

Motu Elevala: Bible for 1 Corinthians, 1 John, 1 Peter, 1 Tesalonika, 1 Timothy, 2 Corinthians, 2 John, 2 Peter, 2 Thessalonians, 2 Timothy, 3 John, Acts, Colossians, Ephesians, Galatians, Hebrews, Iakobo, John, Jude, Luke, Mark, Matthew, Philemon, Philippians, Revelation, Romans, Titus
Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Matthew

1

¹Iesu Keriso, Davida natuna, Aberahamo natuna, ena vara bukana bina. ²Aberahamo na Isa'ako tamana ai vada ela, bona Isa'ako na Iakobo tamana ai vada ela, bona Iakobo na Iuda bona vara-hebouna ida tamadia ai vada ela. ³Iuda na Perese bona Sera tamadia ai vada ela, Tamara bogana amo, bona Perese na Heserona tamana ai vada ela. bona Heserona na Rama tamana ai vada ela. ⁴Rama na Aminadab tamana ai vada ela, bona Aminadab na Nason tamana ai vada ela, bona Nason na Saman tamana ai vada ela. ⁵Saman na Boa tamana ai vada ela, Rahaba bogana amo, bona Boa na Obed tamana ai vada ela, Ruta bogana amo, bona Obed na Iese tamana ai vada ela. ⁶Iese na Davida pavapava tauna tamana ai vada ela, bona Davida na Solomona tamana ai vada ela, Uria adavana bogana amo. ⁷Solomona na Rehoboam tamana ai vada ela, bona Rehoboam na Abia tamana ai vada ela, bona Abia na Asa tamana ai vada ela. ⁸Asa na Iehosafat tamana ai vada ela, bona Iehosafat na Ioram tamana ai vada ela, bona Ioram na Usia tamana ai vada ela. ⁹Usia na Iotam tamana ai vada ela, bona Iotam na Ahasa tamana ai vada ela, bona Ahasa na Hesechia tamana ai vada ela. ¹⁰Hesechia na Manase tamana ai vada ela, bona Manase na Amon tamana ai vada ela, bona Amon na Iosia tamana ai vada ela. ¹¹Iosia na Iekonia bona mai vara hebouna ida tamadia ai vada ela Babulonia e laohaidia negana ai. ¹²Babulonia e laohaidia murinai, Iekonia na Sealtiele tamana ai vada ela, bona Sealtiele na Serubabele tamana ai vada ela. ¹³Serubabele na Abiud tamana ai vada ela, bona Abiud na Eliakam tamana ai vada ela, bona na Eliakam na Asoro tamana ai vada ela. ¹⁴Asoro na Sadok tamana ai vada ela, bona Sadok na Akim tamana ai vada ela, bona Akim na Eliud tamana ai vada ela. ¹⁵Eliud na Eleasara tamana ai vada ela, bona Eleasara na Matan tamana ai vada ela, bona Matan na Iakobo tamana ai vada ela. ¹⁶Iakobo na Iosepa tamana ai vada ela Maria adavana, ia ena amo Iesu e vara, e gwauraia Keriso. ¹⁷Una dainai, uru iboudiai Aberahamo ena amo ema bona Davida be uru gwauta-hani, bona Davida ena amo ema bona Babulonia e laohaidia negana be uru gwauta-hani, bona Babulonia amo e laohaidia negana amo ema bona Keriso be uru gwauta-hani. ¹⁸Iesu Keriso ena vara na ina dala ai e hedinarai. Ia sinana, Maria, na e maohenia Iosepa baine adavaia, to guna idia na do asie tamona, ia na vada e davarua e rogorogo Lauma Helaga ena amo. ¹⁹A Iosepa, ia adavana, na kara maoromaoro tauna bona ia na seura taunimanima vairadia ai ia baine hahemaraia, una dainai e urava baine hahekohoa hehuni-hehuni. ²⁰Lalona unu e hadaia tomava ai, Lohiabada ena aneru ta ese nihi ai e hahedinarai henia, eto, "Iosepa, Davida natuna e, adavamua Maria iabidaena garina basio gari, badina be Lauma Helaga ese mero vada e henia. ²¹Ia na baine mara mero baine abia, ladana ba hatoa IESU; badina be ia ese ena bese taudia edia kara dika amo baine hamauridia. ²²Ini gau iboudiai e vara Lohiabada ese peroveta tauna uduna amo e gwauraia herevana ihamomokanina, eto, ²³A itaia, haneulato ta baine rogorogo natuna baine havaraia mero ta, bona ladana ba hatoa Immanuela"- anina be, "Dirava na ita dekedekedai." ²⁴Bena Iosepa na ena mahuta amo e noga bona Lohiabada ena aneru ese e hagiania hegeregeregenai e karaia bona eabia dae ia adavana. ²⁵A ia na una haneulato na sedibaia ela bona mero e vara. Bena ia ese ladana e hatoa Iesu.

2 ¹Hari Betelehema Iudea ai Iesu e vara murinai Heroda e lohiava negadia ai, Aitaia, aonega taudia be mairiveina kahana amo Ierusalemia ai e ginidae, ²idia na e henanadai eto, "Iudea edia pavapava harihari eme vara be edeseni ai? "Badina be ena hisiu mairiveina kahana ai a itaia, bona itomadiho henina ama." ³To Heroda pavapava tauna ese una hereva e kamonaia neganai, kudouna e hetaha, bona Ierusalemia taudia iboudiai danu. ⁴Bena Heroda ese hahelaga taudia iboudiai bona itorena taudia e haboudia bona e nanadailia eto, "Keriso be edeseni ai baine vara e tomamu?" ⁵Bena idia na e haere eto, "Betelehema Iudea ai, badina be peroveta tauna ese ini e torea toma. ⁶Oi danu, Betelehema e, Iudea tanona lalonai, oi na dia gabe tauna, Iuda lohiadia bogaragidiai, badina be hahekau tauna na oiemu amo bainema Ia ese egu bese Isaraela baine regua. ⁷Bena Heroda ese aonega taudia e boiridia hehuni hisiu ena hedinarai negana e nanadailia goevagoeva. ⁸Bena e siaidia lao Betelehema, eto, "Aola mero maragina ba hatahua goadagoad. Ba davarua negana ai, bame hadibagu, bona lau danu baina vasi toma diho. ⁹Idia na hanua pavapavana erena e kamonaia, bona edia dala amo vada ela, bona aitaia, hari hisiu mairiveina kahana ai e itaia gauna ese e gunalaidia ela bona mero maragina ena noho gabuna daenai e mia. ¹⁰Bena idia na hisiu e itaia negana ai, e moale hisi dae. ¹¹Bena ruma ai e raka vareai bona mero maragina e itaia sinana Maria ida. Bena e goru-goru diho e toma diho henia. Edia kohu e kehodia herahia gaudia e henia, golo bona frankincense, bona myrrh. ¹²To Dirava ese nihi ai e hamaorodia Heroda dekena basie lou lao, una dainai idau dala amo edia hanua e lou henia. ¹³A idia e lou murinai, aitaia, Lohiabada ena aneru ta ese nihi ai Iosepa enai e hedinarai eto, "A toreisi, mero maragina bona sinana ida avabidia, bona ba heau lao Aikupito. Unuseni ai ba noho ela bona ma baina hereva henimu lou, badina be Heroda ese mero maragina e tahuamu baine alaia mase e tomu. ¹⁴Bena una hanuaboina ai, Iosepa e noga mero maragina bona sinana ida eabidia Aikupito ela. ¹⁵Ia na unuseni ai e noho ela bona Heroda e mase. Ina na Lohiabada ese peroveta tauna, uduna amo e gwauraia herevana ihamomokanina eto, "Aikupito amo natugu na boiria." ¹⁶Bena Heroda, na e diba ia na aonega taudia ese vada e koia neganai, bona e badu dikadika. Bena e hesiai bona memero maragidia iboudiai e aladia mase Betelehema ai bona badina hanuadia iboudiai lalodia ai daidia laganidia rua bona henudia urudia, aonega taudia e hamaorolaidia hereva dia korikoridia hegeregeregenai. ¹⁷Bena Ieremia peroveta tauna, dahaka herevalai henia vada e guguru, eto, ¹⁸"Gado ta Rama ai e kamoni, tai lolololo bona ganagana bada, Rahela be natuna taidia e taimu, bona ia na tauhalo e dadaraia badina be idia na lasihidia." ¹⁹Hari Heroda e mase neganai, aitaia, Lohiabada ena aneru ta ese nihi ai Iosepa enai e hedinarai Aikupito ai, ²⁰eto, "A toreisi bona mero maragina bona sinana bona aola Isaraela tanona, badina be mero maragina iala-masena e tahuava taudia na vada e

mase." ²¹Bena Iosepa e tore isi, mero maragina bona sinana e abidia, bona Isaraela tanona vada ela. ²²To ia na e kamonai Akelao ese Iudea e lohia iava tamana Heroda gabunai neganai, ia na e gariva unu bainela. Dirava ese e nihi ta ai e hamaoroa, dainai e raka hanai Galileia tanona kahana ela ²³bona vada ela hanua ta ladana Nazareta ai e nohova. Ina dalai, peroveta taudia edia hereva vada e guguru, Ia na Nazareta tauna bae gwaurai.

3 ¹Unu dinadai Ioane Baptiso na Iudea tano gagaenai e harorova, ²e gwauva, "Ba helalokerehai, badina be guba basileia na vada eme kahira-kahira." ³Badina be ia na peroveta tauna Isaia ese e herevalaia guna, eto,"Gado ta tano gagaena ai e boi lolomu e tomu, 'Lohiabada ena dala ba lailaia, ena laolao dalana ba hamaoromaoroa.'" ⁴Ioane ena dabua na kamela huina bona ena gaba gauna be Boromakau kopina, ana aniani kwadi bona bada ranuna. ⁵Ierusalem, bona Iudea, taudia iboudiai bona Ioridaena Sinavaina hanuadia idoidiai ia dekena ela. ⁶Ia ese e baptisodia Ioridaena Sinavainai, edia dika e gwaurai hedinarai. ⁷A Farisea taudia bona Sadukea taudia diagau baptiso totona ela, e itadia, bona e gwau henidia eto, gaigai natudia e, daika ese e hamaoromui do baine vara baduna na bae heautania? ⁸Una dainai helalokerehai anina do ba hahedinarai. ⁹Sibomui lalomui ai basioto, 'Ai tamamai na Aberahamo.' Badina be na hamaoromuimu Dirava na ini nadi amo natuna bema havaradia Aberahamo ena. ¹⁰Harihari ira na au badidiai e atoamu. Huahua namodia asie dobimu au dia iboudiai be utumu bona lahi ai be taho kaumu. ¹¹Lau be ranu amo na baptisomuimu helalokerehai toana. A lau murigu amo be maimu tauna na ena siahu ese lau egu e hereaiamu, lau na dia namo ena tamaka baine abi loaloa. Ia ese Lauma Helaga bona lahi amo baine baptisomui. ¹²Ena itapo na imanai, ena wit ikwadina gabuna baine tapoa goevagoeva, bona ena wit na roge ai baine haboua. A momona be se bodomu lahina ai baine dou vaitani. ¹³Una neganai Iesu na Galileia amo Ioridaena Sinavaina ela, Ioane dekena, baine baptisoa dainai. ¹⁴A Ioane ese e gwaua tao, eto, Lau dekegu oma a? ¹⁵A Iesu ese e haere henia eto, "Mani boma karaia, badina be kara maoromaoro iboudiai baita haguguru hari namo." Bena Ioane ese ena ura e karaia. ¹⁶Iesu e baptisoa murinai, bona ranu amo e dae kau neganai ai guba e parara. Ia ese Dirava ena Lauma e itaia pune na heto e diho ia tubuana ai e kau. ¹⁷Bena gado ta guba amo e boi dobi eto, "Lau natugu binai egu lalokau. Lau ese ia na lalo-namo heniamu." Translation by: RDKH. Ori. C. Kohu completed and entered into IPAD on the 10

4

¹Bena Iesu na Lauma ese tano gagaena e hakaua lao diabolose baine dibagania totona, ²ia na dina hariahui bona boi hariahui, e anivaga murinai bona ia na e hitolo mase. ³Bena hedibagani laumana na ia dekena ela bona e hamaoroa eto, "bema oi na Dirava Natuna, ini nadi na a haganidia parao ai baela." ⁴A Iesu ese e haere henia bona eto, "vada e torea, "taunimanima na dia parao ai mo bae mauri, a Dirava udu amo e lasimu herevadia iboudiai amo danu." ⁵Bena diabolose hanua helagana e hakaua lao bona Dubu helaga kogenai e haginai kau, ⁶bona e hamaoroa eto, "bema oi na Dirava Natuna, sibomu a roho dobi, badina be vada e torea, ia ese ena aneru baine haganidia oi bae regumu, "bona, "idia imadia ai bae abimu isi, unu amo oi aemu nadi ai na basio tutuhia." ⁷Iesu ese ma e haere henia eto, "vada e torea danu "Oi ese Lohiabada emu Dirava na basio dibagania." ⁸Ma, diabolose e hakaua dara ororo badahereana dorina ai bona tanobada basileiadia idoidiai mai hairaidia ida e haheitalaia. ⁹Ia ese e hamaoroa eto, "ini gau iboudiai lau ese oi baina henimu, bema oi ba goru diho bona lau ba tomadiho henigu." ¹⁰Bena Iesu ese ma e haere henia eto, "Satana! ini amo, dauha aola, badina be vada e torea, "oi na Lohiabada emu Dirava ba tomadiho henia bona ia mo sibona isiaina ba lao heni." ¹¹Bena diabolose e rakatania bona aneru haida ia dekena ela, ia isina e lao heni. ¹²Una neganai Iesu na e kamonai Ioane na e dabaia tao, bona ia na e lou lao Galileia ela. ¹³Ia na Nasareta e rakatania bona ela Kaperanauma ai eha noho, una na Galileia davarana, badina hanuadia Sebulonia bona Napatali tanodia ai. ¹⁴Unu amo Isaia peroveta tauna ena hereva vada e momokani eto, ¹⁵"Sebulonia tanona bona Naptali tanona, davara dalana, Ioridaena sinavaina, bese idau idau edia Galileia bunai! ¹⁶Dibura lalonai e helaiva taudia na diari badana vada e itaia, bona e laomu unu daidia, kahanai e helai bona mase diburana, latadiai, diari vada e ta ta dae roha." ¹⁷Una nega amo Iesu na e haroro matama bona eto, "A helalokerehai, badina be guba basileiana vada eme kahirakahira." ¹⁸Ia na Galileia davarana konena ai e rakava ai, tadikaka rarua Simona e nemaia Petero, bona tadina Andrea, e itadia, reke davara ai etore, badina be idia na haoda taudia. ¹⁹Iesu ese e hereva henidia eto, "Aoma, murigu ai ame raka, bona lau ese taunimanima ihaoda henidia taumui ai baina halaomui." ²⁰Una horanai idia na reke e rakatania bona ia murinai e raka. ²¹Iesu na unu amo e raka laova ai tadikaka rarua ma e itadia, Iakobo Sebedeo ida edia reke e laumeva. Ia ese e boi henidia, ²²bona una horanai idia ese vanagi bona tamadia e rakatania bona ia murinai e raka. ²³Bena Iesu na ela Galileia idoinai eha loaia, edia Dubu lalodiai e hahedibava, bona basileia sivaraina namona e harorolaiava, bona tanimanima edia gorere bona hisihisi idaidau amo e hamauridiava. ²⁴Una dainai ia harina Suria tanona idoinai e hapiua bona tanumanima ese gorere taudia iboudiai na ia dekena e laohaidia gorere idau idau bona hisi idau idau bona lauma dikadia ese e bolodia kava bona tororo-tororo bona pada taudia Iesu ese e hanamodia. ²⁵Hutuma bada herea ia murinai e raka Galileia amo, bona hanua gwauta amo, bona Ierusalem amo, bona Iudea amo, bona Ioridaena sinavaina unu kahana amo. Translated by: RDK. Lohia Kohu. Competed on Monday 16th January, 2023. Entered into IPAD on Sunday 26th February, 2023, ready for quality check.

5

¹Iesu ese hutuma e itadia, (negana ai) ororo ai e dara dae. E helai diho (murinai), bona ena hahediba na ia dekena ela.

²Bena uduna amo e hamaorodia matama, eto. (Ia ese e hereva henidia bona e hadibadia, eto. ³"Manau (ogogami) taudia

(lauma lalonai) be nanamo, badina be guba basileia na idia edia. ⁴Taitai taudia be nanamo, badina taudia bae halodia. ⁵Manada taudia danu nanamo, badina be idia ese tanobada bae abia. ⁶Kara maoromaoro hitolo na e hitolomu bona ranu-masena e ranu-masemu taudia be nanamo, badina be bogadia bae kunu. ⁷Hebogahisi taudia danu nanamo, badina be idia danu do bae bogadia hisi. ⁸Lalo goeva-goeva taudia na nanamo, badina be idia ese Dirava ba itaia. ⁹Herohemaino taudia be nanamo, badina idia na Dirava natuna bae gwauraidia. ¹⁰Kara maoromaoro daidiai e dagedage henidia taudia be nanamo, badina guba basileiana na idia edia. ¹¹Lau daigu ai be uduguiraimui, bae dagedage henimui bae gwau dika henimui koikoi negana ai na do ba namo. ¹²Ba moale bona ba hisidae, badina guba ai davamui baine bada e gunalaimui taudia bona peroveta taudia na unu e dagedage henidia tomava. ¹³Umui na tanobada damenana damena na basinema tadika dahaka ese bema hatadikaia. Asi ena namo vada bae negea taunimanima ese bae moimoi laia. ¹⁴Umui na tanobada diarina, ororo dorina ai e karaia hanuana basine hehuni diba. ¹⁵Lamepa ba-haraia neganai maua henunai basio atoa. A lamepa gabuna korikori ai bae atoa kau. Ruma taudia edia diari ai bainela. ¹⁶Umui danu emui diarina taunimanima vairadia ai unu ba hahedinaraia toma bena emui kara namodia ba-ita bona tamamui gubai ai e nohomu na ba-heatolaia. ¹⁷Lalomui na basieto launa taravatu bona peroveta herevadia ihadikadia nama dia ihadikadia to ihagugurudia dainaia nama. ¹⁸Badina be na hamaoromui, momokanimu guba bona tanobada bae ore, taravatu ena revareva, eiava ena koma ta basine boio, ela bona anina idoinai baine vara. ¹⁹Badina be tau ta ese taravatu maragi-maragina ta baine hamakohia ia na guba basileiana lalonai gabe tauna bae gwaurai. ²⁰Na hamaoromuimu, emui kara maoromaoro ese itorena taudia bona Farisea taudia edia basine hereaia umui na guba basileiana lalonai basio raka vareai lasi ona lasi vaitanai. ²¹Vada o kamoni, guna taudia e hamaorodia eto basio ala-ala bona ala-ala tauna na do bae hahemoro henia. ²²A lau ese na hamaoromuimu tadikakana baine badu henia tauna na do bae hahemaoro henia bona tadikakana baine kirikiri laia tauna na kansol taudia vairadia bae laohaia, bona ia na kava tauna ai baine gwaurai tauna na gehena lahina ai bainela. ²³Una dainai, emu boubou gauna pata helagana ai bavatoa negana ai na bahelaloune takikakamu enai mai emu kerere. ²⁴Emu boubou gauna pata helagana vairanai ba rakatania baola tadikakamu ida baherohemaino guna, gabe amo ba lou lao emu boubou gauna pata helagana latana ai bavatoa. ²⁵Oi e hadikamu tauna ida bae herohemaino haraga hahemaoro dalana ai doini o rakamu negana ai e hadikamu tauna ese ahemaoro tauna imana ai baine atomu na garina. Hahemaoro tauna ese dibura ruma inarina tauna imana ai baine atomu na garina, dibura ruma inarina tauna ese dibura rumana lalonai baine koumu na garina. ²⁶Na hamaoromu momokanimu unu amo basio raka lasi ela bona davana bahagugurua lao. ²⁷Vada o kamoni, guna taudia e hamaorodia eto basio heuda hanai. ²⁸Na hamoromuimu, tau ta ese ahine ta baine raraia bona baine gahusia ia lalonai na heuda hanai mia. ²⁹Matamu idibana ese baine hahekwakwanaimu na ba giboa lasi, ba negea badina be taumu regena ta baine boio be namo, a taumu idoinai lahi ai bae tahoa dobi na dika. ³⁰Eiava imamu idibana ese baine hahekwakwanaimu, na ba utua oho, ba negea badina be taumu regena ta baine boio be namo, a taumu idoinai lahi ai bae tahoa dobi na dika. ³¹E hamaorodia danu eto, adavana baine hadiho tauna ese hahediho revareva na baine henia. ³²A lau ese na hamaoromuimu, tau ta adavana dia heuda hanai hahinena to baine hadiho, ia ese heuda hanai hahinena ai baine halaoa, bona una hahine ma baine adavaia tauna na heuda hanai tauna. ³³Vada o kamoni, guna taudia e hamaorodia eto, basio gwauhamata koikoi, a emu gwauhamata Lohiabada enai ha hamomokanai. ³⁴A lau ese na hamaoromuimu, basio gwauhamata lasi ona lasi vaitanai, dia guba ladanai, badina be ia na Dirava ena terona. ³⁵Dia tanobada ladanai badina ia na aena edia moi-tao gauna, dia Ierusema ladana ai badina ia na pavapava hereana ena hanua. ³⁶Oi kwaramu basio gwauhamata laia badina huimu tamona ihakurokura eiava ihakoremana na asi dibamu. ³⁷Badina be em hereva ba gwaurai, oibe-oiba bona lasi-lasi, ini e herevamu herevana na tau dikana ena amo. ³⁸Vada o kamoni e hamaorodia eto, mata davana vada mat, ise davana vada ise. ³⁹A lau ese na hamaoromuimu, dika tauna basio gwaua tao ia ese medemu idibana baine pataia, laurina danu ba henia. ⁴⁰Tau ta ese baine hahemaoro henimu emu dabua iabina dainai emu rami danu ba henia. ⁴¹Eiava tau ta ese baine haganimu kilomita ta ba raka, kilomita iharuana danu ia ida ba raka hebou. ⁴²Noinoi tauna na ba henia bona emui ai baine abi-torehai e tomu tauna na basio lulua. ⁴³Vada o kamoni e hamaorodia eto, dekemui tauna ba lalokau henia e inaimu ba inai henia. ⁴⁴A lau ese na hamaoromuimu, inaimui ba lalokau henidia, bona bae dagedage henimui taudia daidiai ba guriguri. ⁴⁵Unu amo tamaui guba ai e nohomu na natuna ai baola, badina be ia ese ena dina na kara dika taudia bona kara namo taudia latadiai e hatataia dae rohamu, medu danu kara maoromaoro taudia bona kara kerere taudia latadia ai e hadihoamu. ⁴⁶Una dainai e lalokau henimuimu taudia mo ba lalokau henidia, davamui be dahaka bavabia? Tax gogo taudia na unu asie kara tomava a? ⁴⁷Bona tadikakamui mo ba hanamodia, emui namo be dahaka? Idau bese taudia na, unu asie kara tomava a? ⁴⁸Badina umui na ba goevadae, tamamui guba ai e nohomu na e goeva daemu na heto. Translation done by: Dk. Karoho Kila, completed on Sunday (16/04/23), time: 10.30 pm.

6

¹Nahuamui ba toho emui kara maoro-maoro taunimanima vairadiai basio kara, bae itamui helaoreana. Unu ba kara toma to asi davamui Tamamui Guba ai e nohomu ena mo. ²Badina be harihari gaudia ba heni negana ai na vairamu ai kibi basio hiriria, koikoi taudia ese dubu ai bona ariarai e karamu na heto. Taunimanima ese bae heatolaidia helaoreana. Na hamaoromui momokanimu, davadia vada eabi. ³A harihari gaudia ba heni neganai na imamu laurina ese idibana ena kara basine diba. ⁴Badina be emu harihari baine hehuni, bona Tamamui na gau hehunidia e itamu davana baine henimu. ⁵Ba guriguri negadia ai, koikoi taudia basio toho-tohodia, badina be idia na e uramu dubu ai bona ariara daigunidia ai ginidia ai bae gurigri. Taunimanima ese bae itadia totona na hamaoromui momokanimu, davadia vada e abi. ⁶A oina ba

guriguri negana ai na emu daiutu lalonai ba raka vareai iduarana ba koua ahū, Tamamu na gabu hehunina ai ba noinoi henia bena Tamamu na gabu hehunidia e itamu, davana baine henimu. ⁷Ba guriguri negadia ai basio gwau lou-gwau lou bese idaudia na heheto badina be idia na e tomamu edia hereva momo daidiai baine kamonaiaia. ⁸Idia ida basio hegeregere, badina be Tamamui na dibana dahaka gau dahaka gau ai o dabumu, do asio noinoi heniamu negadia ai. ⁹Badina be, ini ba guriguri toma: Tamamai e, guba ai o nohomu, oi ladamu baia hahelagaia, ¹⁰Emu basileia bainema. Emu ura tanobada ai baia karaguba ai e karamu na heto. ¹¹Hari dina ai amai bame henimai. ¹²Emai dika ba gwau tao, ai ese eha-dikamaimu edia dika a gwau taomu na heto. ¹³Hedibagani ai basio hakaumai vareai, a dika amo ba hamaurimai. ¹⁴Badina be umui ese taunimanima edia dika ba gwau tao. Tamamui guba ai e nohomu ese emui dika baine gwau tao. ¹⁵A umui ese taunimanima edia dika basio gwau tao, Tamamui ese emui dika basine gwau tao. ¹⁶Bavani vaga negadia ai basio vaira hua, kokoi taudia hegeregere dia badina be vairadia e hadikamu edia anivaga toadia na taunimanima ese bae ita e tomamu. Na hamaoromui momokanimu, davadia na vada eabi. ¹⁷A oina bavani vaga negadiai na kwaramu ba horoa, vairmu danu ba huria. ¹⁸Bena taunimanima na basie diba oi anivagamu, a tamamui na gabu hehunidia ai baine diba, bena tamau na gabu hehunina e itaiamu, davana baine henimu. ¹⁹Emui kohu na ina tanobada ai basio habou, iniseni ai pitopito bona hogoghogo ese e ani oremu, iniseni ai danu henao taudia ese ruma e dareamu. ²⁰A emui kohu na guba ai ba habou, unusenai pitopito bona hogohogo ese asie ani oremu, iniseni ai, danu henao taudia ese ruma asie daremu, asie henaomu. ²¹Badina be emui kohu e miamu gabuna ai, lalomui danu unusenai mia. ²²Tau-anina ena lamepa na mata, una dainai, matamu baine namo, taumu anina idoinai baine diarai. ²³A matamu baine dika, taumu anina idoinai baine dibura, una dainai, diari na oi lalomui ai baine dibura, hari dibura na dahaka bada. ²⁴Asi tauna ta ese biagu rarua isiaidia baine lao heni diba, badina be ta baine inai henia. Ta be baine lalokau henia: eiava ta baine badinaia ta be baine dadaraia. Dirava bona taga isiaidia basio lao heni diba. ²⁵Una dainai na hamaoromuimu. Lalomui na basie hekwarahi dahaka bavania, eiava dahaka ba inua eiava dahaka ba hahedokilaia. Mauri ese aniani se hereaiamu a? Tau-anina ese dabua se hereiamu. ²⁶Atai manudia idia na asie hadohadomu, asie taboromu. Roge ai asie haboumu a Tamamui Guba ai e nohomu ese e ubudiamu. Umui ese idia asio hereaiamu a? ²⁷Umui daika ena lalo-hekwarahi amo tauna anina sisina taina mo baine halataia diba? ²⁸Bona lalomui basie hekwarahi dabua daidiai tano heraheradia ba haero. Ede e vara tomamu: asie gaukaramu bona asie hatu-hatumu. ²⁹A lau ese na hamaoromuimu. Solomon mai hairaina idoinai ena namo na idia ida asie hegeregere. ³⁰Benaini, tano avadia, harihari mimia, kerukeru lahi ai bae taho kau. To Dirava ese unu eha-hadabualai tomamu be. Ia ese umui danu basine hadabua laimui a? Abidadama maragi-maragi taumui. ³¹Badina bunai, lalomui basie hekwarahi: basioto "Dahaka baia ania?" eiava "Dahaka baia inua? eiava dahaka baia hahedokilaia?" ³²Bese idau-idau taudia ese unu gau iboudiai e tahumu. A tamamui guba ai e nohomu na mai dibana o dabumu gaudia iboudiai bunu. ³³A umui be iena basileia bona ena kara maoro-maoro ba tahu guna. Bena unu gau iboudiai danu ma baine henimu. ³⁴Lalomui basie hekwarahi kerukeru dainai: kerukeru na sibona baine henari. Dina ta ena dika vada davana iena. Translation done and completed by Dkh. Konio Kila on 21/06/23, time: 15:37

7

¹Basio hahemaoro, badina be oi danu basie hahemoro henimu. ²Ena be emui hahemaoro hegeregere ai, oi danu bae hahemaoro henimu, bona emui hahegeregere ai oi danu unu bae hahegeregere mu toma. ³Dahaka dainai au tahana maragina oi tadikakamu matana ai oi itaiamu, A oi sodibamu matamu ai be au badana ta? ⁴A ede bamonai tadikakamu unu o hamaoroa tomamu, mani lau ese au tahana maragina matamu amo ai na kokia oho, to ba helalotau au tahana badana na oi matamui ai? ⁵Oina koikoi taumu! A giniguna na oi matamu amo au tahana badana a kokia oho, bena unu amo oi tadikakamu matana ai au tahana maragina baitaia namonamo. ⁶Helaga gaudia ta sisia basio henia, bona emu ageva na basio negedia boroma vairadiai, hari be idia ese bae moimoi laidia aedia amo bena ba hegiro bae daremu sisi na garina. ⁷Ba noia, baine henimu, ba tahua, bena ba davaria, ba pidipidi, bena baine keho henimu. ⁸Badina be e noinoimu taudia iboudiai ese na e davariamui bona e tahuamu tauna ese na e davariamui, bona e pidipidimu tauna enai baine hekeho. ⁹Unu be ede dia tatau umui padamui ai, unu be daidia natudia parao bema noi, to umui ese nadi boma henidia? ¹⁰A ena be gwarume bema noi, ia ese gaigai bema henia? ¹¹Una dainai, bema umui na o dikamu o uramu natumui na gau namodia boma henidia, dahaka gau namodia ouramu tamamui guba ai e nohomu ese bema henimui boma noinoi henia nega? ¹²Ini gau iboudiai, una dainai, ena be oi na taunimanima e uramu gaudia boudiai boma kara henidia taravatu bona peroveta, ¹³ikoukou hekahi na ai ba raka vareai, badina be dala lababana bada bona oi baine hakaumu mase gabunai, bona taunimanima momona unu amo e laomu. ¹⁴Badina be dala na hekahi-hekahi bona mauri dalana mai hisihisina, bona gadoi ese una gabu ai e vareaimu. ¹⁵Nahuamui ba toho peroveta koikoina garidia, A idia na mamoe na heto, to lalodia na uda sisia dia na heto, ¹⁶A idia huahua dia ai bodibadiamu, taunimanima ese vine na ava ginigini dia asia heboudiamu eiava suke ida, unu bamonai? ¹⁷Una hegeregere ai au huahua iboudiai anidia namodia e havaramu, to au huahua iboudiai anidia dikadia e varamu. ¹⁸A huahua namodia ese anidia dikadia se havaramu. ¹⁹A huahua iboudiai anidia namodia se havaramu gaudia na ba utudia bae moru bena bae tahodia vareai lahi lalonai. ²⁰Bena ini, oi ese bodibadiamu anidia amo. ²¹Dia iboudiai ese ba hereva henigu baeto, 'Lohiabada e, Lohiabada e,' taudia sibodia guba basileiai bae raka vareai, to tamagu guba ai e nohomu sibodia ena ura e karamu taudia mo. ²²Taunimanima momo ese una dinai ba hereva henigu baeto, Lohiabada e, Lohiabada e, oi ladamu ai asia peroveta, bona oi ladamu ai lauma dikadia asia luludia, bona oi ladamu ai gau namodia asia karadia a? ²³Bena lau ese baina gwauraida hedinarai, launa asi dibagu umui! dekegu amo a heita, umui na kara dika o hahedinaraiava! ²⁴Una dainai, egu hereva e kamonaimu bona e

badina dia taudia iboudiai na aonega tauna na heto ena ruma na nadi latanai e haginia. ²⁵Medu e diho bona abata ema bona lai etoa, bona una ruma e hodoa, to una ruma na se moru, badina ia na nadi latanai e haginia. ²⁶To egu hereva binai e kamonaumu to karana se karaianu taunimanima dia iboudia ai na kavakava tauna na heto ena ruma na mirimiri latanai e haginia. ²⁷Medu e diho, bona abata ema bona lai danu etoa bona una ruma eudea, bena e moru e hegigi rohoroho. ²⁸Iesu na ena hereva e hadokoa, e hegogo taudia ese ena hahediba herevadia e hoa lai. ²⁹Bena ia ese e hamaorodia mai siahuna ida, bona dia itorena taudia hegeregereidia. Translation done by Ek. Geua Kohu, completed on 30th September, 2022; time: 8.30 pm. Entered into IPAD on the 30th December, 2022, ready for quality checking.

8

¹Badina Iesu na ororo amo e hekei, bena hutuma bada na ia murinai e raka. ²Bena Lepera tauna ta ia dekena ela, e toma diho, eto, Lohiabada e, boma ura boma hagoevagu. ³Iesu imana e toia roro, enai e daukau, eto, Lau na uramu agoeva, bena ; lepera tauna vada e goeva ⁴Iesu ese e hamaoroa, eto, tau ta basio hamaoroa, aola hahelaga tauna ese baine itamu bona hahenamo gauna Mose ese e gwauraia hegeregereia na ba henia taunimanima ihadibadibadia. ⁵Iesu na Kaperanaum ai e raka vareai. Bena tuari lohiana ta ia dekena ela e noia. ⁶Hereva eto Lohiabada e egu hesiai merona na ruma ai e hekuremu, ia na e padaia, bona tauna eme hisihsi bada. ⁷Iesu ese e hamaora, eto baina vasi, bona baina hamauria. ⁸A tuari Lohianada e hereva, eto Lohiabada e lau na dia namo be egu ruma ai basio dae kau. Mani a hereva mo, bena egu hesiai merona na aine mauri. ⁹Badina be lau danu haida henudiai, a tuari taudia na lau henigu ai ta baine hamaoroa bainato "Aola," bena bainela ma ta baine hamaoroa, baineto "ina na a karaia, bena bame karaia. ¹⁰Iesu ese una hereva e kamonaia, bena e hoa dikadika; bena ia murinai e raka taudia e hamaorodia, eto Na hamaorumui momokani, abidadama ini hetomana Isaraelaai asine davarua, lasi ona lasi vaitani. ¹¹Na hamaorumuimu danu, hutuma na dina dae amo bona dina diho amo baema, Abraham bona Isa'ako bona Iakobo ida bae ege diho, guba basileia na lalonai. ¹²A basielia mauridia korikoridia na murimuri diburana ai bae doridia lasi unuseni ai bae tai gadigadidia bae hahedai. ¹³Bena Iesu ese tuari lohiana e hamaoroa, eto Aola, emu abidadama hegeregereia bavabia, hesiai merona na una hora lalonai vada e mauri. ¹⁴Iesu na Petero ena ruma ai e dae kau unuseni ai Petero ravana hahinena e davarua tauna e siahua, e hekure. ¹⁵Imana ai e daukau, bena tauna siahuna e doko bena hahine na e toreisi, ia isiaina e lao henia. ¹⁶Adorahi ai, hutuma lauma dikadia ese e bolodia taudia, na ia dekena e hakaudia lao. Bena ena hereva amo ia ese hari lauma dikadia e luludia lasi, boan gorere idau-idau taudia iboudiai danu e hamauridia. ¹⁷Unu amo, Isaia, peroveta tauna, ese e gwauraia herevana vada e momokani, eto Ia ese edia manoka-manoka e abi isi bona edia gorere e hua haidia. ¹⁸Iesu ese aru taudia e itadia e gini hegiro bena e hahedua, gohu kahana ai bae hanai eto. ¹⁹Bena itorena tauna ta e raka lao, e hereva henia eto hahediba taumu e, emu laolao iboudiai baina bamomu. ²⁰Iesu na e haere, eto, uda sisiadia na mai edia kohua, bona atai manudia na mai edia ruma a taunimanima natuna na asie ena hekwina gabuna. ²¹Ena hahediba ta ese danu e hereva henia eto Lohiabada e, mani emu kara tamagu do baina hereva henia guna. ²²Iesu eto murigu ai a raka, mase taudia ese edia mase bae guridia. ²³Ia na vanagi auta ai e gui, bona ena hahediba ese e gavaia. ²⁴Gohu amo guba dikadika badana ta e kau, bena hurehure ese vanagi e habubunia, a ia na vanagi murinai mahuta. ²⁵Bena idia, e haoa, eto Lohiabada e ame hamaurimai iboudai baita masemu. ²⁶Ia ese e gwau henidia eto abidadama maragi-maragi taumui e, dahaka dainai o garimu? Bena e toreisi, lai bona hurehure e gwau tao; bena e vea vaitani. ²⁷Bena idia na e hoa, eto ina lai bona hurehure na erena e kamonaumu tauna be daika. ²⁸Unukahai idia na Gadarene tanona ai e hakau, bena lauma dikadia ese e boloa taudia rarua na ia ida e hedavari idia na gara gabudia amo e lasi. Bona e dagedage bada, una dainai taunimanima na una dala amo basie hanai diba. ²⁹Idia raruosi na e lolo, eto Dirava Natuna e dahaka gau emai ai bo karamu? Emai nega be dounu, ihahisimai vada oma a? ³⁰Una gabu ai, a taina dauhai, boroma serina badana ta e nuanuava. ³¹Bena lauma dikadia ese e noia eto boma lulumai, boma siaimai boroma lalodiai. ³²Bena ia ese e hamaorodia eto. Aola una dainai, idia na e lasi boroma lalodiai e vareai, bena seri idoinai na hagahaga amo e hekei gohu ai unuseni ai e maloa bou. ³³Boroma taudia sivaraidia idoinai e gwauraia hedinarai. ³⁴Una dainai hanua taudia iboudiai e aru ela, Iesu ida e hedavari, e itaia, bena e noia, edia tano amo baine raka oho eto. Translation done and completed by Ek. Davai Heni Lohia on Saturday (20/05/23), time : 7.30 am

9

¹Bena Iesu na vanagi ai e gui e hanai ena hanua badana ai. ²Bena pada tauna ta na ia dekena e laohaia geda ai e kurea, Iesu ese idia edia abidadama e itaia neganai, ia ese pada tauna e hamaoroa eto, "Natugu e, na hagoadamumu, emu dika vada eme hegwaoutao." ³Bena Itorena taudia haida na sibodia e hereva-heheni eto, Ina tau na Dirava eha dikaianu." ⁴A Iesu ese idia lalodia na vada e dibaia bena e hamaorodia eto, "Emui lalohadai dikadia kudoumu ai o haeromu badina be dahaka a?" ⁵Benaini ede na be haraga do baoto, "emu dika na eme hegwaoutao" eiava "a toreisi a raka a?" ⁶A umui ihadibamui dainai Taunimanima Natuna na mai siahuna kara dika baine gwaoutao ina tanobadai,"... bena ia ese hari pada tauna e hereva henia eto, "A toreisi emu geda a lokua, aola emu ruma." ⁷Bena una tau na e toreisi bona e raka oho ena ruma ela. ⁸Taunimanima hutuma ese ina kara e itaia neganai, idia na e hoa bona Dirava e imodaia, ia ese siahua unu hetomana na taunimanima e henidia dainai. ⁹Iesu na e raka hanaiva lalonai ia ese tauta e itaia tax gogo rumanai helai. Ia ese e hamaoroa eto, "Murigu ai ame raka." Bena ia na e toreisi bona Iesu murinai e raka. ¹⁰Iesu na ruma ta lalonai e helai baine aniani tax gogo taudia momo bona kara dika taudia danu ema e aniani hebou, Iesu bona ena hahediba memerodia ida. ¹¹Farasea taudia ese e itadia neganai ena hahediba memerodia e nanadaidia eto, "Dahaka dainai emui hahediba

tauna na tax gogo taudia bona kara dika taudia ida e anianimu, a?¹²Iesu ese e kamonaia neganai e hereva eto, "Tauanidia mai goadadia taudia na muramura tauna se tahuamu a gorere taudia ese e tahuamu. ¹³A umui na baola ina hereva anina ba dibaia, "Lau na hebogahisi na ura bada heniamu a dia iha-boulaina gaudia. Badina lau nama na dia kara maoromaoro taudia iboiridia a kara dika taudia iboiridia¹⁴Bena Ioane ena hahediba memero na ia dekena ela e nanadaia eto, "Dahaka dainai ai bona Farasea taudia na nega momo ai anivagamu a oi emu hahediba memerodia be lasi, a? ¹⁵Iesu ese e haere henidia eto, "Headava imai henina taudia lalodia na bae taitai badina headava matamata tauna na dounu idia dekediai, ani? A dinadia na e maimu, hari headava matamata tauna na idia edia amo bae abia oho neganai idia na do bae anivaga. ¹⁶Tau ta ese dabua matamata seana na dabua gunanai basine bania hebou, badina e bania hebou gabuna amo ma baine hedare neganai una dabua na baine hedare badaherea. ¹⁷Eiava taunimanima ese vine matamatana na vine pusena gunana basie seia dobi, badina puse gunana baine hedare neganai vine matamatana na baine hebubu ore bona vine pusena gunana do bae hadikaia. A una gabunai vine matamatana na vine pusena matamatana ba seia ibalahenina dainai. ¹⁸Ia na unu e hamaorodiava lalonai, tau lohiana ta na eme bona vairanai e goru diho, bona eto, "Lau natugu kekenina na vada eme mase, do aoma imamu na latanai ba daukau bona do baine mauri." ¹⁹Bena Iesu na e toreisi ia murina amo ela ena hahediba memerodia danu. ²⁰Hahine ta lagani gwauta-rua vada e hisihisi rara moru gorere amo ema Iesu murinai bona ena dabua dorinai e dauatoho. ²¹Badina ia na sibona vada e hereva eto, "Bema dabuana ai mo do baina daukau lau na ba namo gugurumu. ²²A Iesu na e hegiro una hahine e itaia bona eto, "Natugu e, ba goada, emu abidadama dainai vada ome namo." Bena una hahine e hanamoa guguru una hora ai. ²³Iesu na ema una lohia tauna ena ruma neganai ia ese ivilikou e botaia taudia bona aru taudia e helogo-helogova e itadia, ²⁴ia eto, "O raka oho, badina ina kekeni na dia mase, ia na mahuta, to idia ese e kirikiri laia mai hegwau henidia ida. ²⁵Aru taudia naruma amo eha rakadia lasi neganai, ia na ruma lalonai e raka vareai bona kekeni imana ai e abi bona kekeni na e toreisi. ²⁶Ina kara sivaraina na e pere rohoroho una gabu idoinai. ²⁷Iesu na una gabu amo e raka hanaiva mata kepulu taudia raru danu ia murinai e raka. Idia na dounu e boi lolo-lolova e tomava. "Davida Natuna e a bogamai hisi. ²⁸Iesu na ruma lalonai e raka vareai neganai mata kepulu taudia raruosi na ia dekena ema, Iesu ese e hamaorodia eto, "Umui ese oha momokanigumu lau ese ini kara na baina kara diba a?" Idia ese e hamaoroa eto, "Oibe, Lohiabada." ²⁹Bena Iesu ese matadai e daukau eto, "Ini danu emui ai baine vara emui abidadama daidiai," ³⁰bona raruosi matadia e papa, bona Iesu ese e gwau auka henidia, eto, "Aitaia, ini gau na ta basio hadibaia. ³¹To ini tatau raruosi na e lasi bona ina kara sivaraina na eha-perea rohoroho gabu idoinai. ³²Ini tatau raruosi e raka oho murinai, lauma dika ta ese e rohea mu tauna ta na Iesu dekena e laohaia. ³³Lauma dika na una mu tauna ena amo e lulua lasi neganai, hari tau vada e herevava. Aru taudia na e hoa bada bona eto, "Ina na guna Isaraelai kara ini hetomadia ta asi aitaia." ³⁴To Farasia taudia na e tomava, "Ina na lauma dikadia lohiadia edia amo ia ese lauma dikadia e luludia lasimu." ³⁵Iesu na hanua badadia bona maragidia iboudiai ela ia na dounu synagogue lalodiai e hahedibava bona basileia sivarai namona e harorolaiava bona gorere badadia bona maragidia iboudiai e hanamodia guguruva. ³⁶Ia na taunimanima hutuma e itadia neganai e bogadia-hisi badina be asi ihakaudia bona e manoka e kara mamoe asi iregudia tauna na heheto. ³⁷Bena ia ese ena hahediba memerodia e hereva henidia eto, "Taboro negana vada eme hegaegae to igau karalaina taudia na dia momo. ³⁸Una dainai taboro Lohiabada na ba noia bona ia ese taboro igaukaralaina taudia haida ma baine siaidia. Translation done by: Ret/Dk. Lohia Gari on Wednesday (16/08/23), time: 6.34 am. Ready for quality checking.

10

¹Iesu ese ena hahediba gwauta raruosi e boiridia hegogo bona siahua e henidia lauma dikadia bae luludia lasi, bona gorere iboudiai bona hisihisi iboudiai bae hanamodia. ²Hari Apostolo gwaut-ruaosi ladadia bini. Ginigunana be Simona (Iesu ese ladana e hatoa Petero), bona ia tadina Anderea; Iakobo Sebedeo natuna, bona Ioane ia tadina; ³Filipo bona Batelomea; Toma, bona Mataio tax gogo tauna; Iakobo Alefeo natuna, bona Tadeo; ⁴Simona Selote, bona Iuda Isakariota, a ia be Iesu taona itorena tauna. ⁵Ini gwauta-ruaosi Iesu ese e siaidia lasi. Ia ese e haganidia, e hereva eto bese idauida edia dala ai basio raka, bona Samaria edia hanua ta ai basio raka vareai. ⁶A aola Isaraela e boio mamoe dia edia ruma; ⁷bona baola, ba haroro bona baoto guba basileia na vada eme kahira-kahira. ⁸Gorere ba hanamo, mase ba hatoredia, lepera ba hagogevadia, bona lauma dikadia ba luludia lasi. Vada o abi doa, ba heni doa. ⁹Emui vaina lalodia ai golo, siliva, eiava kopa basio uda. ¹⁰Emu lao ai laolao baegenas basio abia, eiava ahedoki rua, eiava sandal, eiava gau haida, a gaukara tauna bema mai heinaruna be namo. ¹¹Bema hanua badadia eiava maragidia ai ba raka vareai, taunimanima namona ta ba tahua, bona unuseni ai ba noho ela bona una gabu ba rakatania. ¹²Bema ruma ta ai ba vareai, ba hanamoa. ¹³Bae namo neganai ruma ai ba vareai, emu maino na baine kau ediai, to bema una na dia namo neganai, emu maino na ediai basine mia. ¹⁴A daika be oi eabimu dae eiava emu hereva e kamona, bona emu raka oho una ruma amo eiava una hanua amo, aemu kahuna ba ude-udea. ¹⁵La ese oi na hamaoromu momokanimu, hahemaoro dinana ai una tano na baine dika Sodom bona Gomora hanua na baine dika herea. ¹⁶A itaia, lau ese oi na siaimu lasimu mamoe na heto uda sisiadia bogaragidiai, ba heaonega gaigai na heto bona ba manada pune na heto. ¹⁷A taunimanima nahuadia ba toho! Badina be idia ese kansolo vairadiai bae hakaumui, bona idia ese ba dabaimui edia dubu lalonai. ¹⁸Bena bae abimui dubu biagudia, bona pavaapava vairadiai bae hakuimui lao lau daigu ai, igwaurai hedinarai idia vairadiai bona idau taudia vairadiai. ¹⁹Bema idia ese bae ruhamui nege, lalomui basie hekwarahi dahaka ba gwaurai, badina be ba gwaurai herevadia na baina henimui una horanai. ²⁰Badina una na dia umui bo herevamu, to una na Tamamui Laumana umui emui amo baine hereva. ²¹Kakana ese tadina e hamauria mase amo, bona tamana ese natuna baine hamauria, memero bae tore-isi tamadia bona sinadia

bae ala dia mase.²²Umui na taunimanima iboudiai ese do bae inai henimui lau ladagu dainai. A baine haheauka tauna na dokonai do baine mauri.²³A bae dagedage henimui hanua ai, hanua ta ba heau lao, a na hamaoromui momokanimu Isaraela hanuadia basio rakatani dia ela bona taunimanima natuna baine lou mai.²⁴Hahediba ese ihadibana basine hereaia, a hesiai tauna ese biaguna basine hereaia.²⁵Hahediba na ihadibana ida baine hegeregere, bona hesiai tauna na biaguna ida baine hegeregere. Bena idia ese ruma biaguna ladana bae hatoa Beelzebul, a idia ese edia ruma taudia danu unu basie gwaurai dia toma!²⁶Una dainai idia gari dia basio gari, badina be e govadia ahu gaudia do ba hedinarai, bona hehuni gaudia do bae dibadia.²⁷Dibura lalonai na hamaorolaimuimu herevadia na diari ai ba gwaurai, bona taiamui ai ba kamoni herevadia na ruma guhidia amo ba harorolai dobi.²⁸Taunina ialana mai dibadia a lauma ialana asi dibana tauna na garidia basio gari. A, lauma bona tauanina gehena ai baine aladia mase diba tauna hari garina ba gari.²⁹Bisini rua be moni maragi-maragi amo bae hoi?A idia ta tano ai basie moru tamamui ena aonega ai.³⁰A umui na kwaramui huidia iboudiai vada e duhai vaitani.³¹Una dainai basio gari. Umui ese bisini diagau o hereadiamu.³²Una dainai taunimanima vairadiai bae gwaurai hedinarai taudia iboudiai na, lau ese tamagu guba ai e nohomu varinai baina gwauraidia hedinarai.³³A taunimanima vairadiai baine goregu tauna na, lau ese tamagu guba ai e nohomu vairanai baina gorega.³⁴Lalomui na basieto maino tanobada ai baina mailaia totona nama. Lau na dia maino asi na mailaia, a dare hari.³⁵To lau nama na taunimanima ese tamana baine inai henia, bona kekeni ese sinana baine inai henia, bona ravana kekeni na ese ravana hahinena baine inai henia.³⁶A ruma taudia ese ruma biaguna bae inai henia helaoreana.³⁷A daika ese tamana eiava sinana baine ura henia bada a lau baine ura henigu maragi, tauna na egu ai basine hegeregere; bona natuna maruanena eiava natuna kekenina baine ura henia bada lau baine ura henigu maragi tauna na egu ai basine hegeregere.³⁸A daika ese ena satauro basine abia isi bona murigu ai basine raka tauna na egu ai basine hegeregere.³⁹A daika ese ena mauri e abia tarika-tarikamu tauna ese ena mauri baine reaia. A lau daigu ai ena mauri e reaiamu tauna ese mauri baine abia.⁴⁰E abimui daemu taudia ese lau danu e abigu daemu, bona lau e abigu daemu tauna ese e siaigu Diravana danu e abia daemu.⁴¹A ta ese peroveta tauna e abia daemu badina ia na peroveta tauna ia ese peroveta tauna davana baine abia, bona ta ese kara maoro-maoro tauna e abia daemu badina ia na kara maoro-maoro tauna ia ese kara maoro-maoro tauna davana baine abia.⁴²Daika ese ranu keruma kapusi tamona mo ini maragi-maragidia ta baine henidia ia sibona mo hahediba tauna ta, na hamaoromui momokanimu, ia na davana basine reaia. Translation done and completed by: Dk. Kone Kohu on Monday (10/05/23), time 4.25 pm

11

¹Iesu na ela unuseri ai ena hahediba gwauta raruosi e haganidia vaitani, ia na una gabu amo e raka oho edia hanua ai baine hahediba bona baine haroro totona.²Hari Ioane na dibura rumana ai Keriso ena kara hairaidia e kamoni dia, ia ese ena hahediba rarua ia dekena e siaidia.³Bona e hamaorodia, eto, "Be maimu tauna na oi a, eiava idauna ta baia tahua?"⁴Iesu ese e haere henidia bona e hamaorodia, eto, vada aolabona ome ita karadia bona ome kamoni hereadia na Ioane ba hamaoroalaia.⁵Mata kepulu taudia matadia e papa, ae hedairiki taudia e rakamu, lepera taudia na e goevagoevamu, taia kudima taudia na e kamonaimu, mase taudia na e mauri loumu, bona sivarai namo na ogogami taudia e harorolai henidiamu.⁶Hekwakwanai badina egu ai basine davaria tauna hari namo.⁷A unu tatau e raka oho ai, Iesu ese Ioane herevana e gwaurai matama aru taudia edia, eto. "Umui be dahaka o ita tano gagenai - sirihoro dorina lai ese e odaia a?"⁸A umui na dahaka o ita ola ai - a tau ta dabu manada-manada dia e hedokilai? Momokani, daika dabua manada-manadadia e hedokilaimu tauna na pavapava edia rumai e nohomu taudia.⁹A umui be dahaka o ita ola ai - proveta tauna? Oibe, lau ese umui na hamoromui, bona peroveta taudia logora e herediamu.¹⁰Ia buna vada e torea, eto, "A itaia, lau ese egu hereva vada name siaidia vairamui ai, daika ese emu dala baine lailaia emui."¹¹Na hamaoromui momokanimu, hahine bogadia ai e vara taudia iboudiai na ta ese Ioane se heraiamu. A guba basileiana lalonai gabe tauna ese Ioane e hereaiamu.¹²Ioane Bapatiso negana ema bona harihari, guba basileia vada e dadia, bona dadidadi taudia ese vada e dabaia tao.¹³Badina be peroveta iboudiai bona taravatu e hahedibava ema bona Ioane;¹⁴bona bema umui na ouramu bavabiadae, ia na Elia daika be bema imu.¹⁵Mai taiana tauna e hakalamu; na baine hakala.¹⁶Ina uru taudia na dadia ida baina hegeregere?¹⁷Idia na maragidia na heto hoihoi gabudiai e helaimu, bamodia e boi henidiamu.¹⁸Bona e tomu, ai be ivilikou a hataimu emui, bona umui na asio mavarumu. Ai be a rohe-ahumu, bona umui na asio taitaimu.¹⁹Badina be Ioane ema na se anianiva eiava se inuinau, bona idia e gwauva ia na lauma dikana.²⁰A taunimanima natuna ema na e anianimu bona e inuinau bona idia e tomu, aitaia, ia na ani-dae, ani-dae tauna ona vine ranuna e inua momomu, tax gogo taudia bona kara dika taudia ! A aonega iha momokanina na natuna edia amo e hedinaraimu.²¹Una negana ai siahua karadia diagau hanua lalodiai e karava hanuadia na ia ese e gwau hendia, badina be idia na asie helalo kerehaiva."²²Ihahaimui, Koraisina e! Ihahaimui Btersaida e! badina be siahua karadia lalomui ai na karava na Turo bona Sidono lalonai bama kara idia na idau nega ai bema helalokerehai mai dava haida bona mai rahu- rahu dia ida.²³Na hamaoromui, hahemaoro dinana ai Turo bona Sidono bae dika maragi a oi be ba dika bada."²⁴Oi danu, Kaperanauma, oi na guba ai bae heabidae a? Oi na bae diho laimu tanobada henunai. Badina be siahua karadia oi lalomu ai na karava na Sodoma lalonai bama kara, ia na bema mia ema bona hari.²⁵Na hamaoromui hahemaoro dinana ai Sodoma baine dika maragi a oi be ba dika bada."²⁶Una negana ai Iesu eto, "Tmaagu e, guba nona tanobada Lohiana, na hamaoromu, badina be ini gau na aonega taudia bona lalo-parara taudia edia amo vada o huni, a memero karukarudia ediai vada o hahedinarai.²⁷Momokani, Tamagu e, badina be emu lalo-hadai namona benai.²⁸Bena Iesu ese taunimanima e hamaorodia, eto, "gau iboudiai na tamagu ese vada e henigu; bona tau ta tamana asi dibana natuna mo sibona bona

natuna e uramu baine hahedinarai henia tauna.²⁸ Aoma dekegu, tau boera tumui bona maduna metau taumui iboumui ai, aoma lau ese laga-ani baina henimui. ²⁹Egu maduna na avabia bona egu amo ba diba, badina be lau na manada bona lalo-manau taugu, bona laumamui na do bae laga ani.³⁰ Badina be egu maduna na haraga bona ihuana danu asi hekwarahina. Translation done by: Dk. Kone Kohu on Monday (03/07/23), time: 1.30 pm. Ready for quality checking.

12

¹Una neganai, Iesu na Dina Helagana ai uit umana lalona amo e raka hanaiva. Ena hahediba memero dia na e hitolodia bena uit huahuadia e kinidia bona anidiava. ²A hari Farasia taudia ese e itadia bena Iesu e hereva henia, eto, "Aitaia emu hahediba memero ese e karaiaumu karana dia maoro dina helaga ai." ³A Iesu ese e hamaorodia, eto, "Umui ese asio duahia Davida be dahaka e kara e hitoloa neganai, ena memero ida, a?" ⁴Ia na Dirava ena ruma ai e raka vareai parao eabia bena e aniani ena memero ida, una na dia maoro ia bona ena memero ida bae ania, a helaga taudia sibodia mo adia. ⁵Eiava, umui ese dina helaga taravatuna ai asio duahia, dubu lalonai dina helaga na helaga taudia ese e hahelagaiamu to idia asi edia kerere, a? ⁶A na hamaoromuimu, dubu helaga e hereiamu tauna na hari iniseni. ⁷Bema umui ese ina hereva anina boma dibaia, "Lau na hebogahisi na ura heniamu bona dia ihaboulaina karadia" neganai, umui ese asi edia kerere taudia dikadia basiona gwaurai. ⁸Badina be Taunimanima Natuna na dina helaga Lohiabadana." ⁹Bena Iesu na una gabu e rakatania bona ela edia dubu lalona. ¹⁰Unuseni ai, ima heveri tauna ta e davaria. Farasia taudia ese Iesu e nanadaia, eto, "Ina maoro dina helaganai gorere tauna ta ba hanamoa, a?", bona unu amo idia ese ia ihabadelaina ta ba karaia. ¹¹Iesu na e haere eto, "Umui padamui amo, daika na, bema ena mamoe tamotamona na dina helaganai bema moru guri lalonai, ia na basinema dau-henia bena basinema veria-isi diba, a?" ¹²Edena be hereadae, benaini, tau ese mamoe na e hereaimau! Una dainai, ina na maoro kara namona ikarana dina helagana ai." ¹³Bena Iesu ese ima heveri tauna e hamaoroa eto, "Imamu na atoia roro." Ia imana e toia roro, bona imana vada e namo guguru, hari imana namona kahana hegeregere. ¹⁴A Farasia taudia na e raka oho bon e hebouva ia bae alaia mase dalana e tahuava. ¹⁵A Iesu na mai dibana dainai, ia na una gabu amo e raka-oho. Hutuma bada na ia murina ai e raka, bona ia ese mai edia gorere taudia iboudiai e hanamodia guguru. ¹⁶Ia ese e haganidia, ia na idia ese basie hahedinarai, ¹⁷bona ina na do baine momokani, Isaia peroveta tauna ena amo e hereva, etomu, ¹⁸A itaia, lau egu hesiai merona, lau ese vada na abiahidi, egu lalokau tauna, lau lalogu ese e lalonamo heniamu. Lau Laumagu na latanai baina atoakau, bona ena hahemaui na Idau Bese taudia ediai baine gwaurai hedinari. ¹⁹Ia na basine gugu, eiava basine tai lolo; eiava danu, ta ese gadona basie hakalaia, ariara ai." ²⁰Ia ese e haberoa avana ta basine hakwaidua, lahi mai kwalahuna basine habodoa, ela bona hahemaui ai baine kwalimu, ²¹bona ia ladanai Idau Bese taudia helaro do bae abia. ²²Bena mata kepulu bona mu, lauma dika ese e rohea tauna ta na Iesu dekena e laohaia. Ia ese hari tau na e hanamoa guguru. bona e hahedinaraidia una tau na e hereva bona e roharoha. ²³Taunimanima iboudiai na e hoa bona eto, "Ina tau na dia Davidia natuna, a?" ²⁴A Farasia taudia ese ina hereva e kamonaia neganai, idia na e hereva eto, "Ina tau ese lauma dika na se luludia ohomu, to Bealzebul lauma dikadia lohiana sibona ese mo." ²⁵A Iesu ese lalodia vada e dibaia, bona e hamaorodia eto, "Basileia iboudiai sibodia e haheparara neganai e makohi rohorohomu, bona hanua-ta eiava ruma ta sibodia bae haheparara neganai basine gini auk." ²⁶Bema Satani ese Satani baine lulua-oho neganai, ia na sibona e hahepararamu. Bena edena dala ai ena basileia na do baine gini? ²⁷Bona bema lau ese Beelzebul ena lauma dikadia na luludia-ohomu neganai, umui natumui ese be daika ladanai do bae luludia-oho a?" ²⁸A bema launa Dirava Laumana ena amo lauma dikadia na luludia-ohomu neganai, Dirava ena basileia na umui lalomui ai vada eme kau. ²⁹Eiava, edena dala ai tau-ta na una goada herea tauna ta ena ruma ai baine vareai bena ena kohu baine henao, to ia na una goada tauna do asine gua guna neganai, a?" Bena unu amo ruma kohudia baine henao una ruma amo. ³⁰Tau-ta dia lau ida na lau e laogu ahumu, bona lau ida asia gogomu tauna ese e gigidia rohorohomu. ³¹Una dainai na hamaoromuimu kara dika bona ere dika taunimanima ediai iboudiai na do bae hegwa-tao to Lauma e ere dika heniamu tauna ena dika na do basine hegwa-tao diba. ³²Daika ese Taunimanima Natuna baine hereva dika henia tauna ena dika na do baine hegwa-tao, to daika ese Lauma Helaga baine hereva dika henia tauna ena dika na basine hegwa-tao ina nega ai eiava do bainema negana ai. ³³Au ta na ba hanamoa bona ia huahuana danu do bae hanamoa, eiava au ta na ba hadikaia, bona huahuana danu bae hadikaia, badina be au na huahuana ese do baine hahedinarai. ³⁴Umui na gaigai natudia, doini mai dikamui ida taumui, benaini, gau namodia be ede ba herevalai toma, a? Badina be lalo ena honuhonu-dae amo udu na e herevamu. ³⁵Tau namona ese lalonai e haboumu gaudia namodia amo gau namodia e havaramu. Bona dika tauna ese lalonai e haboumu gaudia dikadia amo gau dikadia e havaramu. ³⁶Lau ese na hamaoromuimu, hereva dikadia ba hereva-lai taudia na hahemaoro dinana ai do bae hahemaoro henidia. ³⁷Badina be emu hereva ese do baine hanamomu, bona emu hereva ese do baine hadikamu. ³⁸Bena Itorena taudia haida bona Farasia taudia ese Iesu e haere henia, eto, "Hahediba tauna e, ai na auramu toa ta baia itaia oi emi amo." ³⁹A Iesu ese e haere henidia, eto, "Uru dikana ma heudahanai na ida, ese toa ta o tahuamu. A lau ese toa ta basina hedinaraia, to toa tamotamona na Iona peroveta ena toa mo." ⁴⁰Badina be Iona na dina toi bona hanuaboi toi Lakara dono-dono bogana ai e noho, "Unu hetomana Taunimanima Natuna danu dina toi bona hanuaboi toi tano lalonai do baine noho." ⁴¹Nineva taudia bona ina uru taudia ida hahemaoro vairanai do bae gini hebou bona bae dunia-dae. Badina Iona ena haroro amo idia na e helalo-kerehai, bona aitaia Iona e hereia tauna na umui ida iniseni ai. ⁴²Diho kahana amo pavadapa hahinena na ina uru taudia ida bae gini tore hahemaoro dinanai bona bae dunia-dae. Ia na tanobada kahana amo ema Solomona ena aonega herevadia iha-kalana totona, bona aitaia Solomona e hereiamu tauna an umui idia iniseni. ⁴³Lauma dikana ta na tau ta ena amo e raka oho neganai, ia na asi ranuna tanona amo e hanai lagana baine ani gabuna e tahuava, to gabu ta se

davaria. ⁴⁴Bena e hereva eto, "Na rakatania rumana baina lou henia." Bena ruma e lou henia bona e davaia una ruma na asi tauna, bona e itaia ruma lalona na e daroa goeva-goeva, bona lalona kohuna iboudiai na e atodia namonamo. ⁴⁵Bena ela bona lauma dika hereadia hahitu e hakaudia bona una ruma lalonai e vareai, unuseni ai bae noho. Bena una tau ena noho maurina na e dika herea dia e noho matava na hegeregereana. Unu hetomana hegeregereana ina uru dikana enai danu baine heto. ⁴⁶Iesu na dounu aru taudia e hereva henidava lalonai, ia sinana bona tadina memerodia na e ginidae, ia e tahuava bona baine hereva henia dainai. ⁴⁷Tau ta ese Iesu e hereva henia, eto, "Aitaia, oi sinamu bona tadimu na gigini oi e tahumumu bona ba hereva henimu." ⁴⁸A Iesu e haere bona eto, "Lau sinagu be daika, bona lau tadigu be daidia?" ⁴⁹Bena imana e toiaroro ena hahediba memerodia ediai bona eto, "Aitaia, lau sinagu bona tadigu be unu idia." ⁵⁰"Badina be lau Tamagu guba ai e nohomu ena ura e karamu taudia, idia na lau tadigu, lau taihugu bona lau sinagu." Translation done by: Ret/Dk. Lohia Gari, completed on Monday (11/04/23), time: 11.30 pm, ready for quality check.

13

¹Una dainai, Iesu na ruma amo e raka lasi bona kone ai e helai diho. ²Aru taudia hutuma danu ia ida e hebou, bona ia na vanagi ta ai e gui bona e helai, hari aru taudia hutuma be kone ai gigini. ³Bena Iesu ese sivarai hegeregereana momo eha moro-laidia. Ia e hereva, eto, "A hakala, uhe ihadona tauna na ena uhe ihadodia ela. ⁴Uhe na e gigidia bona uhe haida na dalai isenai e moru, bona manu roho na ema bona e anidia ore. ⁵Uhe haida be nadi ai e moru. Tano na severa-severa dainai nega tamonai e tubu (vara) badina tano na dia uduna dainai. ⁶Bena dina e dae neganai, vada e marai badina asi ranudia dainai e kakoro. ⁷Uhe haida be au-ginigini latadiai e moru. Au-ginigini e vara neganai eha-oredia. ⁸Uhe haida be tano namonai e moru, huahuadia e dobi, haida be nega sinahu-ta, haida be tauratoi-ahui ta, bona haida be toi-ahui." ⁹"Mai taiana tauna na baine hakala." ¹⁰Ena hahediba memero na ema bona Iesu e hereva henia, eto, "Dahaka dainai aru taudia na sivarai hegeregereana amo o hereva henidiamu?" ¹¹Iesu e haere eto, "Guba basileia herevadia hehunidia vada eme henimui bona do ba lalo parara, to idia ediai na asie henidia." ¹²Badina be daika mai ena tauna na momo ma baine henia, bona enai na baine momo herea. A daika asi ena tauna na enabe mai ena, to ena amo do bae abia oho. ¹³Una dainai, sivarai hegeregereana amo na hereva henidiamu. Enabe idia na e roharohamu to asie e itamu, bona enabe idia na eha-kalamu to asie kamonaimu, eiava asie lalo-pararamu. ¹⁴Idia ediai, Isaia peroveta tauna ena peroveta herevana vada eme momokani, etomu, "Umui na momokani do ba-hakala, to basio lalo-parara, umui na momokani do ba itaia, to basio lalo parara." ¹⁵Badina be idia lalodia na valahu-valahu bona ediai iha-kalana na auka, bona matadia amo asie itamu, eiava taiadia amo asie lalo-pararamu, unu amo idia ese ba lou henigu bona lau ese do baine hanamodia! ¹⁶A umui matamui na nanamo, badina o itamu dainai, bona taiamu na nanamo, badina o kamonaimu dainai. ¹⁷Momokani vaitani na hamaoromui unu peroveta taudia momo bona kara maoromaoro taudia na e urava ini o itamu gaudia bema ita, bona asie itadia. Idia na e urava ini o kamonaimu herevadia bema kamonai to asie kamonaidia. ¹⁸A hakala ina uhe ihadona tauna ena uhe e gigi rohoroho sivaraina hegeregereana. ¹⁹Ta ese basileia sivaraina e kamonaianu to asine lalo-pararamu neganai, hari tau dikana e maimu bona lalonai e hadoa uhena e abia ohomu. Una na dala isenai e hadoa uhena. ²⁰Nadi tanona (tano aukana) latanai e moru uhena be tauta hereva na e kamonaianu bona e abiadae haragamu mai moalena ida. ²¹To ia lalona na asi ramuna dainai bona asine mia daudaumu. Dagedage bona hisihisi e kaumu badina una hereva dainai, ia na nega tamona e morumu. ²²Una au-ginigini padadiai e morumu uhena be, tauta una hereva e kamonaianu to ena mauri ai gau idau-idau e lalo-hagui laimu bona taga igahusina dainai hari hereva ia enai na eha-oremu, bona huahuana se varamu. ²³Hari tano namona ai e morumu uhena be, tauta ese hereva na e kamonaianu bona e lalo-parara-laiamu ia na momokani huahuana e varamu haida nega sinahu-ta, haida tauratoi-ahui, bona haida toia-hui. ²⁴Iesu ese sivarai hegeregereana ta ma e henidia. Ia eto, "Guba basileia na tauta uhe namona e hadoa ena imea ai na heto. ²⁵A taunimanima na e mahuta lalonai, ia e inai heniamu tauna ema bona ava dikadia uhedia na uit padadiai e hado bona e raka oho. ²⁶Uhe matadia na e tubu-isi bona e vara lalonai hari ava dikadia danu padadiai vada e varava. ²⁷Imea biaguna tauna ena hesiai memero na ela bona biagudia e hereva henia, eto, baigumai e, oi emu imea ai uhe namona ta asio hadoa, a? "Bena edena dala ai ava dikadia e varamu?" ²⁸Ia ese ena hesiai memerodia eha-maorodia eto, "Inaigu tauna ese vada eme karaia." Ena hesiai memerodia ese e nanadaia, eto, "Oi o uramu ai ese baia veridia oho, a?" ²⁹Imea biaguna eto, "lasi. Badina be ava dikadia iveri-ohodiai, uit danu ba veridia-oho na garina." ³⁰Do aine mia, ruaosi a vara hebou, ela bona uit iutuna negana. Uit iutuna horanai, lau ese uit iutuna taudia baina hamaorodia, "Ava dikadia ba veridia-isi guna, ba guidia hebou lahi ese do bae aradia, a uit na ba haboudia egu roge ai bame atodia." ³¹Badina Iesu ese sivarai egeregereana ta ma e henidia, eto, "Guba basileia na sinapi nadinadi ta na heto, tau ta ese eabia bona ena imea ai e hadoa. ³²Ina sinapi nadinadina sibona maragi herea au nadinadidia iboudiai padadiai. A ia na e varamu ela bona au bada hereana ta ai e laomu, bona atai manudia na ia riginai ai e helaimu bona laganidia e animu. ³³Iesu ese sivarai hegeregereana ta ma e hamaorodia, "Guba basileia na e hatubuamu gauna na heto, hahine ta ese e abiamu bona flaoa nau toi ida e kuia heboumu ela bona ibounai e tubumu." ³⁴Ini gau iboudiai na Iesu ese aru taudia na sivarai hegeregereana e hamaorolaidia, bona hereva ta se gwaurai kava, a sivarai hegeregereana ma e hamaorodia. ³⁵Una na e heato maoro dalanai bona peroveta tauna ena hereva iha-momokanina e hereva neganai, eto, "Udugu na baina kehoa sivarai hegeregereana dalanai. Lau na hehuni gaudia do baina gwauraidia tanobada e hadaia matama negana amo." ³⁶Bena Iesu ese aru taudia e rakatanidia bona ruma ela. Ena hahediba memero na dekenai ela e hereva eto, mani ava dikadia imea lalonai sivaraina hegeregereana anina boma hadibalaimai." ³⁷Iese e haere eto, "Uhe namona e hadoa tauna be Taunimanima Natuna. ³⁸Imea be ina tanobada, bona uhe namona be ena basileia memero. Ava dikadia be tau dikana natudia, ³⁹bona ena inai ese e

hadoo tauna be diabolio. Uit igogona dinana be nega dokona bona uit igogona taudia be aneru.⁴⁰Una dainai, ava dikadia na e haboua heboumu bona lahi ese e aradiamu, nega dokonai danu unu do baine vara toma. ⁴¹Taunimanim Natuna ese ena aneru do baine siaidia bona idia ese kara dika e havaramu gaudia bona kara dika taudia do baine abidia oho ena basileia amo. ⁴²Idia na lahi siahuna lalonai do bae tahodia vareai, unuseni ai do bae tai ganagana bona isedia gadigadidia bae hedai. ⁴³A kara maoromaoro taudia na do bae diari dina na heto Tamana ena basileia lalonai. Mai taiana tauna do baine hakala. ⁴⁴Guba basileia na kohu davana gauna ta na heto, tano lalonai e hunia. Tau ta ese e davaria moalena dainai, ela ena kohu iboudiai eha-hoihoi laidia, bona una moni amo una tano e hoia. ⁴⁵Unu hetomana danu, guba basileia na kohu e hoihoi-laimu tauna ta na heto, ageva mai davana bada e tahumu. ⁴⁶Ia ese hari ageva mai davana bada e davaria, bona ela, ena kohu iboudiai na eha-hoihoilai, bona monina amo una ageva e hoia. ⁴⁷Ma, guba basileia na reke ta na heto, davara ai e torea, bona gwarume idau idau e gogo. ⁴⁸Reke na gwarume ese eha-honua neganai, haoda taudia ese e veria bona kone kahana. Idia na e helai diho bona gwarume namodia na e habou dakwai ai e udadia, a asi anidia gaudia na e negedia. ⁴⁹Nega dokonai danu unu do baine heto. aneru na be maimu bona kara dika taudia na kara maoromaoro taudia padadiamo do baine hapararadia. ⁵⁰Idia na lahi garagarana lalonai do bae tahodia vareai, bae tai ganagana bona isedia gadigadidia bae hedai. ⁵¹"Ini gau iboudiai lalomui vada eme parara a? Ena hahediba memero iboudiai e haere, eto, "Oibe." ⁵²Bena Iesu eto, "una dainai itorena taudia iboudiai daika be hahediba tauna ai eha-laoa guba basileia lalonai, ia na ruma ta biaguna na heto, gau matamatadia bona gau gunadia na ena kohu namodia amo e abidia lasimu. ⁵³Bena Iesu na ini sivarai hegeregedia e gwaurai ore neganai, una gabu e rakatania. ⁵⁴Bena Iesu na ena hanu kaorikori ai e raka vareai bona taunimanim eha dibadiava edia synagogue lalonai. Unu amo e hedinarai idia na e hoa, bona eto, "Ina tau ena aonega bona hoa karadia be ede amo eabi a? ⁵⁵Ia na dia ruma e karamu tauna natuna, a? Ia sinana ladana dia Maria, a? Ia tadina dia Iakobo, Iosepa, Simona bona Iuda, a?" ⁵⁶Ia taihuna iboudiai na dia ita ida, a? Ini gau iboudiai be ede amo eabi, a?" ⁵⁷Idia iboudiai na ia ese eha hekwakwanaidia. A Iesu ese eha-maorodia eto, "Peroveta tauna na mai imatauraina, to dia ena hanua ai bona ena bese lalodiai. ⁵⁸Ia ese hoa karadia momo na asine kara unuseni ai badina asi edia kamona dainai. Translation done and completed by: Ret/Dk. Lohia Gari on Friday (12/05/23), time: 3 pm.

14

¹Una negana ai, Heroda una gabu lohiana na Iesu sivaraina e kamonaia. ²Ena hesiai memerodia eha-maorodia, eto, "Ina na Ioane Bapatiso, ia na mase amo e tore-isi. Una dainai ini siahu na ia ena amo e gaukaramu." ³Heroda, ese Ioane na vada e dabaia-tao, e guia bona dibura ruma ai eato badina be Herodia ia kakana Pilipi adavana dainai. ⁴Badina Ioane ese eha-maoroa eto, "Ina na dia maoro oi ese ina hahine na bavabia oi emu." ⁵Heroda na e urava ia na baine mase to, ia na taunimanim garidia e gariva, badina idia ese ia na e gwauraiava peroveta tauna ta. ⁶A Heroda ena vara dinanai, Herodia natuna kekenina na idia vairadiai e mavaru bona Heroda na e moale. ⁷Davana ihalounai, ia ese kekeni na e gwauhamata henia ia e noiamu gauna do baine henia. ⁸Kekeni na sinana ese eha-dibadibaia murinai, ia na eto, "Ioane Bapatiso kwarana na dihu ai bavatoa bona bame henigu iniseni ai." ⁹Hari papapava lalona na e hisihisi to badina kekeni e gwauhamata henia dainai bona e aniani hebou taudia vairadiai danu dainai, bona e haerevakekeni e noiamu gauna na ba henia. ¹⁰Ia ese vada e siaidia Ioane Bapatiso kwarana ba utua-oho dibura ruma ai. ¹¹Bena ia kwarana dihu ai e atoa e laohaia kekeni e henia bona ia ese e laohaia sinana e henia. ¹²Bena ena hahediba memero dia ese mase tauanina e abia-oho eha-guria. Una murina ai idia na ela Iesu eha-maoroa lao. ¹³Hari Iesu ese e kamonaia neganai, una gabu amo e raka-oho vanagi ai e gui sibona ela gabu gagaena ta. Aru taudia na e kamonaia, idia na ia murinai aedia ai e raka hanua badadia amo ela. ¹⁴Bena Iesu na ema bona aru taudia hutuma e itadia. Ia ese e bogadiahisi bona mai edia gorere taudia na eha namodia guguru. ¹⁵Adorahi ai, ena hahediba memero na ia dekena ela e hereva, "Ina na tano gagaena dina danu e dihomu. Ini taunimanim na boma siaidia oho. Umui ese aniani ba henidia bae aniani." ¹⁶A Iesu ese eha maorodia eto, "Idia na basita siaidia oho. Umui ese aniani ba henidia bae aniani." ¹⁷Idia ese e hereva henia, eto, Ai dekemai na gau ta lasi, to parao ima bona gwarume rua hona mo." ¹⁸Iesu eto, "A mailaidia lau dekegu." ¹⁹Bena Iesu na e hereva aru taudia iboudiai na ba helai diho rei latanai. Ia ese parao ima bona gwarume rua na eabidia. E gaga-isi guba e itaia, e hanamodia, bona ena hahediba memero e henidia, bona idia ese aru taudia e henidia. ²⁰Iboudiai e aniani bona bogadia e kunu - Bena idia ese aniani bahudia e gogodia-lou bosea gwauta-rua e hahonudia. ²¹E aniani taudia iboudiai daha ima, hahine bona maragidia danu. ²²Asi vanahana, ena hahediba memerodia na vanagi ai eha-guidia bona e saidia guna gohu kahana baela, a ia be aru taudia do baine siaidia-oho. ²³Ia ese aru taudia e siaidia oho murinai, sibona ela ororo baine haguriguri. ²⁴A hari vanagi na davara bogaraginai hurehure lalonai vada e vareai bona lai na idia varadiai e toa. ²⁵Hanuboi gima negana iha-haninai Iesu na idia dekediai ela davara latanai e raka. ²⁶Ena hahediba memero ese e itaia ia na davara latanai e raka neganai, idia na kudoudia e hetaha, bona eto, "Ina na lauma ta," bona e tai lolo mai garidia ida. ²⁷A Iesu ese eha-maorodia, eto, "A boga auka, ina na lau! Asio gari." ²⁸Petero e haere, eto, "Lohiabada, bema ina na oi neganai, aha-maorogu dekemu baina raka vasi davara latana amo." ²⁹Iesu eto, "Aoma." Bena Petero na vanagi amo e diho bona davara latanai e raka Iesu e laohenia. ³⁰To Petero na lai e toa bona e itaia neganai, ia na e gari. E moru matama lalonai e tai lolo, eto, "Lohiabada e, aha-maurigu!" ³¹Nega tamona Iesu na e daulao imana ai e abi, bona e hereva, eto, "Abidadama maragi taumu, dahaka dainai o daradaramu, a?" ³²Bena Iesu bona Petero na vanagi ai e gui neganai, hari lai e toa vada e ore. ³³Bena hahediba memero ese vanagi ai Iesu e tomadiho henia, eto, "Momokanai, oi na Dirava Natuna." ³⁴Idia na e hanai Genesareta tanona ai. ³⁵Una gabu taudia ese Iesu e itaia neganai, idia ese hereva e siai unu gabu haida taudia danu eha dibadia, bona idia ese

gorere taudia iboudiai e laohaidia ia dekena. ³⁶"Idia ese e noia ena dabua dorinai bae daukau bena edia gorere amo e namo guguru. Translation done and completed by: Ret/Dk. Lohia Gari on Monday (15/05/23), time: 2 pm

15

¹Bena Farasia taudia bona Itorena taudia na Iesu dekena ema Ieruselema amo, eto, ²"Dahaka dainai oi emu hahediba memerodia ese ai senemai edia hahediba herevadia e tatadia utumu? Badina be idia imadia na asie huri aniani neganai a? ³Ia e haere, eto, "Benaini dahaka dainai umui ese Dirava ena taravatu o tatadia utumu senemui edia hahediba herevadia amo?" ⁴Badina Dirava ena hahegani na etomu, "Sinamui bona tamamui na ba matauraidia, bona "tamana eiava sinana baine ere-dika henia tauna na do baine mase." ⁵A umui na otomu, "Daika ese tamana eiava sinana na eha-maoroamu, baineto, "Dahaka gau heduru lau egu amo umui ese o davarimu na hereahia gauna na Dirava na heniamu. ⁶Una tau ese tamana imatauraina na basine ura. Una dainai Dirava ena hereva na asi anina ai ome halaoa, badina senemui edia hahediba herevadia daidiai. ⁷"Umui na koikoi taumui!" Benaini, Isaia ese vada e peroveta-laia eto, ⁸"ini taunimanima ese e matauraigumu ududia bibinadiai mo, a lalodia be dadaudau lau egu amo." ⁹"Idia ese lau e tomadiho henigumu na asi anina, badina be edia hahediba herevadia na taunimanima edia hahegani herevadia mo." ¹⁰Bena ia ese aru taudia e boiridia kahi, bena eha maorodia, eto, "Ba hakala bona ba diba." ¹¹"Asi gauna ta udu amo e vareaimu ese una tau eha-miroamu, a udu amo e lasimu gauna ese una tau eha-miroamu." ¹²Bena hahediba memero na Iesu dekena ela bona eha-maoroa eto, "Oi mai dibamu ini Farasia taudia na eme hekwakwanai oi emu hereva ome gwaurai neganai, a?" ¹³Iesu e haere eto, "Hado hado audia iboudiai Tamagu guba ai e nohmu ese asie hadodia na do ba ragadia." ¹⁴"Idia na sibodia bae noho, idia na mata kepulu taudia iha-kaudia taudia. Bena mata kepulu ta ese mata kepulu ta baine hakaua neganai, idia na guri lalonai do bae moru." ¹⁵Petero ese Iesu eha maoroa eto, "Ina sivarai hegeregere anina mani aha maoromai." ¹⁶Iesu eto, "Umui danu doini asi odibamu, a?" ¹⁷"Umui na doini asio itaiamu, una taunimanima uduna amo e anianimu gauna na e dihomu boganai, bena inegen gabuna amo eha-lasimu ani?" ¹⁸"A udu amo e lasimu gaudia na lalo amo e maimu. Unu gaudia ese tau ta na eha miroamu." ¹⁹Badina be lalo amo e lasimu gaudia na lalohadai dikadia, ala ala, heuda hanai, mata bodaga karadia, henao-henao, habade koikoi, bona heuduguirai. ²⁰"Ini gau ese tau ta na eha miroamu. A aniani dainai imana asine hurimu ese tau ta na se hamiroamu." ²¹Bena Iesu na una gabu amo e raka-oho ela Turo bona Sdono tanodia. ²²Bena Canaan hahinea ta unu kaha amo ema, e lolo eto, "A bogagu-hisi, Lohiabada e, Davida Natuna! Lau natugu kekenina na lauma dikana ese e rohea dikadika." ²³A Iesu na se hereva, ena hahediba memero ese e noia, eto, "Ina hahine na a siaia-oho badina be ita murida amo e maimu mai lolona ida." ²⁴A Iesu na e haere, eto, "lau e siaigu na dia haida daidiai, to Isaraela ena rumai boio mamoe dia daidiai." ²⁵A hari hahine na Iesu vairanai e goru diho bona eto, "Lohiabada e a durugu." ²⁶Ia na e haere bona eto, "Ina na dia maoro memero maragidia adia aniani na sisia maragidia na taho henidia." ²⁷Hahine, eto, "Oibe, Lohiabada, to sisia maragidia na biaguna ena aniani patana amo e morumu momorudia na dounu e animu." ²⁸Bena Iesu ese e haere henia bona, eto, "Hahine e, emu abidadama na bada herea, ina na baine hekara emu ura hegeregere." Hahine natuna na e namo guguru una hora lalonai. ²⁹Iesu na una gabu e rakatania bona Galilea gohuna kahana ela. Ororo ai e dae bona unuseni e helai diho. ³⁰Taunimanima hutuma bada na ia dekena ela. Idia ese imadoko bona mta kepulu, ae heveri, bona taia kudima taudia, bona mai edia gorere idauidau taudia na ia dekena e laohaidia. Idia ese Iesu vairanai e atodia bona iboudiai eha namodia guguru. ³¹Bena aru taudia na e hoa, bona e itaia hari mu taudia na e hereva, ima doko, ae heveri taudia na eha namodia, asie raka taudia e raka, bona mata kepulu taudia e roharoha. Idia ese Isaraela taudia edia Dirava e imodaiava. ³²Iesu ese ena hahediba memero e boiridia bona eto, "Lau ese aru taudia name bogadia-hisi badina idia na lau dekegu ai dina toi vada eme noho bona asie dia aniani. Lau na asina uramu baina siaidia oho mai hitolodia ida, eiava bae manoridia dala ai." ³³Ena hahediba memerodia ese eha-maoroa eto, "Ne edeseni ai aniani do baita abi ina tano gagenai bona ini hutuma bada be ede baita ubudia toma, a?" ³⁴Iesu ese eha-maorodia eto, "Amui aniani be hida?" Idia eto, "Parao ha-hitu bona gwarume maragidia hoho mo." ³⁵Bena Iesu ese aru taudia iboudiai eha-ganidia bae helai diho rei latanai. ³⁶Iesu ese parao hitu-osi bona gwarume e abidia, bona e hanamodia murinai, ia ese e bitudia bona ena hahediba memero e henidia. Ena hahediba memero dia ese aru taudia e henidia. ³⁷Aru taudia iboudiai e aniani bona iboudiai e hegeregere. Bena idia ese e bitudia aniani bahudia na e gogodia bona bosea hitu e hahonudia. ³⁸E aniani taudia iboudiai be daha hani, hahine bona memero maragidia danu idia ida. ³⁹Bena Iesu ese aru taudia e siaidia-oho bona vanagi ai e gui bona Magadan tanona ela. Translated done and complete by : Ret/Dk. Lohia Gari on Thursday (18/04/23), time: 3pm.

16

¹Farasia taudia bona sadukea taudia na ia dekena ema bona ia itohona dainai e nanadaia toa ta guba amo baine hahedinarai. ²A ia ese e haere henidia eto, "Ita eda tano ai bema guba e kaka adorahi kahanai, ita na ta tomamu "Kerukeru nega na do baine namo." ³To bema guba na e kaka daba kahanai ita na baita dibamu kerukeru nega be ede bamona, to ina nega ai hari gau matamatadia e varamu ta itadiamu neganai ita na asita dibadiamu. ⁴Kara dika mai heuda-hanaimui ida uruna, umui na toa o tahumu a toa ta na basina henimui, to Iona enai toa mo. bena Iesu ese e rakatanidia bona e raka oho. ⁵Ena hahediba memerodia na gabu kahana ema neganai, idia na e helalo-boio parao na asie abikau. ⁶Iesu ese e hamaorodia eto, "Ba helalo tao bona nahuamu na ba toho Farasia bona Sadukea taudia edia parao e ha-tubuamu muramurana dainai. ⁷Hahediba memerodia ese sibodia e haeroa bona eto, "Ina be ita parao asita abikau dainai e herevamu a?" ⁸Iesu na mai dibana bona e haere eto, "Umui na abidadama maragi taumui, dahaka dainai umui na

o laloamu badina asi emui parao dainai a?⁹Umui na doini asio lalo-pararamu eiava asio helalo-taomu una parao laima una taunimanima daha ima edia bona bosea hida unu aniani bahudia e gogodia a?"¹⁰Eiava parao hit taunimanima daha hani edia bona bosea hida unu aniani bahudia o gogodia a?"¹¹"Ede bamona doini asio dibamu lau na dia parao dainai na hereva henimuimu, a? Nahuamui hari ba toho Farasia bona Sadukea taudia edia parao eha-tubuamu muramurana."¹²Unu amo idia na vada e laloparara ia na dia parao eha-tubuamu muramura na e hereva laiava to nahuadia ba-toho Farasia bona Sadukea taudia edia hahediba herevadia daidiai.¹³Iesu na Kaisarea, Filipi tanona kahanai neganai ia ese ena hahediba memerodia e nanadaidia eto, "Taunimanima be dahaka e gwaumu Taunimanima Natuna be daika?"¹⁴Idia e haere eto, "Haida na e gwaumu oi na Ioane Bapatiso, haida na e gwaumu oi na Elia, ma haida na e gwaumu oi na Ieremia eiava oi na peroveta tauna ta."¹⁵Bena ia ese e nanadaidia eto, "Umui na o gwaumu lau be daika a?"¹⁶Simona e haere eto, "Oi na Keriso, e maurimu Diravana Natuna."¹⁷Iesu ese e haere henia eto, "Simona Iona natuna e,oi na namo, badina be dia tauani bona rara ese eme hahedinarai henimu, to Tamagu gubai e nohomu ese."¹⁸Bona ma na hamaoromumu danu oi na Petero, bona ina papapapa latanai lau egu dubu baina haginia. Mase hanuadia ikoukoudia ese basie laomu-ahu.¹⁹Lau ese guba basileia kidia baina henimu. Dahaka gau tanobadai ba guidia gubai danu ba guidia, bona dahaka gau tanobada ai ba ruhadia-nege, gubai danu bae ruhadia.²⁰Bena Iesu ese ena hahediba memerodia e tamanudia tau-ta do basie hamaoroa ia na Keriso.²¹Una hora ai Iesu Keriso ese ena hahediba memerodia e hamaorodia matama ia na Ieruselema do bainela bona gau momo daidiai do baine hisihisi, dubu lohiadia ese, hahelga taudia ese, Itorena taudia ese bona bae alaia mase, bona dina iha-toinai baine tore-isi.²²Bena Petero ese eha-kaua tabe bona e gwauhenia eto, "Lohiabada e, ina kara na baine daudau emu amo bona ina na basine vara oi emu ai."²³To Iesu na e gini hegiro bona Petero e hamaoroa eto, Satani e, murigu kahana aoma. Oi na lau oha-hekwakwanaigumu badina be ini gau lalohadai dia na dia Dirava ena amo to taunimanima edia amo.²⁴Bena Iesu ese ena hahediba memerodia e hamaodia eto, "Bema tau ta euramu lau murigu ai baine raka, ia na sibona do baine hedadarai, ena satauro baine huaia, bona lau murigu ai baine raka."²⁵Badina be sibona ena ura ai eme mauri baine hamauria tauna na ena mauri do baine reaia, bona sibona ena mauri e reaimu lau daigu ai na mauri do baine davaria.²⁶Badina bema tau ta ese ina tanobada idoinai baine abia, to ena mauri baine reaia, namona be dahaka? Tau ta be dahaka baine heni ena mauri ihalouna davana, a?"²⁷Badina be Taunimanima Natuna na Tamana hairainai do bainema ena aneru logora ida. Bena ia ese taunimanima iboudiai tata ahudia do baine henidia edia kara daidiai.²⁸Momokani vaitani na hamaoromuimu umui haida o ginimu taumui ese mase na basio mamia ela bona Taunimanima Natuna ena basileia ida bainema do ba itaia.Translation done by Ret/Dk. Lohia Gari, on Friday (14/07/23), time: 7.54am. Ready for quality checking.

17

¹Dina taura-toi muridiai, Iesu ese Petero, Iakobo bona Ioane ia tadina sibodia mo eabidia bona ela ororo ai e dae.²Ia oromana na e idau idia vairadiai. Ia vairana e hururu-hururu dina na heto, bona ena dabua na e kiama-kiama diari na heto.³Bena Mose bona Elia na idia vairadiai e hedinarai Iesu ida e hereva-hereva.⁴Petero ese Iesu e haere henia eto, "Lohiabada, ina na herea ai danu iniseni. Bema o uramu neganai, lau ese kalaga au-toi aina karadia iniseni ai, ta oi emu, bona ta Mose ena, bona ta Elia ena."⁵Ia na dounu e herevava lalonai ori kiam-kiamana ta ese e govadia ahu bona gado ta ori lalona amo e hereva eto, "Ina na lau Natugu lalokauna, lau ese na lalo-namo heniamu, Ia ba kamoni henia."⁶Hahediba memerodia e kamoni neganai, e goru-goru diho, bona e gari bada.⁷Bena Iesu na ela dekedia, e dogodia-tao bona eto, "O toreisi bona asio gari."⁸Bena matadia e kehodia, to tau-ta asie itaia, Iesu mo sibona e itaia.⁹Idia na ororo amo e dihova ai, ia ese eha-ganidia, eto, "Ina mata-hanai ai ome itaia gauna ta basio hamaoroa ela bona Taunimanima Natuna na mase amo baine tore-isi lou."¹⁰Ena hahediba memerodia ese e nanadaia, eto, "Benaini, dahaka dainai Itorena taudia na etomu Elia na bainema guna?"¹¹Iesu na e haere eto, "Elia na, momokani do bainema guna, bona gau iboudiai baineme atodia namonamo."¹²A lau ese na hamaoromuimu, Elia na vada ema, to asio dibaia, lalona amo, edia ura karana ia enai vada e kara henia. Una dala tamona amo Taunimanima Natuna danu idia ese unu do bae hahisia toma.¹³Bena hahediba memerodia lalodia na e parara idia na ia ese Ioane Bapatiso e herevalaia.¹⁴Aru taudia hutuma vairadiai, tau ta na ema ia vairanai e goru diho,¹⁵bona eto, "Lohiabada e natugu na boma bogaia-hisi badina ia na tororo-tororo gorere ese e abiamu, bona ena hisi e badamu neganai, nega momo lahi latanai e morumu bona nega momo ranu lalonai e morumu."¹⁶Emu hahediba memero dekedia danu na laohaia, to asie hanamoa."¹⁷Iesu e haere bona, eto, "Asi emui kamoni bona kara kerere-kerere uruna nega hida lau na umui dekemui name noho, a? "Nega hida umui ida baita haheauka heheni, a? "Mero na a mailaia lau dekegu."¹⁸Iesu ese lauma dika na e gwau henia, bona ia ena amo e lasi, bona una hora ai hari mero na e namo guguru ena gorere amo.¹⁹Bena ena hahediba memero dia na Iesu dekena ela hehuni, e nanadaia eto, "Dahaka dainai ai ese na asia lulua lasi?"²⁰Iesu ese e haere hendia, eto, "Emui abidadama na maragi herea dainai. Lau ese na hamaoromui momokanimu, bema umui na mai emui abidadama sinapi nadinadina na heto, ina ororo do ba hamaoroa, ini amo a marere aola unukaha, bona ia do baine marere bona gau ta na dia auka umui emui ai."²¹Benaini, ina gau ilulu-ohona na dala tama lasi a guriguri bona anivaga mo."²²Idia na Galilea ai e nohova lalonai, Iesu ese ena hahediba memerodia e hamaorodia, eto, "Taunimanima Natuna na taunimanima imadia ai do baine henia hanai, bona idia ese do bae alaia mase bona dina ihatoinei do baine tore-isi." Ena hahediba memero lalodia na e hisihisi bada.²⁴Bena idia na Kaperanauma ai e kau neganai, tax gogo tauna na Petero dekena ela, eto, "Emu hahediba tauna ese pene rua tax danu e henimu eiava lasi?"²⁵Ia e haere eto "Oibe", Petero na ruma e lou henia neganai, Iesu e hereva matama bona eto "Oi be ede bamona o haeroamu, Simona? Ina tanobada pavapavadia ese be daidia edia amo e gogomu, a?" Natudia edia

amo eiava haida edia amo, a."²⁶Ia e haere, eto, "haida edia amo." neganai, Iesu ese e hamaoroa eto "Benaini natudia ediai na asi taravatuna!"²⁷To una na ita ese tax gogo taudia basie kara dika dainai Aola, davara ai kimai ba tahoa, bona gwarume ginigunana ba veria dae. Gwarume uduna na ba kehoa lalonai pene monina ta ba davaria. Bavabia bona tax gogo tauna ba henia, lau bona oi eda."Translation done and completed by: Ret/Dk. Lohia Gari on Thursday (18/05/23), time: 5.30 pm

18

¹Una nega ai hahediba na ema Iesu dekena, e tomava, "Bena daika be hereadae guba basileia lalonai?"²Iesu ese maragina ta e boiria dekena ela, bogaragidiai eha ginia, ³bona eto, "Na hamaoromui momokanimu, ela bona umui na ba helalo-kerehai bona maragidia hetomadia ai bola, umui na guba basileia lalonai basio raka vareai diba."⁴Una dainai, daika baine hahemanau (hahemaragi-maragi) ina maragina na heto, ia na hereadae guba basileia lalonai. ⁵Daika ese maragina ini bamona ta baine abiadae lau ladagu ai lau na eabigudaemu. ⁶A daika ese lau e abiabiraigumu maragidia ta baine hahekwakwanaia, ia na bema namo aiona ai nadi badana ta bae tauadae, bona davara dobuna ai ba hamaloaia. ⁷Tanobada madi ihabaina, badina be hekwakwanai gaudia daidiai! Badina unu hekwakwanai gaudia e maimu na bae vara gaudia, a hekwakwanai e havaramu taudia hari madi ihabaidia! ⁸Bema imamu ta eiava aemu ta ese baine hahekwakwanaimu neganai, emu amo ba utua oho bona ba negea. Namona be oi mauri ai ba raka vareai mai imamu dokona bona aemu dokona ida eiava dia namo e ara hanaihanaimu lahinai bae tahomu vareai mai imamu ruaosi bona aemu ruaosi ida. ⁹Bema matamu ese baine hahekwakwanaimu neganai, ba veria lasi bona emu amo ba negea. Mai matamu tamona ida mauri lalonai ba raka vareai be namo a gehena lahinai bae tahomu dobi mai matamu ruaosi ida be dia namo. ¹⁰Ba henahuatoho ini maragidia ta basio hadikadia. ¹¹Badina na hamaoromuimu gubai idia anerudia na nega iboudiai Tamagu gubai e nohomu vairana e itaiamu. ¹²Umui be dahaka o lalomu? Bema tau ta ena mamoe na sinahu-ta, bona tamona bema raka-oho (dobi), bona ia ese unu taurahani-ta-ahui taurahani-ta, basinema rakatanidia ororo ai bona bema lao e raka-oho mamoe bema tahua, a? ¹³Bema ia ese baine davaria neganai, na hamaoromui momokanimu, ia ese baine moale laia bada, a unu nohodia taurahani-ta-ahui ta ediai ena moale be maragi. ¹⁴Unu hetomana, ina na dia Tamamui guba ai e nohomu ena ura ini maragidia ta na baine mase. ¹⁵Bema tadikakamu ese baine karadika henimu, baola bona ena kerere na ba hamaoro laia, umui mo raruosi padamui ai. Bema ia ese baine kamoni henimu, oi vada o kwalimu tadikakamu enai. ¹⁶A bema ia na basine kamoni neganai, tau ta eiava tatau rarua ida baola, badina be tatau rarua eiava tatoi ududia amo hereva iboudiai do bae hamomokani. ¹⁷Bona bema ia na se uramu idia baine kamoni henidia, ekalesia oreana ba hamaoro laia. Bema ia na dounu se uramu ekalesia oreana baine kamoni henia, ia oi emu ai na idau bese tauna bona tax e gogomu tauna hegeregere. ¹⁸Na hamaoromui momokanimu, tanobada ai ba gui gaudia iboudiai gubai vada e hegui, bona tanobada ai ba ruha gaudia iboudiai guba ai vada e heruha. ¹⁹Na hamaoromui momokani, loumu, bema taumui rarua ese ina tanobada ai lalo tamoni gau ta ba noinoi laia hebou, Tamagu guba ai e nohomu ese vada baine havara henidia. ²⁰Badina be rarua eiava tatoi lau ladagu ai e heboumu gabudia ai, lau na idia dekedekediai. ²¹Bena Petero vada ema bona Iesu e hamaoroa, eto, "Lohiabada e, lau be nega hida tadikakagu ese baine hadikagu bona ena dika baina gwauidia? Ela bona nega hitu, a? ²²Iesu ese e hamaoroa eto, "Lau na dia na tomu ela bona nega hitu, a ela bona nega hitu-ahui hitu."²³Una dainai, guba basileia na hanua pavapavana ta na heto e urava ena hesiai taudia edia abitorehai vada baine gogodia. ²⁴Ena gogogogo vada e hematama neganai, hesiai tauna ta vada e mailaia dekena ena abitorehai na moni (talents) daha gwautao. ²⁵To imanai dia hegeregere ena abitorehai ihalouna, biaguna ese e haduaia ia na vada bae hoihoi laia mai adavana bona natudia bona ena kohu iboudiai ida, bona abitorehai davana vada bae heni. ²⁶Bena hesiai tauna vada e hetuitui biaguna vairanai, eto, "Biagugu e, nega do boma henigu, bona lau ese gau davadia iboudiai baina henimui." ²⁷Bena una hesiai tauna biaguna ese e bogaiahisi bada, e ruhaia-nege bona ena abitorehai danu e gwautao. ²⁸A una hesiai tauna e raka lasi bona bamona hesiai tauna ta e davaria, mai ena abitorehai denarii sinahu ta ia enai. Ia ese e dogoatao, gadona e gigia, eto, "Egu ai o abitorehai davana na a henigu," ²⁹Bena bamona hesiai tauna na ia vairanai e hetuitui bona e noia, eto, "Nega do boma henigu, bona lau ese abitorehai davana baina henimu lou."³⁰A hesiai tauna ginigunana na seura unu baine kara toma. Bena ia vada ela bona dibura ruma ai e tahoa vareai ela bona ena abitorehai davana baine heni lou." ³¹Una dainai, ia bamona hesiai taudia ese dahaka e vara gaudia e ita neganai, idia na iboudiai e badu dikadika. Idia vada ema bona e vara gaudia iboudiai baigudia e hamaorolaia. ³²Bena una hesiai tauna biaguna ese e boiria, bona e hamaoroa. 'Oi na hesiai tauna dikamu, emu abitorehai idoinai vada na gwautao badina be o noigu dainai. ³³Oi ese bamomu hesiai tauna danu basioma bogaiahisi, lau ese vada na bogamu hisi hegeregere. ³⁴Biaguna na e badu bona ihahisihisina taudia vada e henidia ela bona ena abitorehai idoinai davadia baine heni lou. ³⁵Hegeregere Tamagu gubai ese umui danu unu baine karamui toma. bema umui ta ta ese kudoumui amo tadikakamui edia dika basio gwautao."Translation done by: Mr. Peter English on Friday (18/08/23), time: 6.42pm. Ready for quality checking.

19

¹Iesu ese ini hereva e hadokodia neganai, ia ese Galileia vada e rakatania, bona ema Iudea kahana una na Ioridaena Sinavaina unukahana. ²Hutuma bada ese e gavaia, bona ia ese unusenai ai edia gorere e hanamodia. ³Farisea taudia ema ia dekena, ia itohona, e nanadaia eto, "Ina taravatu ai be maoro tau ta ese adavana vada baine hadihoa gau haida daidiai, a? ⁴Iesu e haere bona eto, "umui ese do so duahia una matamana amo e karadia tauna ese na vada e karadia tau bona

hahine, a?⁵Ia danu ma eto, 'Badina be inai, tau ta ese tamana bona sinana do baine rakatanidia bona adavana ida bae tamona, bona raruosi vada tauani tamona ai baela. ⁶Unu amo idia na dia rarua, to tauani tamona. Una dainai, Dirava ese dahaka vada e hahekapa na taunimanima ese basine hapararaia."⁷Idia ese e hamaorora, eto, "Vada dahaka dainai Mose ese e haganimai headava ihapararana pepana baia heni bena hahine vada baia siaia oho, a?" ⁸Ia ese e hamaorodia eto, "Emui kodou auka dainai, Mose ese e haduamui adavamui ba hadihodia. A matamana neganai amo dalana na dia unu heto." ⁹Lau ese na hamaoromuimu, daika ese adavana hahinena baine hadiho, dia heuda-hanai dainai, bona ta ma baine adavaia, ia na e heuda hanaimu; bona tau ese e diho hahinena ta baine adavaia, ia na e heuda hanaimu. ¹⁰Hahediba ese Iesu e hamaorora eto, "Bema tau mai adavana ida ediai na unu heto, headava na vada dia namo." ¹¹A Iesu ese e hamaorodia, eto, "Dia taunimanima iboudiai ese ina ahediba na eabia daemu, a unu e henidia taudia sibodia mo. ¹²Badina be helaga taudia haida na sinadia bogadiamo vada unu evara toma, bona haida be taunimanima ese vada eha helagadia, bona haida be sibodia Guba Basileia dainai sibodia helagadia e gwaurai. Daika ese ina hahediba herevana e abia daemu, vada baine abia dae."¹³Bena natudia maragida haida e mailaidia dekena, imana ai tubuadai baine daukau bona baine guriguri, a hahediba ese e gwau henidia. ¹⁴A Iesu eto, "Maragidia na aema dekegu, asio luludia, badina guba basileia na ini hetomadia edia." ¹⁵Ia imana maragidia tubuadai eatodia kau, bona una gabu amo vada e raka oho. ¹⁶Aitaia, tau ta Iesu dekena ema, bona eto, "Hahediba tauna e, lau be dahaka namona baina karaia bena mauri hanaihanai baina abia?" ¹⁷Iesu ese e hamaorora, eto, "Dahaka dainai oi ese o hamaorogumu gau namona be dahaka? Tamona sibona mo namo, a bema ouramu mauri ai ba vareai, taravatu ba badinaia,"¹⁸Tau ese e hamaorora, eto, "Edena taravatu?" Iesu eto, "Basio ala-ala, basio heuda hanai, basio henaohena, basi hahebade koikoi, ¹⁹tamamu bona sinamu ba matauraidia, bona dekemu tauna ba lalokau henia sibomu o helalokaumu hegeregere." ²⁰Eregabe tauna ese eha maorora, eto, "Ini gau iboudiai vada na badinadia. Lau be dahaka ai doini na dabumu?" ²¹Iesu ese e hamaorora, eto, "Bema oi na ouramu ba goevadae, aola, emu kohu idoidiai ba hoihoi lai, bona ogogami taudia bahenidia, bona oi na mai emu taga gubai; bona baoma, murigu ai ba raka." ²²A, eregabe tauna ese Iesu ena hereva e kamoni neganai, ia na mai lalohisi-hisina ida e raka oho, badina ia na mai ena kohu momo dainai. ²³Iesu ese ena hahediba e hamaorodia, eto, "Na hamaoromui momokanimu, taga tauna enai guba basileia lalona vareaina na auka. ²⁴Ma na hamaoromui loumu, kamela enai nila matuna vareaina be haraga, a taga tauna enai guba basileia lalona vareaina na auka." ²⁵Hahediba e kamoni neganai, idia na e hoa dikadika, eto, "Vada daika be mauri baine abia?" ²⁶A Iesu ese e raraidia bona e hamaorodia, eto, "Taunimanima edai, ina na basine vara diba, a Dirava enai gau iboudiai na bae vara." ²⁷Bena Petero e haere bona e hamaorora, eto, "Aitaia, ai na gau iboudiai vada a rakatanidia bona oi murimuai vada a raka. Ai be vada dahaka baiabi?"²⁸Iesu ese e hamaorodia eto, "Na hamaoromui momokanimu, laganai ihamatamatana ai Taunimanima Natuna ena hairai bada teronana ai baine helai neganai, umui dadia lau murigu ai o raka taumui, umui danu terona gwaute-rua ai bahelai, Isareala besena iduhu gwauta-ruaosi ba hahemaoro henidia." ²⁹Taunimanima iboudiai ese ena ruma e rakatani, eiava tadikakadia, eiava taihudia, eiava tamadia, eiava sinadia, eiava adavadia, eiava natudia, eiava tano lau ladagu dainai, tauna ese sinahu sinahu be abiamu bona mauri hanaihanai be abiamu. ³⁰A hutuma e guna taudia na so bae gabe bona gabe taunadia na do bae guna. Translation done by: Mr. Peter English on Friday (28/07/23), time: 9.30 am. Ready for quality checking.

20

¹Badina be guba basileia na tano biaguna ta na heto daika be daba matana ai e raka lasi gaukara taudia e boiridia ena vine imeana ai bae hagaukara. ²Idia ida e gwaubou davadia dina ta silver monina ta, gabeai ia ese ena vine imeana vada e siaidia lao. ³Adoata ai ma e raka lasi lou bona gaukara taudia haida hoihoi gabuna ai e gini kava gini kavava ai e itadia. ⁴Ia ese e hamaorodia eto, umui danu vine imeana aola, bona dahaka gau be maoro lau ese baina henimui. ⁵Bena idia na ela. Ma e raka lasi lou dina tubua bona dina gelona kahana, bona e kara guna hegeregere ai ma e kara lou. ⁶Adorahi kahana ai ma e raka lasi lou haida ma e gini kava gini kavava ai e davaridia. Bena e nanadaidia eto, "Dahaka dainai ina dina idoinai ini seniai o gini kava gini kavamu?" ⁷Idia e haere eto, badina be tau ta ese asine boirimai! Ia ese e hamaorodia eto, Umui danu vine imeana aola!" ⁸Dina e diho, vine imeana biaguna ese ena heitao tauna, e hamaorora eto gaukara taudia na a boiridia bona davadia ba henidia dokona amo bae hematama ela bona matamana! ⁹Bena adorahi kahanai e boiridia taudia e dae guna ta ta silver monidia ta ta e abi. ¹⁰A ela guna taudia e dae, idia banava eto idia danu silver monidia ta ta e abi. ¹¹Davadia eabi neganai, idia ese imea biaguna e maumauraia. ¹²Idia eto, "Gabe taudia bini hora tamona mo eme gaukara, a idia ida ome hahegegere mai, a ai be dina idoinai ame hekwarahi bona siahuna ese vada eme alamai."¹³A imea biaguna ese idia ta e haere henia bona eto, bamogu, lau ese oi asina hadikamu. Oi lau ida ta gwaubou silver monina ta bavabia ani? ¹⁴Dahaka oiemu na avabia bona emu dala ai aola. Lau na abia baina henimu gabe tauna na henia hegeregere oi danu unu baina henimu toma. ¹⁵Eiava lau asi egu maoro sibogu egu gau egu ura hegeregere basina karaia a? eiava oi matamu dika badina launa namo a? ¹⁶Una dainai gabe na baine guna, bona guna na baine gabe."¹⁷Iesu na Ierusalemala dalana e laova ai, ia ese hahediba gwauta rua e hakaudia siri, bena dala ai e hamaorodia eto, ¹⁸a itaia, ita na Ierusalemala ta hadara daemu bona taunimanima Natuna e hahelaga taudia bona itorena taudia be henidiamu idia ediai taona bae torea bona bae alaia mase, ¹⁹bona idau taudia bae henidia idia ese bae gonagonalai, bona bae kanudia, bona bae hasatauroa. A dina ihatoia ai ia na do baine toreisi lou."²⁰A Sebedeo natuna raruosi mai sinadia ida Iesu dekena ela. Hahine na ia vairanai e tomadiho bona gau ta enai e noia. ²¹Iesu ese e nanadaia eto, "Dahaka o uramu? Ia eto" Ahaganigu ini natugu raruosi bini ta imamu idibana ai bona ta imamu laurina ai bae helai emu basileia lalonai. ²²A Iesu e haere bona eto, "Oi na asi dibamu oi be dahaka o noimu. Lau baina inua keherena umui ese danu ba

inua a? "Idia e haere eto, "baia karaia diba." ²³Ia ese ma e hamaorodia eto, "Egu kehere na do ba inua, to imagu idibana ai bona imagu laurina ai bae helai igwauraidia na dia lau ese baina henimu, a tamagu ese vada eha hegaegaedia taudia na do baine henidia." ²⁴A gwauta-osi e kamona neganai, idia na tadikaka raruosi na e badu henidia. ²⁵A Iesu ese e boiridia bena eto, "Umui dibamui bese idauida edia lohia ese eha lohiadiamu, bona edia herea taudia ese e haganidiamu. ²⁶A una dala ai unu na basio laloa toma umui bogaragimui ai ini heto, ta umui bogaragimui ai e uramu baine lohia e tomamau ia na isiaimui baine lao heni, ²⁷bona ta e uramu bogaragimui ai baine guna ia na iboumui ai emui hesiai tauna ai bainela; ²⁸Taunimanima Natuna ema na unu heto dia hesiai mo baine lao heni, a isiadia baine laoheni, bona ena mauri baine heni hutuma baine hamauridia helaoreana." ²⁹Idia na Ieriko amo e raka lasi negana ai hutuma bada ese ia e gavaia. ³⁰A mata kepulu rarua dala isena ai e helaiva, bena idia ese Iesu e raka hanaiva ai harina e kamona, e boi dagu, eto, "Lohiabada e, Davida Natune e, ame bogamai hisi." ³¹A hutuma ese e gwau henidia, e hamaorodia basie hereva, to idia na e boi lou, eto "Lohiabada e, Davida Natuna e, ame bogamai hisi." ³²Iesu vada e gini bona e boiridia bona e hamaorodia eto, "Dahaka ouramu emui ai baina kara?" ³³Idia eto, "Lohiabada, matamai boma hapapa." ³⁴Bena Iesu ese e bogadia hisi, matadia e dau toho. Una horanai matadia vada e papa; bona ia murinai e raka. Translation done and completed by: RDk. Lohia Kohu on Monday (21/05/23), Time: 11.43

21

¹Iesu na ena hahediba ida e raka ela Ierusalem vada e kahirakahira bona Betefage ai e kau, olive ororona badinai, bena ia ese ena hahediba rarua e siaidia guna, ²e hamaorodia eto, vairada hanuana aola bena umui ese una hanuai doniki ta mai natuna ida e kwatudia ai ba davaridia, ba ruhadia bena lau dekegu ba hakaudia mai. ³Bema ta ese gau ta baine hamaoromui neganai, umui ese ba hamaorodia baoto "Lohiabada ese e ura henidiamu, bena una tau ese una horanai baine siaidia." ⁴Ina na vada e vara dahaka peroveta tauna ena hereva ihamomokanina eto, ⁵"Siona natuna kekenina a hamaoroa, aitaia, emu pava pava na oi e mai henimumu." ⁶Bena raruosi vada ela, Iesu ese e hamaorodia hegeregere nai e kara. ⁷Idia ese doniki bona natuna e hakaudia lao bena edia dabua dorudia ai e atodia bena Iesu latadia ai e helai kau. ⁸Hutuma bada ese edia dabua dala ai e laha, bona haida ese au rigidia au amo e utu bona dala ai e laha. ⁹Bena hutuma Iesu vairanai bona murinai e gavaia e lolo isi eto, "hosana Davdia natuna e maimu! Lohiabada ladana ai e maimu tauna aita hanamo! Atai doriva-dorivana ai hosana! ¹⁰Iesu na Ierusalem ai e kau, hanua taudia iboudiai e herou-heroua bona eto," ¹¹Ina ba dahaka?" ¹²Aru taudia e haere, eto, "Ina na Iesu peroveta tauna Nasareta Galileia amo vada e maimu!" ¹³Bena Iesu na dubu helaga ai e raka vareai, ia ese hoihoi taudia iboudiai e luludia lasi, moni e senisiva taudia bona pune e hoi taudia edia helai seadia e girodia hanai. ¹⁴E gwau henidia eto, "Vada e torea, egu ruma na guriguri rumana bae gwauraia, "A umui ese dadidadi taudia edia ruma ai ome halaoa." ¹⁵Bena mata kepulu taudia bona ae hedairiki taudia ia dekena ela dubu helaga ai, bena ia ese e hamauridia. ¹⁶A hahelaga taudia bona itorena taudia ese ena hoa karadia e karava e ita, bona memero dubu lalonai ai e lolo bona eto, "Hosana Davida natuna," idia na e badu dikadika. ¹⁷Idia ese e nanadaia eto, "Dahaka e herevamu o kamonaumu a? Iesu ese e hamaorodia eto, "Oibe! ¹⁸Bena Iesu ese e rakatanidia bona hanua badana amo e raka lasi ela Betania ai eha mahuta. ¹⁹Daba ai hanua badana e lou henia, ia na e hitoloa, ²⁰ia ese suke auna ta e itaia dala isena ai, e lao henia a gau ta se davarua rauna mo. Ia ese e hamaoroa eto, "Oi huahuamu basine dobi lou, ela hanaihanai." ²¹Ena hahediba ese e itaia, idia na e hoa dikadika, e hereva heheni eto, :ede bamona suke eme e marai vairani? ²²Iesu e haere eto, "Na hamaoromui momokanimu, bema mai emui abidadama bona basioma daradara, hari suke enai e vara hegeregere na mo basioma karaia, a ina ororo danu boma hagiania, "ba heraga bona davara ai ba henege dobi, bena unu bema vara toma. ²³Dahaka gau umui ese guriguri ai ba noi mai abidadamamui ida, vada bavabi." ²⁴Iesu na dubu helaga ai e raka vareai, hahelaga taudia badadia bona hanua taudia ia dekena ela, e hahedibava lalona ai, e nanadaia eto, "Edena siahua ai ini gau o kara bona daika ese ina siahua e henimu a? ²⁵Iesu e haere bona eto, "Lau danu umui henanadai ta ai na henimui, bena mani ba haere henigu bena lau danu ini gau na karadiamu siahuna na baina hamaoromui. ²⁶Ioane ena bapatiso be ede kahamo ema? Guba amo eiava taunimanima edia amo ema? Sibodia e hereva heheni eto, "bema baita gwaumu guba amo, 'Ia ese be hamaorodamu, dahaka dainai so kamona heniamu?" ²⁷A bema ita baitato, 'taunimanima edia amo' Aru taudia garidia baita gari, badina be idia iboudiai lalodiai e tomamu Ioane na peroveta tauna," ²⁸Una dainai idia ese Iesu e haere henia eto, "Ai na asi dibamai," bena ia eto, o lau danu ini gau na karamu siahuna na basina hamaorolaimuimu. ²⁹A umui dahaka o tomamu? tau ta na mai natuna rarua bena tau guna dekena ela bena eto, "Natugu, aola hari dina vine imeana ai ba hagaukara. ³⁰Ia na e haere bona eto, "lau na basinala," A gabeai lalona e haloua bena ela. ³¹Bena tau muritai dekena ma ela bona ruma e hamaoroa toma, ia na e haere bona eto, Lohiabada, bainala, A ia na sela. ³²Ina natuna raruosi edena be tamana ena ura e karaia? Idia eto, "tau guna? Iesu ese e hamaorodia eto, "na hamaoromui momokanimu, tax gogo taudia bona ariara hahinedia ese bae gunalaimui Dirava ena basileia lalonai. ³³Badina be Ioane na kara maoromaoro dalana ai dekemui ema, a umui ese na asio kamona henia. A tax gogo taudia bona ariara hahinedia ese e kamona henia. A umui, ena be o itaia, to umui na asio helalokerehai bona asio abia dae. ³⁴Sivarai hegeregere na ta ma a kamona tau ta, tano biaguna. Ia ese vine imeana ta e hadoa, maguna e ahu, vine imoilaina gurina e geia, hegima kohorona e hagini, bena imea ireguna taudia e habadinalaidia, bena hanua daudauna ta ela. ³⁵Huahua negana vada e kahirakahira, ia ese ena hesiai taudia na imea ireguna taudia dekedea e saidia lao ena vine anidia iabidia totona. ³⁶A imea ireguna taudia ese ena hesiai taudia e dabaidia tao, ta e dadabaia, haida e aladia mase bona haida nadi amo e hododia. ³⁷Ma imea biaguna ese hesiai taudia diagau e siaidia a imea ireguna taudia ese kara hegeregere ai idia ese e kara henidia. ³⁸Gabeamo, biaguna ese natuna korikorina idia dekedea e siaia lao, eto, idia ese

natuna bae matauraia.³⁸ A imea ireguna taudia ese natuna e itaia, e hereva heheni eto, dihina binai, aoma aitame alaia mase.³⁹ Bena idia ese e dabaia tao, imea amo e tahoa lasi bena e alaia mase.⁴⁰ Hari imea biaguna bainema negana ai, imea iregudia taudia be dahaka baine kara henidia? ⁴¹Lohia ese e haere henia eto, "Ia ese imea ireguna taudia dikadia baine aladia ore bena imea na ireguna taudia idaudia haida baine henidia, bena idia ese huahua negadia ai ena vine anidia ia dekena bae laohai?"⁴² Iesu ese e hamaoridia eto, "revareva helagana lalonai asio duahia a? Ruma ilarebana taudia ese e dadaraia nadina na daiguni nadina ai vada ela. Ina na Lohiabada, ena amo bona matadai ta itaiamu, ta hoamu?"⁴³ Una dainai na hamaoromuimu, Dirava ena basileia na emui amo do baine abia oho bona huahua baine havaraia besena baine henia.⁴⁴ Daika ina nadi latanai baine moru na baine makohi rohoroho. A tau ta baine kurea tao, baine pata rohoroho gahu na heto.⁴⁵ Hahelaga taudia badadia bona Farasia taudia ese sivarai hegeregedia e kamoni, idia ediba ia ese idia e herevalaidiava.⁴⁶ E hetahuva ia bae dabaia tao, to hma garidia e gariva, badina taunimanima ese e hagoreava ia na peroveta tauna. Translation done by: Ret/Dk. Lohia Kohu Lohia on Thursday (20/07/23), time: 1.30 am. Ready for quality checking.

22

¹Iesu ese ma palabore ai e haere henidia eto. ²Guba basileiana na pavapava tauna ta ese natuna dainai aria ta e karaia na heto. ³Ia ese ena hesiai taudia e siaidia baela, e vavedia headava ariana baema taudia bae boiridia, to idia na asie ura baema. ⁴Pavapava tauna ese ma ena hesiai taudia idaudia e siaidia, eto, "Na vavedia taudia a hamaorodia, "Aitala, egu aria na vada na hahegaegaea. Boromakau badana bona boromakau natudia baukadia vada e aladia, bona gau iboudiai na vada eha hegaehage. Aoma headava ariana aitala." ⁵To idia lalodia na gau idaudia ai bona e raka siri, ta ela ena uma gabudia, ta ma ela ena moni kara gaukarana." ⁶A e vavedia taudia haida ese pavapava tauna ena hesiai taudia na e dabaidia tao, hemarai karadia e kara henidia bona e aladia mase. ⁷Pavapava tauna na e badu bona ena tuari taudia e siaidia, unu e ala-ala taudia na e aladia mase bona edia hanua na e doua. ⁸Bena pavapava tauna ese ena hesiai taudia e hamaorodia eto, "Headava gaukarana na vada hegaegae to e vavedia taudia na dia nanamo (hegeregere). ⁹Una dainai aola dala badadia gabudia ai bena taunimanima momo o davaridiamu taudia na ba vavedia, headava ariana baema." ¹⁰Una hesiai taudia na ela dala badadia gabudiai bena unuseni ai e davaridia taudia e haboudia, taunimanima namodia bona dikadia. Una dainai headava rumana e vavedia taudia ese e hahonua. ¹¹To pavapava tauna ema bena e vavaedia taudia e itadia neganai, ia ese tau ta e itaia headava dabuadia na se ahedokolaia. ¹²Pavapava tauna ese e hamaorodia, "Bamogu, oi be edena dala ai ome vareai bona headava dabuana danu so ahedokilaia? To una tau na se haere." ¹³Bena pavapava tauna ese hesiai taudia e hamaorodia, eto, "Ina tau na aena bona imana a kwatudia bona ba tahoa vareai gabu diburanai, taitai bona ise e ririmu gabuna ai." ¹⁴Badina be taunimanima momoherea vada e boiridia to dia momo e abidia hidi." ¹⁵Bena Farasia taudia vada ela, Iesu bae idoia ena hereva lalonai. ¹⁶Bena idia ese e hadibadibadiava taudia bona Heroda ena orea taudia e siaidia Iesu dekena ela, idia ese Iesu e hereva henia, eto, "Ahediba Taumu e, ai dibamai oi na o momokanimu, bona oi ese Dirava ena dala na hereva momokani ai o hahedibalaiaimu. Taunimanima ta ena hereva ese oi asine halalo metaumumu badina be oi ese taunimanima oromadia asio itamu. ¹⁷Una dainai mani a hamaoromai, oi emu lalohadai be dahaka? Sisa "ena tax" bae heni be taravatu dodinai eiava lasi?" ¹⁸To Iesu ese edia karadika e dibaia bena eto, "Koikoi taumui, dahaka dainai lau o tohogumu?" ¹⁹Tax ba heni monina a haheita laigu. "Bena idia ese siliva monina ta Iesu e henia." ²⁰Iesu ese e hamaorodia, eto, "Ina na daika laulauna bona daika ladana?" ²¹Idia e haere eto, Sisa, (Kaisara) "Vada Sisa ena gau na Sisa ba henia, bona Dirava ena gau na Dirava ba henia." ²²Idia ese e kamonaia neganai e hoa. Bena idia ese e rakatania. ²³Una dina tamoni Sadusi (Sadukea) haida ema ia dekena, idia e gwaumu toreisi lou na lasi. Idia ese e nanadaia eto, ²⁴"Hahedibadiba tauna, Mose eto, "Bema asi natuna tauna ta baine mase, ia varahebouna tauna ta ese adavana na baine adavaia bena taumase natuna baine havaradia." ²⁵Ai lalomai ai na varahebou mamaruanedia hitu. Roboana e headava bena vada e mase. Asi natuna dainai. Adavana na tadina ese e davaia. ²⁶Bena tadina danu kakana enai e vara hegeregere ia ena e vara, ma varahebou tauna ihatoia enai danu, ela bona ihahituna enai danu. ²⁷Idia iboudiai e mase murinai, hahine danu e mase. ²⁸Toreisilou ai, unu varahebou tatau hituosi padadiai be edena tau be una hahine adavana? Badina be idia iboudiai ese e adavaia dainai?" ²⁹To Iesu ese e haere henidia eto, "Umui na o kerere, badina umui na revareva helagadia eiava Dirava ena siahu na asi dibamui. ³⁰Badina be toreisilou ai headava na lasi, idia na aneru bamodia guba ai. ³¹Mase taudia bae toreisilou lalonai, umui Dirava ese ehareva henimui herevana asio duahia, eto, ³²"Lau na Aberahamo ena Dirava, Isa'ako ena Dirava, bona Iakobo ena Dirava? Dirava na dia mase taudia edia Dirava to mauri taudia edia." ³³Hutuma ese ena hereva e kamoni neganai ena hahedibadiba e hoalaidia. ³⁴Farasia taudia e kamoni Iesu ese Sadusi taudia ududia e hakapu neganai, sibodia e hegogo, ³⁵idia ta na taravatu tauna ta ese e nanadaia, baine tohoa totona - ³⁶ahedibadiba tauna, taravatu lalonai hahegani badana be edena? Iesu ese e hamaorodia, eto, "Lohiabada emui Dirava ba lalokau henia mai kodumui idoinai, bona mai laumamui idoinai, bona mai lalomui idoinai, ³⁸ina na hahegani badana bona ginigunana. ³⁹Hahegani iharuana bona unuhetomana - Dekemu tauna ba lalokau henia sibomu o helalokau henimu bamona. ⁴⁰"Taravatu bona peroveta haheganidia iboudiai ini hahegani ruaosi ai e badimu." ⁴¹Farasia taudia dounu e hegogo lalonai, Iesu ese e nanadaia. ⁴²"Umui ese Keriso be ede o laloa tomamu? Ia be daika natuna?" Idia ese e hamaorodia, "Davida natuna." ⁴³Iesu ese e hamaorodia, "Matona edena dala ai Davida ese Lauma lalonai e gwaauraiamu Lohiabada, etomamu. ⁴⁴Lohiabada ese egu Lohiabada e hamaorodia, "idibagu kahanai a helai, ela bona lau ese inaimu na aemu ihadaina patana henunai baina atodia?" ⁴⁵Bema Davidia ese Keriso na e hatomamu 'Lohiabada' edena dala

23

¹Bena Iesu ese hutuma diagau bona ena hahediba memerodia e hereva henidia.²Ia eto, "Itorena taudia bona Farasia taudia na Mose ena helai gabunai e helaimu.³Una dainai dahaka eha-ganilaimuimu na ba karadia bona bavabidia dae. A dia idia edia gaukara dainai ba karadia badina be idia na herevamo e gwauraimu a karadia be asie karamu.⁴Idia ese maduna metaudia bona ihuadia danu metauna taunimanima na eha-hualaidiamu. A idia sibodia ese imadia kwaki-kwakidia amo asie uramu bae abidia-isi.⁵Idia na euramu taunimanima ese edia gaukara na ba itadia; edia hahelaga dabua dia bagudiai e halababadiamu, edia dabua rimudia danu e habadamu.⁶Aria negadiai helai gabudia badadia e urahenimu bona synagogue ai helai gabudia namodia e urahenimu.⁷Hoihoi gabudiai idia na e uramu taunimanima ese ba hanamodia-bada, bona ladadia na ba gwauraidia "Rabbi" taunimanima ese.⁸A umui na basie gwauraimui "Rabbi" badina emui hahediba tauna na tamona, bona umui be bamogu veridia.⁹Bona ina tanobadai ta basio gwauraimui Tamagu, badina umui Tamamui na tamona mo guba basileia ai.¹⁰"Hahediba tauna" ai basie gwauraimui, badina emui hahediba tauna na tamona mo Keriso.¹¹A daika be umui padamui ai na hereadae ia na umui emui hesiai merona.¹²Sibona e heimodaimu tauna na do baine hahemanau, a sibona e manauimu tauna na do bae imodaia.¹³A umui Itorena taumui bona Farasia taumui madi ihabaimui, koikoi taumui! Umui ese Guba basileia na o laoa-ahumu taunimanima edia amo. Badina umui sibomui danu asio uramu ba raka vareai bona e uramu ba raka vareai taudia o laodia-ahumu.¹⁴Itorena taumui bona Farasia taumui e koikoi taumui madi ihabaimui! Badina be hahine vabudia edia ruma oha-ogagamidiamu, a emui guriguri na oha-latadiamu taunimanima ikoilaidia, badina benai davana metauna na do bavabia.¹⁵Itorena taumui bona Farasia taumui koikoi taumui madi ihabaimui! Badina davara bona tano kaukaudia o laomu o uramu tau ta ba helalao kerehai iabina totona, bona obia ohomu neganai Gehena natuna ai o halaoamu bona umui e hereaimuimu nega harua.¹⁶Hahekau taumui matamui kepuludia ihabaimui! O tomava dubu helaga dainai e gwauhamatamu ta na asi anina. To dubu helaga golo na ai e gwauhamatamu tauna na ena gwauhamata do baine badinaia.¹⁷Umui na kavakava bona mata kepulu taumui! Edena be hereadae dubu helaga eiava golo una dubu e hahelagaiaimu a?¹⁸Bona ma o gwaumu ihaboulaina patanai e gwauhamatamu na asi anina. To latanai mia herahiana gauna ai ena gwauhamata baine badinaia.¹⁹Umui na kavakava bona mata kepulu taumui! Edena be bada herea herahia gauna eiava ihaboulaina patana una herahia gauna e hahelagaiaimu?²⁰Una dainai ihaboulaina patana dainai e gwauhamatamu tauna ena herahia gauna iboudiai daidiai e gwauhamatamu.²¹Dubu dainai e gwauhamatamu tauna na una dubu lalonai e nohomu tauna dainai e gwauhamatamu.²²Bona guba dainai e gwauhamatamu tauna na Dirava ena terona dainai bona e helaimu tauna dainai e gwauhamatamu.²³Itorena taumui bona Farasia taumui madi ihabaimui! koikoi taumui! Badina be umui ese minti bona anise bona cummin karoadia oha-gwautamu o harimu to dia taravatu ai kara badadia dalanai - hahemaoro, hebogahisi, bona kamonai ai. A ini gau na umui ese boma karadia bona asio ura ba karadia.²⁴Umui na hahekau taumui matamui kepuludia o uramu haida ba gunalaidia. Nahuamui ba toho Dirava enai nuru amo dimairi o hadonodiamu bema ranu o inumu ai, to kamelo na oha-donoamu²⁵Itorena taumui bona Farasia taumui, madi ihabaimui, koikoi taumui! Badina be umui na kehere bona mereki murimuridia mo hurimu a lalodiai be abi dadidadi bona lebulebu karadiai e honuhonudae.²⁶Farasia taumui mata kepulu taumui e! Emui kehere bona mereki lalodia ba hagoevadia guna bona murimuridia danu do ba goeva.²⁷Itorena taumui bona Farasia taumui e, madi ihabaimui, koikoi taumui! Badina be umui na eha-kurokuro mase garadia na heheto murimuridia roha kaudia na mai hairaidia, to lalodiai na mase taudia turiada ai e honu bona iboudiai mai mirodia.²⁸Unu hetomana danu murimuri roharohanai umui na e kara kara maoro-maoro taumui, na heheto, to lalomui na koikoi ese e hahonumui bona dika ai o honuhonudae.²⁹Itorena taumui bona Farasia taumui, madi ihabaimui, koikoi taumui! Badina be peroveta taudia edia oha-ginimu bona kara maoromaoro taudia edia gara o hairaidiamu.³⁰Umui na otomu, "Bema tamamai negadiai baiama noho ai na peroveta taudia raradia e hadiho taudia ida baiama gini hebou diba.³¹Una dainai, umui na sibomui o gwau hedinaraimu umui na dia peroveta taudia e aladia maseva taudia natudia.³²Umui ese tubumui tamamui e karava mauridia oha-gugurudiamu.³³Umui na gaigai, lavara natudia, Gehena hahemaurina amo be ede bo roho mauri tomamu, a?³⁴Una dainai aitaia, lau ese peroveta taudia baina siaidia bona aonega taudia bona Itorena taudia, haida na bo aladia masemu, haida na bo hasataurodiamu, bona haida na bo dadabadiamu synagogue lalodiai bona bo luludia lasimu hanua ta amo hanua ta.³⁵Bena iha hedinarainai kara maoromaoro taudia raradia ma tano ai baine hebubu na latamui ai baine diho Abela rarana amo ela Barachiah natuna Zechariah rarana daika be umui ese o laia mase, ia na dubu bona ihaboulaina patana padanai oha masea.³⁶Momokani waitani na hamaoromuimu ini gau iboudiai na ina uru latanai baine kau.³⁷Ieruselema e, Ieruselema e, oi ese peroveta taudia o aladia mase bona e siaidia taudia nadi ai o hododiava? Nega hida natumu do baina haboudia hekubou kokoroku hahinea ese natuna hanina henunai e goruataomu na heto to asio ura!³⁸Aitaia, emui ruma na eme hegigi-rohoroho emui ai.³⁹Badina be umui na hamaoromuimu umui ese lau na do basio itagu ina hari ela bona gabeai umui ba hereva baoto "Lohiabade ladanai e maimu tauna be namo." Translation done by: Ret/Dk. Lohia Gari on Saturday (15/07/23), time: 8.30 am. Ready for quality checking.

24

¹Iesu na dubu helaga amo e raka lasi, bena ena hahediba ia dekena ela dubu helaga rumadia e duanai. ²Iesu ese e hereva henidia, eto, ini gau o itamu a? Na hamaoromui momokanimu, nadi ta nadi ta latanai basine mia, iboudiai bae hegigi dobi.³Ia na Olive orornai e helai, ena hahediba ia dekena ela, e hereva henia hehuni, eto, Mani a hamaoromai hari gau be edena hora bae vara? Oi ba lou mai, tanobada dokana bona toadia be dahaka? ⁴Iesu ese e haere henidia, eto, nahuamui ba toho, tau ta ese baine koimu na garina. ⁵Badina be hutuma lau ladagu ai baema. Baeto, 'lau bina Keriso,' dia gagadoi bae koidia. ⁶To umui ese tuari haridia bona tuari badadia ba kamoni, lalomui basie daradara. Ini do bae vara guna, a dokona be vairai. ⁷Badina be bese ta, ta bae heala heheni, bona basileia ta ta ida bae tuari. Doe bona tano-marere bae vara gabu ta ta lalodiai. ⁸To ini gau iboudiai na mara hisihisi na matamana mo. ⁹Una negana ai taomui bae tore, bona bae alamui mase. Bae inai henimui bese iboudiai ese lau ladagu dainai. ¹⁰Bena bae hetao tore heheni bona bae heinai (heiri-heiri) heheni. ¹¹Peroveta taudia koikoidia diagau danu bae toreisi hutuma bae koidia. ¹²Kara havara danu bae vara rohoroho, bena diagu edia lalokau do baine keruma. ¹³A baine haheauka ela bona dokona tauna na do baine mauri. ¹⁴Basileia sivaraina namona na tanobada idoinai bae harorolaia, bese iboudiai ihadibalaia, bena dokona vada baine kau. ¹⁵Badina umui ese gau dika rohorohona, hekoku tania badina, Daniela peroveta tauna ese e hereva laia gauna, ba itaia, basinema gini gabuna ai do baine gini. ¹⁶Iudea ai bae noho taudia na ororo bae heau lao. ¹⁷Bona ruma guhina ai baine helai tauna na ruma lalonai basine raka vareai, ena kohu basine abi. ¹⁸Bona uma ai bae noho taudia na ororo bae heau lao baine gaukara tauna danu ena dabua iabina basine lou lao. ¹⁹Una negana ai rogorogo hahinedia bona mara roto hahinedia madi ihabaidia. ²⁰Ba guriguri, keru negana eiava dina helagai na basio heau. ²¹Badina be unu dinadai hisibada herea bae vara, Dirava ese tanobada e karaia negana amo hisi unuhetomadia asie vara ema bona harihari, gabeai unu hetomana ta basine vara lou. ²²Unu dinadai na basine gadoi, taunimanima ta basine mauri diba, to eabidia hidi taudia daidiai unu dinadai do baine gadoi. ²³Una negana ai baineto, a itaia, Keriso eiava? Umui basio kamoni. ²⁴Badina be Keriso koikoidia bona peroveta taudia koikoidia bae tore is toa bona hoa gaudia bae hedinarai, e abidia hidi taudia ihahekwakwanai dia. ²⁵Ba lalao tao, vada na hamaoromui gunamu, ²⁶Una dainai, bae hamaoromu baeto, 'Aitaia, ia na tano gagaena ai, 'to basiola, eiava' aitaia, ia na daiutu lalonai, to basio kamoni. ²⁷Badina be kevaru na heto dina dae kahana amo e kevarua isimu ela bona dina diho kahana ai e hedinaraimu, Taunimanima Natuna bainema danu unu baine heto. ²⁸Badina be mase tauanidia e miamu gabuna ai galo bae hebou. ²⁹Una dikadika baine ore murinai dina do baine dibura, hua danu basine tara, hisiu guba amo bae moru, bona guba siahudia bae heude-heude. ³⁰Bena Taunimanima Natuna toana guba ai baine hedinarai, una negana ai tanobada besedia iboudia ai bae tai, badine be Taunimanima Natuna bae itaia, ori latanai bainema, mai siahu badana bona mai hairana ida. ³¹Bena ia ese ena aneru baine siaidia, kibi regena badana ida e abidia hidi taudia lai haniosi gabudia amo, bona tanobada dokona ela bona guba dokona amo, bae gogodia. ³²Palabore herevadia amo ba diba, tuhutuhuna amo e varamu, rauna e papamu, vada ba diba lahara be kahira-kahiramu. ³³Badina bunai umui danu ini gau bae vara ba itadia bona ba diba ia na eme kahiria-kahiria, iduara badibadinai. ³⁴Na hamaoromui momokanimu, ina uru basine ore ela bona ini gau iboudia ai bae vara. ³⁵Guba bona tanobada bae ore, a Dirava ena hereva na basine ore. ³⁶Una dina, bona hora, ta asi dibana, guba anerudia danu asi dibadia, natuna danu asi dibana, Dirava sibona mo dibana. ³⁷Noa negana hegeregere, Taunimanima Natuna ena mai negana ai unu baine heto. ³⁸Badina una negana ai abata do se kau ai, idia na e anianiva, e inuina, e headavava, ema bona Noa lagatoi ai e gui. ³⁹Matadia asie kani ema bona abata e utu dae bena iboudiai e mase. ⁴⁰Una negana ai rarua-rarua bae noho, ta baine hekoko, ta baine noho. ⁴¹Hahine rarua uit igwadana nadina bae giroa, ta baine hekoki, ta baine noho. ⁴²Ba gima, badina be emui Lohiabada bainema negana asi dibamui. ⁴³Ina, ba diba, ruma biaguna na bema diba guna edena negai hena tauna bema mai, ia na bema hegaegae, bena ena ruma basinema darea. ⁴⁴Bena umui danu ba hegaegae, badina asi dibamui horanai, Taunimanima Natuna bainema. ⁴⁵Daika be hesiai tauna, kamoni bona kara maoromaoro, ena ruma biaguna bona aniani negadai memero adia aniani baine henidia? ⁴⁶Bena biaguna bainema negana baine davarua unu e kara tomamu tauna be namo. ⁴⁷Na hamaoromui momokanimu ena kohu idoinai ireguna tauna ai baine halaoa. ⁴⁸A hesiai tauna dikana lalona baine hadaia, biaguna vada e halahemu. ⁴⁹Bena ia ese biaguna baine dadabadia, kekero taudia ida baine aniani bona baine inuina iavara. ⁵⁰Una hesiai tauna na se lalao dinana ai biaguna baine gini dae. ⁵¹Bena baine utua sisi, koikoi taudia bogaradia ai gabunai baine henia, unusenai bae tai, gadigadidia bae hahedai. Translation done by: Dkh. Konio Kila on Tuesday (01/08/23), time: 11.08 pm. Ready for quality checking.

25 ¹Guba basileia hahegeregere na ulato gwauta bamodia, edia lamepa e abi bena ela headava gabuna bae hedavari henia. ²Ulato laima be mai aonegadia, ulato laima be asi daradia. ³Badina be ulato asi daradia edia lamepa e abi kau negana, idia ese lamepa diaranudia na asi e abi kau. ⁴To ulato mai daradia ese lamepa bona diaranudia e abi kau iudalaidia gaudia ai. ⁵Headava uahuna ena ginidae do e halaheva lalonai, ulato iboudiai vada e mahuta. ⁶To hanuaboi bogaraginai tai regena ta e dae, A itaia. Headava uhauna! Aola ba hedavari henia. ⁷Ulato asi daradia ese mai aonegadia e hamaorodia, "Emui diaranu taidia ai a henimai badina ai emai lamepa na vada e bodomu. ⁸To ulato mai aonegadia e haere, eto, "Diaranu na dia hegeregere ai bona umui edai, namona na aola diaranu e hoimu taudia dekedie bena emui haida ba hoi." ⁹Idia ela diaranu bae hoi lalonai headava uahuna vada ema, bena e hegaegae taudia na ia ida vada ela headava ariana gabuna, bona iduara danu vada e koua. ¹⁰Gabeai hari ulato haida na ema bena etomava, "Biagumai, biagumai, ai daimai ai do a kehoa." ¹¹To ia na e haere bena eto, "Na hamaoromui momokanimu, asi dibagu umui." ¹²Una dainai ba gima, badina umui na asi dibamui dinana bona horana. ¹³Badina ina na e kara tau ta e ha laolaomu. Ena hesiai ilaohenina taudia e boiridia bena ena taga na e henidia. ¹⁴Ta be talent laima e heni,

ta be ma talent rua e henia, ta be ma talent tamona e henia. Ia ese edia goada hegeregere nai e henidia hagau, bena asi vanahana vada ena laolao ela. ¹⁶Talent laima e abia tauna na ela ena talent e ha hoihoilai bena unu amo talent laima na e davari. ¹⁷Unuhetomana, talent rua e abi tauna danu talent rua e davari. ¹⁸To talent tamona e abia hesiai lao heni tauna na e lao siri, tano ai guri ta e geia, bena biaguna ena moni na e hunia. ¹⁹Nega daudau murinau unu hesiaiaoheni taudia biagudia na e loumai bena ema idia ida ena moni daladia baine heato namonamo. ²⁰Talent laima e abi hesiaiaoheni taunana na ema bona talent laima ma e mailai. Ia eto, "Biagugu oi ese talent laima o henigu. To aitaia, lau ese talent laima ma na davari. ²¹"Biaguna ese e hamaoroa eto, "O kara namonamo, hesiai lao heni tauna namomu bona mai kamonaumu! Oi na gau dia momo inaridia ai na mai kamonaumu. Lau ese gau momo ita taodia tauna ai na atomumu. Biagumu ena moale lalonai a vareai. ²²Talent rua e abi hesiaiaoheni tauna na ema bena eto, "Biagugu, oi ese talent rua o henigu. To aitaia, lau ese talent rua ma na davari. ²³Biaguna ese e hamaoroa eto, "O kara namonamo, hesiaiaoheni tauna namomu bona mai kamonaumu! Oi na gau dia momo inaridia ai na mai kamonaumu. Lau ese gau momo ita-taodia tauna ai na atomumu. Biagumu ena moale lalonai a vareai. ²⁴Talent tamona e abi hesiaiaoheni tauna danu ema bena eto, "Biagugu, dibagu oi na tau aukamu ta. Oi ese asio hadohado gabudiai o geigeimu, uje asio nege gabudiai o taboromu. ²⁵Launa na gari dainai na lao siri bena emu talent na tano lalonai na hunia. Aitaia gauna oina, oi emu. ²⁶To biaguna ese e haere henia eto, 'Oina dia tau namona bona hesiku tauna, oi be mai dibamu launa na geigeimu asi na hadohado gabudiai bona na taboromu uhe, asi na nega gabudiai. ²⁷Una dainai, oi ese una moni na bank ai boma balaiaoheni bena egu loumai ai mai atokauna ida bama abialou. ²⁸Una dainai, ina tau ena amo talent na avabia oho bena ena talent gwauta tauna a henia. ²⁹Badina be mai edia gau taudia iboudiai na gau haida ma bae henidia - bae henidia badabada danu. To asi ena gau tauna ena amo danu, dahaka gau be enai na ena amo bae abia oho. ³⁰Ena hesiaillao tauna bonegitana na a tahoa lasi gabu diburana lalonai, taitai bona ise eha-gariridiamu gabunai. ³¹Taunimanima Natuna bainema mai hairaina ida bona ena aneru logora ida, ia na ena terona mai hairaina latanai baine helai. ³²Tanobada hanuadia idauida iboudiai ia vairanai bae hegogo, bena ia ese taunimanima baine hapararadia, mamoe eregumu tauna ese mamoe e kokidiamu nani edia amo bamona. ³³Ia ese namona imana idibanai baine atodia, to nani na laurina ai. ³⁴Bena Pavapava ese imana idibana taudia baine hamaorodia, "Aoma, Tamagu ese e hanamomui taumui, Tamagu ese tanobada e hadaia matamatana negana amo e hahegaegaea basileiana, na bavabia. ³⁵Badina be e hitologuva, agu aniani o heniva; ranu e maseguva, ranu o heniguva; asi dibamui lau to o abigu daeva, ³⁶asi dabuagu bena dabu o hakara laigu; na gorere bena o regugu, dibura- ruma ai na nohova bena o maiva dekegu. ³⁷Bena karar maoromaoro taudia ese bae heaere henia, baeto, "Lohiabada, edena nega ai a itamu e hitolomumu bena aubumu? Eiava asi dabuamu bena dabu a hakara laimu? ³⁸Bona edena nega ai a itamu ideau tauna bena abimudae? ³⁹Bona edena nega ai aitamu e gorere mu eiava dibura ruma ai bena dekemu avasi? ⁴⁰Bema Pavapava ese baine haere henidia baine eto, 'Na hamaoromui momokanimu, umui ese o kara karadia ini tadikakagu, asi e duahidiamu taudia ta enai, umui ese na lau daigu ai o kara. ⁴¹Bena ia ese ma laurina kahana taudia baine hamaorodia, "Dekegu amo a siri, e hadikamui taudia, se bodomu lahina lalonai a vareai; diabolona bona ena aneru daidiai e hahegaegaea lahina, ⁴²badina be e hitologu, to agu so heni asina ani; ranu e masegu to ranu asio e henigu asina inu; ⁴³idau gabu taugu so abigudae; asi dabuagu to so hadabua laigu; na gorere bona dibura ruma ai, to asio haerogu. ⁴⁴Bena idia na bae haere bona baeto, 'Lohiabada, edena nega ai hitolomu ai a itamu, eiava ranu e masemu, eiava idau taumu, eiava asi dabuamu, eiava o gorere, eiava dibura ruma ai, bena asia haeromu? ⁴⁵Bena ia ese baine haere henidia baineto, 'Na hamaoromui momokanimu, umui ese asi ladana taunimanima na ta unu so kara henia toma bamona, lau danu unu so kara henigu toma. ⁴⁶Idia na hisihisi hanaihanai ai bae vareai, to kara maoromaoro taudia na mauri hanaihanai ai bae vareai. Translation done by: Ev.Ret/Dk. Arua Taravatu on Monday (17/07/23), time: 3.43pm. Ready for quality checking.

26

¹Iesu na unu hereva iboudiai eore, bena ia ese ena hahediba e hamaorodia, eto, ²Dibamui vainana-nagai lagau-hanai ariana bae karaia, una neganai Taunimanima Natuna taona bae torea bae hasatauroa. ³Bena hahelaga taudia, bona hanua tau-badadia ese hahelaga tauna badana, ladana na Kaiafa, ena ruma ai e hebou. ⁴E henega, dibaka karadia amo Iesu bae dabaia tao bae alaia mase eto, ⁵To idia eto, dia aria dinadia ai, aru taudia bae helogo-helogo na garina. ⁶Iesu na Betania ai, Simona, lepera tauna, ena ruma ai. ⁷Bena hahine ta ia dekena ela, nadi kavabuna ta e abia kau, lalonai na dehorona namo hereana, davana bada gauna: Bena Iesu egedihona ai hahine ese dehorona e horolaia. ⁸Ena hahedia ese e itaia, bena e badu, eto, dahaka dainai ina dehorona e negea kavamu? ⁹Bema hoia, moni dia gau bema abi, bena ogogami taudia bema henidia. ¹⁰Iesu na dibana, bena e hamaorodia, eto, dahaka dainai o maumau heniamu. ¹¹Ogogami taudia be nega idoidiai dekemu ai nonoho. Bena ba ura negadia ai vada baha namodia. A lau be nega idoidiai basina noho. ¹²Ina dehorona amo taugu vada eme dahua hegaegae, igurigu totona. ¹³Na hamaoromui momokanimu, ina sivarai namona bae harorolaia gabudia iboudiai tanobada hegege-madai. Hari eme karaia karana bae gwauraia ia ihelalolaina. ¹⁴Bena gwauta rarua tauna ta, ladana na Iuda Isakariota, hahelaga taudia dekedea ela. ¹⁵Eto, taona bama torea, dahaka boma henigu. Bena idia ese siliva monidia toi-ahui e henia. ¹⁶Una negana ela ia ese taona itorena negana namona e tahuava. ¹⁷Asie hatubua flaoana ariana dinana gini-gunana, Ahedibana Iesu dekena ela. E nanadaia, eto, edeseni ai lagau-hanai baia karaia hegaegae bena bavania. ¹⁸Bena ia na e haere, eto, hanua aola, tau ta dekenai ba hamaoroa, baoto, hahediba tauna na e tomu egu nega vada eme kahikahi egu hahediba ida lagau-hanai na emu rumai baia ania. ¹⁹Bena hahediba na Iesu ese e hamaorodia hegeregere na karaia, lagau-hanai ariana vada e karaia hegaegae. ²⁰Adorahi ai, ia na ena hahediba gwauta-raruosi ida e ege diho. ²¹Bena e anianiva negana ai ia eto na hamaoromui momokanimu, umui ta ese taogu baine tora. ²²Idia na lalodia

e hisihisi, bena ta ta ese e nanadaia, eto, Lohiabade e, ina lau a?²³ Ia e haere, eto, lau ida nau tamona ai adau dobimu tauna ese lau taogu baine torea.²⁴ Taunimanima Natuna vada be laomu, e tore laia hegeregere, A taunimanima Natuna taona itorena tauna madi ihabaina, una tau basinema vara hari namo.²⁵ Bena Iuda, tao-tore tauna, ese e nanadaia, eto hahediba taumu, ina lau a? Iesu eto, o ena vada o gwaumu.²⁶ Idia na e anianiva lalonai, Iesu ese flaoa atagana ta e abia, e hanamoa bena e bitua, ena hahediba e henidia, eto, avabia avania, lau taugu binai.²⁷ Ma kehere ta ea baia, e hanamoa, e henidia eto iboumui ai a inua;²⁸ Badina be ina na lau raragu, herohemaino rarana, hutuma daidiai baine hebubu, dika igwautaoa.²⁹ Na hamaoromuimu, vine ranuna do basina inua lou, ela bona dinana baine kau lau umui ida matamatana baita inua Dirava ena basileia lalonai.³⁰ Idia na ane e abi vaitani, bena e didi lasi, olive ororona ela.³¹ Bena Iesu ese e hamaorodia, eto, iboumui ai lau daigu ai ba hekwakwanai badina be ini e torea toma. Mamoe iregudia tauna baine gwadaia bena mamoe vada bae karoho.³² A lau baina tore isi lou, bena baina gunalaimui Galileia ai.³³ Petero ese e haere henia, eto, ena be taunimanima iboudia ai oi daimu ai bae hekwakwanai, to lau na lasi.³⁴ Bena Iesu ese e hamaoroa, eto, na hamaoromui momokanimu, hari ina hanuboi, kokoroku do basine tai oi ese hatoi lau ba goregu.³⁵ A Petero eto, ena be oi idia baita mase hebou, to lau oi na basina goremu. Ena hahediba iboudia danu unu mo e gwau toma.³⁶ Iesu na idia ida gabu ta ai e lasi, ladana Getesemane bena ia ese ena hahediba e hamaorodia, eto, iniseni ai ba helai: lau do baina ha guriguri.³⁷ Bena ia ese Petero bona Sebedeo natuna raruosi e hakaudia siri, bena laumana e daure, darana e doko.³⁸ Bena e hamaorodia, eto, lau na lalogu eme hisihisi bada, mokona name mase: iniseni ai ba noho, baita gima.³⁹ Taina ma e raka lao, bena tano ai e goru parapara, e guriguri, eto. Tamagu e, bema mai dalana ina kehere na egu amo boma abia oho: to dia lau egu ura, oiemu ura hari.⁴⁰ Ena hahediba dekedie e lou lao, mahutadia ai e davaridia bena ia ese Petero e gwau henia, eto, be asi goadamui hora tamona mo lau ida baitama gima a? ⁴¹Ba gima, ba guriguri hedibagani ai ba vareai na garina. Laumana na e uramu a tauanina na eme manoka.⁴² Nega iharuana ma e raka lao, eha guriguri, eto, Tamagu e, ina kehere iabi-ohona readia asi dalana dahaka, ela bona baina inua; emu ura baine guguru.⁴³ Ma e lou lao dekedie, mahutadia ai ma e davaridia, badina be matadia e mahutava.⁴⁴ E rakatanidia, e lou ela, nega ihatoia ma eha-guriguri, ena guriguri herevadia gunadia ma e gwaurai lou.⁴⁵ Ma e lou lao, ena hahediba dekedie e hamaorodia, eto, madi vada a mahuta, lagamui avani vadaeni, negana vada eme kahira-kahira Taunimanima Natuna na dika taudia imadiai be atoamu.⁴⁶ Be, o tore, aitala, taogu itorena tauna na e maimu.⁴⁷ Ia dounu e herevava ai, Iuda, gwauta-rarua tauna ta, e gini dae, hutuma bada ida, mai edia dare bona mai edia kareva: Hahelaga taudia bona hanua tau-badadia ese e siaidia taudia bunu.⁴⁸ Tao-tore tauna ese toa ta e henidia guna, eto, baina harahua tauna gauna bunai: ba dabaia tao.⁴⁹ Bena ia na Iesu dekena e raka kahi lao, eto, hahediba taumu e, ba mauri, bena e harahua.⁵⁰ Iesu ese e hereva henia, eto, henamo e, ikarana totona oma, karana vada a karaia. Bena idia ese Iesu imadia ai e dau henia, e dabaia tao.⁵¹ Iesu ena oreo tauna ta ese imana e dau tari ena dare e veria lasi hahelaga tauna badana ena hesiai tauna ta e tarai, taiana e utua oho.⁵² Bena Iesu ese e gwau henia, eto, emu dare na gabuna ai avatoa lou. Badina be dare e abi taudia iboudia ai na dare amo do bae mase.⁵³ Emu lalo-hadai be lau asi siahugu a, Tamagu bama noia bena ia ese aneru oreadia gwauta-rua, ma haida bema siaidia lau idurugu.⁵⁴ To unu bema heto, revareva helaga na ede bema momokani toma. Vada e torea ini baine hekara toma.⁵⁵ Una negana ai Iesu ese hutuma e gwau-henidia, eto, umui na mai daremui bona mai karevamui ida lau idabai-taogu oma. Dadidadi tauna idabai taona boma mai na heto. Dina iboudia lau na dekedekemu ai na helaiva bona na hahedibava, dubu helaga lalonai, to asio dabaigu tao.⁵⁶ A ini gau iboudia vada e vara, peroveta taudia ese e tore herevadia ihamomokani laidia bena ena hahediba iboudia ese e heautania.⁵⁷ Bena Iesu e dabaia tao taudia ese hahelaga tauna badana Kaiafa dekena e dabua lao. Unuseni ai itorena taudia bona hanua tau-badadia vada e hebou.⁵⁸ Petero ese e gavaia, to mai padana, ela bona hahelaga tauna badana ena ruma maguna lalonai e raka vareai hesiai taudia ida e helai hebou. Una kara dokona be dahaka baine e ita eto.⁵⁹ Bena hahelaga taudia bona kaunsil taudia iboudia ese hahebade koikoi taudia e tahudia malakamalaka ialana badina bae davarua eto.⁶⁰ Hahebade koikoi taudia diagau e toreisi to ialana badina ta asie davarua ela bona koikoi taudia rarua ma e toreisi, eto,⁶¹ Ina tau e hereva, eto, lau na mai siahugu Dirava ena dubu helaga baina rohoa, bena dina toi muridiai ma baina haginia lou.⁶² Bena hahelaga tauna badana e tore isi e nanadaia, eto, oi so herevamu a? Ini edia hahebade herevadia be dahaka? ⁶³A Iesu na asi regeregena, bena hahelaga tauna badana ese ma e hereva henia, eto, mauri Diravana ladana ai na hagamumu: A hamaoromai, oi na Keriso, Dirava natuna, eiava? ⁶⁴Iese ese e haere henia, eto, o ena vada o gwaumu. Ina danu ma aina hamaorolaimui: Taunimanima Natuna do baitaia, siahu imana idibana ai baine helai bona guba oridia ai bainema.⁶⁵ Bena hahelaga tauna badana ese sibona ena dabua e dare, eto, Dirava ihadikana herevana vada e gwauraiamu, ma dahaka hahebadena ta tahuamu a? Dirava ihadikana herevana vada eme gwauraia ome kamonai.⁶⁶ Dahaka o tomamu? idia e haere, eto, baine mase hari namo.⁶⁷ Bena idia ese ia vaira huahuana e kanudia e tutua e pataia ahu bena eto,⁶⁸ Keriso e, a hamaomai, daika ese e tutumumu.⁶⁹ Petero na murimuri ai, magu lalonai e helaiva bena hesiai hahinena ta dekena ela, eto, ina oi danu Iesu, Galileia tauna o bamoava ani? ⁷⁰To ia na iboudia vairadiai e hegore, eto, emu hereva na lalogu seme parara.⁷¹ Ia na e raka oho, ela ikoukou badibadinai, ma hahine ta ese e itaia bena dekedekena taudia e hamaorodia, eto, ina tau danu Iesu Nasareta tauna e bamoava.⁷² Bena ia ere dika, e hegore lou, eto, una tauna asi dibagu.⁷³ Asi vanahana una gabu ai e gini taudia na Petero dekena ela, eto Momokani, oi na idia ta badina be gadomu ese e hahedinaraimumu.⁷⁴ Bena sibona vada e heuduguirai, ere dika, eto, una tau lau asi dibagu, bena kokoroku vada e tai.⁷⁵ Bena Petero ese Iesu e gwauraia herevana vada e helalolaia une, eto, kokoroku do basine tai, oi ese hatoi ba goregu, bena e raka lasi, e tai dika dika.

Translation done by: Dk. Karoho Kila on Wednesday (19/07/23), time: 4.17 pm. Ready for quality checking.

27¹Daba e rere, hahelaga taudia bona hanua tau-badadia e hebou Iesu ialana urana. ²Bena e guia, e hakaua lao, Pilato gavana tauna dekenā. ³Iuda, tao tore tauna, ese Iesu e itaia, ia ese vada e henidia bena e helalo, hari silver monidia toi-ahui osi e lou lai. Hahelaga taudia bona tau badadia e henidia lou, ⁴eto, vada na kara dika, asi ena kerere tauna taona vada na torea. "A idia eto, ai ese a? oi sibomu. ⁵Ia ese silver monidia na dubu helaga lalonai e taho vareai. Bena e raka oho, ela sibona e hahemata. ⁶Bena hahelaga taudia ese silver monidia e abi. eto, dia namo bobou ai baita todia, badina ina na rara monidia. ⁷E hebou laia, bena ro ikarana tauna ena tano e hoilaia, idau bese taudia iguridia gabunai e halaoa. ⁸Una dainai, una tano ladana e hatoa "rara tanona" ema bona hari. ⁹Unu amo Ieremia, peroveta tauna, ena hereva vada e momokani, eto, silver monidia toi-ahui na abi, Isaraela taudia ese davana e gwauraia tauna davana. ¹⁰Uro ikarana tauna ena tano na hoilaia Lohiabada e e hamaorogu hegeregere. ¹¹Iesu na gavana vairanai e gini bena gavana ese e hamaoroa, eto, oina Iuda taudia edia pava-pava eiava? Iesu eto, ena vada o gwaumu. ¹²Bena hahelaga taudia bona tau badadia ese ma e habadelaia, to ia na se haere. ¹³Bena Pilato, eto, hahebade herevadia momo-herea e habade laimumu o kamonaumu a? ¹⁴To Iesu na se haere, hereva ta se gwauraia badina gavana na e hoa. ¹⁵

¹⁶Una negana ai tauta na dibura rumai e nohova ladana na Baraba, una tau harina na bada. ¹⁷Bena idia na e hebou vaitani neganai, Pilato ese e hamaorodia, eto, daika o ura heniamu baina ruhaia nege, Baraba eiava Iesu e gwauraia Keriso. ¹⁸Badina Pilato na dibana idia na e badu dika-dika va dainai taona e torea. ¹⁹Pilato na hahemaoro gabunai helainai adavana na ena hereva e siaia lao dekenā ai, eto, una kara maoro-maoro tauna enai na gau ta basio karaia badina be hari dina ai na nihi egu nihi ai hisi badana ese e abigu ia dainai. ²⁰A hahelaga taudia bona tau badadia ese aru taudia lalodia e ani. Baraba iruhana bona Iesu iala-masena bae gwaurai. ²¹Bena gavana ese e hamaorodia eto, idia raruosi be daika baina ruhaia nege emui idia eto, Baraba. ²²Bena Pilato ma e hereva, eto, O Iesu Keriso e gwauraia be ede baina tomaia? Idia iboudiai e haere, eto, ba hasatauroa. ²³Pilato, eto, be ena kerere be dahaka. A idia na e lolo lalo-dika eto ba hasatauroa. ²⁴Una dainai Pilato lalona e parara, ena hereva na se goada, bona edia helogo-helogo e habadaia dainai ranu e abia aru tadia vairadiai imana e huri, eto, ina kara maoro maoro tauna rarana na dia lau egu ai to umui emui ai. ²⁵Idia iboudiai e haere, eto, ia rarana na ai emai ai bona natumai ediai. ²⁶Bena ia ese Baraba e ruhaia nega A Iesu ba eabia e henidia, bae hasatauroa. ²⁷Bena gavana ena tuari taudia ese Iesu e hakaua lao, edia gima rumana lalonai bena edia oreā taudia iboudiai e haboudia ia dekenai. ²⁸Idia ese ena dabua e kokia oho. Dabua kakakakana e hakaralaia. ²⁹Bona havava gauna ginigini eha matakaia ia kwarana e atoa kau: sirihō auna ta danu imana idibana ai e hakaualaia. Bena tuidia eha dai, e toma henia diho kokoi, eto, Iuda Pavapavana e! ba mauri! ³⁰Bena e kanudia bona hari sirihō e abihāia, kwarana e kwadilaia. ³¹E kirikiri laia vaitani, bena dabua kaka-kaka na e kokia oho, ena dabua korikorina me a hakaralaia. Bena e hakaua lao bae hasatauroa. ³²E raka lasiva ai, Kurene tauna ta e davarāia, ladana na Simona. Bena e hamaoroa Iesu ena satauro baine huaia. ³³Gabu ta ai e lasi, ladana na Golgota. Anina na kwarā koukouna tanona. ³⁴Unuseni ai vine ranuna na muramura ida e buloa e henia, baine inua. To e malaia toho inuna se ura. ³⁵Bena e hasatauroa ena dabua e hari bona e gadara lai. ³⁶Bena e helai diho, e nari. ³⁷Ia kwarana daenai idia ese hahebade herevana e kapaia. Ini e torea toma: Ina na Iesu, Iuda Pavapavana. ³⁸Ia ida nega tamona heano-henao taudia rarua e hasataurodia. Ta idibana kahanai ta laurina kahanai. ³⁹E raka hanai taudia ese e hereva dika henia, kwaradia e davedave. ⁴⁰Eto, I! dubu helaga ba rohoa ma dina toi ai ba haginia lou taumu. Sibomu hahemaui, oi Dirava natuna o tomamu satauro amo boma diho. ⁴¹Hahelaga taudia bona itorena taudia bona tau-badadia ese danu e kirikiri laia. ⁴²Ia na idau taudia e hamauridiava, matona sibona se hahemaui. Ia na Isaraela pavapavana, harihari satauro amo aine diho, bena baita abidadama henia. ⁴³Ia ese Dirava e abidadama heniava; Dirava ese bema ura henia, bema hamauria: Badina ia eto, "Launa Dirava Natuna. ⁴⁴Henao-henao taudia raruosi ia idia e hasatauro dia taudia, ese unu e kirikiri laia toma. ⁴⁵Dina tubu amo dibura ese gabu idoinai e laoa-ahu ela bona ado e rahi. ⁴⁶Bena adorahi sisivana Iesu e lolo, eto, Eloī, Eloī lama sabaktani, anina na egu Dirava e, egu Dirava e, dahaka dainai ome rakatanigu. ⁴⁷Unuseni ai e gini taudia haida na kamona, bena, eto, ia na Elia e boi heniamu. ⁴⁸Bena ta e heau lao, puta ta eha-abia, vine ranuna iditana ai e urua diho. Io ai e gwadaia kau, bena e dudua isi, baine topoa, eto, ⁴⁹a haida ma, eto, mani do, aita itaia, Elia bainema baine hamauria eiava. ⁵⁰A Iesu ma e boi lolo, bena e mase. ⁵¹Una horanai dubu helaga seseahuna e hedare parara, atai amo ema bona henu. Tano danu e marere bona e parara. ⁵²Bona mase garadia e hekeho, helaga taudia hutuma na e tore isi. ⁵³Bena ena toreisi lou murinai, idia na gara amo e raka lasi. Hanua helaga na ela, unuseni ai hutuma ese e itadia. ⁵⁴Tuari biaguna mai bamona ida, Iesu e naria taudia. Tano marere bona e vara gaudia e ita. Bena e gari dikadika eto, momokani ina na Dirava natuna. ⁵⁵Herarai hahinedia danu dahuai e gini. Galileia ai Iesu murinai e rakava bona isiai na e lao heniva hahinedia be unu. ⁵⁶Haida bini: Maria, hane Magadala bona Maria, Iakobo bona Iosepa sinadia: bona Sebedeo natuna sinadia. ⁵⁷Adorahi ai, taga tauna ta, ladana Iosepa Arimatea eto e kau: ia danu Iesu ena hahediba ta. ⁵⁸Ia na Pilato dekenā ela, e noia, Iesu tau-anina baine abia eto, ⁵⁹Bena Iosepa ese tau-aninna e abia diho, dabua goevagoevana ai e kumia. ⁶⁰Nadi ai e geia kohuana matamatana ta. Ia sibona ena, lalonai e atoa. Nadi badana amo e koua iduarana e kurea ahu, bena e raka oho. ⁶¹A hahine rarua, Maria, hane Magadala bona Maria ta, be kohua vairanai e helaiva. ⁶²Daba ai, hahegoeava dinana murina ai, hahelaga taudia bona Faresia taudia Pilato vairanai e hebou. ⁶³Eto, gaubada e, ai na ame helalo-une, una koikoi tauna na maurinai e hereva, eto, dina toi bae ore, bena baine toreisi lou. ⁶⁴Bena, mani ba hamaorodia, gara bae naria namo namo ela bona dina ihatoina! ena hahediba baela, tau-anina bae ha henaia. Bena taunimanima bae koidia, baeto, "Ia na mase amo vada e toreisi lou." na garina. Unu bema heto, koikoi matamana ese koikoi gunana bema hereaia. ⁶⁵Pilato eto, be, umui na mai emui henari taudia. Vada aola gara ba hakoua, emui goada hegeregere. ⁶⁶Bena idia an ela gara e hakoua auka-auka. Toa ta nadi ai e

atoa, bena henari taudia e habadina laidia. Translation done and complete by Dk. Karoho Kila on Friday (05/05/23), time: 2pm

28 ¹Sabati dinana horadia e oreva, daba matana bona pura dinana ginigunana ai, Maria Magadala hahinena bona ma Mary ta na raruosi ela gara bae itaia. ²Aitaia, tano laga badana ta e vara badina be Lohiabada ena aneru ta guba amo e diho bena ema gara e koua ahu, nadina na e keia oho, bena latana ai e helai. ³Ia toana na e kara kevau na heto bona ena dabua snow na heto. ⁴Tuari taudia, gara e gimaiava, na ia garina e gari e heudeheude bona mase taudia bamodia ai ela. ⁵To aneru ese unu hahaine e hamaorodia, "Asio gari. Badina lau na mai dibagu umui na Iesu e hasatauroa tauna, o tahuamau. ⁶Ia na e toreisilou, e hereva hegeregere. Aoma e hekure gabuna baine itaia. ⁷Aola haraga bona ena ahediba ba hamaorodia, ia na mase amo e toreisilou. Aitaia, ia na e gunamu, e laomu Galileia. Unuseni ai ba ha itaia. Aitaia lau ese na hamaoromuimu. ⁸Ha-hahine na mai garidia ida gara e rakatania haragaharaga bona mai moale bada ida danu bena e heau ela ahediba bae hamaorodia. ⁹Aitaia, Iesu ese e hedavari henimai, eto, "Tame hedavari." Ha-hahine na ema, ia aena palapaladia ai e daukau bena e tomadiho henia. ¹⁰Bena Iesu ese e hamaorodia 'Asio o gari. Aola tadikakagu ba hamaorodia Galileia baela. Unuseni ai da bae itagu. ¹¹Hahine vada e laova ai, gara e itaia tao taudia haida na hanua lalonai e vareai bena gara gabuna ai e vara karadia na helaga taudia badadia e hamaorolaidia. ¹²Helaga taudia badadia ida e hedavari bona e vara gaudia e herevahereva lai murinai, idia ese moni taina badana na hari gara e naria tuari taudia e henidia, ¹³bona e hamaorodia eto, "Baoto, Ia ena diba-taudia na hanuaboi ai ema bena tauanina na e henaao, ai mahutamai ai. ¹⁴Bema na haripiu na gavana enai baine kau neganai, ai ese baia haduaia bena umui na kerere ai basio vareai. ¹⁵Bena Tuari taudia na moni e abi bona e hamaorodia karadia vada eha kara. Ina haripiu na Iuda taudia padadiai e pere rohoroho ema bona e hesiriu ema bona hari. ¹⁶To hari diba-taudia taudia gwauta-taosi na Galileia ela, Iesu ese e siaidia baela ororona ai. ¹⁷Idia ese e itaia neganai, e tomadiho henia to haida na e daradara. ¹⁸Iesu na idia dekedie ema bona e hereva henidia, eto, "Siahu idoinai na vada e henigu, guba lalonai bona tanobada latanai. ¹⁹Una dainai aola bona tanobada idoinai diba-tahua taudia ai ba halaodia. Ba baptisodia, Tamana, Natuna bona Lauma Helaga ladana ai. ²⁰Ba hadibadia, lau ese na hanimui gaudia iboudiai bae badina. A itaia, lau na nega iboudiai umui dekemui ai, ena-be tanobada dokona ai danu." Translation done by: Ev/Rdk. Arua Taravatu on Monday (17/07/23), time: 4.30pm. Ready for quality checking.

Mark

1

¹Ina matamana neganai Iesu sivarai namona, ina Dirava Lohia natuna, ina etorea ai peroveta, tau ena Buka lalonai. ²Baitaia, launa egu sivarai namona na siaia vasimu oi iboudiai varamuiai una tamona ese emu dala baine lailaidia bona baine haegaegaedia. ³Hereva namona e boi lolomu tano gagenai, Dirava ena dala ba lailaia bona ena dala na maoromaorona. ⁴Ioane ema baptiso e karava tano gagaena ai bona baptisodia e harorolaiva bona helalokerehai bona e baptiso heniva edia dika bae gwautao. ⁵Tanobada hegegemaide Jude tanona idoinai bona Ierusalem taunimanima iboudiai ai dekeni ela, ai ese iboudiai e baptisodia bona ia ese Ioridaina sinavaina ai e baptisodia. ⁶Ioane ena danu na Kamelo huina ena gaba gauna na boromakau kopina, ena aniani be kwadi bona bada ranua. ⁷E haroro, eto tau ta lau murigu ai be maimu, ena siahu ese lauegu e hereaiamu, lau na dia namo ena tamaka varona iruhana baina igo diho. ⁸Lau ese ranu amo na baptisomuimu, a ia ese Lauma Helaga amo baine baptisomuimu. ⁹Unu dinadia ai Iesu na Nasareta, Galileia hanuana ta amo ela, bona Ioane ese Ioridaina sinavaina ai e baptisoa. ¹⁰Bena ranu amo e dae kau negana ai ia ese guba e itaia, e parara, bona Lauma e diho, pune na heto, ia tubuana ai e kau. ¹¹Bena gado ta guba amo e boi dobi eto, oi na lau natugu, egu lalokau, lau ese oi na lalo-namo henimumu. ¹²Una negana ai Lauma ese tano gageni e siaia lao. ¹³Dina hari-ahui tano gagaena ai e nohova, Satani ese e dibaganiava ia na hekoi boromadia ida e nohova, to aneru ese ia isiaina e lao heniva. ¹⁴Ioane dibura rumana ai e koua murinai Iesu na Galileia ela, Dirava ena sivarai namo e harorolaiva, ¹⁵eto, negana vada eme gini dae, Dirava ena basileia eme kahirakahira ba helalokerehai, bona sivarai namo na lalomui ai bavabia dae. ¹⁶Ia na Galileia gohu konena ai e ravava ai, Simona, tadina Aniderea ida e itadia idia na reke gohu ai e torea, badina ida na haoda taudia. ¹⁷Bena Iesu ese e boiridia eto murigu ai a raka lau ese taunimanima ihaoda henidia taumui ai baina halaomui. ¹⁸Bena ida ese edia reke e rakatani, ia murinai e raka. ¹⁹Asi e raka daudau, ia ese Iakobo Sebedeo, tadina Ioane ida, e itadia vanagi ai edia reke e laumeva. ²⁰Ia ese e boiridia, bona idia ese tamadia Sebedeo ena gaukara memeria ida vanagi ai e rakatanidia ia murinai ma e raka. ²¹Idia na Kaperanauma ai e kau; bona dina Helaga ai ia na Dubu ai e hahediba. ²²Bena idia ese ena hahediba herevadia e hoalai, badina be ena hereva na mai siahuna, dia itorena taudia edia hereva hamomokanidia. ²³Unu dubu ai tau ta na Lauma dika ese eboloa tauna e raka lasi e lolo, ²⁴"Eha haneva eto" oi be dahaka ba kara egu ai? Iesu tau Nasareta oi oma lau ba hadikagu a? Lau mai diabagu ou be daika, oi Helaga tamona Diravana. ²⁵Bena Iesu ese e gwau henia eto, Eremu, iena amo a raka lasi. ²⁶Bena hari una lauma dikana ese una tau e hatoror-tororoa bona mai gabana ida e lasi. ²⁷Bena taunimanima iboudiai e hoa dikadika, e hereva heheni, eto, ina dahaka, hahediba matamatana binai! ia ese lauma dikadia e haganidiamu mai siahuna ida bona idia ese ia erena e kamonaumu. ²⁸Bena asi vanahana ia harina e piua Galileia kahana idoinai. ²⁹Dubu amo e didi dobi, bona Simona bona Aniderea edia ruma ai e dae kau, Iakono bona Ioane ida danu. ³⁰Simona ravana hahinena e gorerea, tauna e siahu, bona idia ese Iesu e hamaoroa. ³¹Bena ia ela, imana e abia e hahelaia tore, bona ena gorere e doko, e toreisi idia isiadia e laoheni. ³²Una dina do se diho gabunai, idia ese gorere taudia e iboudiai, bona lauma dikadia ese e boloa taudia, na ia

dekena e laohaidia. ³³Bona hanua taudia iboudiai na ena iduara ai e hebou. ³⁴Bena gorere idau-idau taudia hutuma ia ese ehamauridia, bona lauma dikadia e luludia lasi, a lauma dikadia na egwaudia tao, basie hereva, badina be idia dibadia ia. ³⁵Daba kahana ai, daba do se kinia, vadae tore isi, gabu gagen a ela, eha guriguri. ³⁶Bena Simona mai bamona ida ese e gavaia, ³⁷e davarua, e hamaoroa eto, Taunimanima iboudiai na oi e tahumumu. ³⁸Ia eto, Aitala hanua kahikahidia unuseni ai danu baina haroro, badina be egu mai badina bunai. ³⁹Bena ia ela, Galileia kahana hanuadia iboudiai edia dubu ai e haroro, badina be idia dibadia ia. ⁴⁰Lepera tauna ta ia dekena ela, tuina e hadai, e noia, eto, Boma ura, boma hagogevagu. ⁴¹Bena Iesu ese e bogaia hisi, imana e toia roro, e daua toho, bona eto, Na uramu, vada a goeva. ⁴²Bena ena lepera e doko, vada e goeva vaitani. ⁴³Bena e siaia, to e sisiba heni guna, ⁴⁴eto, Ina kara tau ta basio hamaorolaia aola, hahelga tauna ese baine itamu, bona hahegoeva gauna, Mose ese e gwauraia hegeregere; ba henia, taunimanima ihadibalaia. ⁴⁵To ia na ela, una kara harina vada eha piua rohoroho, una dainai Iesu na hanua ta ai asine raka vareai diba, a tano gagaena ai a nohova, unuseni ai taunimanima ese idau gabu amo ia e lao heniava.

2

¹Dina haida vada ela ia na Kaperanauma e lou lao, bona harina e piua ia na ruma aia. ²Bena hutuma e raka ela bona ruma lalonai gabu ta lasi, iduara badina danu asi gabuna. Bena ia ese e haroro henidia. ³Bena tatau hahani ese pada tauna ta na ia dekena e huaia lao. ⁴a hutuma daidiai asi edia dala Iesu dekena bae kahilaia lao. Una dainai, ia gini gabuna daenai idia ese guhi e giua oho, bona pada tauna mai gedana ida e tua dobi vairanai. ⁵Iesu ese edia abidadama e itaia, bona ia ese pada tauna e hamaoroa, eto, Natugu e, emu dika vada eme hegwaui tao. ⁶A itorena taudia haida unuseni ai hehelai, lalodia ini e hadai tomava, ⁷eto, Badina be dahaka ina tau unu e hereva tomamu? Ia ese Dirava se matauraiaimu, Daika ese dika baine gwau tao? Dirava mo sibona. ⁸Iesu dibana idia na unu e helalo tomava, bona e nanadaidia, eto, Badina be dahaka lalomui ene o hadai tomamu? ⁹Edena be haraga, pada tauna na hamaoroa, nato "Emu dika vada eme hegwaui tao", eiava bama toma "A gini tore, emu geda a lokua, a raka"? ¹⁰A baina hadibamui Taunimanima Natuna na mai siahuna dika baine gwau tao ina tanobada ai, (ia ese pada tauna e hamaoroa eto), ¹¹A gini tore, emu geda a lokua emu ruma vada aola. ¹²Bena ia na e gini tore, ena geda e lokua, idia vairadiai e raka lasi. Iboudia ai e hoa, Dirava e imodaia, eto. Ini hetomana ta asi ta itaia. ¹³Ia na kone ai ma e lasi; hutuma ia dekena ela bona ia ese e hadibadia. ¹⁴Raka hanaina ai, ia ese Levi Alfeo tax gabunai helaina ai e itaia bona e boiria eto, murigu ai a raka. Bena e tore isi ia murinai e raka. ¹⁵Iesu na Levi tauna ena ruma ai e aniani, bona tax gogo taudia iboudiai, kara dika taudia diagau danu, Iesu mai ena hahediba ida ege diho, badina be hutuma na ia murinai e raka. ¹⁶Itorena taudia, Farisea edia ore a amo, e itaia, ia na kara dika taudia bona tax gogo taudia ida e aniani hebouva, bona idia ese ena hahediba e nanadaidia, eto, Ia na dahaka dainai tax gogo bona kara dika taudia ida e aniani heboumu? ¹⁷Iesu e kamona, bona e hamaorodia, eto, Goada taudia ese muramura tauna basie tahua, a gorere taudia hari, lau danu nama, dia kara maoromaoro taudia iboiridia totona, a kara dika taudia hari. ¹⁸Ioane ena hahediba bona Farisea edia hahediba edia anivaga ta ai haida ese Iesu e nanadaia, eto, Dahaka dainai Ioane bona Farisea edia hahediba e anivagamu, a oiemu hahediba na asie anivagamu? ¹⁹Iese e haere, eto, Headava matamata tauna na turana dekediai be bae anivaga a? Lasi, headava matamata tauna na dekediai noho, idia na basie anivaga. ²⁰A negana baine gini dae, headava matamata tauna na edia amo baine heabi oho una negana ai bae anivaga. ²¹Dabua matamatana kopi gunadia ai basie banilaia. Unu bema kara toma, e banilaia seana na dabua gunana amo bema hedare oho, bona hedarena bema bada. ²²Vine ranuna matamata na kopi gunadia ai basie vedaia. Unu bema kara toma, vine ranuna matamatana ese kopi gunadia bema hapou; bona vine ranuna bona kopi bema dika hebou. ²³Dina Helaga ta ai, ia na uit umana ta e raka hanaiva ai, ena hahediba na rakadia ai uit e burukiva. ²⁴Farisea taudia ese e nanadaia, eto, Idia dahaka dainai hegwaui-tao dina helaga ai e karaiamu? ²⁵Ia e haere eto, Nega ta asio duahia, a, Davida ena kara ta, e hitoloa negana ai, ia mai bamona ida? ²⁶Dirava ena ruma ai e dae kau, Abiata hahelaga tauna negana ai, bona pata helagana amo malamala e abia, e ania, bona bamona e henidia, a una malamala na e helaga vaitani, hahelaga taudia mo adia. ²⁷Ma eto, Dina Helaga e karaia taunimanima edia, dia taunimanima Dina Helaga ena. ²⁸Una dainai, taunimanima natuna na Dina Helaga biaguna.

3

¹Iesu na syngogue ai ma e raka vareai lou, bona ima heveri tauna ta na unuseni ai. ²Haida ese ia eha-gereava bema ia ese una tau do baine hanamoa dina helagana ai bona una an idia edia habade gauna ai bainela. ³Iesu ese ima heveri tauna e hamaoroa, eto, "A tore-isi bona a gini tore ini hutuma bogaragidiai." ⁴Bena ia ese aru taudia eha-maorodia, eto, "Ina be maoro dina helaga ai ba kara dika, ba hahemaui eiava ba ha-hemase, a? To idia na iboudiai asi regeregedia." ⁵Ia ese e raraidia mai lalo hisihisina ida bona mai lalodikana ida, badina edia kudou auka daidiai, bona ia ese hari ima heveri tauna na e hamaoroa eto, "Imamu na atoia roro." Ia imana na e toia-roro bona vada e hedai hebou lou. ⁶Hari Farasia taudia na haraga e raka lasi, bona Heroda ena ore a taudia ida e hebou bona ia ialana dalana e tahua. ⁷Bena Iesu na mai ena hahediba memerodia ida ela davarua kahana, bona taunimanima hutuma bada danu ia murinai e raka, Galileia amo, bona Iudea amo, ⁸bona Ierusalem amo, bona Idumaea amo, bona Ioridana kahana amo, bona Turo bona Sidono amo. Ia e karava karadia e kamona dia, hutuma na ia dekena ema. ⁹Ena hahediba memero dia na e hereva henidia vanagi maragina ta bae hahegaegaea ia ena, badina be hutuma na bada herea bona ia e doriava bona e biriava. ¹⁰Badina ia ese hutuma edia gorere amo eha namodia guguru, bona una ese gorere taudia na e guguva, baela ia ba daua-toho. ¹¹Lauma dikadia ese e itaia negana ia vairanai e goru dihova bona mai tai lolodia ida e herevava, "Oi na Dirava Natuna." ¹²Ia ese

e tamanudiava ia na basie hahedinarai.¹³ Ia na e dae ororo ai, bona ia ese e urahenidia taudia e boiridia, bona dekena ema.¹⁴ Ia ese gwauta-rua e abidia-hidi (apostolo ai e gwauraidia) bona idia na ia dekenai bae noho, bona baine siaidia sivarai namo bae harorolaia,¹⁵ bona siahua danu e henidia lauma dikadia bae luludia-lasi.¹⁶ Bena ia ese ini gwauta-rua e abidia hidi Simona ladana ta e hatoa Petero,¹⁷ Iakobo Zebedeo natuna, Ioane Iakobo tadina, ia ese ladana e hatoa Boanergea anina na guba rahu-rua natudia,¹⁸ bona Aniderea, Pilipi, Batolomiu, Mataio, Toma, Iakobo Alphaes natuna, Thadeo, Simona Zealot natuna,¹⁹ bona Iuda Isakariota, ia taona itorena tauna.²⁰ Bena ia na ena hanua ela, bona aru taudia hutuma danu ia ida ma e hebou, aniani danu asie urava.²¹ Ia varavarana na e kamoni neganai, idia na ela ba dabaia-tao bona ba habadea eto, "Ia na eme kavaia."²² Itorena taudia na Ieruselema amo ema eto, Ia na Beelzebul ese e rohea, bona lauma dikadia lohiana ladanai lauma dika e luludia lasimu.²³ Iesu ese e boiridia bona sivarai hegeregereenai eha maorodia eto, "Satani be edena dala ai Satani do baine lulua lasi, a?"²⁴ Bema basileia ta sibona do baine haheparara neganai, una basileia na basine gini diba.²⁵ Bema ruma ta sibona baine haheparara neganai, una ruma na basine gini diba.²⁶ Bema, Satani na sibona baine toreisi, sibona enai baine haheparara, ia na basine gini, a ena dokona baine kau.²⁷ Asi tauna-ta na mai goadana tauna ena kohu do baine henao, a una goada tauna na baine guia guna, bona ena ruma ai baine raka vareai.²⁸ Na hamaoromui momokanimu taunimanima natudia edia kara dika na do bae hegwaitao, edia ere dika danu,²⁹ to, daika ese Lauma Helaga dikana baine gwaurai henia tauna ena kara dika na basine hegwaitao diba, a ena kerere dainai ena kara dika na baine hanaihanai.³⁰ Iesu ese unu bamona eha-maorodia badina be idia na eto, "Ia na mai ena lauma dika."³¹ Bena sinana bona tadina na ema gigini. Haida e siaidia iboirina ela.³² Hutuma ese e helaia hegere, bona idia ese ehamaoroa eto, "Oi sinamu bona tadimu na gigini bona idia na oi e tahumumu."³³ Ia na e haere eto, "Lau sinagu bona tadigu be daidia, a?"³⁴ Ia na e roha lao, ia e helaia hegere taudia e e itadia bona eto, "Aitaia, ini idia na lau sinagu bona tadigu veridia."³⁵ Badina be, lau Tamagu ena ura e karamu tauna, ia na lau tadigu, lau taihugu bona lau sinagu.

4

Ia ese kone ai ma e hadibadia lou, bona hutuma bada ese e ginia hegege. Ia na davara latana ai vanagi ai e dae kau, bona e helai diho lalonai. Hutuma iboudiai be kone ai gigini.¹ Ia ese gau momo sivarai hegeregereenai e hadibadiava, bona ena hahediba lalonai, ia ese na ini e hamaorodia toma,² ba hakala! Uhe ihadona tauna ta vada ela ena uhe baine hadoa.³ E hadohadovai, uhe haida na dala ai e moru, bona manu ema vada e anidia ore.⁴ Uhe haida be papapapa latadai e more, tano severana ai. Uhe na e tubu haraga badina be tano na dia dobu dainai.⁵ A dina e daeva neganai, au huahuadia vada e marai bona e kakoro, badina be asi ramudia dainai.⁶ Uhe haida be ava-ginigini padadai e moruva. Ava-ginigini e tubu badabada bona e laodia-ahu, bona huahuana ta asi e vara.⁷ Uhe haida be tano namona lalonai e moru bona huahuana ta e tubu bona e dobi haida be toi-ahui, haida be tauratoi-ahui, bona ma haida be sinahu-ta.⁸ Bena ia vada eto, "Mai taiana tauna na baine hakala!"⁹ Iesu vada sibona neganai, ia e hakahikahiava taudia bona taudia gwauta-ruaosi ida ese e nanadaia sivarai hegeregereenai daidiai,¹⁰ ia ese e hamaorodia, eto, "Dirava ena basileia herevadia hehunidia na umui vada e henimui. A unu murimuri taudia ediai gau iboudiai na sivarai hegeregereenai,¹¹ una dainai, bae roharoha neganai, oibe bae roharoha, a basie itamu, bae hakala neganai, oibe bae hakala, a basie kamonaumu, eiava bema lasi idia na ba helalokerehai bona Dirava ese edia dika do baine gwau tao?"¹² Bena ia ese e hamaorodia eto, "Umui ese ina sivarai hegeregereenai so laloparara laimu, a? Bena ede bamoni umui ese sivarai hegeregereenai haida iboudiai ba laloparara laidia, a?"¹³ Hadohado tauna ese ena uhe e hadoamu una na ia ese hereva e hadoamu.¹⁴ Dala isenai e moru na hereva e heado gabuna, ini na taunimanima haida ese hereva e kamonaumu neganai Satani e maimu bona ediai e heado herevana na eabia ohomu.¹⁵ Papapapa latana e hadodia be taunimanima haida ese hereva e kamonaumu neganai, eabiadaemu mai moaledia ida.¹⁶ Idia na asi ramudia sibodia ediai, a nega kwadogi mo e nohomu. Bena hisihisi eiava dagedage e maimu badina be hereva dainai, idia na e hekwakwanaimu.¹⁷ Haida be ava giniginidia lalodia ai e hadodia gaudia, idia ese hereva e kamonaumu,¹⁸ to tanobada ena lalo hekisehekise, moni ilalokau henina, gau idauia iurahenidia edia mauri ai e vareaimu ese hereva na e gugubaiamu, bona se huahuamu.¹⁹ Bena unu tano namoni vada e hadodia na hereva e kamonaumu bona e abiadaemu taudia, bona huahuadia na e dobimu toi-ahui, tauratoi-ahui, eiava sinahuta vada e hadoa daenai."²⁰ Iesu ese e hamaorodia eto, "Umui ese lamepa o mailaiamu ruma lalona ai be bosea henunai eiava mahuta patana henunai bo atoamu, a? Umui ese na o mailaiamu bona lamepa patana ai o atokaumu."²¹ Badina gau ta na hehuni bona basita dibaiaumu, bona gau ta na dia laloai e maimu bona basita gwauraia lasimu;²² Mai taiana tauna na baine hakala!²³ Ia ese e hamaorodia, eto, "Dahaka o kamonaumu na ba hakaladia namonamo, badina bohenimu hahetoana amo oi do ba henimu, bona haida ma emui ai bae atokau."²⁴ Badina be mai ena tauna, ia na momo ma ba henia, bona asi ena tauna, enai miadia danu bae abidia oho."²⁵ Ia danu ma eto, "Dirava ena basileia na tau ta ena uhe tano ai e hadoamu na heto,²⁶ Ia na e mahutamu hanuaboi ai bona e toreisimu dina ai, bona uhe na sibona e huahuamu bona e tubumu, a ia na sedibamu ede bamoni."²⁷ Tano sibona ese anina e havaraiaumu: tuhutuhuna e gunamu, murinai taiana, murinai anina taiana lalonai?²⁸ Huahua e lo'omu neganai, ia ese utu-utu kaiana e hesailaimu badina be taboro vada e kau dainai.²⁹ Ma e hamaorodia lou, eto, "Dirava ena basileia be dahaka ai baita hahegeregerea, eiava ita be edena sivarai hegeregereenai amo anina baita dibaiaumu?"³⁰ Ia na sinapi nadinadina ta na heto, e hadoamu negana ai, ia na tanobada latana uhe maragi-maragi hereana.³¹ A e hadoamu neganai, ia na e tubumu bona uma au huahuadia iboudiai e hereadiamu, bona rigina badadia e hekaramu, unu amo guba manudia ese edia noho gabudia e karadiamu a hekerukeru lalodiai.³² Sivarai hegeregereenai ini hetomadia momo amo ia ese e hereva henidiava, edia laloparara hegeregereenai ai,³³ bona ia ese na

sivarai hegeregere ai mo idia e hereva henidiava. A ia sibona e nohova neganai, ia ese gau iboudiai anidia na ena hahediba e hamaoro laidiava.³⁵Una dina ai, dibura ese vada e govadia neganai, Iesu ese e hamaorodia eto, "Aitala unu kahana."³⁶Bena idia ese hutuma vada e rakatanidia, Iesu mo eabia idia ida, vanagi ai e guilaia. Vanagi haida danu ia ida ela hebou.³⁷Una murinai lai dikana ta mai gubana ida eabia isi bona hurehure e makohiva vanagi lalonai bena vanagi na kahiri-kahira ranu ese e hahonua.³⁸A Iesu sibona be vanagi gabena kahanai, kusini latanai mahuta. Idia ese e haoa, e tomu, "Hahediba tauna e, oi so laloamu ita vada baita masemu, a?"³⁹Ia e tore-isi, lai e gwau henia, bona davara e hamaoroa, eto, "A gaima! Basio marere!" Bena lai e doko bona e gaima?⁴⁰Bena ia ese e hamaorodia, eto, "Umui be dahaka dainai o garimu, a? Umui doini asi emui abidadama, a?"⁴¹Idia na gari bada ese e hahonuhonudia dae bona sibodia e hereva heheni, eto, "Ina be daika, badina be lai bona davara ese danu erena e kamonaumu?"

5

¹Idia vada ema davara unu kahana ai, Garasa tanona ai e kau. ²Iesu vanagi amo e dihovai, lauma dikana ese e boloa tauna ta ena gara amo e raka lasi ia dekena ela. ³Tauna na gara gabunai e nohova. Tau ta ese ma basine guia lou diba bona auri iguidia danu dia hegeregere. ⁴Ia na nega momo vada e guia aena auridia bona auri iguidia amo. Ia ese iguidia eha motuva bona aena auridia danu e hamakohidia rohorohova. Tau ta asi goadana ia baine hamanadaia. ⁵Hanuaboi bona daba iboudiai gara bonna ororo lalodiai, ia na e tai lolova bona nadi mai matadia amo sibona e heivava. ⁶Bena ia ese Iesu daudauna ai e itaia neganai, ia ese e heau henia bona vairanai e tomadiho henia. ⁷Ia na mai tai lolona ida, e tomava, "Lau be vada dahaka baina kara oi emu ai, Iesu, Dirava Herea Mikamika Natuna, a? Lau na Dirava sibona dainai na noimumu, asi o hahisihisigu." ⁸Badina ia ese vada e hereva heniava, e tomava, "Lauma dikana, tau ena amo a raka lasi," ⁹Ia ese e nanadaia, etomava, "Oi ladamu be daika, aha?" Ia ese e haere henia, etomava, "Lau ladagu na Legiona (Lepeona), badina ia na hutuma. ¹⁰Ia ese ma e noia loulouva una tano amo basine siaidia lasi. ¹¹Harihari boroma momo be unuseni ororo ai e anianiva, ¹²bona idia ese e noia, e tomava, "Asiamai boroma lalodia baia vareai; idia lalodiai aita vareai." ¹³Bena ia ese vada e siaidia, lauma dikadia e rakalasi bona boroma lalodiai vada e vareai, bona idia vada ororo amo mai tata siahudia ida davara lalonai e diho, bona boroma daha rua hegeregere davara ai e maloa. ¹⁴Bena unu boroma e ubudiava taudia vada e heau ela hanua lalodiai bona uma gabudiai e varava gaudia haripiudia e karadia, bona taunimanima vada ela e varava gaudia bae itadia totona. ¹⁵Bena idia ema Iesu dekena bona lauma dikana ese e boloa tauna e itaia, lauma dikadia logora ese e boloa tauna, unuseni ai helai, e hadabuaia bona lalona vada e maoro; bona idia na e gariva. ¹⁶E vara karadia e ita taudia ese lauma dikana ese e boloa tauna sivaraina idoinai e hamaorodia bona idia ese boroma sivaraidia danu e hamaorodia. ¹⁷Bena idia ese e noiava edia tano amo baine raka oho. ¹⁸Ia na vanagi ai e guiva neganai, lauma dikana ese e boloa tauna e noinoi ia ida baina. ¹⁹A Iesu ese e gwauatao, a e hamaoroa eto, "Aola emu ruma bona emu taunimanima dekedie bona ba hamaorodia Lohiabada ese oi be dahaka eme kara henimu, bona ia ena hebogahisi oi emu ai." ²⁰Una dainai, ia vada ela bona Iesu ese kara badadia e kara henia na e harorolaiava. Hanua gwauta (Dekapolis) tanodia ai, bona taunimanima iboudiai vada e hoa. ²¹Hari Iesu, vada vanagi amo ma e lou lao gohu kahana neganai, hutuma bada ese kone ai ma e ginia hegege. ²²Bena dubu hegunalai tauna ta, ladana Iairo, ema, bona ia e itaia, aena badinai e goru diho. ²³Ia ese e noia loulouva, e tomava, "Natugu kekenina vada be masemu. Na noimumu aoma bona enai ba daukau bona ia na baine namo bona baine mauri. ²⁴Bena ia na ia ida ela bona hutuma bada ese e gavadia bona muridiai e raka hesede-hesede. ²⁵Hari hahine ta unuseni ai na rara-moru gorere na e hakaua lagani gwauta-rua. ²⁶Ia na e hisihisi bada muramura taudia edia amo bona ena moni iboudiai vada e haoredia, a ena gorere na se namova a e bada e laova. ²⁷Ia ese Iesu sivaraina vada e kamonaia neganai, ia na ia murina amo ema hutuma bogaragidiai bona ena dabua ai e daukau. ²⁸Badina ia na e tomava, "Bema lau ese ena dabua ai mo baina daukau, lau na baina namo." ²⁹Ia ese e dogoatao neganai, rara-moru vada e doko, bona tauaninai mamina eabia, ia na ena gorere amo vada e namo. ³⁰Iesu na una horai sibona e diba siahu na ena amo vada e lasi. Ia na hutuma bogaragidiai e roha kerehai bona eto, "Daika lau dabuagu ai eme daukau, a?" ³¹Ena hahediba e haere eto, "Hutuma e raka hesede-hesedemu be o itadiamu, bona oi be o tomu, 'Daika ese eme daugu toho, a?" ³²A Iesu na e roharoha daika unu e kara toma na baine itaia. ³³Hahine, mai dibana dahaka enai e vara, vada e gari bona e heude-heudeva. Ia na ema bona ia vairainai e goru diho bona hereva momokanidia e hamaorolaia. ³⁴Ia ese e hamaoroa, eto, "Natugu e, emu abidadama ese vada eme hanamomu. Mai mainomu ida aola bona emu gorere amo ba namo vaitani." ³⁵Ia dounu e herevava ai, taunimanima haida dubu e gunalaimu tauna ena mo ema, e tomamu, "Natumu kekenina na e hamase. Dahaka dainai hahediba tauna doini o hametauamu, a?" ³⁶A Iesu ese edia hereva e kamonaia neganai, ia ese dubu igunalaina tauna e hamaoroa, eto, "Asio gari. Bavabidadama mo." ³⁷Ia na seura haida ese bae bamoa, a Petero, Iakobo, bona Ioane, Iakobo tadikakana, sibodia ese e bamoa. ³⁸Idia ema dubu igunalaina tauna ena ruma bona unuseni ia ese taunimanima e itadia rege bada herea e karava; idia na e taiva bona e tai lolova. ³⁹Ia ruma ai e vareai neganai, ia ese e hamaorodia, eto, "Dahaka dainai o lalo hisihisimu bona dahaka dainai o taimu? Kekenina se mase a e mahutamu." ⁴⁰Idia ese e kirikirilaia. A ia ese iboudiai murimuri ai eatodia bona kekeni tamana bona sinana bona ia e bamoa taudia mo eabidia, bona ia ida e vareai kekeni ena hekure gabunai. ⁴¹Ia ese kekeni imana ai eabi bona e hereva henia, eto, "Talita Kumi! Anina be etomu, "Kekenina Kekenina, na haganimumu, a tore-isi." ⁴²Kekenina vada e toreisi bona e raka (badina ia laganina na gwauta-rua). Idia iboudiai e hoa dikadika. ⁴³Ia ese e tamanudia ini e vara karana na ta basine diba. Bena ia ese vada e hamaorodia kekeni gau ta ba henia baine ania.

6

¹Ia vada unu amo e lasi bona ema ena noho hanuana, bona ena hahediba ese e gavaia. ²Dina helagana ema neganai, ia na Dubu lalonai e hahedibava. Taunimanima momo ese e kamoni henia bona idia na e hoa. Idia vada eto, "Ini hahediba herevadia be ede amo eabi, a? "Ina be dahaka aonega ia vada e henia, a? "Ini be dahaka hoa karadia ia imana ai e karamu, a?" ³Ina be dia ruma kara tauna, Mary natuna bona Iakobo bona Jose bona Iuda bona Simeona tadikakana, a? Ia taihuna be dia ita ida iniseni ai, a? "Idia na Iesu enai e lalo hisihisi. ⁴Bena Iesu ese e hamaorodia, eto, "Peroveta tauna na bae matauraia, a ena noho hanuana ai bona varavarana bogaragidia ai bona sibona ena ruma lalona ai, basie matauraia." ⁵Ia na siahua karadia badadia ta sekaradia, to imana mo e atokau gorere taudia hida hona ediai bona e hanamodia. ⁶Ia na e hoa bada idia na asi edia abidadama. Bena ia na ela hanua ta ta ai e hahedibava. ⁷Bena taudia gwauta-raruosi e boiridia bona taudia rarua-rarua amo vada e siaidia lasi matama bona maoro e hendia lauma dikadia latadi, ⁸bona e tamanudia gau ta basie abi kau edia laolao ai to itotohi ta hari - parao lasi, vaina lasi, moni lasi edia riotao dabuadi - ⁹a tamaka bae karadia, bona ahedoki rua na basie karadia. ¹⁰Ia ese e hamaorodia, eto, "Ruma ta ai o vareaimu neganai, ba noho ela bona unu amo ba siri," ¹¹Bema hanua haida ese basie abimuidae bona basie kamoni henimui, bema una gabu ba rakatania neganai, aemui kahudia ba ude-uedia oho vada igwauraimui gaudiai baela. ¹²Idia vada e raka lasi bona e harorova taunimanima edia karadika amo bae helalokerehai. ¹³Lauma dikadia momo e luludia lasiva, bona gorere taudia momo latadi oil eatova eha-namodiava. ¹⁴Pavapava tauna Heroda ese ini hereva e kamoni, badina Iesu ladana vada e pere rohoroho. Haida e gwauva, "Ioane Bapatiso vada mase amo eha torea isi, bona ina dainai ini hoa karadia siahudia na ia ena amo e varamu." ¹⁵Haida ma e gwauva, "Ia na Elisa." Dounu haida ma e gwauva, "Ia na peroveta tauna ta, nega gunadia peroveta tauna ta na heto." ¹⁶A Heroda e kamoni neganai, ia vada eto, "Ioane, lau ese kwarana na utua oho, vada e toreisi-lou," ¹⁷badina Heroda vada e hesiai Ioane bae gua bona dibura ruma ai bae ato Heroda (tadikakana Pilipo adavana) dainai, badina be ia ese vada e adavaia dainai. ¹⁸Badina Ioane ese Heroda vada e hamaoroa eto, "Ini na dia taravatu henunai oi ese tadikakamu adavana bavabia." ¹⁹A Heroda ena badu enai na dounu e dogotaova bona e urava baine alaia, a se karaia dibava. ²⁰Badina Heroda be Ioane garina e gariva; ia na dibana Ioane na kara maoromaoro bona helaga tauna ta, bona ia ese na e naria namonamova. ²¹Bena nega ta e kau Heroda na ena vara dinana ihelalolaina anianina ta e karaia ena gaukara taudia, bona ena tuari taudia badadia, bona Galileia taudia badadia daidiai. ²²Heroda natuna kekenina sibona e vareai idia vairadi e mavaru, bona ia ese Heroda mai ena vadivadi ida vada eha-maoaledia. Pavapava ese kekeni e hamaoroa eto, "A hamaorogu oi be dahaka o uramu bona lau ese gauna na baina henimu." ²³Ia ese kekeni ena hereva vada e gwauhamata laia, eto, "Dahaka egu ai ba gwauraia, enabe egu basileia kahana, lau ese baina henimu." ²⁴Ia vada e raka lasi bona sinana e hamaoroa, eto, "Lau e dahaka baina gwaurai ia enai, a? Ia eto, "Ioane Bapatiso kwarana." ²⁵Ia na asi vanahana e lau lao Pavapava dekena, bona vada e nanadaia, etomamu, "Lau na nauramu oi ese Ioane Bapatiso kwarana, au merekina latanai, na ina harihari ba henigu." ²⁶Ena be Pavapava na e lalo-hisihisi, a ena gwauhamata dainai bona ena vadivadi daidiai, ena noinoi vada eabiadae. ²⁷Una dainai Pavapava ese ena tuari tauna ta e siaia, e hagiania Ioane kwarana na baine mailaia. Tuari tauna na ela dibura rumana ai Ioane kwarana vada e utua-oho. ²⁸Ia kwarana na au mereki na latanai eatoa bona e mailaia kekeni e henia, bona kekeni ese sinana e henia. ²⁹Ena hahediba e kamoni neganai, idia na ema bona tauanina eabia bona gara ai vada eatoa. ³⁰Apostolo taudia Iesu dekena e loulao e kara bona e hahedibalai gaudia iboudiai e hamaoro laia. ³¹Bena ia ese e hamaorodia, eto, "iboumui ai aoma gabu gagaenai nega taina do baita laga'ani." Badina taunimanima momo e lao-maiva dainai, bona idia na sie edia nega bae aniani. ³²Bena idia vada vanagi amo sibodia ela gabu asi tauna ta. ³³A edia heau-oho ai taudia momo ese e itadia bona toadia e kara, bona hanua iboudiai amo aedia amo iboudiai e heau, bona gabuna ai e kau guna gabeamo idia e kau. ³⁴Idia kone ai e diho neganai, ia ese hutuma bada e itadia bona e bogadia hisi, badina be e karamu mamoe asi ireguna tauna na heto. Bena ia ese gau momo e hadiadia. ³⁵Adorahi kahanai, ena hahediba ema dekena bona eto, "Ina na tano gagaena, bona dina vada be dihomu. ³⁶Asiaidia lao unu amo idia na baela hanua murimurina kahana bona hanua lalodiai sibodia edia aniani gaudia haida bae hoidia." ³⁷A ia e haere bona eto, "Umui ese gau haida a hendia bae ani." Idia ese e hamaoroa, eto, "Ai be baiala bona aniani davana paoni sinahu-rua paraodia baia hoidia bona baia henidia bae ani, a? ³⁸Ia ese e hamaorodia, eto, "Parao be hida emui ai, a? Aola bona baitaidia e diba vada eto, "Parao ima bona gwaume rua." ³⁹Ia ese taunimanima iboudiai eha-duadia oreia ai ba helai ava namona latanai. ⁴⁰Idia na sinahuta bona imahui oreadi ta ta ai e helai diho. ⁴¹Ia ese parao imaosi bona gwaume ruaosi vada e abidia, bona e gagaisi guba e itaia eha-namodia bona parao e bitudia bona hahediba vada e henidia taunimanima vairadi bae atodia. Ia ese gwaume ruaosi danu iboudiai padadi e haridia. ⁴²Idia na iboudiai e aniani bona bogadia e kunu. ⁴³Idia ese parao oreia eabi-isi, bosea gwauta-rua eha-honudia, bona gwaruma oreia danu. ⁴⁴Parao e ani tataudia iboudiai be sinahu imahui. ⁴⁵Ia ese ena hahediba vanagi ai e haguidia bona bae lao guna gohu kahana, Betesaida ai, a ia be hutuma do baine siaidia oho. ⁴⁶Idia ela murinai, ia na e dara dae ororo ai baine guriguir dainai. ⁴⁷Hanua e boiva, vanagi ina horai na davara bogaraginai bona ia na sibona tano ai. ⁴⁸Ia ese e itadia, e kalo hekwarahiva badina lai na idia vairadia amo e maiva. Daba do sererei, ia ese e lao henidia davara kopinai e raka, bona e urava baine rakadia hanai. ⁴⁹A idia ese davara kopinai rakanai e itaia neganai, edia lalohadai e tomava ia na lauma ta bona e tai lolo, ⁵⁰badina be iboudiai ese e itaia bona e gari dikadika, Ia ese e hereva henidia bona eha-maorodia eto, "Ba goada! Ina na lau! Asio gari!" ⁵¹Vanagi ai e daekau dekediai, bona lai vada e doko. Idia na iboudiai e hoa bada herea. ⁵²Badina idia ese anibou anina do se lalopararalaia dainai, kudoudia vada eha-aukadia. ⁵³Idia kahanai e hanai neganai, idia na ema Genesarea tanonai ai e toa bona vanagi dogona eato. ⁵⁴Idia vanagi amo e raka lasi neganai, taunimanima ese ia toana e itaia, ⁵⁵bona idia una gabu idoinai e hadibadia bona gorere taudia mai edia hekure gedadia ida idia e kamoni Iesu edeseni dekena vada e lao haidia. ⁵⁶Edena hanua ai, eiava hanua badadi, eiava

hanua murimuridiai, idia ese gorere taudia na hoihoi gabudia eatodiava, ia e noihegame heniava idia ese ena dabua rimuna ai bae daukau, bona e daukauva taudia iboudiai na vada e namova.

7

¹ Farise taudia bona itorena taudia haida Ierusalemamo amo ema ia dekena ai e hebou.² Idia ese ena hahediba haida e itadia imadia asi e huri, mai mirodia ida parao e aniva. ³ (Badina Farisea taudia bona Iuda taudia na do basie aniani ela bona idia imadia na ba huridia, badina senedia edia taravatu edia badadia ese e dogoa taova dainai. ⁴ Edena nega ai Farisea taudia hoihoi gabudia, amo e maiva idia na do se anianiva ela bona idia sibodia e hahediguva, bona idia na senedia taravatu dia momo e badina, hegeregereidia kapusi, uro, veo kohudia, bona hekure gaudia idia e anianiva daediai.)⁵ Una dainai Farisea taudia bona itorena taudia ese e nanadaia, eto, "Dahaka dainai emu hahediba sene taudia badadia, bamodia ai se rakamu imadia asie hurimu edia parao e animu?"⁶ A ia ese e haere henidia eto, koikoi taumui e momokani "Isaia ese e peroveta laimui eto, ini taunimanima ese bibinadia ai e imodaigumu, a lalodia na dauha veravai. ⁷ E tomadiho henigu kavamu, a edia hahediba herevadia na taunimanima edia amo!⁸ Umui na Dirava ena hahegani o dadaraiaumu bona taunimanima edia taravatu o badina tarikatarikamu." ⁹ Ia ese ma e hamaorodia eto, "Umui ese Dirava ena hahegani o laloa negemu senemui edia taravatu ilalo taona o helaorealaiaumu! ¹⁰ Badina be Mose eto, 'tamamu bona sinamu ba matauraidia,' bona, 'daika tamana bona sinana hereva dikadia baine hamaorodia na do bae mase.'" ¹¹ A umui o tomamu, 'bema tau ta ese tamana eiava sinana baine hamaoroa, "Dahaka gau egu amo o abiamu na Kobana" (anina be, 'Dirava e henia'). ¹² Bema umui ese ia basio taravatua gau ta basine karaia ia tamana eiava sinana enai. ¹³ Umui na Dirava ena hahegani o utuamu. Senemui taravatudia umui ese o heni diho. Bona kara unu hetomadia diagau o karamu.'" ¹⁴ Ia ese are taudia ma e boiridia lou bona e hamaorodia eto, "Iboumui ai lau a kamoni henigu bona ba diba. ¹⁵ Gau ta tau ta murimurina amo e vareaimu lalonai ese basine hadikaia." ¹⁶ Source text ai na se atoa vareai. ¹⁷ Hari Iesu ese hutuma e rakatanidia bona ruma ai e raka vareai, ena hahediba una hereva hegeregereena e nanadailaia. ¹⁸ Iesu ese e hereva henidia eto, "Umui danu doini lalomui asie pararamu a? Umui so itaiamu murimuri amo dahaka gau e vareaimu tau lalonai ese asie hadikaiaumu; ¹⁹ Badina ia kudouna asine laomu, a bogana e laomu bona inegenaga gabuna e laomu?" Ina hereva momokanina amo Iesu ese aniani gaudia iboudiai na goevadia e gwaurai. ²⁰ Ia eto, "Ina na tau lalona amo e lasimu gaudia ese e hadikaiaumu. ²¹ Badina be Mose tau lalona amo, kudou amo e lasimu, lalohadai dikadia, mata bodaga, henao, ala ala, ²² heuda hanai, hegahusi, kara dikadia, koikoi, lebulebu; mata dika, hahediba koikoi, hekokoroku, kavakava. ²³ Ini dika iboudiai na tau lalona amo e daemu, bona ini be dahaka tau ta e hadikalaiaumu." ²⁴ Ia na unu amo e toreisi bona e lao siri Turo bona Sidono kahadia ela. Unu senior ruma ai e vareai bona e ura ta basine diba ia be ede seniai, to asi ena komu dalana. ²⁵ Ina momokani [2], nega dia daudau hahine ta natuna kekenina na lauma dikana ese e guia. Ia harina e kamoni hahine na ela bona ia aena badinai e goru diho, ²⁶ hari hahine na Helena, a Surofenise hahinena, ia ese e noia lauma dikana na hari kekeni ena amo baine lulua lasi. ²⁷ A ia ese e hereva henia eto, "Ene maragidia na ba ubudia guna. Badina ina na dia maoro maragidia edia parao na bavabia sisia ba taho henidia," ²⁸ A hahine na e haere bona e hereva eto, "Oibe, Lohiabada enabe sisia sisia danu pata henunai maragidia eanimu momoru-momorudia e morumu eanimu!" ²⁹ Ia ese hahine ma e hereva henia eto, "Badina ini ome hereva toma dainai, oi na lailai dainai vada aola. Lauma dikana na natuna ena amo e lasi." ³⁰ Hahine na ena ruma e lou lao natuna e davarua mahuta patanai e hekure, bona lauma dikana vada e lasi. ³¹ Bena ia na ma e lasi lou Turo kahana, bona Sidono e rakaia hanai ela Galileia Gouna amo edae ela hanua gwauta kahadia. ³² Haida ese taia kudima bona lanalana, tauna ta ia dekena e hakaua lao bona e noia imana na ia tubuana ai baine daukau. ³³ Ia ese hutuma lalodia amo e hakaua siri, bona imana kwakikwakina taiana ai e toia vareai, bona gabe ai e kanudi ia ese matana e dahua toho. ³⁴ Ia na guba ai e roha dae, e ganagana bona e hereva henia eto, "Efata," ina na e gwaumu a "hekeho!" ³⁵ Nega tamona taiana e hekeho, malana e maoro, bona e hereva goevagoeva. ³⁶ Iesu ese e haganidia tau ta basie hamaoroa, e haganidia momo, to idia na asie kamoni harina e piua rohoroho. ³⁷ Idia na e hoa dikadika, eto, ia ese gau iboudia ai e karadia goevagoevamu. Ia ese taia kudima e hakamonaidiamu bona mu e haherevadiamu.

8

¹ Unu dinadia ai, hutuma bada na Iesu dekenai ma e hebou lou, bona asi adia Iesu ese ena hahediba e boiridia e hamaorodia eto, ² "Aru taudia na name bogadiahisi, badina be dina toi dekegu ai bona asi adia. ³ Mai hitolo dia ida edia ruma ba siaidia laomu neganai, dala ai be manori diamu." ⁴ Ena hahediba e haere eto, "Ede kahai ina tano gagaenai ina hutuma adia parao begadia baia abi bona adia baita heni?" Bena e nanadaidia eto, "dekemui ai parao atagadia be hida?" Idia eto hitu." ⁵ Bena ia ese hutuma na e hamaorodia tano ai bae helai diho. Bena parao atagadia hituosi eabi, e hanamoa bona e bakidia. Ena hahediba e henidia bae dabaraia bona idia ese hutuma vairadiai e atoa. ⁶ Mai adia gwarume-gwarume ta ta danu, bona e hanamoa, ma e henidia bae dabaraia. ⁷ Idia na e aniani, bogadia e kunu, bona bahu bosea hitu e gogo. ⁸ Idia na daha-hani sisivana. Bena e siaidia karohe. ⁹ Haraga herea ena hahediba ida vanagi ai e gui, Dalmanuta tanona ela. ¹⁰ Farisea taudia e lasi, ia ida e hepapa-ahuahu matama, e dibagania, guba amo toa ta e tahua. ¹¹ E hahodi mai lalo-hisihisina ida bona eto, "Badina be dahaka ina uru ese toa e tahuamu? Na hamaoromui momokanimu, toa ta ina uru basina henidia. ¹² Bena e rakatanidia, e gui lou vanagi ai, e heau hanai kahanai. ¹³ Hahediba ese parao e lalo boio. Tamona mo vanagi ai e abia kau. ¹⁴ E tamanudia eto, ba roharoha bona matamui bae papa Farisea taudia bona Heroda ena orea taudia edia hatubu gauna garina." ¹⁵ Idia na sibodia e hereva heheni eto, "Badina asi ada." ¹⁶ Iesu na dibana, bona e hereva henidia eto, "Dahaka dainai o hereva hehenimu asi amui parao dainai? Doini asi dibamui a? Lalomui na do asie

pararamu a? Lalomui na doini duduhu a?¹⁸ Mai matamui, to asio itamu a? Mai taiamui, to asio kamonaimu a? Asio helalotaomu a? ¹⁹ Aniani gaudia imaosi na baki sisi daha-imaosi iubulaidia, bahudia na bosea hida o hahonu?" Idia eto, "Gwauta-rua."²⁰ Parao hituosi na baki sisi, daha-haniosi iubulaidia, bahudia na bosea hida o hahonu? Idia eto, "Hitu." ²¹ Ma eto, "lalomui na doini asie pararamu a?"²² Betesaida ai e kau. Bena haida ese mata-kepulu tauna ta ia dekena e hakaua lao, bena Iesu e noia enai baine dau kau. ²³ Iesu ese mata-kepulu tauna imana eabia, hanua murimurina ai e hakaua lasi. Bena matana e kanudidia bena imana tauna ai e dau kau, e nanadaia eto, "Gau o itamu a?"²⁴ Ia na e roharoha, bena eto, "taunimanima na itadiamu au na heheto to e rakamu." ²⁵ Imana na matanai ma e dau kau lou, bena ma e roharoha vada e namo, bona gau iboudiai e ita goevagoeva. ²⁶ Bena ena ruma e siaia lao, eto, "Hanua lalona amo basiola." ²⁷ Iesu mai ena hahediba ida Kaisarea Filipi hanuadia ela. Dala ai ia ese ena hahediba e nanadaidia, eto, "Taunimanima be dahaka e tomamu lau be daika?" ²⁸ Idia na e haere, eto O haida be "Ioane Baptiso e tomamu. a haida be Elia, bona ma haida peroveta tauna."²⁹ Ma e nanadaidia eto, A umui be dahaka o tomamu, lau be daika: Petero e haere eto, Oi na Keriso. ³⁰ Bena ia ese e tamanudia ia herevana na tau ta basie hamaoroa. ³¹ Bena e hadibadia matama, taunimanima natuna na hisihisi diagau do baine ani, ³² Ina hereva e gwauraia hedinarai. Bena Petero ese e hakaua siri e gwau henia matama. ³³ A Iesu na e gini kerehai ena hahediba e hageredia bena ia ese Petero e gwau henia eto, "Murigu kahana aola," Satani! badina be emu lalohadai na dia Dirava ena, a taunimanima edia. ³⁴ Ia ese aru taudia bona ena hahediba e boiridia hegogo, bena e hamaorodia eto, "Bema tau ta igavagu ura na baine ura, ia na sibona baine hedadarai, ena satauro baine abia isi, bena murigu ai baine raka. ³⁵ Badina be ena mauri e dogoa taomu tauna ese mauri baine reaia, a lau daigu ai bona sivarai namo dainai, ena mauri baine negea tauna ese mauri baine abia. ³⁶ Tau ta tanobada idoinai baine abia to ena mauri baine reaia dahaka namona ia enai? ³⁷ Bona tau ta dahaka baine heni ena mauri davana?" ³⁸ Taunimanima ta ese lau daigu ai eiava egu hereva daidiai baine hemarai ina heudahanai bona kara dika uruna vairadiai, Taunimanima Natuna ese ia dainai baine hemarai aneru helagadia ida tamana hairainai bainema negana ai.

9

¹ E hamaorodia eto, "na hamaoromui momokanimu, haida ini o ginimu taumui ese mase mamina basio dibamu ela bona Dirava ena basileia mai siahuna ida baine kau." ² Dina tauratoi vada ela, Iesu ese Petero bona Iakobo bona Ioane e abidia ororo badana ta ai e hakaudia dara, idia sibodia mo. Bena idia vairadiai ia toana e idau. ³ Ena dabua e hururuhururu, kurokakuroka, tanobada ai dabua ihurina tauna ta ese unu basinema hakurokuroa toma. ⁴ Bena Elia bona Mose ida vairadiai e hedinarai, bena Iesu ida e hereva-hereva. ⁵ Petero e haere bena Iesu e hamaoroa eto, "Hahediba e, ita ini seniai ta nohomu na namo herea, mani kalaga atoi ai a kara, auta oi emu, auta Mose ena, auta Elia ena." ⁶ (Badina be asi dibana ede baine hereva toma, badina idia na e gari dainai.) ⁷ Bena ori ta ese e govadia ahu. Bena ere/gado ta ori lalona amo ema eto, "Ina na natugu egu lalokau. Ba kamoni henia." ⁸ Idia na e roharoha, to tau ta asie itaia, Iesu mo sibona idia ida. ⁹ Ororo amo e hekeiva ai, ia ese e haganidia idia ese e ita gaudia ta basie e hamaoroalaia, ela bona Taunimanima Natuna na mase amo baine toreisi lou. ¹⁰ Idia sibodia ese ina hereva na lalodiai eatoa, a sibodia e henanadai heheni "ina mase toreisi lou anina be dahaka." ¹¹ Idia ese e nanadaia eto, "Dahaka dainai itorena taudia e gwaumu Elia na do bainema guna?" ¹² Ia na e haere eto, "Elia na vada ema guna, gau iboudiai ihamatamatadia. Dahaka ede e torea toma, Taunimanima natuna na hisihisi diagau baine ani bona bae dadaraia?" ¹³ A na hamaoromuimu Elia na vada ema, bona edia ura karadia ia enai vada e kara vaitani, e tore guna herevadia hegeregeregedia. ¹⁴ Ena hahediba ediai e kau ai, e itadia hutuma ese e ginidia hegege bena itorena taudia ida e hepapa-ahuahu. ¹⁵ Idia ese Iesu e itaia, bena aru taudia na e hoa bona dekena e heau lao, e hanamoa. ¹⁶ Iesu ese ena hahediba e nanadaidia eto, idia ida dahaka o herevalaiamu? ¹⁷ Bena hutuma bogaradia amo ta e haere eto, Hahediba tauna e, lau natugu na oi dekemu na mailaia. Mu laumana ese e boloamu. ¹⁸ E butua taomu bona e tahoa dobimu uduna e gwara-gwaramu, gadigadina (isena) e hahedauidiamu, bona tauna e tororo-tororomu (rigid). Emu hahediba na noidiamu ena amo bae lulua lasi, to idia na asi dibadia." ¹⁹ Bena Iesu ese e gwau henidia eto, "Asi emui abidadama uruna, Lau na dekemui ai baina noho ela bona edena nega ai? Baina haheauka henimui ela bona edena nega ai? Dekegu a mailaia." ²⁰ Idia ese mero na dekena e laohaia. Bena lauma ese Iesu e itaia, bena tauna e heude-heude (convulsion-shaken). Mero na tano ai e moru bona uduna e gwara-gwara. ²¹ Iesu ese tamana e nanadaia eto, "Ede daudau na ini eme heto? Tamana eto," Maragina negana ai. ²² Nega momo lahi ai e tahoa kauva, ranu ai e tahoa dobiva, aine hamasea e tomava. Bema igaukaralaina mai dibamu, mani boma bogamai hisi bona boma durumai. ²³ Iesu ese e hamaoroa eto, "Bema igaukaralaina mai dibagu o tomu? Abidadama tauna na gau iboudiai ikaradia dibana." ²⁴ Bena mero tamana e tai lolo eto, "Lau na vada abidadama! A durugu egu abidadama maragi-maragi amo!" ²⁵ Iesu ese aru taudia e itadia, idia e heau henidia, bena ia ese una lauma dikana e gwau henia eto, "Mu bona taia kudima laumana, na haganimumu, iena amo a raka lasi, bona ia lalonai basio vareai lou." ²⁶ Bena e tai lolo, tauanina e heude-heude bena vada e lasi. A mero na mase tauna na heto, hutuma e tomava, "Ia na e mase." ²⁷ A Iesu ese ia imana eabia e veria tore, bena vada e gini. ²⁸ Rumai e raka vareai negana ai, ena hahediba ese e nanadaia hehuni eto, "Dahaka dainai ai ese asia lulua lasi?" ²⁹ Ia eto, "Ini hetomana na ilulu-ohona dalana ta lasi guriguri mo sibona. ³⁰ Unu amo raka lasi bena Galileia tanona amo e raka hanai. Se urava ta baine diba idia be ede kahai, ³¹ badina ena hahediba e hadibadia. Eto, Taunimanima Natuna na taunimanima ediai taona bae torea, bae alaia mase, a dina toi murinai ia na baine tore isi lou." ³² a idia na lalodia asie parara, bona inanadaina danu e gari. ³³ Bena Kaperanaumai e kau. Ruma lalonai e vareai ia ese e nanadaidia, eto, "Umui dala ai be dahaka o herevalaiva?" ³⁴ A idia na asie haere, badina be dala ai sibodia vada e hepapa-ahuahu daika be hereadae. ³⁵ Bena ia na e helai diho, gwauta-ruaosi e boiridia bena e hereva henidia eto, "Baine guna e tomamu tauna, na gabe taunai

bainela iboudiai isiaidia baine lao heni.³⁶Bena ia ese mero-mero maragina ta eabia bogaradia ai e haginia. E rosia imanai eto,³⁷Lau ladagu ai mero-mero inihetomana ta eabia daemu; tauna ese lau danu e abigu daemu, bona lau e abigu daemu tauna ese dia lau mo lau e siaigu Diravana danu e abia daemu.³⁸Ioane ese e hamaoroa eto, Hahediba taumu e, ai na tau ta aitaia oi ladamu ai lauma dikadia e luludia bena a gwaua tao badina be ia na dia ita bamodia.³⁹Iesu eto, Basioma gwaua tao, lau ladagu ai kara siahuna e karaiamu tauna na lau ihadikagu asi dibana.⁴⁰Se laoda ahumu tauna ese e kahadamu.⁴¹Na hamaoromui momokanimu, ta ese ranu kurita baine henimui, umui na Keriso ena dainai, ia na davana ai basine dabu.⁴²A ini e abibiraigumu memero-memerodia ta baine hahekwakwanaia tauna na huro badana ta aiona ai bema mataia,davara ai bema negea dobi, bema namo.⁴³Imamu ese baine hahekwakwanaimu, ba utua oho: namo mai imamu dokona mauri ai ba vareai, dika mai imamu rua Gehena lahi se bodomu gabuna, baola.⁴⁴Unuseni ai edia uloulo basine mase, bona lahi na basine bodo.⁴⁵Aemu ese baine hahekwakwanaimu, ba utua oho, namo mai aemu dokona mauri ai ba vareai, dika mai aemu rua Gehena ai bae tahomu dobi.⁴⁶Unuseni ai edia uloulo basine mase, bona lahi na basine bodo.⁴⁷Matamu ese baine hahekwakwanaimu, ba giboa lasi, namo Dirava ena basileia lalonai ba raka vareai mai matamu tamona, dika mai matamu rua Gehena ai bae tahomu dobi.⁴⁸Unuseni ai edia uloulo basine mase, bona lahi na basine bodo.⁴⁹Taunimanima iboudiai na lahi amo bae hagoevadia.⁵⁰Damena na gau namona, a damena basinema tadika-tadika, ede bae hatadikaia toma? Damena lalomui ai bavabia, bona ba noho hebou mai mainomui ida.

10

¹Iesu na una gabu e rakatania bena ela Iudea tanona bona ela Ioridaena sinavaina kahana, bona taunimanima hutuma danu ia deken a ela. E henia gaukarana dainai ia ese idia na e hadibadibadiava.²Bena Farasia taudia na deken a ema e nanadaia ia itohona dalanai bena eto, "Taravatu ai tau ta adavana baine hadihoa ina be maoro eiava?"³Ia e haere eto, "Mose ena taravatu umu emui be dahaka, a?"⁴Idia e haere eto, "Mose ese tau ta na e hamaoroamu revareva ta baine torea, hahine baine henia bena hahine na baine hadihoa."⁵Ina na umui kudou auka-auka taumui dainai ina taravatu e torea.⁶Iesu ese e hamaorodia. To tanobada e karaia matama neganai, Dirava ese tau bona hahine e karadia.'Una dainai tau ta na tamana bona sinana e rakatanidiamu bona adavana ida e tamonamu,⁸bona raruosi na tauani tamona ai e laomu. Bena idia na dia raru, a tauani tamona.⁹Una dainai dahaka Dirava ese e haboua tamonai, tau ta ese na basine hapararaia.¹⁰Idia na ruma ai bena ena hahediba memerodia ese ma e nanadaia-lou.¹¹Ia ese e haere henidia eto, "Tau ta ese adavana eha dihoamu bona hahine ta ma e adavaiaumu tauna na heuda-hanai tauna."¹²Bema hahine ese tau eha dihoamu bena tau ta ma e adavaiaumu hahinena na heuda-hanai hahinena!¹³Bena haida ese natudia e laohaidia ia deken a ia ese baine dau dia-toho, to ena hahediba memero ese e gwau henidia.¹⁴A Iesu ese una kara e itaia neganai ia lalona na se moale ena hahediba ediai bena e hamaorodia eto, ene maragidia na lau dekegu aema, bona asio koudia, badina ba Dirava ena basileia na ene hetomadia edia.¹⁵Momokani na hamaoromuimu, daika ese Dirava ena basileia na asine abia daemu ina maragina ta asio abia daemu hegeregeregai, danu na do basie vareai diba.¹⁶Bena ia ese hari maragidia na e abidia hebou, ima na latadiai e ato bena e hanamodia.¹⁷Ia ena laolao ma e matamaia neganai, tau ta na ia e heau henia vairanai e gorudiho bena e noia eto, "Hahediba Tauna namona e, lau be dahaka baina kara mauri hanaihanai do baina abia?"¹⁸Iesu eto, "Dahaka dainai lau namogu e gwauraiamu, a? Ta na dia namo to Dirava sibona mo."¹⁹Oi na taravatu herevadia mai dibamu, "Basio ala-ala, basio heuda-hanai, basio henao, basio habade koikoi, basio kara koikoi, tamamu bona sinamu ba matauraidia."²⁰Una tau e hereva eto, "Hahediba tauna e, ini iboudiai na lau merogu neganai vada na badinadia."²¹Iesu ese e itaia bona e ura henia. Ia ese e hamaoroa eto, "Gau tamona oi emu ai o dabumu. Oi na emu kohu iboudiai ba hoihoilaidia bena ogoami taudia ba henidia bena kohu namona do bavabia guba ai. Bena baoma murigu ai ba raka."²²A una hereva dainai, ia lalona na asine moale, bona e raka oho mai lalo-hisihisina ida badina ia na mai ena kohu momo tauna.²³Iesu na e roharoha, bona ena hahediba memerodia e hamaorodia eto, Taga taudia ediai na mai hekwakwanaina Dirava ena basileia lalonai do ba vareai.²⁴Ena hahediba memerodia na e hoa unu ena hereva daidiai. A Iesu ese ma e hereva henia lou eto, "Natugu e, Dirava ena basileia ai ba raka vareai na auka!"²⁵Ina na dia auka kamelo ta nila matana amo baine vareai, to taga tauna enai na auka Dirava ena basileia lalonai baine vareai.²⁶Idia na e hoa dikadika bona sibodia e hereva heheni eto, "bena daika be do baine mauri, a?"²⁷Iesu ese e raraidia bena eto, "Taunimanima ediai ikarana na asi dibadia to dia Dirava enai, badina Dirava enai gau iboudiai ikaradia na mai dibana."²⁸Petero ese e hereva henia eto, "Aitaia ai na emai gau iboudiai vada a rakatanidia bona oi muimu ai ame raka."²⁹Momokani vaitani na hamaoromuimu, asi tauna ta lasi vaitani ia ese ena ruma, eiava tadina, eiava taihuna, eiava sinana, eiava tamana, eiava natuna, eiava ena tano vada e rakatanidia, lau daigu ai bona sivarai namo dainai,³⁰ia na nega sinahu-ta do basine davari hari ina tanobada ai; ruma bona tadina, bona taihuna, bona sinana bona natuna, bona ena tano, mai hisihisina ida, bona vaira tanobadanai, mauri hanaihanai basine abia.³¹A hutuma daidia be vaira na do bae gabe, bona gabe taudia na do bae guna.³²Idia na dala amo e laova Ierusalem, bona Iesu na idia vairadiai e raka guna. Ena hahediba memerodia na e hoa bona haida ia murinai e raka taudia na e gari. Bena Iesu ese ena hahediba memero gwauta-ruaosi na e boiridia-oho bona e hamaorodia matama nega sisinai dahaka do baine vara ia enai.³³Eto "Aitaia, ita na ta daradaemu Ierusalem ai bona Taunimanima Natuna na be henia hanaimu Dubu helaga taudia bona Itorena taudia ediai. idia ese be henia hanaimu Idau bese taudia ediai."³⁴Idia ese be kirikirilaiamu, be kanudiamu, be kwadiamu, bona be hamaseamu. To dina toi murinai do baine toreisi.³⁵Iakobo bona Ioane, Zebedeo natudia ruaosi ia deken a ema bena eto, "Hahediba Tauna e, ai a uramu a noiamu gauna na boma kara henimai."³⁶Ia ese e hamaorodia eto, "Umui be o uramu dahaka emui ai baina karaia a?"³⁷Idia eto, "Oi hairaimu o abiamu neganai, bavabimai oi ida baita helai hebou, ta idibamu kahanai bona ta

laurimu kahanai.³⁸ To Iesu ese e hamaorodia eto, "Umui na asi dibamui dahaka e noimu. Lau ese do baina inua keherena umui ese ba inua diba a, eiava lau baine baptisolaigu baptisona umui ese ba haheauka-laia diba a? ³⁹Idia eto "oibe". Iesu ese eha maorodia eto, "Lau ese baina inua keherena na umui ese danu ba inua, bona lau eha-baptisogu baptisona na umu danu ba baptaisolaimui. ⁴⁰To, daika be lau idibagu eiava lau laurigu ai baine helai na dia lau ese baina henia eha-hegaegedia taudia edia. ⁴¹Hahediba gwauta-osi ese e kamonaia neganai idia na e badu dikadika Iakobo bona Ioane ediai. ⁴²Iesu ese ena hahediba memerodia e boiridia hebou bona eto, "Umui na mai dibamui, e gwauradiamu Idau bese lohiadia edia lohia henudiai e nohomu bona edia tau badadia edia maoro na e gaukaralaidiamu idia latadiai. ⁴³To dia una dala ai umui latamui ai. Umui padamui ai daika e uramu baine hereadae na hesiai tauna ai bainela, ⁴⁴bona daika e uramu baine hegunalai na umui iboumui ai isiaimu baine laoheni. ⁴⁵Badina be Taunimanima Natuna na dia isiaina ba laoheni to ia ese isiaimui baine laoheni bona ena mauri baine hen i taunimanima momo ihamauridiai. ⁴⁶Idia na Ieriko ai e gini dae. Mai ena hahediba memerodia bona hutuma danu murinai ia ida Ieriko e rakataniava lalonai, Timaeus natuna ladana Batelomiu, mata kepulu bona noi hegama tauna na dala isenai helai. ⁴⁷Ia na e kamonaia una na Iesu tau Nasareta, ia na e boi-lolo bona eto, "Iesu, Davida Natuna e, a bogagu hisi." ⁴⁸Hutuma ese mata kepulu tauna na e gwau henia basine boi-lolo. To ia na dounu e boilou boilou e tomava, "Davida Natuna e, a bogaguhisi." ⁴⁹"Iesu na e gini bona e hamaoroa bainema ia dekena. Idia ese mata kepulu tauna na e boiria bona e hamaoroa eto, "A goada! A toreisi ia na oi e boirimumu." ⁵⁰Ia na ena dabua e tahoa tabe e toreisi bona Iesu dekena ela. ⁵¹Iesu ese e haere henia eto, "oi be dahaka o uramu emu ai baina kara a? Mata kepulu tauna e hereva eto, "Rabbi e, launa na uramu baina roharoha." ⁵²Bena Iesu ese e hamaoroa eto, "Aola, emu abidadama dainai ome namo guguru. Nega tamona, ia na e roharoha lou bona dala amo Iesu murinai e raka.

11

¹Idia na e raka ela bona Ierusalem e kahikahi, Betefage bona Betania ai e kau, olive ororonai. Bena Iesu ese ena hahediba rua e siaidia guna. ²E hamaorodia, eto, vaira hanua na aola. Bena ba raka vareai gabuna ai doniki natuna ta hekwatu-kauna ai ba itaia, latana ai ta do segui-kau ba ruhaia, ba mailaia. ³A ta baine hereva, baineto "Umui dahaka o karamu? Umui baoto "Lohiabada ese e ura heniamu, bona baine siaia lou haraga." ⁴Bena raruosi vada ela. Doniki batuna e davarua, ruma ta vairanai e itaia, bona vada e ruhaia. ⁵Unu seni ai ginidia taudia ese e nanadaidia, eto, umui na dahaka dainai ena doniki natuna o ruhaia. ⁶Bena Iesu ena hereva e hamaorolai dia bona e kahua negu. ⁷Idia ese doniki natuna na Iesu dekena e laohaia, bona edia dabu dorunai e ato: Bena Iesu e helai kau. ⁸Bena hutuma na edia dabua dala ai e tahodia, bona haida be reta e utu, dala ai e tahodia. ⁹Bena vaira taudia bona dokona taudia e hisi dae, eto, Hosana! Lohiabada ladana ai e maimu aita hanamoa. ¹⁰Seneda Davida ena basileia vada e maimu aita hanamoa. Atai doriva-dorivana ai hosana. ¹¹Ia na Ierusalem ai e kau, bona dubu helaga ai e raka vareai, gau iboudiai, e ita hagau-hagau. Adorahi ai, ia na gwauta-rarua ida e raka lasi, Betania e lou lao, ¹²Daba ai Betania amo e lou, mai hitolona ida. ¹³Bena ia ese suke auna ta rauna daudau na ai e itaia. Bena huahua na iabina e lao henia, to asi huahua na, rauna mo. Badina suke edia huahua negana na do vairai. ¹⁴Bena Iesu ese e gwau henia, eto, oi huahua na ta ese basine abia. harihari ela hanaihanai. Una hereva na ena hahediba ese e kamonaia. ¹⁵Idia na Ierusalem ai e kau, bona ia na dubu helaga ai e raka vareai. Hoihoi taudia e luludia lasi, bona moni e sensi taudia edia pata bona pune e hoi taudia edia helai gaudia e dori hebubu. ¹⁶Bona kohu e lato taudia danu e gwaudia tao. ¹⁷E gwau henidia, eto, ini se torea toma, a? Egu ruma na bese logora iboudiai edia guriguri rumana bae gwauraia. To umui ese hena-hena taudia edia kohu ai vada o halaoa. ¹⁸Hahelaga taudia bona Itorena taudia ese harina e kamonaia. Bena ia ialana dalana e tahua; badina be ia garina e gariva. Taunimanima iboudiai ese ena hahediba, herevadia e hoa laiva dainai. ¹⁹Adorahi iboudiai ia ese hanua badana e rakataniava. ²⁰Daba ai, raka hanaidia ai, hari suke, e itaia vada e mase vaitani. ²¹Petero na e helalolai-une, eto, hahediba taumu e, mani aitaia, o gwau henia sukena na vada eme mase vaitani. ²²Iesu eto, Dirava bavabidadama henia. ²³Na hamaoromui momokanimu. Ta ese ina ororo baine hamaoroa baineto "Ba heraga, davara ai ba henege dobi." Bona lalona basine daradara, lalona idoinai baineto e gwauraia gauna na do baine hekara. Ia ese e gwauraia gauna do baine vara. ²⁴Benaini na hamaoromui. O uramu gaudia iboudiai guriguri ai ba noi. Lalomui idoidiai baota bavabi, vada bavabi. ²⁵Guriguri ai ba gini negadai, e hadikamui taudia edia dika ba gwautao. Bena Tamamui guba ai e nohomu na emui dika baine gwautao. ²⁶A umui ese edia dika basi gwau tao, Tamamui guba ai e nohomu danu emui dika basine gwau tao. ²⁷Idia na Ierusalem ai ma e kau. Bena ia na dubu helaga lalonai rakanai, hahelaga taudia bona Itorena taudia bona tau-badadia ia dekena ela. ²⁸E nanadaia, eto, edena siahua ai ini gau o karamu, bona daika ese ina siahua e henimu? ²⁹Iesu e haere, eto, lau ese danu umui ai na nanadaimui: ba haere henigu, bona lau danu ini gau na karalaimu siahua baina hamaorolaimui. ³⁰Ioane ena baptiso na guba amo eiava taunimanima edia amo? Mani hamaorogu. ³¹Idia na sibodia e hereva heheni, eto, ita baitato "Guba amo," ia be gwaumu "matona basio kamonaia henia." ³²Baita gwa "Taunimanima edia amo" to idia na aru taudia garidia e gariva. Badina iboudiai be tomamu Ioane na peroveta tauna korikori. ³³Bena idia ese Iesu e haere henia, eto, asi dibamai. Bena Iesu ese e haere henidia, eto, lau danu ini gau na karalamu siahua na basina hamaorolaimui.

12

¹Ia ese sivarai hegeregere e gwaurai matama eto, tau ta vine imeana e hadoa, maguna eatoa hegege, vine imoimoidia gurina e geia, hegima kohorona e haginia. Bena imea ihadona taudia e habadinalaidia. Bena e halaolao. ²Negana korikori

ai, ia ese ena hesiai tauna ta e siaia ela imea ireguna taudia dekedie vine anidia baine abi.³ A idia ese e dabaia tao, e dadabaia, bona e lulua imana kavakava e lou.⁴ Bena hesiai tauna ta ma e siaia, to ia na kwarana e haberoa, bona e hahemaraia.⁵ Ta ma e siaia, to e alaia mase. Hutuma danu unu e karadia toma, haida e haberodia bona haida e aladia mase.⁶ Ia dekenai na tamona mo noho baine siaia, ia natuna lalokauna. Ia na dokonai idia dekedie e siaia lao. Eto, 'natugu binai idia ese bae matauraia.'⁷ To imea ireguna taudia e hereva heheni eto, dihina binai, aoma aitame alaia, bona imea na vada iseda.⁸ Idia ese e dabaia tao, e alaia mase, bona imea lalona amo e tahoa lasi.⁹ Una dainai, Imea biaguna be ede baine kara toma? Ia na do bainema bona imea hado taudia baine aladia ore bona imea na haida baine henidia.¹⁰ Ina revareva asio duahia a? Ilarebana taudia ese e dadaraia nadina na daiguni nadina ai vada ela;¹¹ Ina na Lohiabada ena amo ema, bona ta hoamu matadai ta itaiamu.¹² Idia eurava Iesu bae dabaia-tao, to taunimanima garidia e gariva, badina idia e dibava una sivarai matana na idia ediai. Bena idia ese e rakatania bona vada ela.¹³ Bena idia ese Farisea taudia bona Heroda ena orea taudia haida e siai dia ia dekena ela ena hereva amo bae idoaia.¹⁴ Bena ela neganai, e hereva henia eto, "Hahediba tauna e, ai dibamai oi na maoromaoro, taunimanima garidia so garimu bona taunimanima orormadia so lalomu. Dirava ena dala o hahedibalaia goevagoevamu. Edena be maoro Kaisara ena tax monina baia heni namo eiava lasi?"¹⁵ A Iesu na edia koikoi dibana bona eto, Dahaka dainai o dibaganigumu? Siliva monina ta a mailaia bona baina itaia.¹⁶ Ta e mailaia Iesu dekena. E hamaoroadia eto, "Ina be daika laulauna bona daika ladana?" Idia eto, "Kaisara."¹⁷ Iesu eto, "Kaisara ena Kaisara bae henia, bema Dirava ena Dirava bae henia. Idia na ia e hoalaia."¹⁸ Bena Sadukea taudia, egwauva toreisi lou lasi oreana taudia, ia dekena ela. Idia ese e nanadaia eto,¹⁹ "Hahediba tauna e, Mose ese e tore henimai eto, 'Bema tau ta tadikakana baine mase bona adavana baine rakatania, to asi natuna, una tau ese tadikakana adavana baine abia, natuna baine havaradia tadikakana ena.'²⁰ Bese ta taudia na hahitu; tau guna e headava bona e mase, to asi natuna."²¹ Bena iharuana ese vabu e adavaia to ia danu e mase, asi natuna, bona ihatoina danu unuheto.²² Taudia hituosi e mase asi natudia. Gabe amo, hahine vada e mase.²³ Toreisi lou neganai, idia vada e toreisi lou, una hahine be daika adavana? Badina be hahituosi ese e adavaia."²⁴ Iesu eto, "emui kerere binai, badina buka helaga asi dibamui bona Dirava ena siahu danu asi dibamui?"²⁵ Badina be mase amo bae toreisi lou, na basie e headava, to idia na guba anerudia na heheto.²⁶ A mase amo e toreisi herevana na Mose ena buka ai, au e araia sivaraina lalonai, asio duahia a? Dirava ese e hereva henia eto, 'Lau na Aberahamo ena Dirava bona Isa'ako ena Dirava bona Iakobo ena Dirava?'²⁷ Ia na dia mase taudia edia Dirava, to mauri taudia edia. Umui na o kerere dikadikamu.²⁸ Itorena tauna ta ema bona edia hepapa-ahuahu e kamonai; e itaia Iesu ese e haere henidia goevagoeva. Ia ese e nanadaia eto, "hahegani herevadia iboudiai edena be herea?"²⁹ Iesu e haere eto, "hahegani hereadaena binai, a kamonai, Isaraela e, Lohiabada iseda Dirava be, Lohiabada tamona."³⁰ Lohiabada emu Dirava ba lalokau henia mai lalomu idoinai, mai laumamu idoinai, mai daramu idoinai bona mai goadamu idoinai?³¹ Iharuana binai, dekemu tauna ba lalokau henia sibomui o helalokaumu hegeregereana.' Ini hahegani ruaosi na heherea.³² Itorena tauna ma e hereva henia eto, "Namo, Hahediba taumu e, momokani o hereva maoromu, Dirava na tamona, bona tama lasi ia ohenai."³³ Ta ese baine lalokau henia mai lalona idoinai, mai darana idoinai, mai goadana idoinai, bona dekena tauna e lalokau henia sibona e helalokaumu hegeregereana, bada hereana bunai, helaga karadia iboudiai e hereadiamu.³⁴ Iesu dibana ia na vada e haere mai lalopararana ida, e hamaoroa, eto, Oi bona Dirava ena basileia padamui na dia daudau. Una murinai taunimanima iboudiai Iesu inanadainai e gariva.³⁵ Iesu na Dubu lalonai e hahediba eto, Itorena taudia be ede egwau tomamu. Keriso na Davida natuna etomamu a?³⁶ Davida be Lauma Helaga, ese e rohea eto, Lohiabada ese egu Lohia e hamaoroa eto, "Lau idibagu kahanai ba helai, ela bona inaimu iboudiai na oi aemu ihadaidia gaudia ai baina halaodia."³⁷ Davida sibona ese "Lohiabada" e gwauraia be edeheto Keriso na Davida natuna, Aru taudia na mai moaledia ida ia erena e kamonai.³⁸ E hahediba lalonai Iesu eto, Itorena taudia nahuadia ba toho, idia na e uramu dabua latadia bae rio bona bae loaloa hoihoi gabudia ai taunimanima ese bae hanamodia.³⁹ Bona e uramu gabu hereadi ai bae helai dubu ai bona anibou ai gabu hereadia ai bae helai.⁴⁰ Idia ese vabu edia ruma e haogogamidia, bona edia guriguri e hadaudau, taunimanima ikoilaidia. Idia na dava metaudia do bae abi.⁴¹ Iesu na boubou mauana vairanai e helai; e raka vareai taudia e itadia edia moni maua lalonai e uda dobi. Haida danu taga taudia, moni e uda dobi maua lalonai.⁴² A vabu ogogamina ta ena moni maragi-maragidia rua e uda dobi, ruaosi na toea tamona mo hegeregereana.⁴³ Ena hahediba e boiridia e hamaorodia eto, na hamaoromui momokanimu, una vabu e uda dobi gauna na bada a idia iboudiai e uda dobi gaudia na mamaragi.⁴⁴ Badina be idia ese edia taga amo sina taina e udaia dobi, a ia na ena ogogami amo, ena gau idoinai ena mauri helaoreana e udaia dobi."

13

¹ Iesu na dubu helaga amo e raka ohova lalonai ena diba-taudia tauna ta ese e hamaoroa, eto. "Ahediba tauna e, unu nadi hereadaedia bona ruma hereadaedia aitadia."² Ia ese e haere henia, eto, "Ini ruma badadia o itadiamu? Nadi ta nadi ta latanai basine heato kau bona basine heveri diho."³ Ia na Olive ororona latanai, dubu-helaga kahana ai, e helaiva lalonai, Petero, Iamesa, Ioane bona Aniderea ese hehuni ai e nanadaia.⁴ Mani a hamaoromao, ini gau be edena nega ai be varamu?"⁵ Iesu ese e hereva henidia, eto. "Oromana ba itaia. Taunimanima ta ese basie hakaumui kerere." Taunimanima momo be maimu lau ladagu ai beme gwaumu, "Lau na Ia' bona idia ese bae hakaumui kerere." Tuari e varamu eiava tuari bae vara sivaraidia ba kamonai neganai, basio lalohekwarahi.⁶ Badina be tanobada ta ese tanobada ta baine heiriheiri henia, bona basileia ta ese basileia ta baine heiriheiri henia. Laga do bae vara gabu momo ai bona doe do baine vara. Ini na mara matamata hisihisidia.⁷ Ba gima, idia ese siahu taudia vairadi ai bae haginimui bona hebou rumadia ai bae dadabamui.⁸ To sivarai namo na bae haripiulaia tanobada iboudiai ediai.⁹ Bae dabamui tao bona bae henimui hanai

neganai, basio lalohekwarahi dahaka ba gwaurai. Badina be una hora lalonai, dahaka ba gwaurai gaudia na bae henimui; una na dia umui ba hereva, to Lauma Helaga. ¹²Tadikaka maruanena ese tadikakana maruanena baine hamasea bona tama ese natu baine hamasea. ¹³Taunimanima ese basie ura henimui, badina be ladagu dainai. To daika baine haheauka ela bona dokona una taunimanima na do bae hamauria. ¹⁴Hahedika gauna ba itaia ia basine gini gabunai (duahiduahi tauna na ba lalopararai, Iudea ai nohodia taudia na bae heau mauri ororo baela, ¹⁵ruma guhina latanai nohona tauna na basine vareai ruma lalonai eiava ruma lalona amo gau ta basine abia lasi, ¹⁶bona uma imeana ai nohona tauna na basine loulao ruma, ena dabua iabina totona. ¹⁷To rogorogo hahinedia bona mararoto hahinedia unu dina ai, madi ihabaidia! ¹⁸Ba guriguri be ina kara na basine vara keru negana ai. ¹⁹Badina be hisihisi badaherea do baine vara, matamana negana vaitgani Dirava ese tanobada e karaia negana amo ema bona ina harihari, do se vara hisihisina. ²⁰Bema Dirava ese unu dina basine hakwadogidia, "tauani" ta basie hamauria. To e abidiahidi taudia daidiai, ia ese abidiahidi taudia, ia ese dina do baine hakwadogidia. ²¹Bena taunimanima ta ese baine hamaoromui, baineto, 'A itaia, Keriso o-ina' eiava 'A itaia, Ia o-una! basio hamomokania. ²²Badina be Keriso koikoidia bona peroveta taudia koikoidia na do bae hedinarai bona hoa toadia bona kara bae henimui, bae koimui, bona bema dalana e abidihidi taudia danu. ²³Ba gima! Lau ese ini gau na hamaoromui nega do badaherea do vairai miana lalonai. ²⁴To una hisihisi bada negana dinadia murinai, dina na do bae hadiburaia, hua ese diari basine henidia, ²⁵hisiu na guba amo bae moru, bona siahu guba lalonai na bae udeuedia. ²⁶Bena idia ese Taunimanima Natuna bae itaia, ori latadiai be maimu, siahuna-bada bona mai hairaina-bada ida. ²⁷Bena ia ese ena aneru baine siaidia bena ia ese ena abihidi taudia baine haboudia lai haniosi amo, tanobada-gabudia dokodia amo ela bona guba-gabudia dokodia. ²⁸Suke auna ena amo mani ahedibadiba ta dibaia. Ia badauna vada e gavemu bena rauna vada e garamu neganai, umui o dibamu siahu negana vada e kahikahimu. ²⁹Unuhetomana danu, umui ese ini gau e varamu ba itadia neganai, badiba ia na vada kahirakahira, ikoukou badibadidiai. ³⁰Na hamaoromui momokanimu, ina uru na do basine puki ore ela bona ini gau iboudiai bae vara. ³¹Guba bona tanobada na do bae ore, to lau egu hereva na basie puki ore. ³²To una dinana bona horana, na ta asi dibana, aneru gubai danu asi dibadia, bona Natu danu asi dibana, to Tama mo dibana. ³³Bae hegaegae! Ba gima, badina ai dibamai negana be edena. ³⁴Ina na e kara tau ta e halaolao-ena ruma e rakatania bona ena ruma na ena hesiai-laoheni taudia edia heregu henuna ai e rakatania, ta ta edia gaukara e henidia bona gima tauna e hagiania basine mahuta. ³⁵Una dainai, ba noho hegaegae badina umui asi dibamui ruma biaguna be edena nega ai bainema ruma readia hanuaboi ai, eiava malo ai, kokoroku baine tai ai, eiava daba ai. ³⁶Bema ia na baine mai taku neganai, ia ese mahutamui ai basine davarimui. ³⁷Na hamaoromuimu herevana na taunimanima iboudiai na hamaorodiamu: Ba gima!

14

¹Dina rua do vairai Lagau-hanai Ariana, bona asie hatubua paraona ta bae karaia. Bena hahelaga taudia bona itorena taudia ese dibaka karadia e lalodia Iesu bae dabaia tao bena baia abia. ²To idia na e tomava, "Dia aria neganai, badina be aru taudia bae helogo-helogo bogaragdia ai na garina. ³Iesu na do Betania ai Simona lepera tauna ena ruma lalonai, aniani patana ai ege diho, hahine ta na ela ia dekena nadi kavabuna ta eabia kau lalonai dehoru namo-hereana davana bada gauna. Hahine ese kavabu na e hamakohia bena kwarana ai e bubua. ⁴A ia dekena taudia haida na e badu, bena sibodia lalodia ai e hereva bena eto, "Dahaka dainai ina dehoru e negea kavamu?" ⁵Ina dehoru na bema hoia kina toi-ahui bema hanaia reana, monina na ogoami taudia bema henidia bena idia ese e gwau henia. ⁶A Iesu eto, "A rakatania." Dahaka dainai umui ese o turia riki heniamu?" Ia ese gau namo-hereana egu ai vada eme karaia. ⁷Ogoami taudia be nega iboudiai umui dekemui ai, bema ba ura neganai vada ba hanamodia. A lau be dia nega idoidiai umui dekemui ai. ⁸Ena diba hegeregereana ai vada e kara henigu. Ia ese tangu vada e dahua hegaegae do asie gurigu ai. ⁹Na hamaoromui momokanimu, sivarai namo bae harorolaia gabudia iboudiai tanobada hegege madai, "Ina hahine ese eme karaia karana ba gwauraia, ia ihelalolaina." ¹⁰Bena Iuda Isakariota, gwauta-rarua tauna ta, ela hahelaga taudia dekedie Iesu taona itorena totona. ¹¹Bena dubu helaga taudia na e kamoni, e moale dikadika bena e gwauhamata moni ba henia. Una dainai ia ese taona itorena dalana e tahua. ¹²Dina ginigunana ai asie hatubua flaoana, Lagau-hanai mamoodia ialadia ai, ena hahediba ese e nanadaia eto, "Ai be edeseni ai Lagau-hanai baia karaia hegaegae, bena bavania?" ¹³Bena ia ese ena hahediba rarua e siaidia bena eto, "Aola hanua lalonai ba vareai, bena tau ta hodu e huaia ba davarua. Ba gavaia. ¹⁴Baine vareai rumana ai, ba gavaia bena una ruma biaguna ba hereva henia. Hahediba tauna na e tomamu, "vativadi daiutuna be edena, egu hahediba ida Lagau-hanai ariana baia ania?" ¹⁵Bena ia ese atai daiutuna badana ta baine haheitalaimui, vada e iravaia vaitanai unuseni ai ba hahegaegae. ¹⁶Bena ena hahediba ela hanua lalona ai e raka vareai, ia ese e gwaurai guna gaudia iboudiai e davari, bena Lagau-hanai e dabaraia. ¹⁷Adorahi ai ia na gwauta-raruosi ida e hebou. ¹⁸Bena idia na aniani gabuna ai ege diho ai, Iesu ese e hamaorodia eto, "Na hamaoromui momokanimu, umui lau ida ta aniani heboumu tauna ta ese lau taogu baine torea. ¹⁹Idia na e lagaga bou, bena ta ta ese e nanadaia, eto, ina lau a?" ²⁰Ia e haere eto, Gwauta-raruosi taumui ta, lau ida nau tamona ai a dau dobimu. ²¹Taunimanima Natuna na momokani bainela, e torelaia guna hegeregereana. A Taunimanima Natuna taona itorena tauna madi ihabaina, vada basie nema vara hari namo. ²²Idia na e anianiva lalonai, Iesu ese glaoa atagana ta eabia, e hanamoa, bena e bitua. E henidia bena eto, "Avabia. Lau tangu binai. ²³Bena kehere (kapusi) ta ma e abia e hanamoa, e henidia, eto, ²⁴Lau raragu binai, herohemano rarana, hutuma daidiai baine hebubu. ²⁵Na hamaoromui momokanimu, lau ese vine ranuna basina inua lou, ela bona matamatana baina inua, Dirava ena basileia lalonai. ²⁶Idia ese ane eabia vaitani, bena e raka lasi Olive ororona ela. ²⁷Bena Iesu ese e hamaorodia, eto, iboumui ai lau daigu ai ba hekwakwanai, badina be ini e torea toma. Mamoe iregudia tauna

baine gwadaia, Bena mamoe vada bae karoho.²⁸ A lau na baina toreisi lou bena baina gunalamui Galileia ai.²⁹ Petero eto, Taunimanima iboudiai bae hekwakwanai a lau be lasi.³⁰ Bena Iesu ese e hamaoroa eto, na hamaoromu momokanimu, hari ina hanuaboi, kokoroku do basine tai harua, oi ese hatoi ba goregu.³¹ A ia na e gwau heagi eto, ena be oi ida baita mase hebou, to lau oi basina goremu. Iboudiai danu unu mo e gwau toma.³² Idia na gabu ta ai e lasi, ladana Getesemane. Bena ia ese ena hahediba e hamaorodia, eto, iniseni ai ba helai, lau do baina haguriguri.³³ Bena ia ese Petero bona Iakobo bona Ioane e hakaudia siri bena laumana e daure, darana e doko.³⁴ Bena e hanamodia, eto, lau na laumagu eme hisihisi bada, mokona name mase, iniseni ai ba noho, ba gima.³⁵ Taina ma e raka lao, bena tano ai e goru para-para, e guriguri, bema mai dalana ena nega taina bema daudau,³⁶ eto, Aba e, Tamagu e, oi na gau iboudiai ikaradia dibamu, ina kehere na egu amo boma abia oho, to dia lau egu ura, oi emu ura hari.³⁷ Bena e lou lao mahutadia ai e davaridia. Ia ese Petero e gwau henia, eto, Simona e, o mahutamu a? Hora tamona do basoma gima a? ³⁸Ba gima, ba guriguri, hedibagani ai ba vareai na garina. Lauma na e uramu, a tau-anina na eme manoka.³⁹ Ma e raka oho, eha-guriguri, ena guriguri gunadia ma e gwurai lou.⁴⁰ Ma e lou lao, mahutadia ai ma e davaridia, badina be matadia na e mahutava. Ia ihaere henina na asi dibadia.⁴¹ Iha-toina ma e lou lao bena e hamaorodia, eto, "Umui be doene mamahuta bona lagamui o animu? Vadaeni! horana vada eme kau. A itaia! Taunimanima Natuna na dika taudia imadia ai vada e atoa.⁴² O tore isi, aitala. Aitaia, taogu itorena tauna vada e maimu.⁴³ Ena hereva do se ore, Iuda, gwauta-rua tauna ta, e ginidae, hutuma bada ida mai edia dare bona mai edia kareva, hahelaga taudia, itorena taudia, bona hanua tau-badadia.⁴⁴ Tao-tore tauna ese toa ta, e henidia guna eto, "Baina harahua tauna gaunabunai, ba dabaia tao bena ba hakaua balaheni." ⁴⁵Iuda e ginidae neganai, maoromaoro Iesu dekena ela eto, "Hahediba taumu e." Bena e harahua.⁴⁶ Bena idia ese imadia ai e daua kou bena e dabaia tao.⁴⁷ A ia dekenai e gini taudia ta, ese ena dare e veria lasi bena hahelaga tauna badana ena hesiai tauna taiana e taraia bena e utua oho.⁴⁸ Iesu ese e hereva henidia, eto, "Umui na mai daremui bona mai karevamui ida oma lau idabaigu e kara dadidadi tauna ta na heto.⁴⁹ Dina iboudiai lau be dekedekemui ai bona na hahedibava dubu helaga lalonai, to asio dabaigu tao. A ina na e tore guna gaudia ihamomokani laidia.⁵⁰ Bena iboudiai ese Iesu e heautania.⁵¹ A tau ta, ia na rami mo e rioa, ia ese Iesu e gavaia bena idia ese ia danu e dabaia tao,⁵² to ena rami imadia ai e rakatania, ia gagaena mo e heau.⁵³ Idia ese Iesu e hakaua lao hahelaga tauna badana dekena. Hahelaga taudia, tau badadia bona itorena taudia iboudiai ia ida e hebou.⁵⁴ Petero ese Iesu e gavaia to mai padana, ela bona hahelaga tauna badana ena ruma maguna lalonai! bena hesiai taudia ida e helai hebou, lahi ai e hegana.⁵⁵ Bena hahelaga taudia bona kaunsil taudia iboudiai ese Iesu ihamasena badina e tahua. To gau ta asi e davaridia.⁵⁶ Badina be hutuma ese e habadelaia koikoi, to edia hahebade na asi e hegeregere.⁵⁷ Ma haida e tore isi edia hahebade koikoi hereva dia e gwaurai, eto, ⁵⁸A ai na iena hereva a kamoni eto, "Ina imadia amo e karaia dubuna baine rohoa, bena dina toi lalodiai ima ai asie karaiaumu gauna auta ma baine karaia." ⁵⁹A edia hahebade herevadia na asie hegeregere.⁶⁰ Bena hahelaga tauna badana na bogaragidiai e tore isi, Iesu e nanadaia eto, Oi so herevamui a? Ini edia hahebade herevadia be dahaka? ⁶¹Ia na asi regeregena se haere henidia. Bena hahelaga tauna badana ese ma e nanadaia lou eto, "Oi be Keriso, e hanamoamu Diravana Natuna a?" ⁶²Iesu eto, "Lau binai bona umui ese Taunimanima Natuna do ba itaia ia na siahua imana idibana ai baine helai guba oridia ida bainema."⁶³ Hahelaga tauna badana ese sibona ena dabua e dareva bena eto, "Dahaka hahebade doini ta tahuamu a?" ⁶⁴Hahedika herevadia vada ome kamoni. "Umui be dahaka o tomamu?" Idia iboudiai ese e revaia ia na baine mase.⁶⁵ Bena haida ese e kanudia bona haida ese matana e koua ahu bena e tutua bena e hamaoroa eto, "Daika ese!" Edia hesiai taudia ese e abia bena e dadabaia."⁶⁶ Petero do henuai magu lalonai, hahelaga tauna badana ena hesiai kekenina ela dekena.⁶⁷ Ia ese Petero e itaia sibona e heganava, bena ma e itaia kahikahinai bena eto, "Oi danu Iesu Nasareta tauna, o bamoava.⁶⁸ To ia na e hegore, eto, "Lau na asi dibagu bona lalogu na seme parara oi be dahaka o gwauraimu." Bena e raka lasi magu lalonai.⁶⁹ A hesiai kekenina ese e itaia bena unukahai ginidia e hamaorodia, "Ina tau danu idia ta!" ⁷⁰To ia na e hegore lou. Asi vanahana unusenai e gini taudia ese Petero e hamaoroa, eto, "Momokani oi danu idia ta, badina be oi danu Galileia."⁷¹ A ia na sibona e gwautora bona ere dika, "Lau na asi dibagu umui o gwauraiamu tauna." ⁷²Bena kokoroku haraga herea e tai nega iharuana. Bena Petero ese Iesu ena hereva e hamaorolaia na e helaloune laia. "Kokoroku do basine tai harua, oi ese hatoi ba goregu," bena e tai dikadika.

15

¹Daba matana ai, dubu helaga taudia bona hanua taudia badadia, itorena taudia bona Iudea edia Kansola iboudiai e hebou. Bena Iesu vada e gua e laohaia. Idia ese Pilato enai vada e henihanai. ²Pilato ese vada e nanadaia, eto, "Oi be Iudea taudia edia Pavapava, a?" Ia e haere, eto, "Oi ese o gwauraiamu." ³Helaga taudia ese gabu momo ai e habadelaia. ⁴Pilato ese ma e nanadaia lou, eto, "Oi asi emu haere ta, a? O itaiamu idia ese gabu momo ai oi e hahebade laimumu!" ⁵A Iesu ese Pilato vada se haere henia lou, bona ia vada e hoa.⁶ Hari una aria negana ai, Pilato na nega iboudia ai dibura-ruma tauna ta, idia edia ura dibura ruma tauna ta, ba ruhaia negeva idia edia, ⁷unu dibura ruma ai e nohova dagedage taudia ida, ala-ala taudia vada e abidia edia dagedage daidiai, padadiai be tau ta ladana na Baraba.⁸ Taunimanima hutuma vada ema Pilato dekena bona e noinoi guna ediai e karava karana ma baine karaia lou ediai.⁹ Pilato vada e haere, eto, "Umui be ouramu lau ese Iudea taudia edia Pavapava baina ruhaia nege emui, a?" ¹⁰Badina ia vada dibana edia mama dainai hahelaga taudia ese Iesu vada ia e henia. ¹¹A hahelaga taudia ese hutuma vada e haganidia bae lolo bema namo Barabas hari bae ruhaia-nege.¹² Pilato ma e haere, eto, "Lau be vada dahaka baina kara Iudea taudia edia Pavapava enai, a?" ¹³Idia ma e lolova, etomava, "Ba hasatauroa!" ¹⁴Pilato ese vada e hamaorodia, eto, "Ia be vada dahaka kerere e kara, a?" A idia dounu e lolo loulouva, etomava, Ba hasatauroa," ¹⁵Pilato e urava hutuma baine hamoaledia, una dainai

Barabas vada e ruhaia-nege edia. Ia ese tuari taudia e haduadia Iesu ma kwanau ai e kwadia bena e henidia bae hasatauroa.¹⁶ Tuari taudia ese vada e hakaua lao edia gavamani tauna badana ena noho gabuna ai, bona edia tuari taudia iboudiai e gogodia.¹⁷ Idia ese tuari taudia edia dabua vada e hakaralaia bona au ginigini e mogedia korona ta e karaia kwanai vada eatoa.¹⁸ Idia ese vada e hanamoa matama bona eto, "A hanamomumu, Iudea taudia edia Pavapava!"¹⁹ Idia ese ia kwarana siriho amo e botaiava, bona e kanudiava. Idia na ia vairanai e hetuituiva koikoi ai e toma henia dihova.²⁰ Idia ese vada e kirikiri laia neganai, tuari dabuana ena amo vada e kokia-oho bona ena dabua ma e hakaralaia, bona e hakaua lasi bae hasatauroa.²¹ A tau ta, ladana Simona Kurene hanuana amo, na gunika amo e maiva (ia na Alesana bona Rufus tamadia), bona idia ese e haduaiava (Iesu ena) satauro baine huaia.²² Tuari taudia ese Iesu vada e hakaua lao gabu ta ladana Gologota anina be, "Kwara-koukouna gabuna."²³ Idia ese vine ranuna mai hisihisi ihmaragina muramura ida e henia, a ia ese na se inua.²⁴ Idia ese vada e hasatauroa bona ena dabua e haridia ludo gadarana amo bae diba edena dabua seana tuari taudia ta ta ese do bae abidia.²⁵ Una be hora ithoinai (daba nine o'clock), idia ese vada e hasatauroa.²⁶ Toana latanai be idia ese hahebade herevana ini e torea toma: Iudea taudia edia Pavapava."²⁷ Ia ida dadidadi taudia rarua ida e hasataurodia, ta ia idibana ai bona ta ia laurina ai.²⁸ Unu amo gunaguna e torea herevana vada e momokani, eto, Kara havara-havara taudia ida e duhaia hebou.²⁹ E raka hanaiva taudia ese e hereva dika heniaiva, kwaradia e taiko-taiko bona etomava, "Aha, oi dubu helagana ba hadikaia bona dina ithoina ai ba haginia lou taumu."³⁰ Sibomu a hahemaui bona satauro amo ba diho!³¹ Ini hetomana danu, hahelaga taudia sibodia ese e gonagonalaiva, bona itorena taudia danu, bona etomava, "Ia be taunimanima haida e hamauridiava, a ia sibona be basine hahemaui."³² Keriso, Isaraela Pavapavana e, satauro amo ina harihari a diho, bona ai ese baia itaia bona baia abidadama," bona ia ida e hasataurodia hebou taudia ese danu e gonagona laiava.³³ Hora tauratoi ai (dina tubua ai), dibura ese tanobada idoinai vada e govaia-ahu, ela bona hora taurahani-ta (adorahi three o'clock).³⁴ Hora taurahani-ta ai Iesu vada mai erena badana ida e tai-lolo, eto, "Eloi, Eloi lama sabaktani?" anina be, "Egu Dirava e, Egu Dirava e, dahaka dainai lau ome rakatanigu?"³⁵ Ia dekenai e gini taudia haida ese erena vada e kamoni bona eto, "Aitaia, ia na Elia e boiriamu."³⁶ Taudia ta e heau, raba ta vada vine ranuna iditana ai e hagavea siriho auna ai e atoa, bona vada e henia baine inua. Tauna eto, "Mani aita itaia, bema Elia na bemaumu ia iabi dobina."³⁷ Bena Iesu vada erena badana e tai-lolo bona e mase.³⁸ Dubu helagana seseahuna vada e hedare kaha rua atai amo ema bona henu.³⁹ Bena tuari igunalaina tauna ta vada gini Iesu e vaira henia ese e itaia ini e mase toma negana ai, ia vada eto, "Momokani ina tau na Dirava Natuna."⁴⁰ Hahine haida danu daudauna amo e itaia. Bogaragidia ai be Maria Magadala, Maria (Iakobo maragina bona Iose sinadia), bona Salome.⁴¹ Ia do Galileia e nohova idia ese murinai e rakava bona isiaina e lao heniva. Hahine momo danu ia ida vada ema Ierusalem.⁴² Adorahi vaburana ema negana ai, badina be una dina na Hegaegae Dinana, una na, Sabadi vairana dinana.⁴³ Iosepa, Arimatia tauna vada ema unu. Ia be Kansola oreanai harina namona tauna ta, Dirava ena basileia e nariava tauna. Ia na mai goadana ida vada ela Pilato dekenai bona Iesu tauanina e noia.⁴⁴ Pilato vada e hoa dikadika badina be Iesu na vada e mase dainai; ia ese tuari igunalaina tauna vada e boiria bona e nanadaia bema Iesu na vada e mase.⁴⁵ Bena Pilato tuari igunalaina tauna ena amo e diba Iesu vada e mase neganai, ia ese tauanina vada Iosepa e henia.⁴⁶ Iosepa na dabua aukana ta vada e hoia. Ia ese satauro amo vada ebia dobi, dabua amo vada e kumia, bona nadi kohuana e utua garana ai vada eatoa. Bena ia ese nadi ta e keia gara iduarana ilao-ahuna.⁴⁷ Maria Magadala bona Maria, Iose sinana ida ese Iesu e guria gabuna vada e itaia.

16¹ Dina helaga e ore ai, Maria Magadala, Maria Iakobo sinana bona Salome muramura mai bonadia e hoi bona ela Iesu tauanina idahulaina.² Daba galumana pura dina ginigunana ai, idia na gara ela dina edae ai.³ Idia na sibodia e hereva heheni, eto "daika ese una gara nadina baine a kurea oho ita daidai?"⁴ Bena e roha isi idia ese nadi e itaia vada e kure oho, badina ina na badahere.⁵ Idia na gara ai e raka vareai bona eregabe ta e itaia dabua kurokurodia e kara idiba kahanai e helai, bona idia na e gari.⁶ Ia ese e hamaorodia eto, asio gari umui na Iesu tau Nasareta o tahuamu, daika be e hasatauroa, ia nae toreisi! ia na dia ini kahai, idia ese ia e kurea gabuna e itaia.⁷ Vada aola, ena hahediba bona Petero ba hamaorodia, "Ia ese baine guna laimui Galileia ai unu seniai umui ese ia baitaia, umui e hamaoromui hegeregeregai."⁸ Idia na e raka oho bona gara e heautania, idia na e heude heude bona laumadia e daure. Idia ese na hereva ta asie hamaoroa badina idia na e gari dikadika.⁹ Daba matana pura dina ginigunana ai, Iesu e tore isi, Maria Magadala enai e hedinarai guna, daika be Iesu ese lauma dikadia hahitu ena amo e luludia lasi.¹⁰ Ia na vada ela bona daidia be ia ida unu seniai, e kudou hetahava bona e taitaiva ai.¹¹ Idia e kamoni ia na vada e mauri bona Iesu na ia ese e itaia, to idia ese ia na asie hamomokania.¹² Unu gau muridiai Iesu na e hedinarai idau, hanua murimurina ai e rakava taudia rua ediai.¹³ Idia na ela bona hahediba taudia e hamaorodia, to idia ese na asie hamomokani dia.¹⁴ Iesu ma nega ta gwauta-taosi pata ai e herevava ai edia e hedinarai, bona ia ese e gwau henidia badina e daradarava bona e kudou hetahava, A idia ese na se hamomokania daika ia e itaia mase amo e tore isi murinai.¹⁵ Ia ese e hereva henidia eto, "Aola tanobada idoinai, bona sivarai namo taunimanima ba hadibalaidia."¹⁶ Ia baine hamomokania bona bapatiso baine eabi na baine mauri, bona daika basine hamomokania na do baine mase.¹⁷ Ini toa na baela daidia ia e hamomokania ediai: lau ladagu lauma dikadia bae luludia. Idia na gado matamata ai bae hereva.¹⁸ Idia ese gaigai imadia amo bae abi isi bona bema idia na gau dikadia ba inu, unu gau ese idia na basie hahisidia. Idia na imadia gorere latadi ai bae daukau idia na bae mauri.¹⁹ Lohiabada ese e hamaorodia murinai, ia na e heabi isi guba ai bona tamana idibana kahanai e helai.²⁰ Hahediba na una gabu ai e rakatanidia bona gabu idoinai e harorova, una be Lohiabada ida e gaukarava bona e hamomokania revarevana toana na idia ida ela.

Luke

¹Lohiamu Teofilo e, ita taunimanimu iboudai ese ta abia dae herevadia na e tore.²Matadia ai e ita bona matamana amo e harorolai taudia ese e henidava bamona. ³Badina Lau danu hereva iboudai na tahudia goeva-goeva. Matamanai bena na tomamu namona binai, lau ma baina tore lou oiemu. ⁴Bena vada badiba, e hadibamuiva herevadia be momokani. ⁵Herod ese Iudea e lohiava negana ai hahelaga tauna ta e nohova ladana na Sakaria. Abia ena ore a tauna, adavana be Arona ena iduhu hahinena ladana Elizabeta. ⁶Idia raruosi na kara namo taudia Dirava - vairanai, bona Lohiabada ena taravatu ena hahegani iboudiai e badinava, asi bebeke-bebeke dia. ⁷A raruosi asi natudia, Elisabeta e gabani dainai, bona raruosi vada e buruka. ⁸Dina ta Sakaraia bona ena ore a taudia na hahelaga karadia e karava Dirava vairana ai. ⁹Bena edia kara hegeregereenai ia na eabia hidi gabu helaga na lalonai muramura mai bonana baine gabua: Bena ia na e raka vareai muramura baine gabua dainai. ¹⁰A taunimanimu iboudiai na murimuri ai e noho e guriguri. ¹¹Una horana ai Lohiabada ena aneru ta e itaia. Muramura mai bonana patana idibana kahana ai e gini. ¹²Sakaria ese e itaia, bona kudouna e hetaha, bona gari ese eabia. ¹³Bena aneru ese e hereva henia, eto, Sakaria asio gari, badina emu guriguri na e kamonaia, adavamu Elisabeta na natumu ta do baine abia ladana ba hatoa Ioane. ¹⁴Ba moale, ba hisidae, hutuma danu bae moale ia baine vara dainai. ¹⁵Badina ia na Lohiabada vairanai baine herea ia ese vine ranuna bona kekero muramuradia basine inu, bona sinana boganai ia na Lauma Helaga ese baine rohea. ¹⁶Ia ese Isaraela memerodia iboudiai baine girodia Lohiabada edia Dirava bae lou henia. ¹⁷Bona Lohiabada vairanai baine raka, Elia e kara siahuna hegeregereena. Tamadia lalodia bona natudia lalodia ida baine hatamona dia. Gwau edede taudia aonega baine henidia. ¹⁸Sakaria ese aneru e hereva henia, eto, Ina be ede baina diba toma? Lau na iahu: adavagu danu vada e buruka. ¹⁹Aneru e haere ma e hereva henia, eto, lau na Gabriel, Dirava vairanai na gini oi baina hereva henimu bona ina hari namona ihamaorolaimu totona, dainai e siaigu. ²⁰Benaini asi regeregemu bona basio hereva diba ela bona ina hereva anina baine vara dinana, badina be egu hereva na some abia dae: To, ena nega korikori ai do baine momokani. ²¹Taunimanimu ese Sakaria e naria mase, bona e hoa, badina be gabu helaga nai e halahe. ²²Bena ia na e raka lasi, to se hereva henidia bona lalodia e parara. Ia na gabu helagana ai vada e mata hanai. Bena ia ese toa amo e hadibadiava ia na se herevava. ²³Ena gaukara dinadia eha guguru bona vada ela ena ruma. ²⁴Dina gabedia ai, ia adavana Elisabeta vada e rogorogo, bona hua ima e noho hehuni. ²⁵Eto, Lohiabada ese ini eme karagu toma, ena ura dinana ai eme hageregu. Egu hemarai taunimanimu vairadiai eme abia oho. ²⁶Hua ihatauratoinai, Dirava ese aneru ladana Gabriel e siaia, Galileia hanua na ta ladana Nasareta ela. ²⁷Haneulato ta na unusenai, ia na Davida ena iduhu tauna ta, ladana Iosepa, maohenina: haneulato ladana be Maria. ²⁸Aneru na ia dekenai e raka vareai, eto: Ba namo ba mauri, e lalokau henimumu hahinemu Lohiabada na oi ida. ²⁹Una hereva dainai ia na e hegonu bona lalona e haguhi una hahenamo anina be dahaka. ³⁰A aneru ese e hamaoroa, eto, Maria e asio gari badina be Dirava ena harihari bada ome abia. ³¹Oi na do ba rogorogo, mero ta bavabia, ladana ba hatoa Iesu. ³²Ia na baine herea dae, Herea Mikamika Natuna bae gwauraia: Dirava Lohiabada ese tamana Davida ena terona na baine henia. ³³Iakobo ena iduhu baine ha lohiaia hanaihanai ena basileia na basine doko. ³⁴Maria ese aneru e hamaoroa, eto: lau na tau asi dibagu, ina be ede baine vara toma? ³⁵Bena aneru na e haere, eto: Lauma Helaga na latamu ai baine diho, bona Herea Mikamika ena siahu ese baine hakerukerumu. Bena oiemu amo baine vara merona ia na helaga, Dirava Natuna bae gwauraia. ³⁶Bena baitaia, oi varavaramu Elisabeta na burukana ai e rogorogo: Ia na e gwauraiava gabani, to ena hua ihatauratoina binai. ³⁷Badina Dirava enai, gau iboudiai na haharaga. ³⁸Maria, eto: Lau na Lohiabada ena hesiai hahinegu: Emu hereva dainai egu ai baine vara bona aneru na iena amo e raka oho. ³⁹Una dinanai Maria e toreisi e raka haraga Iuda ororodia hanua na ta ela. ⁴⁰Bena ia na Sakaria ena rumai e dae Elisabeta e hanamoa. ⁴¹Elisabeta ese Maria ena hahenamo herevana e kamonai neganai, na ia bogana e marere: Bona Elisabeta na Lauma Helaga ese e rohea. ⁴²Bena e hereva lolo, eto: Hahine iboudiai bogaragidiai oi sibomu mo namo herea, bona bogamu anina danu namo herea. ⁴³Egu ai be dahaka eme vara, bona egu Lohiabada sinana, dekegu vada ema? ⁴⁴Badina emu hahenamo regena na taiagu ai eme vareai neganai, natugu na bogagu ai eme marere moale dainai. ⁴⁵Abidadama hahinemu, vada o namo: Badina be Lohiabada ena amo o kamonai herevadia na bae momokani. ⁴⁶Bena Maria eto, Lau lalogu ese Lohiabada eme imodaia. ⁴⁷Bona laumagu ese danu ihamaurigu Diravana eme moale laia. ⁴⁸Badine be ia ese ena hesiai hahinena ogogamina e hagerea. Badina bunai ini amo uru iboudiai ese bae hanamogu. ⁴⁹Badina be Siahu Diravana ese hoa karadia egu ai eme havara ia ladana na helaga. ⁵⁰Ena hebogahisi na uru uru iboudiai ia garina e garimu taudia latadia ai. ⁵¹Ia imana ese ena goada vada e hahedinarai lalodia e hekokoroku taudia ia ese eha-karoho dia. ⁵²Bona lohia na edia helai gabudia amo ia ese vada e doridia dobi a ogogami taudia ia ese vada e abidia isi. ⁵³Hitolo taudia ia ese gau namodia amo bogadia vada e hakunu a taga taudia ia ese ima kavakavadia e halou dia. ⁵⁴Ena hesiai besena Isaraela ia ese vada e kahaia ena hebogahisi vada e helalolaiaune. ⁵⁵Seneda e gwau henidia hamata hegeregereena Aberahamo mai garana ida do baine bogadiahisi hanaihanai, eto: ⁵⁶bona Maria na Elisabeta ida e nohova hua toi. Gabe amo ena ruma e lou henia. ⁵⁷Elisabeta ena mara dinana e ginidae, mero ta vada e abia. ⁵⁸Bena dekena taudia bona varavarana ese Lohiabada ena harihari bada ienai vada e vara gauna e kamonai, bona idia na ia ida e moale hebou. ⁵⁹Dina ihataura hanina ai, idia na mero iperitomena totona e hebou, bona ladana bae hatoa Sakaria tamana ladana, eto: ⁶⁰To sinana e haere, eto, lasi, ia ladana na Ioane. ⁶¹Idia eto, be, una na emu iduhu tauna ta ladana a? ⁶²Bena idia ese tamana e itaia, toa ta e kara henia. Mero ladana ede bae hatoa toma. ⁶³Ia ese toretore gauna ta e gwauraia, bona ini e torea, ia ladana na Ioane bona iboudiai e hoa. ⁶⁴Una horana ai uduna e hagaia, malana danu e maoro bona e hereva Dirava e imodaia. ⁶⁵Bena, dekedea taudia iboudiai na e noho gariva badina unu kara haridia na Iudea ororodia hanuadia iboudiai lalodiai vada e piua. ⁶⁶Bena e kamonai taudia iboudiai e lalo tao

eto, Ina mero na ede baine heto? Badina be Lohiabada imana na ia latanai.⁶⁷ Bena tamana Sakaria na Lauma Helaga ese e rohea, bena e peroveta laia eto,⁶⁸ Lohiabada, Isaraela ena Dirava aita hanamoa badina be ia ese edia bese taudia vada e vadivadidia bona vada e hamauridia.⁶⁹ Hahemaui badina ia ese vada e havaraia ita eda ena hesiai tauna Davida ena iduhu amo.⁷⁰ Ena peroveta taudia helagadia ududia amo e gwaurai herevadia na heto, tanobada matamatana amo ema hari.⁷¹ Baine hamaurida, inaida bona e badu henidamu taudia imadia amo.⁷² Ia ese ita tamada e bogadia hisi, bona ena gwauhamata helaga na danu e laloa tao.⁷³ Ita seneda Aberahamo e gwauhamata henia.⁷⁴ Ita inaida imadia amo baine hamaurida, eto bena isiaina baita lao henia asi eda gari.⁷⁵ Helaga bona maoromaoro ai ia vairanai baita raka eda mauri lalodia ai.⁷⁶ Natugu, oina Herea Mikamika ena peroveta tauna bae gwauraimu, badina oina Lohiabada vairanai do ba raka ena dala ba lailaia.⁷⁷ Mauri dalana oi ese ena bese ba hadibalaidia edia dika igwau taodia.⁷⁸ Eda Dirava ena hebogahisi dainai, daba e reremu na heto, atai amo bainema, baine itada tao.⁷⁹ Ba diari; mase laumadia bona diburai e nohomu taudia, ba hadiaridia, bona ita aeda maino dalana ai baine hakauda.⁸⁰ Bena hari mero na e bada oho bada oho, bona lalona e goada: bona tano gagaena ai e nohova ema bona Isaraela ediai e hedinarai dinana.

2

¹Unu dinadiai, Kaisara Augusto ese ena hahegani revareva na ta e siaia lao tanobada taudia iboudiai ladadia bae tore.

²Lada iabidia gini-gunana e hekarava na Kurenio ese Suria e lohiava negana ai. ³Una dainai taunimanima iboudiai na ladadia itoredia, totona edia hanua ta ta e lou heni.⁴Una dainai Iosepa danu Galileia, Nasareta hanuana ta amo ela, Iudea, Davida ena hanua ladana Betelehema, badina ia danu Davida ena iduhu bona bese tauna ta. ⁵Maria danu ia ida ela ladadia bae tore, ia maohenina bona vada e rogorogo.⁶Bena raruosi unuseri ai nohodiai, ia ena mara dinana e kau. ⁷Bena e mara mero ta eabia, natuna roboana, bona dabua amo e tarua bona boromakau edia aniani patana ai e kurea, badina be heitatao rumana lalona na asi gabuna.⁸Mamoe ireguna taudia haida danu una tano ai e nohova, vahu ai bona hanuaboi ai edia seri e igimadiava. ⁹Lohiabada ena aneru ta e hedinarai idia ediai, bona Lohiabada hairaina diari diarina ese e gegedia, bona garibada ese e butudia tao.¹⁰Bena aneru ese e hamaorodia eto, "Asio o gari, hereva namona lau ese na mailaia, taunimanima iboudiai ihamoaledia. ¹¹Badina be ina harihari Davida ena hanua ai, emui hahemaui tauna vada e vara Keriso Lohiabada bunai! ¹²Toana binai umui emui ai: beibi ta ba davaria dabu ai e kumia boromakau edia aniani patana ai hekure."¹³Bena guba anerudia hutuma bada hari aneru ida e hedinarai taku, Dirava e hanamoa eto, ¹⁴"Atai doriva-dorivanai Dirava ba imodaia, bona tanobada ai na maino, ena lalo-namo taudia ese bae abia. ¹⁵Aneru logora ese e rakatanidia guba e lou henia, muridiai Mamoe iregudia taudia sibodia e hereva eto, "Ita na Betelehema aitala, ina eme vara gauna, Lohiabada ese vada e hadibada." ¹⁶Bena ela haraga unuseri ai Maria bona Iosepa e davaridia, bona beibi danu, hekure boromaku edia aniani patana ai. ¹⁷Idia ese e itaia murinai, idia e kamonaia gauna mero sivaraina e gwauraia hedinarai. ¹⁸E kamonaia taudia iboudia ai ese mamoe iregudia taudia e herevalaia gaudia e hoalaia. ¹⁹A Maraia na unu hereva iboudia ai, e haero bona kudounai e lalotao. ²⁰Bena mamoe iregudia taudia e lou, Dirava e imodaia bona e heatolaia badina be e kamonaia bona e ita gaudia na vada e hadibadia hegeregerena. ²¹Dina taurahani e lao bubuni ai, e peritomea bona ladana e hatoa Iesu, aneru ese e hatoa sinana do se ruru negana ai. ²²Bena idia ihagoevadia dinadia e ore, Mose ena taravatu hegeregerena ai, idia ese Ieruselema e laohaia Lohiabada vairana ai bae hahedinarai totona.

²³(Lohiabada ena taravatu ai e torea hegeregerena, "Mamaruanedia roboadia iboudia ai na hehelaga Lohiabada ena"),

²⁴bona boubou gauna ba henia eto, Lohiabada ena taravatu hegeregerena, "Kerea rua eiava pune natuna rua."²⁵A itaia, tau ta Ieruselema ai, ladana na Simeona, ia na kara maoromaoro tauna bona Dirava garina e gariva, Ia ese Isaraela edia tauhalo tauna e nariava, bona Lauma Helaga ese e rohea. ²⁶Lauma Helaga ese danu e hamaoroa ia na basine mase ela bona Lohiabada ena Keriso do baine itaia. ²⁷Lauma ai dubu lalonai e vareai bona iahuna ese Iesu, na e mailaia taravatu karana ibadinana totona. ²⁸Ia ese eabia, e rosia bona Dirava e hanamoa bona ia eto, ²⁹Harihari emu hesiai tauna a kahugu nege mai mainogu ida, Lohiabada, emu gwauhamata hegeregerenai. ³⁰Badina be matagu ese emu hahemaui vada eme itaia. ³¹Oi ese vada o seua taunimanima iboudiai vairadiai; ³²Diarina binai bese idaidau ihadiarilaidia bona oiemu bese Isaraela ihaheatolaidia. ³³Hari tamana bona sinana na e hoa, unu hereva e kamonaia ai. ³⁴Bena Simeona ese raruosi e hanamodia, bona sinana Maria e hamaoroa eto, "Ina mero na eabia hidi Isaraela taudia hutuma iha-ketodia bona iha-toreisidia ai bainela bona ina na toa taunimanima ese bae gwauatubu - ³⁵Bona dare ta ese oi lalomu baine daia uru - unu amo hutuma edia lalo-hadai hehunida readia bae hedinarai."³⁶Anna danu unuseri, peroveta hahinena, Fanuel natuna Asere ena iduhu hahinena. Ia na hahine badana, e headava lagani hitu adavana ida e noho hebou, ³⁷bona e vabu lagani taurahaniahui hani e noho. Ia ese dubu helaga se rakataniava, hesiai e lao heniva e anivaga bona e guriguriva hanuaboi bona dina. ³⁸Una hora ai ia danu e kau, bona Dirava e hanamoa bona Isaraela ihamaurina e nariava taudia Isaraela ai mero herevana e harorolaidia. ³⁹Raruosi ese Lohiabada ena taravatu karadia e haguguru vaitani, bona Galileia e lou henia, edia hanua korikori Nasareta ela, ⁴⁰bona mero na e bada bona e goada, mai aonegana ida, bona Dirava ena hariharibada na ia latanai. ⁴¹Lagani iboudiai ia iahuna (tamana, sinana) Ieruselema e laova Lagau-Hanai Ariana dainai. ⁴²Bena ia (Iesu) laganina gwauta-ruana ai, idia na Ieruselema e dara dae una Aria ikarana totona. ⁴³To Aria dinadia e ore murinai, bona idia vada e lou edia hanua, to Iesu na Ieruselema ai e noho. Tamana sinana na asi dibadia, ⁴⁴idia banava eto ia na laolao taudia bogaragidia ai, bona dina ta e raka. Murinai bona e tahua varavara dia bona bamodia dekedia ai. ⁴⁵Asi e davaria bona e lou Ieruselema bona ma e tahuava unuseri ai. ⁴⁶Dina ihatoina murina ai dubu lalonai e davaria, hahediba taudia bogaragidia ai e helai, edia hereva e kamonaia bona e nanadaidia danu. ⁴⁷Bena erena e kamonaia taudia iboudiai ia ena lalo-parara bona ena haere e hoalai. ⁴⁸Raruosi e itaia, e daradara, sinana ese e hereva henia eto, "Natugu e,

dahaka dainai ini o karamai toma? A itaia, oi Tamamu bona lau oi a tuhumu tai, tahumu taimu.⁴⁹ A ia eto, dahaka dainai o tahugumu? Asi dibamui Tamagu ena ruma na egu noho rumana?⁵⁰ A ena hereva e kamona to lalodia asie parara.⁵¹ Bena e diho idia ida Nasareta ela, bena e kamona henidia. A sinana ese ini hereva iboudiai e lalo tao.⁵² Bena Iesu e badaho, badaho mai aonegana ida Dirava bona taunimanima ese e ura heniava.

3

¹Harihari Tiberias Kaisara ena lohia laganina ihagwauta-imana ai - Pontios Pilato be Iudea edia gavamani tauna badana, bona Heroda be Galielia lohiana, bona tadina Filipino be Iturea bona Trakoniti lohiadia bona Lisania be Abilene lohiana.
²Anas bona Kaiafa hahelaga taudia badadia negadiai. Dirava ena hereva ema Sakaraia natuna Ioane tano gagaenai enai.
³Bena ia na ela Ioridaena tanona idoinai lalodia, helalokerehai bapatisona e harorolaiva badina karadika igwautaona dainai.⁴Vada e torea peroveta tauna Isaia ena hereva bukana lalonai hegeregere, "Gado ta tano gagaenai e boi lolomu, e tomu, Lohiabada ena dala ba lailaia (hegaegaelaia?), ena raka dalana baine maoromaoro.⁵Koura iboudiai do bae honu, bona ororo iboudiai do bae taora, bona dala gageva-gagevadia do bae maoro, bona dala mai koupadia do bae manada, bona taunimanima iboudiai ese Dirava ena hahemauro do ba itaia."⁶Una dainai Ioane ese htutuma e maiva ia ese baine bapatisodia, e hamaorodia, eto, "Umui na gaigai natuda! Daika ese e hamaoromui vairai do bainema gabuna ba heautania, a?"⁷Una dainai, helalokerehai huahuadia ba havara, bona sibomui na basioto, "Aberahamo na ita tamada, badina na hamaoromuimu Dirava ese ini nadi amo Aberahamo natuna na baine havaradia diba."⁸A momokani ira na vada heato au ramudiai. Una dainai au iboudiai huahua namodia basie havara neganai na ba utudia oho bona lahi ai bae tahodia vareai."⁹Bena taunimanima hutuma ese dounu e nanadaiva, atomamu, "Ai be vada dahaka baia kara?"¹⁰Bena e haere henidia bona e hamaorodia, eto, "Daika tau mai ena ahedoki rua neganai ia na asi ena tauna na ta baine henia, bona mai ena aniani tauna danu unu baine kara toma."¹¹Harihari tax gogo taudia danu ema bae bapatisodia, bona idia ese e hamaoroa, eto, "Hahediba tauna e, ai be dahaka baia kara, a?"¹²Bena ia ese e hamaorodia, eto, "Moni haida ma basio gogodia, a e hamaoromui moni dia mo ba gogodia."¹³Harihari tuari taudia haida ese danu e nanadaia, etomu, "Bona ai be dahaka baia kara, a? Ia ese e hamaorodia, eto, "Dagadage ai haida edia amo moni basio abidia bona haida basio hahebadelaidia koiko, bona ba moale mai davamui dainai."¹⁴Harihari taunimanima na e nari badava bona iboudiai lalodia e daradarava Ioane dainai, ia be Keriso eiava.¹⁵Ioane e haere, iboudiai e hamaorodia, etomu, "Lau ese na momokani ranu amo na bapatisomuimu, a ta ena siahu ese lau egu e hereaiamu na e maimu, lau na dia hegeregere ia tamakana varona baina ruhaia. Ia ese Lauma Helaga bona lahi amo baine bapatisomu."¹⁶Ena gaukara fokana na imanai ena uit ikwadina gabunai baine fokadia goevagoeva bona uit na ihaboudia rumana ai baine atodia. A lai ese e odadia oho momorudia na se bodomu lahina amo baine gabudia.¹⁷Una dainai, gau idauida danu lalodia amo, Ioane ese sivarai namo e haroro laiava taunimanima ediai.¹⁸A lohia Heroda, Ioane ese e sisiba henia Herodias, tadikakana adavana dainai, bona ena kara dikadia danu daidiai,¹⁹ bona ina danu ma latadiai eatokau: ia ese Ioane na dibura rumana lalonai e koua-ahu.²⁰Taunimanima iboudiai e bapatisodia neganai, Iesu danu e bapatisoa, bona e gurigurivai, guba vada e parara.²¹Bona Lauma Helaga tauaninai latanai e diho pune na heto, bona gado ta guba amo e diho, e tomava, "Oi na lau Natugu, na lalokau henimumu. Lau na oi daimu ai na moalemu."²²Harihari Iesu sibona ena vara laganina toi-ahui hegeregere ai ena gaukara vada e matamaia. Ia na (e gwaauraiava hegeregere) Iosepa natuna, Heli natuna,²³Matat natuna, Levi natuna, Melki natuna, lanai natuna, Iosepa natuna.²⁴Matatia natuna, Amos natuna, Nahum natuna, Esli natuna, Nagai natuna,²⁵Maat natuna, Matatia natuna, Semein natuna, Iosek natuna, Ioda natuna,²⁶Ionana natuna, Resa natuna, Zerubabiela natuna, Salatiel natuna, Neri natuna,²⁷Melki natuna, Adi natuna, Kosam natuna, Elemadam natuna, Ere natuna,²⁸Iosua natuna, Eliasa natuna Iorima natuna, Matat natuna, Levi natuna,²⁹Simiona natuna, Iuda natuna, Iosepa natuna, Ionam natuna, Eliakam natuna,³⁰Melea natuna, Mena natuna, Matata natuna, Natani natuna, Davida natuna,³¹Iesi natuna, Obedi natuna, Boas natuna, Samani natuna, Nasoni natuna,³²Aminadabu natuna, Adimini natuna, Ani natuna, Heron natuna, Perei natuna, Iudea natuna,³³Iakobo natuna, Isa'ako natuna, Aberahamo natuna, Tera natuna, Naho natuna,³⁴Seruga natuna, Reu natuna, Peleg natuna, Eba natuna, Sela natuna,³⁵Kaina natuna, Afa natuna, Sema natuna, Noa natuna, Lemeki natuna,³⁶Metusela natuna, Enoka natuna, Iareda natuna, Mahalale natuna, Kaina natuna,³⁷Enos natuna, Set natuna, Adamu natuna, Dirava natuna.

4

¹Bena Iesu, na Lauma Helaga, ese e rohea, Ioridaena sinavaina amo e lou ai. Bena lauma ese tano gagaena e hakaua lao,²unuseni ai dina hari-ahui diaboloso ese e dibagania. Unu dina iboudiai, ia na se anianiva, dokonai e hitoloa.³Bena diaboloso ese e hereva henia eto, :Bema oi na Dirava natuna, ina nadi boma hagiania aniani gauna ai bema lao."⁴Iesu e haere eto, "Vada e torea, "Taunimanima na dia aniani ai mo baine mauri."⁵Bena diaboloso ese Iesu e hakaua dae tanobada basileia dia idoidiai e haheitalaia una horanai.⁶Bena diaboloso ese ma e hamaoroa eto, "Lau na ini siahudia bona hairaidia iboudiai baina henimu, badina be lau mo e henigu, bona na ura heniamu tauna do baina henia."⁷Una dainai, boma toma henigu diho, idoinai boma abia oiemu.⁸A Iesu ese e haere henia, eto, "Vada e torea, Lohiabada emu Dirava mo ba toma henia diho, bona ia mo sibona isiaina ba lao heni."⁹Bena diaboloso ese Ierusema ma e hakaua lao, Dubu helaga kogena (atai hereana) ai e haginia kau, eto, "Bema oi na Dirava Natuna, ini amo boma roho dobi,¹⁰"Badina be vada e torea, "Ia ese ena aneru baine haduadia, oi bae gimamu,"¹¹bona, imadia ai bae abimu isi, aemu nadi ai ba tutuhia na garina."¹²Iese e haere eto, "Vada e torea, Lohiabada emu Dirava basio dibagania."¹³Diaboloso ena hedibagani iboudiai e haere bona e rakatania ela

bona nega ta.¹⁴ Bena Iesu, na Lauma ena siahua ai Galileia e lou lao, bona ia harina una tano hegege madai idoinai e piua.¹⁵ Edia dubu lalonai e hahedibava bona iboudiai ese imodaia.¹⁶ Bena ela Nasareta, ia e nada gabuna bona vaia edia kara Dina helaga ai dubu ai e raka vareai, bona e toreisi Buka helaga e duahia lolo-lolo.¹⁷ Isaia peroveta tauna ena buka e henia. E kehoa bona e davarua gabuna amo e duahia eto,¹⁸ Lohiabada Laumana ese eme rohegu (na latagu ai), badina be vada e hahelagagu, sivarai namo ogogami taudia baina harorolai henidia. E siaigu vada nama e guidia taudia iruhadia, bona mata kepulu taudia matadia ihapapadia baina gwaurai bona e haberodia taudia baina hamauridia,¹⁹ bona Lohiabada ena lalo-namo laganina baina harorolaia.²⁰ Bena buka e lokua, inarina tauna e henia lou bona e helai diho. Iboudiai dubu lalonai ese ia e raraia.²¹ Bena e hereva henidia matama eto, "Hari ina dinai ome kamonaia hereva vada eme momokani.²² Bena iboudiai ese e imodaia, hereva namo dia uduna amo e lasi dainai, bona e hoa eto, ina na dia Iosepa natuna a?"²³ Bena ia ese e hereva henidia eto, ina hereva hegeregereba ba gwaurai henigu dahaka baoto, "Dokta sibomu hahemaui. Dahaka a kamoni Kaperanauma ai o karava karadia, emu hanua korikori ai ba kara.²⁴ A ia na eto, na hamaoromui momokanimu, peroveta tauna na ena hanua korikori ai basie abiadae.²⁵ Na hamaoromuimu danu, Elia neganai vabu hutuma Isaraela ai e nohova, una neganai lagani toi bona hua tauratoi, medu se dihova, tanobada idoinai doe e badava.²⁶ A Elia na idia ta dekena se siai lao, Sarepeta Sidono kahana hanuana, vabuna ta dekena e siaia lao.²⁷ Bena lepera taudia hutuma Isaraela ai e nohova peroveta Elisaia neganai, a ta se hamauria, Naman Siria tauna mo sibona.²⁸ Bena dubu lalonai e hebou taudia iboudiai unu hereva e kamoni e badu dikadika.²⁹ E tore isi, hanua amo e doria lasi, edia hanua e hadaia ororona e dabua lao, hagahaga amo bae tahoa dobi eto.³⁰ To ia na bogaragidia amo e raka oho, ena dala amo ela.³¹ Bena ela Kaperanaumi, Galileia hanuana ta, ai e lasi bona dina helagai e hahedibava.³² Idia na ena hahediba herevadia e hoalaiva, badina be e herevava mai siahuna ida.³³ Dubu lalonai tau ta lauma dikana ese vada e boloa, ia na e tai lolo eto,³⁴ E! Iesu Nasareta tauna, dahaka emai ai o karamu? Oi ialamai totona oma a? Lau mai dibagu oiibe daika - Dirava ena Helaga Tauna.³⁵ Bena Iesu ese emoni e gwau henia eto, :Eremu, iena amo a raka lasi! "Bena lauma dikana ese tano e kwadilaia idia bogaragidiai, bona iena amo e lasi. Hari tau na asi berona.³⁶ Bena iboudiai e hoa, e hereva heheni eto, ini na dahaka hereva? Ia na mai siahuna bona mai goadana ida lauma dikadia e haganidiamu bona e raka lasimu.³⁷ Una hegege madai tano idoinai ia harina e hapiua.³⁸ Dubu amo e didi lasi bona Simona ena ruma ai e daekau. Simona ravana hahinena e gorerea, tauna e siahua, bona idia ese Iesu e hamaoroa.³⁹ Ia na hahine dekena ai e gini, gorere e gwau henia, bona gorere e doko hahine na e tore isi idia isiaidia e lao heni.⁴⁰ Dina kerekerena ai, idia ese gorere idau-idaud taudia iboudiai ia dekena e laohaidia. Bena ia imana idia ta ta latadia ai e daukau, e hamauridia.⁴¹ Lauma dikadia danu taunimanima hutuma edia amo e halasidia. Bena lauma dikadia e lolo, eto, Oi na Dirava Natuna. To ia ese e gwau henidia, bona e tamanudia basie hereva, badina idia dibadia ia na Keriso.⁴² Daba e rere ia na e tore isi gabu gagaena ela a hutuma ese e hatahua e davarua bona e rua, basine rakatanidia eto.⁴³ A ia ese e hereva henidia eto, lau ese Dirava ena basileia hanuadia idaudia ai baina harorolaia e siagu badina bunai.⁴⁴ Bena Iudea dubu dia lalodiai e harorova.

5

¹Dina ta ai e vara, una neganai Iesu na Genesaret gohuna badina ai e gini taunimanima hutuma e gini hesede-hesede ia e lao heniava bona Dirava ena hereva, ikamonaina.² Ia ese vanagi rua e itadia kone badina ai e veridia dae, a haoda taudia una vanagi amo na e lasi bona edia reke e huridia.³ Bena Iesu na una vanagi ta ai e gui, una be Simona ena, bona e hamaoroa taina baela daudau tanu amo ena. Bena ia na e helai diho bona hutuma e hadibadia vanagi amo.⁴ Ena hereva e hadokoa, ia ese Simona, e hamaoroa eto, "vanagi na dobuna a laohaia bona emui reke ba torea gwarume bavabi."⁵ Simona e haere bona eto, "Biagugu, ai na hanuaboi idoina ai ame gaukara; bona gau ta danu asi ame abia, to emu hereva dainai, reke na baina torea."⁶ Bena e torea, idia na gwarume numerana bada e abi, bona edia reke na mokona e hedare.⁷ Una dainai bamodia e kalodia, vanagi au ta ai idurudia baema. Idia na ela bona vanagi ruaosi na e honu bona idia na e mutu.⁸ A Simona Petero, ese e itaia, Iesu aena badinai e igo diho, eto, "Lohiabada e, egu amo ba raka oho, badina lau na dika taudu!"⁹ Badina be ia, bona bamona iboudiai ida e hoa dikadika, unu gwarume e abidia dainai,¹⁰ bona ia ida e haoda hebouva taudia be Iakobo bona Ioane, Zebedeo natuna, daidia be Simon bamona bona Iesu ese Simona e hamaoroa eto, "basio gari hari amo ela umui na taunimanima bavabidia."¹¹ Bena edia vanagi kone ai e tudia, edia gau iboudiai e rakatanidia bona ia murinai e raka.¹² Una negana amo ema ia na hanua ta lalonai e vareai, bona tau ta kopia idoinai lepera mo, hari ia ese Iesu e itaia, bona ia vairanai e goru diho bona e noia eto, "Lohiabada, bema bona ura, oi ese boma hagogevagu."¹³ Bena Iesu imana e toidia roro bona e daua toho, eto, "na uramu, vada a goeva. Una horanai ia na lepera ese na e rakatania."¹⁴ Bena ia ese e taravatua ta basine hamaoroa, a e hamaoroa, "Emu dlala amo baola, bona sibomu hahelaga tauna enai ba hedinarai bona emu hahegoeva boubouna bae heni, Mose ese eha-ganilaia hegeregereba, taunimanima ihadibalaia.¹⁵ To ia ese harina e piua rohoroho, bona taunimanima hutuma bada na ela e hebou ena hereva e kamonaia bona edia gorere amo e hanamodia.¹⁶ A ia na e raka oho tano gagaena ela bona eha-guriguri.¹⁷ Dina ta ai ia na e hahedibava, bona Faresia taudia bona taravatu ihahedibalaia taudia Galileia hanuadia iboudiai amo, boa Iudea amo, bona Ierusalem amo, ema unu seniai e helai Lohiabada siahuna na unu seni ai ia ese gorere taudia e hamauridia.¹⁸ Bena unuseniai tatau haida ese pada tauna geda ai hekurena ai e huai lao, ivarealaina dalana e tahua bona Iesu vairana ai bae atoa eto,¹⁹ A dala ta asie davarua badina hutuma daidiai bona ida na e dae guma daenai bona pada tauna na mai gedana ida, guhi matuna amo e tua dobi Iesu vairanai taunimanima bogaradiai.²⁰ Ia ese edia abidadama e itaia, bona eto, "tau, e emu dika vada eme hegwaui tau."²¹ Itorena taudia bona Faresia taudia e henanadai heheni, eto, "Ina be daika Dirava ihadikana e heheni, eto "Ina be daika Dirava ihadikana e herevalaiamu? Daika dika baine gwau tau dirava mo

sibona?²² A Iesu, na edia lalohadai edibaia, e haere bona e hamaorodia, eto, dahaka dainai lalomui ai ene o henanadai tomamu? ²³Edena be haraga, ai na gwauraimu, 'Emu dika vada eme hegwaui tao' eiava bama toma 'atoreisi bona a raka? ²⁴A baina hadibamui taunimanima natuna na mai siahuna ina tanobadai dika baine gwaudia tao, " - ia ese pada tauna e hamaoroa - na hamaoromuimu a toreisi, bona emu geda a lokua, emu ruma aola!²⁵Una horanai ia na idia vairadia e toreisi, ena hekure geda na e lokua, bona ena ruma vada ela, Dirava heatolaia. ²⁶Bena iboudiai ese hoa dikadika bona iboudia ai ese Dirava e heatolaia, bona gari ese e hahonudia, eto, "Ia ese hoa karadia ina hari dina ai ame ita."²⁷Una gau muridiai, Iesu na unu kaha amo e raka lasi bna tax gogo tauna ta e itaia ladana levi' tax gogo dabuana rumana ai helai, ia ese e hamaoroa eto, "murigu ai ame raka." ²⁸Bena ia na e toreisi bona gau iboudiai murinai e atodia e rakatani, ia murinai e raka. ²⁹Bena Levi ese Iesu ena aniani dabarana badana ta e karaia ena ruma ai, bona unusenai tax gogo taudia hutuma bona taunimanima haida danu idia ida pata badinai ege diho. ³⁰A Faresia taudia bona Itorena taudia ese ena hahediba e maumauraidia, eto, "Dahaka dainai kara dika taudia bona tax gogo taudia ida o aniani bona o inuinu heboumu? ³¹Iesu ese e haere henidia bona eto, "namo taunimanima dia ese muramura tauna basine tahua, a gorere taudia ese hari. ³²Lau danu dia kara maoromaoro taudia iboiridia asi nama, to kara dika taudia bae helalokerehai."³³Bena idia ese e hamaoroa eto, "Ioane ena hahediba na e anivaga, lou-lou mu bona e guriguri lou-lou mu, bona Faresia taudia edia hahediba danu unu e kara tomamu a oiemu hahediba e anianimu bona e inuimu. ³⁴Bena Iesu ese e hamaorodia eto, "Umui ese headava e hakauamu tauna basio hamaoroa baine anivaga bona diba a ? ³⁵A dinadia be maimu headava matamatana tauna na edia amo be abia ohomu, bona unu dinadia ai idia na bae anivaga. ³⁶Bena Iesu ese danu sivarai hegeregere ai e hereva henidia eto, "tau ta ese dabua matamatana seana basine darea, dabua gunana ai basine turia kau. A bema ia unu baine kra toma, ia na dabua matamatana seana ida na basine hegeregere. ³⁷Bona tau ta ese vine ranuna matamatana basine seia vareai vine kopina gunanai. A unu bema kara toma, vine ranuna matamatana na baine haboua vine kopina ai bona hebubu lasi, bona vine kopina danu baine dika. A vine ranuna matamatana³⁸ na vine kopina matamatana ai bae seia vareai. ³⁹Tau ta ese vine gunana e inuamu tauna ese matamatana basine ura henia, badina ia baineto, 'gunana na namo herea.

6

¹Ina na Dina Helagana ta ai e vara karana ta, Iesu na uit imeana lalona amo e raka hanaiva, bona ena hahediba mererodia ese uit anidiai na imadia ai e kopadiava bona e abidiava. ²A hari Farasia taudia haida ese eha maorodia eto, "Dahaka dainai umui na ini o kara tomamu, dina helaga ai ina na dia maoro."³Iesu ese e haero henidia eto, "Umui asio duahia Davida be dahaka e kara e hitoloa neganai, ia bona ena memero ida, a? ⁴"Ia na Dirava ena ruma ai e raka vareai una parao na eabi bona e aniani, ena memero danu e henidia, una na edia gwau-ahu ai na dia maoro idia ese bae ania to hahelaga taudia sibodia adia." ⁵Bena ia ese eha maorodia, "Taunimanima Natuna na Dina helaga Lohiabadana."⁶Ina danu Dina helagana ta ai ma e vara ia na synagogue ai e raka vareai bona hahedibava. Unuseni ai tau ta bona ia imana idibana na heveri. ⁷Itorena taudia bona Farasia taudia na e raraia kahi-kahiva e urava bae itaia ia es tau ta do baine hanamoa guguru una dina helaganai bona dala ta e tahuava ia bae habadelaia. ⁸To ia na e diba vaitani idia edia lalohadai bona ia ese ima heveri tauna na eha maoroa, eto, "A toreisi, bona ina ai bogaragimai ai ame gini." Bena une tau na e toreisi bona e gini tore idia bogaragidiai.⁹Bena Iesu ese eha maorodia eto, "Lau ese umui na nanadaimuimu, ina maoro Dina helaganai kara nam ba karaia eiava ba hahedia, lauma ta do ba hamauria eiava ba hamasea, a? ¹⁰Bena ia ese iboudiai e itadia hegege bona ima heveri tauna eha maoroa eto, "Imamu na a toia-roro" Ena hereva karana e karaia, bona imana vada e goeva guguru.¹¹A idia na badu ese eha-honudia bona sibodia e hereva heheni dahaka do ba kara Iesu enai.¹²Ina danu unu dinadiai e vara karana, ia na ororo ela baine guriguri dainai, bona una hanuaboi idoinai Dirava e guriguri heniava. ¹³Daba e rere neganai ia ese ena hahediba mererodia e boiridia ia dekeni ela, bona ia ese gwauta-rua e abidia-hidi bona e gwauraidia danu apostolo taudia.¹⁴Simona (Ia ese ladana e hatoa Petero) bona ia tadina Anderea, bona Iakobo, bona Ioane, bona Pilipi; bona Batolomiu, ¹⁵bona Mataio, bona Toma bona Iakobo Alphaeus natuna, bona Simona daika be ladana e hatoava Zealot tauna, ¹⁶bona Iuda, Iakobo natuna, bona Iuda Isakariota, daika be tao-tore tauna.¹⁷Ia na ororo amo e diho idia ida bona gabu palakana ai e gini ena hahediba memero hutuma ida bona taunimanima hutuma ida Iudea idoinai amo, bona Ieruselema amo, bona Turo bona Sudo kone kahana amo.¹⁸Idia na ia ena hereva iha-kaladia bona edia gorere amo ba namo guguru totona ema. Taunimanima mai edia kerere bona lauma dikadia ese e rohedia taudia danu eha namodia guguru. ¹⁹Taunimanima iboudiai e urava ia ba dauatoho badina be siahu na ia ena amo e lasiva bona iboudiai eha namodia guguruva.²⁰Bena ia na matanai ena hahediba mererodia e itadia bona eto, "Ogogami taudia be nanamo badina Dirava ena basileia na umui emui. ²¹Harihari e hitolomu taudia be nanamo, badina umui bogamui do bae kunu. Harihari e taitaimu taudia be nanamo, badina be umui na do ba kiri²²Taunimanima ese do bae inai henimui, neganai, bae dadaraimui neganai, bona bae habadelaimui koikoi neganai, bona ladamui bae hadikadia badina be Taunimanima Natuna dainai.²³Una dina ai do ba moale hisidae, bona mai moalemu ida ba roho isi, umui ahumui na bada herea basileia ai. Badina be idia tamadia ese peroveta taudia danu dala tamona unu e kara henidia toma.²⁴A umui daidia na o taga, madi ihabaimui, adina emui namo na vada ome abia. ²⁵A madi ihabaimui, ina harihari bogamui eme kunu, badina be umui na do ba hitolo. Madi ihabaimui, harihari o kirimu taumui, badina be umui na do ba daradoko bona ba taitai.²⁶Madi ihabaimui, taunimanima ese hereva namo henimui neganai, badina senedia ese peroveta koikoi taudia danu unu e kara henidia tomava.²⁷A lau ese umui oha-kalamu taumui na hereva henimuimu, e inai henimuimu taudia ba lalokau henidia bona e dagedage henimuimu taudia na ba kara namo henidia. ²⁸E gwau-tubu henimuimu taudia ba

hanamodia bona asie kara namomui daidiai ba guriguri.²⁹ Daika ese oi vahamu baine pataia neganai vahamu kahana danu ba mede henia, bona daika oi emu amo o karaia dabuana baine abia oho emu rami danu basio rua.³⁰ Daika emu ai e noinoimu taudia na ba henidia, bona daika oi emu kohu na oi emu amo e abia oho na basio noidia lou.³¹ Umui o uramu taunimanima ese unu bae kara henimui toma, unu hetomana danu umui ese ba kara henidia toma.³² Bena oi ese o lalokau henidiamu daika be oi e lalokau henimumu, ena namo be dahaka oi emu ai? ³³Bema umui na taunimanima ba kara namo henidia daika be e kara namo henimuimu, ena namo be dahaka oi emu ai a? ³⁴Bema oi na dava o heni-torehaimu taunimanima dia ediai mo, daika be o laloamu emu abitorehai na ma beheni-lou dibamu tauna, ena namo be dahaka oi emu ai? Kara dika taudia danu kara dika taudia dava e henidiamu, una dava tamona na bae abia lou dainai.³⁵ A umui ese e inai henimuimu taudia na ba urahenidia bona ba kara namo henidia. Ba heni-torehai davana ihalouna na basio naria, bona ahumu na do baine bada, bona Herea Mikamika natuna ai baola, badina be ia na manau asie hahenamomu taudia bona dika taudia ediai. ³⁶Ba hebogahisi, Tamamui hegeregere na ia na hebogahisi.³⁷ Basio hahemaoro, bona umuina do basio hahemaoro henimui. Basio hahedika, bona umui na do basio hadikamui. Edia dika ba gwaudia tao bona emui danu do bae hegwaui-tao.³⁸ Ba heni ma baine henimui: Hahetoho gauna namona - e toa kunu, e buloa hebou, e hepurai dobimu - latamu ai baine hebubu dobi. Badina be una e heni hahetohona ida oi ma baine henimu lou.³⁹ Bena ia ese sivarai hegeregere na ta danu ma ehamaoroa laidia, "Mata kepulu tauna ta ese mata kepulu tauna na basine hakaua diba, a? "Raruosi guri ai basie moru a? ⁴⁰Hahediba merona ese e hahediba tauna na se hereaia, ia na do baine diba guguru neganai, ena hahediba tauna ida bae hegeregere.⁴¹ Dahaka dainai ina taha maragi-maragi be oi bamomu matanai o itaiamu, a oi be so dibamu oi sibomu matamui ai be au badana ta, a? ⁴²Edena dala ai bamomu na ba hamaoroa "Bamogu ena matamu ai taha maragi-maragina na aina kokia-oho, a oi sibomu matamu ai au badana be asio itaiamu, a? Koikoi taumu! Oi sibomu matamu ai ina au badana do ba kokia guna, bona oi emu roharoha na do baine diari bona oi bamomu matanai una taha maragina na ba kokia-oho.⁴³ Badina be au namona ese huahua dikana baine havaraia, una kahanai danu au dikana ese huahua namona do baine havara. ⁴⁴Badina be au ta ta na huahuadia ai baita diba. Badina taunimanima ese suke anina na dia au ginigini amo eiava vine anina na dia uda auna amo asie gogodiamu.⁴⁵ Tau namona ese ia lalona kohu namodia amo gau namodia e havaramu, bona tau dikana ia lalona kohu dikadiamo gau dikadia e havaramu. Badina be ia lalonai e honu gaudia amo ia udunai e herevalaimu.⁴⁶ Harihari, dahaka dainai umui ese lau o boi henigumu "Lohiabada, Lohiabada" a lau na herevamu karadia be asio karamu, a? ⁴⁷Taunimanima daika be lau dekegu e maimu bona egu hereva e kamonaumu bona karadia e karamu, lau ese umui baine haheitalaimui ia be taunimanima ede bamona.⁴⁸ Ia na hegeregere tau ta, ruma ta e karaiaumu, guri dobuna ta e geia, bona papa-papa latanai eha daia. Bena utu-utu e kau, bona ranu bada aruna ese ruma na e doria to ruma na asine marere, badina una ruma na e karaia balaheni.⁴⁹ A lau egu hereva e kamonaumu to karana se karaiaumu, ia na tau ta na heto ena ruma na tano latanai e karaia asi ihadaina dainai abata ranuna ese nega tamona e hamorua, bona una ruma danu e hegigi rohoroho.

7

¹Iesu ena hereva iboudiai taunimanuma vairadia ai e gwaurai vaitani, bona Kaperanaumai e raka vareai.² Tuari biaguna ta ena hesiai merona e lalokau henia, na e gorere dikadika, mokona e mase. ³Tuari biaguna ese Iesu harina e kamona, bona Iudea tau-badadia haida e siaidia lao, bae noia, ia e maimu ai, ena hesiai merona na baine hamauria. ⁴Bena idia na Iesu dekenai ela, e noia lalo-dika eto, "Ia na tau namona ini boma karaia toma bema namo, ⁵badina ia ese eda bese e ura henidiamu, bona ia ese emai dubu e karaia."⁶ Una dainai Iesu na idia ida ela. A ia na vada dia daudau ruma amo, Tuari biaguna ese bamona haida e siaidia, ela e hamaoroa, eto, "Lohiabada e, asio hekwarahi badina lau na dia namo egu rumai ba dae.⁷ Una dainai lau danu sibogu natomu dia namo baina vasi dekemu, a hereva ta mo a gwaurai bona egu hesiai tauna baine namo.⁸ Badina be lau danu haida henudiai, egu tuari taudia be lau henugu ai. Ta baina hamaoroa, 'Aola', bona bainela; bona ta ma baina hamaoroa, 'Aoma,' bona bainema, bona egu hesiai merona baina hamoroa, 'Ina na a karaia,' bona baine karaia."⁹ Iesu ese una hereva e kamonaia, e hoa dikadika, bona e hegiro ia murinai hutuma e rakava e hamorodia eto, "Na hamaoromuimu, abidadama ini hetomana Isaraela ai asina davarua lasi ona lasi vaitani."¹⁰ Tuari biaguna ese hari e siaidia taudia e lou ruma ai e davarua hesiai merona vada e namo.¹¹ Hari una e vara murinai Iesu na hanua ta ela ladana Nain, bona ena hahediba bona hutuma badaherea ia ida ela. ¹²Hanua ikoukouna e raka kahi laova ai, haida ese mase tauna ta e huaia lasi, hahine ta natuna vara-ešana (bona ia na vabu), bona hanua taudia hutuma ese e bamoa. ¹³Lohiabada ese e itaia, bona e bogaiahisi dikadika, bona e hereva henia, eto, "Asio tai." ¹⁴Bena e raka kahi lao mase patana ai e dau kau bona e huaia taudia danu e gini. Bena e hereva, eto, "Tauhau e, na hamaoromumu, a toreisi."¹⁵ Bena mase tauna e helai tore bona e hereva, bona Iesu ese sinana e henia.¹⁶ Gari ese iboudiai e butudia tao, bona Dirava e imodaia, eto, "peroveta tauna badana bogaragidai vada eme hedinarai." bona "Dirava ese ena bese taudia vada eme igodia ita. ¹⁷Iesu ese ina kara e karaia sivaraina na Iudea idoinai bona badina tanodia idoidiai e piua rohoroho"¹⁸ Ioane ena hahediba taudia ese Ioane hereva iboudiai e hamaorolaia. Bena ena hahediba rarua e boiridia.¹⁹ Ioane ese e siaidia Lohiabada bae nanadaia, baeto, "Be maimu tauna be oi, eiava ta ma baita tahua?" ²⁰Hari idia na Iesu dekenai e kau, bona raruosi eto, "Ai na Ioane Bapatiso ese e siamai, e tomu, "Be maimu tauna na oi, eiava idauna ta baita tahua?"²¹ Una horanai Iesu ese hutuma e hamaorolaia edia gorere amo bona hisiani idau-idau amo bona lauma dikadia ese e bolodia, bona matakepulu taudia hutuma danu matadia e hapapa. ²²Bena Iesu ese e haere henidia eto, "Vada aola ome ita bona ome kamona karadia Ioane ba hamaorolaia: Mata kepulu taudia matadia e papamu, ae hedairiki taudia e rakamu, lepera taudia e hagogevagoevadia bona taia kudima taudia e kamonaumu, mase taudia e toreisi lou, ogogami taudia sivarai namo

e kamonaumu. ²³Hekwakwanai badina egu ai basine davarua tauna hari namo. ²⁴Ioane ena hesiai taudia e raka oho murinai, Iesu ese aru taudia e hereva henidia matama Ioane herevana eto, "Umui na dahaka itana tano gagaena ola? Siriho lai ese e haevaia a? ²⁵A dahaka itana ola? Dabua manada-manadana e dokilaia tauna ta a? "A itaia, dabua mai hairaidia e dokilaimu bona aniani namodia e animu taudia na pavapava edia ruma ai e nohomu. ²⁶A dahaka itana ola? Peroveta tauna a? Oibe, na hamoromuimu, peroveta taudia logora ia ese e hereadiamu. ²⁷Ia bunai herevana e torelaia eto, 'A itaia, lau ese egu gwaukau tauna oi vairamu ai name siaia, emu dala ilailaina.' ²⁸Na hamaoromuimu, hahine bogadia ai e vara tauna ta ese Ioane se hereaiamu, "A Dirava ena basileia lalonai gabe tauna ese Ioane e hereaiamu. ²⁹Hari taunimanima iboudiai una hereva e kamonaia bona tax gogo taudia danu, idia ese Dirava maorona e gwauraia badina be Ioane ese e baptisodia. ³⁰A Farisea taudia bona taravatu taudia ese ena bapatiso e dadaraia, unu amo Dirava ena lalo-hadai e laoa-ahu. ³¹"Ina uru taudia be dahaka ida baina hageregeredia, bona idia be ede heto? ³²Idia na memero-memero na heto hanua ariarana ai e hehelai, bamodia e boi henidiamu, e tomu, 'Ai be ivilikou a hatai umui daimui ai, to asio mavaru; Rohe-ahu anedia abi, to asio tai! ³³Badina be Ioane Bapatiso ema se anianiva, eiava vine ranuna se inuava, bena umui o tomu, 'Ia na mai ena lauma-dika.' ³⁴Taunimanima Natuna na ema e anianimu bona e inuimumu, bena umui o tomu, 'A itaia, ia na anidae-anidae tauna bona vine ranuna e inua momomu tauna, tax gogo taudia bona kara-dkika taudia turadia.' ³⁵A aonega ihamomokanina na natuna edia amo e hedinaraimu. ³⁶Farisea tauna ta ese Iesu e vavea bae aniani hebou. Bena Farisea tauna ena ruma ai e raka vareai, aniani gabuna ai ege diho. ³⁷Una hanua hahinena ta ariara hahinena. Ia dibana Iesu na Farisea tauna ena ruma ai ege diho, bena nadi kavabuna ta e abia kau lalonai na dehoru namo-hereana, ³⁸beni ela Iesu murinai e gini aena badinai, e taiva, bona irurumatana amo aena e haparipari, bena huina amo e dahu kaukau bena aena e harahu bona dehoru amo e dairi. ³⁹Hari Farisea tauna Iesu e vavea ese una kara e itaia, bena lalona e hadaia, eto, "Ina tau bema peroveta tauna, ia na bema diba ina ienai e daukau hahinena na ariara hahinena. ⁴⁰Bena Iesu ese e haere henia, eto, "Simeona e, lau na mai egu hereva taina oi emu ai." Bena Ia eto, "A hereva, hahediba tauna ei! ⁴¹"Tatau rarua na, ima doa tauna ta enai moni e abitorehai. Ta sinahu ima, bona ta imahui. ⁴²Asi edia gau abitorehai davadia bae halou, bena ia ese raruosi edia abitorehai e gwautao. Una dainai, idia raruosi daika ese ia baine lalokau henia bada?" ⁴³Simeona e haere bena eto, readia ena abitorehai badana e gwaua tao tauna." Iesu eto, Oibe momokani. ⁴⁴Ia ese hari hahine e hagerea bena Simeona e gwau henai, eto, Ina hahine oi taiaimu a? Lau na emu rumai name dae kau, ran so henigu aegu ihurilaina, a Ia ese irurumatana amo aegu eme haparipari bona huina amo eme dahu kaukau. ⁴⁵Oi ese so harahugu, a Ia ese dae kaugu ai ema hari aegu eme harahu. ⁴⁶Oi ese kwaragu dehoru amo so horoa, a Ia ese aegu dehoru amo eme dairi. ⁴⁷Una dainai, na hamaoromumu, ena dika ena be babada, to vada eme hegwaoutao - badina be ena lalokau na bada. A ena dika amo e hegwaoutao tao tauna na ena lalokau danu maragi! ⁴⁸Bena Ia ese hari hahine e hamaoroa eto, "Emu dika vada eme hegwaoutao. ⁴⁹Ia ida ege diho hebou taudia na e henanadai heheni, eto, ina na daika dika e gwautao?" ⁵⁰A ia ese hari hahine ma e hamaoroa, eto, "Emu abidadama ese vada e hamaurimu. "Aola mai mainomu ida."

8

¹Unu muridia ai, Iesu ena laolao e matamaia hanua badadia bona hanua maragidia idau-idau lalodiai, Dirava ena basileia sivaraina namona e harorolaiava. Gwautao raruosi ese e bamoa, ²bona hahine haida danu lauma dikadia edia amo e luludia lasi bona edia gorere amo e hamauridia hahinedia danu: Maria hane Magadala, iena amo lauma dikada hitu e halasidia, ³bona Ioana, Kusa, Heroda ena kohu ireguna tauna; bona Susana; bona ma hutuma danu, edia kohu ia e ubulaia. ⁴Taunimanima hutuma e aru ela, hanua iboudiai amo ema ia dekena e hebou. Bena ia ese sivarai hegeregereana ta e gwauraia, eto, ⁵"Uhe ihadona tauna na uit igigi-rohorohona totona e vareai. Bena e gigi-rohorohova ai, haida dala isenai e moru, bena taunimanima ese e moia tao bona manu ese e ani ore. ⁶Haida be nadi kikiri ai e moru, bena e tubu negana ai e mase badina be tano na dia paraka. ⁷Ma haida be ava ginigini ai e moru, ginigini ida e tubu hebou, ginigini ese e habubuni. ⁸A haida be tano namona ai e moru, bena e tubu goevagoeva, e dobi, anidia na sinahu-sinahu." Unu e gwau toma, bena e hereva badabada eto, "Mai taiana tauna na baine hakala." ⁹Bena ena hahediba ese e nanadaia, eto, "Hari sivarai anina hegeregereana be dahaka?" ¹⁰Ia eto, umui be lalo-parara vada e henimui, Dirava ena basileia hereva hehunidia vada ba diba, a hahidaosi na sivarai hegeregereana amo na hadibadiamu, una dainai, "Bae roharoha, to basie ita; bona bae kamonaia, to basie laloparara." ¹¹Sivarai hegeregereana anina binai: Uti nadinadidia na Dirava ena herea. ¹²Dala isena ai e moru nadinadidia be taunimanima ese hereva e kamonaiaimu, to diabolou na e maimu lalodia amo hereva na eabia ohomu, bae abiadae bona bae mauri garina. ¹³Papapapa ai e moru gaudia na daidia, ese hereva e kamonaiaimu, bena eabiadaemu mai moaledia ida. To asi ramudia; idia ese eabiadaemu to asi vanahana, bena hedibagani ese e tohodiamu ai e hekwakwahanaimu. ¹⁴Ava ginigini ai e moru gaudia, be taunimanima ese hereva e kamonaiaimu, to dala amo e laomu ai, tanobada ena lalohagui bona ena taga bona ena moale maurina ese e hahonudiamu bena asie huahuamu. ¹⁵A tano namona ai e moru gaudia, be ini idia, hereva e kamonaiaimu, mai momokanidia ida bona lalodia goevagoevadia ida, e lalo tao tarika-tarikamu asie hesikumu bona huahuadia e dobimu. ¹⁶Asi tauna ta ese lamepa baine ha-araia bena beisini ai baine koua eiava bedi henunai baine atoa. Ia ese lamepa patanai baine atoakau be bae raka vareai taudia iboudiai ese diarina baitaia. ¹⁷Badina hehuni gaudia iboudiai do bae hedinarai gau ta na dia hehuni, eiava e moi tao herevadia iboudiai bae hahedibalai bona bae gwaurai hedinarai. ¹⁸Una dainai emui kamonaia nahuadia ba toho, badina be mai ena gau tauna, na momo ba henia, a asi ena gau tauna, enabe ia banava eto vada e abia gauna na ena amo do bae abia oho. ¹⁹Bena ia sinana bona tadikakana na ia dekena ema, to hutuma dainai asi edia dala dekena bae raka kahi

lao.²⁰ Bena haida ese e hamaorua, eto, "Oi sinamu bona oi tadikakamu na murimuri a gigini, e uramu baitamu."²¹ A Iesu ese e haere henidia, eto, "Lau sinagu bona lau tadikakagu bini: Dirava ena hereva e kamonaumu bona karana e karaumu taudia."²² Dina ta ai, ia na ena hahediba ida vanagi ta ai e gui bona ia ese e hamaorodia eto, "Ai tala unukaha gohuna." Bena lara e kidaia.²³ Heaudia ai ia na e mahuta. Bena lai gubana ta gohu ai e kau, bona edia vanagi na ranu ese e hahonua, bona dikadika lalona ai e vareai.²⁴ Bena idia na ia dekena ela, e haoa, eto, Biagumai! Biagumai! ita aita mase a? A ia e noga lai bona hurehure e gwaudia tao, bona e doko, bona vada e gaima.²⁵ Bena ia ese e hamaorodia, eto, "Emui abidadama be edeseni ai? Bena idia na e gari bona e hoa, e hereva heheni eto, "Ina be daika, bona lai bona hurehure e haganidiamu bona erena e kamonaumu?"²⁶ Bena idia ese Gerasa tanona ai eha kau, Galileia hegaga heninai.²⁷ Iesu tano ai ginina ai, tau ta hanua amo ema ia ida e hedavari, mai lauma dikana ida. Nega daudau asi dabuana e loava, bona rumai se nohova, a gara ai e nohova.²⁸ Ia ese Iesu e itaia, e tai lolo, dekena ai e moru, bona e hereva badabada, "Dahaka egu ai o karamu, Iesu e, Herea Mikamika Diravana Natuna, basio hahisigu.²⁹ Badina be Iesu ese lauma dikana vada e haganua una tau ena amo baine raka lasi. Badina be nega momo ia ese e dabaia taova, negadia ai, seini bona auri amo e guava bona e nariava, to seini na eha motudiava bona lauma dikana ese tano gagaena ai e doria laova.³⁰ Bena Iesu ese e nanadaia eto, "Oi ladamu be daika?" bona ia eto, "Tuari Oreana," badina be lauma dikadia momo ese e boloa.³¹ Bena idia ese e noiava basine haganua dobu kahana basi ela.³² Una ororo gabanai boroma serina badana ta e anianiva, bona lauma dikana ese e noia idia lalodia ai bae vareai. Bena ia ese e siaidia.³³ Bena lauma dikadia na hari tau ena amo e lasi boroma lalodia ai e vareai, bona hari serina idoinai e heau hekei gohu ai e malodia mase.³⁴ Hari iregudia taudia ese una kara e itaia, bona e heau ela bona hanua lalonai bona hanua kahanai harina e pua.³⁵ Bena taunimanimu e aru ela e vara gauna baitaia, bona Iesu enai e kau bona lauma dikana ese e rakatania tauna e itaia Iesu aena badina ai helai, mai dabuana bona mai darana bona idia na e gari.³⁶ A kara e itaia taudia ese kava tauna e hamauria dalana e hamaorolaia.³⁷ Bena Gerasa tanona taudia iboudiai ese e noia, edia amo baine raka oho, badia be gari ese e butudia tao. Bena ia na vanagi ai e gui e lou.³⁸ Hari lauma dikana ese e rakatania tauna ese e noia baine bamoa eto, A Iesu ese e siaia lou, eto,³⁹ "Emu ruma ba lou henia Dirava ese e kara henimu karadia iboudiai ba harorolaia." Una dainai ia na e lou ela, ena hanua idoinai Iese ena kara ia enai e harorolai.⁴⁰ Iesu e lou negana ai, hutuma ese e abiadae, badina be idia ese e nariava tauna.⁴¹ Una neganai, tau ta ladana Iairo, bona ia na hegunalai ta dubu lalonai. Iesu aena badinai e goru diho, e noia ena ruma bainela,⁴² badina be ia natuna kekenina vara-eadena laganina gwauta-rua, masena vada e kahira-kahira. Bena dala amo e laova ai aru taudia ese e rakaia biribiriva.⁴³ Hari hahine ta ena gorere rara moru lagani gwauta rua, unu e noho tomava, ena kohu idoinai dokta (doctors) ediai vada e ore, to ta ese se hamauria.⁴⁴ Ia na Iesu murina amo ela bona Iesu ena dabua isenai e daukau, bona ena rara moru vada e doko.⁴⁵ Bena Iesu eto, "Daika ese e dogogu tao?" To iboudiai e hegore, Petero eto, Biagumai e, aru taudia ese e gegemu dae bona e rakamu biribirimu."⁴⁶ A Iesu eto, "Ta ese e daugu toho, badina be siahuna egu amo vada e lasi."⁴⁷ Hari hahinena na e itaia basine hehuni diba, bona mai heude-heudena ida ela ia vairana ai e goru diho. Taunimanimu iboudiai vairadia ai dahaka dainai e daua toho, bona ede e mauri toma sivaraina e gwauria hedinarai.⁴⁸ Bena Iesu ese e hamaorua, eto, "Natugu e, emu abidadama ese vada e hamaurimu. Aola mai mainomu ida."⁴⁹ Ia dounu e herevava ai, ta ema dubu biaguna ena ruma amo eto, "Natumu na vada e hamase. Hahediba tauna basio haturiaia."⁵⁰ A Iesu e kamonaui, bona e haere henia eto, "Asio gari, bavabidadama, bona ia na do baine mauri."⁵¹ Bena ruma ai e kau, Ia ese taunimanimu ta se haduaia ia ida bae vareai, Petero bona Ioane bona Iakobo, bona kekeni tamana sinana ida.⁵² Iboudia ai e taitaiva bona kekeni taina e taiva, A ia eto, "Asio tai, ia na se mase, a e mahutamu."⁵³ To idia ese e kirikirilaia dibadia kekeni na vada e mase.⁵⁴ A ia ese kekeni imana eabia, e boi lasi, eto, Kekenai e, a tore isi!⁵⁵ Bena laumana e lou, bona kekeni e tore isi, bona Iesu e haduadia aniani taina bae henia baine ania.⁵⁶ Kekenai tamana sinana na e hoa, a ia ese e tamanudia tau ta basie e hamaorua, dahaka e vara.

9

¹Ia ese gwauta-rua e boiridia hegogo, ia ese siahu bona maoro e henidia lauma dikadia iluludia oho, bona gorere taudia ihamauridia,² bona e siaidia lasi Dirava ena basileia bae harorolaia bona gorere bae hamauridia.³ E hamaorodia eto, "Laolao kohudia basio abi kau - eiava itotohi, vaina, parao, moni-hahedoki rua.⁴ Ba dae kau rumana ai, ba noho, ela bona raka oho.⁵ Edeseni ai se abimui daemu, edia hanua amo raka oho, aemu kahudia ba ude-ude oho idia ihabadelaidia.⁶ Una dainai, idia na e raka lao, hanua hanua lalodiai sivarai namo e harorolaia, bona gorere taudia e hamauridia.⁷ Heroda, Galileia hanua idoinai e lohiaiva tauna, e kamonaui e varava gaudia iboudiai. Kodouna e hetaha badina taunimanimu haida e tomava Ioane Bapatiso na vada e tore isi lou.⁸ Haida ma e tomava Elia peroveta tauna vada e hedinarai, bona ma haida e tomava peroveta tauna gunana ta vada e tore isi lou.⁹ A Heroda eto, "Ina na dia Ioane badina be kwarana na utua oho. A ina harina na kamonaumu tauna be daika?" Bena douna e hetahuva dala ta ai Iesu baine itaia.¹⁰ Apostolo taudia edia laolao amo e lou neganai, edia kara iboudiai Iesu e hamaorolaia. Bena ia ese e hakaudia siri ia ida sibodia baela Betesaida hanuana.¹¹ A hutuma na e kamomai, Iesu vada ela, bona e gavaia. Ia ese eabidia dae bona Dirava Lohiabada sibona baine hedinarai herevadia e harorolai henidia, bona gorere taudia e hamauridia.¹² Dina gelona ai, gwauta-raruosi ia dekena ela bona eto, "Mani aru taudia na boma siaidia hanua lalodiai bona uma gabudia adia bema tahu bona bema mahuta, badina ita na gabu gagaena ai."¹³ A Ia ese e hamaorodia eto, "Umui ese adia bae henidia!" Idia eto, "Ai emai ai na parao maragidia ima bona gwarume maragidia rua. Eiava aniani baia hoi ini hutuma adia!"¹⁴ Idia unu e gwau toma badina be taunimanimu na daha ima. Bena Iesu ese ena hahediba e hamaorodia eto, "Taunimanimu a hamaorodia ba helai diho ore ai, imahui-imahui amo ore ta ta lalodiai."¹⁵ Unu e kara toma bona iboudiai e helai diho.¹⁶ Bena ia ese parao

imaosi bona gwarume rua abidia. Guba ai e gagadae bena Dirava e hanamo. Bena e baki dia sisi bena hahediba e henidia taunimanima bae henidia hagau-hagau. ¹⁷Iboudiai e aniani bogadia e kunu. Bena aniani bahudia e habou, bosea gwautarua e hahonu! ¹⁸Dina ta Iesu na sibona e guriguriva, ena hahediba ema dekena bena ia ese e nanadaidia eto, "Taunimanima be dahaka e tomamu Lau be daika?" ¹⁹Ida eto, "Haida e gwaumu oi na Ioane Bapatsio, a haida e gwaumu oi na Elia peroveta tauna, bona haidia na doini e gwaumu oi na peroveta tauna gunana ta vada e tore isi lou." ²⁰Ia ese ma e nanadaidia lou eto, "A umui dahaka o tomamu? Lau be daika?" Petero e haere eto, "Oina Keriso Dirava Natuna." ²¹Bena Iesu ese e taravatudia eto, tau ta basio hamaoroa. ²²Bena Ia eto, "Taunimanima Natuna, na hisihisi diagau do baina ani: Hanua tau badadia, hahelaga taudia bona itorena taudia ese bae dadaraia bona bae alaia mase. To dina ihatoina ai ma baine tore isi lou." ²³Ia ese iboudiai e hereva henidia eto, "Bema tau ta igavagu baine ura ia na egu hahediba tauna, ia na sibona baine hedadarai. Ia na dina iboudiai baine hisihisi, ena mauri danu baine atoa diho. ²⁴Badina be ena mauri e dogoa taumu tauna ese ena mauri baine reaia, a lau daigu ai ena mauri e negeamu tauna ese ena mauri baine abia. ²⁵Ena namo be dahaka bema ia ese tanobada idoinai baine abia, a sibona ena mauri baine atoa diho, eiava baine reaia?" ²⁶Ia na lau daigu ai eiava egu hereva daidiai baine hemarai, Taunimanima Natuna na ia dainai baine hemarai ia hairaina ai bona Tamana hairaina ai bona aneru helagadia hairaidia ai bainema negana ai. ²⁷Na hamaoromui momokanimu: Haida o ini gigini na basie mase ela bona Dirava ena basileia bae itaia. ²⁸Dina taurahani vada ela murinai, Iesu ese Petero, Ioane, bona Iakobo abidia hidi ororo ai e hakaudia dara guriguri totona. ²⁹E guriguriva lalonai, ia vairana vada e idau bona ena dabua e kuroka-kuroka bona e hururu-hururu. ³⁰Bena peroveta tatau gunadia rarua na Iesu ida e herevava; Una be Mose bona Elia. ³¹Mai hairaidia ida e hedinarai bena Iesu ena mase Ierusalem herevana e gwauraia. ³²Petero bona mai bamona ida be mamahuta. bena idia e noga neganai, idia ese ia hairana vada e itaia; bona tatau rarua danu ia ida gigini. ³³Mose bona Elia ese Iesu e rakatania, Petero ese e hereva henia eto, "Biagumai e, namo herea ita na iniseni ai! Mani kalaga autoi ai a karadia, oi emu ta, Mose ena ta bona Elia ena ta!" A lalona se parara badina asi dibana ia be dahaka e gwauraia. ³⁴Ia dounu e herevava ai, ori ta ese e govadia ahu. Bena hahediba na e gari ori ese e gegedia ahu dainai. ³⁵Bena Dirava gadona ori lalona amo e hereva henidia, eto, "Ina na Natugu, lau ese na abia hidi; ia erena ba kamonai!" ³⁶Ere e doko ai, hahediba tatou-osi Iesu sibona e itaia. Idia na asi regeregedia bona nega taina e daudau e ita gaudia na tau ta danu asie hamaorolaia dahaka e ita gaudia. ³⁷Daba ai, idia na ororo amo e hekeiva ai, hutuma bada ida e hedavari. ³⁸Bena hutuma bogaragidia amo tau ta e boiboi, "Hahediba taumu e, na noimumu, natugu mani ame itaia! Ia na natugu vara-e-deana. ³⁹Lauma dikana ta ese e butua taumu bena e lolo dagumu. E hatororo-tororoamu bena uduna e gwara-gwaramu. Ia ese natugu na serakatanaiamu ela bona kopi danu e beromu. ⁴⁰Emu hahediba na noidia lauma dikana bae lulua lasi, to asi dibadia ede bae kara toma!" ⁴¹Iesu e haere, eto, Asi emui abidadama uruna bona emui lalohadai na kekerere! Lau na dekemui ai baina noho ela bona edena nega ai?" Bena mero tamana e hamaoroa eto, "Natumu a mailaia!" ⁴²Iesu dekena e mailaia lalonai lauma dikana ese tano e hodo laia bona e hatororo-tororoa. A Iesu ese lauma dikana e gwau henia bona mero e hamauria. Bena tamana e henia lou. ⁴³Taunimanima iboudiai ese Dirava ena siahua e hoalaia una nega ai. Idia iboudiai dounu Iesu ena kara e hoalai, ia ese ena hahediba e hamaorodia eto, ⁴⁴Ba hakala namonamo ini hereva taiamui ai bae vareai na ba lalo tao: Taunimanima Natuna na taunimanima ediai taona bae torea. ⁴⁵A hahediba na lalodia asie parara una hereva anina be dahaka. Dirava ese edia amo e hunia, anina basie davaria, bona ia inanadailaina garina e gari. ⁴⁶Hora taina elao bubuni, hahediba sibodia padadia ai e hepapa-ahuahu daika baine herea. ⁴⁷A Iesu ese edia lalohadai na e dibaia, bena mero-mero ta e mailaia dekena ai e gini. ⁴⁸E hamaorodia eto, "Lau ladagu ai ina meromero e abia daemu tauna ese lau danu e abigu daemu, bona lau e abigu daemu tauna ese e siaigu Diravana danu e abia daemu. Ba helalotao umui bogaragimui ai maragi-herea tauna na bada badina be Dirava ese e haeroa ia na bada-herea." ⁴⁹Ioane ese Iesu e haere henia eto, "Biagumai e, ai na tau ta aitaia oi ladamu ai lauma dikadia e luludia lasi taunimanima edia amo. Bena a gwaua tao, badina be ia na dia ita bamoda. ⁵⁰A Iesu eto, "Basioma gwaua tao! badina be se laomui ahumu tauna ese e kahamuimu." ⁵¹Dina vada e kahira-kahira bena Dirava ese ia iabi-lou na guba baela neganai, Iesu ese Ierusalem e raka henia mai haheaukana ida. ⁵²Ena gwaukau taudia vada e siaidia guna, bena e vareai Samaria hanuana ta ai ena gabu bae hegaegaelaia. ⁵³To Samaria taudia ese asie abia dae edia hanua ai badiba be ia na Ierusalem e lao heniava. ⁵⁴Ena hahediba rarua, Iakobo bona Ioane, e kamonai, bena eto, "Lohiabada e, o uramu lahi guba amo baia gwauraia baine diho unu taunimanima baine habuadia a?" ⁵⁵A Iesu e gini kerehai bena e hamaorodia idia na e hereva kereremu. ⁵⁶Bena hanua idauna ta ela. ⁵⁷Iesu bona ena hahediba dala amo e laova ai, tau ta ese e hereva henia eto, "Lau na emu laolao iboudiai lalodiai baina bamomu." ⁵⁸Iesu eto, "Uda sisiadia na mai edia kohua, bona atai manudia na mai edia ruma, a Taunimanima Natuna na asi ena hekwina gabuna." ⁵⁹Ma ta danu ia ese e hamaoroa eto, "Murigu ai a raka!" A ia eto, "Lohiabada e, mani emu kara tamagu do baina ha guria guna." ⁶⁰A Iesu eto, Mase taudia sibodia ese edia mase bae guridia: a oi hari aola taunimanima gabu idoinai Dirava ena basileia ba harorolaia!" ⁶¹Ma ta eto, "Lohiabada e, lau ese oi baina gavamu, a mani egu ruma taudia do aina hatonidia lao guna. ⁶²A Iesu eto, Tau ta ese ruarua isivana imana ai baine abia, ma baine roha kerehai ia ese Dirava ena basileia basine abia diba.

10

¹Harihari ini gau muridiai, Lohiabada ese danu tatau hituahui-rua vada eabidia-hidi, bona rarua-rarua amo e siaidia lasi guna baela ia sibona do bainela hanuadia bona gabudia iboudiai. ²Ia ese e hamaorodia, eto, "uma geigeina (harvest) na momo herea, a gaukara taudia na dia momo. Una dainai uma (Lohiana/Biaguna) ba noia ia ese gaukara taudia baine siaidia lasi ena geigei lalonai. ³Vada aola. Aitaia, lau ese na siaimui lasimu mamoe natuna na heheto uda sisiadia

bogaragidiai. ⁴Moni vainana ta, e laolao tauna ena kohu uda baegena ta, tamaka danu ta basio abidia-kau bona dala ai ta basio hedavari henia. ⁵Edena ruma lalonai o vareaimu, guna baoto, 'Maino na ina rumai baine mia.' ⁶Bema maino natuna na unuseni, emui maino na ia latanai baine mia; a bema lasi neganai, ia na baine lou emui ai. ⁷Una ruma tamona ai ba noho, idia ese ba henimui gaudia na bavanidia bona ba inudia, badina gaukara tauna na ena gaukara davana do baine abia. Dia ruma ta amo ruma a baola. ⁸Edena hanua lalona ai o vareaimu, bona idia ese eabimui daemu, dahaka vairamui ai e dabaramu na bavani, ⁹bona ruma lalonai gorere taudia ba hanamodia, bona ba hamaorodia, 'Dirava ena basileia na emu ai vada eme kahirakahira. ¹⁰Edena hanua lalonai ba vareai, bona idia ese basie abimui dae, baola hanua daladia ai bona baoto, ¹¹dounu emui hanua kahudia aemu ai e kamokau gaudia na ba dahudia ohomu umui ihabadelaimui! A ina na badiba, Dirava ena basileia na vada eme kahirakahira. ¹²Na hamaoromuimu una dina ai una hanua ese Sodoma ena dika na be hereaiamu. ¹³Madi ihabaimui, Korasina! madi ihabaimu, Betesaida! Badina bema siahua karadia hereadia emu ai vada e vara na Tyre bona Sidono ediai bema vara neganai, idia na idau negai vada bema helalo kerehai, boroma kopidia bona kahu ai helaidiai. ¹⁴A Tyre bona Sidono edia dika hahemaorona na umui ese bo hereaiamu. ¹⁵Bona umui, Kaperanauma, oi na basie abimu-isi gubai, a? Oi na bae diholaimu tanobada henunai. ¹⁶E kamona henimuimu tauna ese lau e kamona henigumu, bona e daradaraimuimu tauna ese lau e dadaraigumu, bona lau e dadaraigumu tauna ese e siaigu tauna e dadaraigumu. ¹⁷Bona hitahui-rua osi e lou mai moaledia ida, etomava, "Lohiabada e, lauma dikadia ese eremai e kamona oi ladamu dainai." ¹⁸Unu amo ia ese e hamaorodia, eto, "Lau ese Satani guba amo e moru vada na itaia, kevaru na heto. ¹⁹Aitaia, lau ese siahua vada na henimui gaigai bona doadoa ba moidia tao, bona inai tauna ena siahua idoinai danu, bona ma gau ta ese dala ta ai basine hahisihisimu diba. ²⁰Vadaeni dia lauma dikadia ese e kamona henimuimu mo daidiai ba moale, a ba moale danu ladamui gubai vada e toredia dainai. ²¹Una nega tamona, ia na Lauma Helaga lalonai e moale bada herea, bona eto, "Na hamaoromuimu, Tamagu, guba bona tanobada Lohiana, badina be oi ese ini gau vada o hunidia aonega bona laloparara taudia edia amo, bona maragidia ediai vada o hahedinaraidia. Oibe, Tamagu badina ini na nanamo heherea oi vairamu ai." ²²Gau iboudiai na Tamagu ena amo vada e gwaurai henigu, bona ta asi dibana Natuna be daika Tamana sibona mo, bona Tamana be daika Natuna sibona mo, bona daika Natuna ese e gwaurai tauna ese baine hahedinarai. ²³Bena ia na e hegiro hahediba edia ai bona sibodia mo e hereva henidia, eto, "Ini gau o itamu taumui matamui na vada nanamo. ²⁴Badina na hamaoromuimu, peroveta bona pavapva taudia momo eurava umui ese o ita gaudia bema ita to asi e itava, bona o kamona gaudia bema kamona to asie kamonaiva. ²⁵Harihari aitaia, Iudea taravatuna dibana momo tauna ta vada e tore-isi ia baine dibagania, etomamu, "Hahediba Tauna e, lau be dahaka baina kara mauri hanaihanai baina abia? ²⁶Ia ese vada e hamaoroa eto, "Taravatu lalonai be dahaka e tore, a? Oi ese be ede o duahia tomamu, a? ²⁷Ia vada e haere bona eto, "Lohiabada emui Dirava ba lalokau henia mai kudoumu idoinai ida, bona mai daramu idoinai ida, bona mai goadamu idoinai ida, bona mai lalomu idoinai ida, bona dekemu tauna sibomu o helalokaumu hegeregere." ²⁸Ia ese vada e hamaoroa eto, "Emu haere na maoro. Ini ba kara toma, bona oi na bo maurimu. ²⁹A sibona eurava baine maoro urana, ia ese Iesu e hamaoroa eto, "Bona lau dekegu tauna be daika, a? ³⁰Iesu e haere bona eto, "Tau ta na Ierusalemamo Ieriko e laova. Ia na henao taudia padadiai e moru, idia ese dabuana e daredia bona eha-beroa, vada e rakatania, mokona eha-masea. ³¹Ma ini e vara toma, helaga tauna ta una dala amo e diho laova, bona ia ese ina tau e itaia neganai, dala kahana amo e rakaia hanai. ³²Hegeregere, Levi tauna ta danu, ema ina gabu bona tau e itaia neganai, dala kahana amo e rakaia hanai. ³³A Samaria tauna ta, ena laolao ai, ina tau enai e kau, bona ia ese ina tau e itaia neganai, e bogaiahisi. ³⁴Dekena ela, ia ese dehoru bona vine ranuna amo berona e dairidia, bona e kumidia. Bena sibona ena doniki ai e hahelaia-kau, e laohaia noho rumana, bona unuseni ai eregua. ³⁵Dina iha ruana ai, ia ese denaril (moni) rua e vaidia noho rumana biaguna e henia, bona eto, 'Ba naria namonamo, bona ma dahaka ia dainai ba hoidia, baina loumai neganai, davadia baina henimu lou. ³⁶Ini taunimanima tatoi-osi oi ese o laloamu edena be henao taudia ese eha beroa tauna dekena tauna na bo gwauraiamu?" ³⁷Ia eto, "Ia e bogaia-hisi tauna." Bena Iesu ese eha maoroa eto, "Aola bona oi danu unu ba kara toma. ³⁸Harihari idia edia laolao ai, ia na hanua ta lalonai e vareai, bona hahine ta ladana Mareta ese eabidia dae vadivadi ai e haloa. ³⁹Ia na mai tadina ta, ladana Maria, ia danu Iesu aena badinai e helai diho bona ena hereva e kamona. ⁴⁰A Mareta na hegaegae karadia ese lalona eha-hekwarahiava, una dainai ia vada ema bona eto, "Lohiabada e, oi be so laloamu tadigu ese vada e rakatanigu sibogu baina gaukara, a? ⁴¹A Lohiabada e haere bona eto, "Mareta e, oi na gau momo daidiai lalomu e metaumu bona e hisihisimu, ⁴²a gau tamona mo herea. Badina Maria ese gau namona vada e abiahidi, ina na ia ena amo basine heabi oho."

11

¹Hari ina na e vara Iesu na gabu ta ai e haguriguri neganai, e guriguri vaitani murina ena hahediba ta ese e hereva henia eto, Lohiabada e, guriguri a hadibamai Ioane ese ena hahediba memero e hadibadia hegeregere. ²Bna e hereva henidia eto, "Ba guriguri neganai ini ba gwau toma, Tamamai eOi ladamu baia hahelagaiaEmu basileia bainema³Dina ta ta amo amai bame henimai⁴Emai dika ba gwau tao badina be ai ese danu e hadikamaimu taudia edia dika a gwau taom bona hedibagani ai basio hakaumai vareai. ⁵Bena ia ese e hamaorodia eto, "Umui daika na mai turana bona hanuaboi ai bainela dekena bona baine noia baine eto, "Turagu e, parao toi do boma henigu. ⁶Turagu ta na ena laolao amo lau dekegu ema bona lau dekegu na asi gaunata ia baina ubua, a?" ⁷Bena ia na ruma lalona amo baine hereva henimu baineto, "Asio hametaugu (or haraivagu) iduara na hekou, bona natugu na lai ida hehekure. Lau na basina toremu bona basina hemimumu. ⁸Aina hamaoromui, enabe bema ia na basine toreisi una e noiamu gauna basine henia, badina be una na turana dainai, to badina turana ena noinoi goada-goada dainai, ia na do baine toreisi bona turana ena noinoi gauna do

baine heni momo.⁹Bona ma na hamaoromuimu, ba noinoi bena baine henimu, ba tahua bena ba davaria, ba pidipidi bena iduara baine kehoa emu. ¹⁰Badina be baine noinoi tauna na do baine henia, e tahuamu tauna ese do baine davaria, bona e pidipidimu tauna enai iduara baine hekeho. ¹¹Edena tama ese bema natuna ese gwarume ta baine noia bena gaigai ta baine henia a dia gwarume, a?" ¹²Eiava, bema gatoi ta baine noia a doadoa ta baine henia, a?" ¹³Una dainai umui dika taumui natumui gau namodia ba henidia na mai dibamui a daenai be ede badana Tamamui guba ai e nohomu ese Lauma Helaga do baine henidia e noiamu taudia ediai a?"¹⁴Hari, Iesu na mu tauna ta ena amo lauma dika ta na e lulua lasi murinai una mu tauna vada e hereva matama, bona hutuma na e hoa. ¹⁵A haida na e hereva eto, "Ia na Beelzebal lauma dika lohiana ladanai lauma dikadia e luludia-lasimu."¹⁶Haida ese e tohoa toa ta guba amo baine hahedinaraia. ¹⁷A ia ese idia lalodia na e dibaia bona e hamaorodia eto, Basileia ta sibona eha-hepararamu neganai do baine kohu ore, bona ruma ta baine haheparara neganai do baine moru.¹⁸A bema Satani na sibona baine haheparara, ena basileia be ede baine gini toma, a? Badina umui na o gwaumu lau ese lauma dikadia na Beelzebul ladanai na luludia-lasimu. ¹⁹Hari bema lau ese Beelzebul ladanai lauma dikadia na luludia-lasimu o umui natumui be daika ladanai e luludia lasimu a?" ²⁰A, bema lau ese lauma dikadia na luludia lasimu Dirava imana kwaki-kwakina amo, Dirava ena basileia vada eme kau emui ai.²¹Mai goadana tauna mai ena tuari kohudia ese sibona ena ruma e itaiaatou neganai, ena kohu iboudiai na nanamo. ²²To goada herea tauna ta ese baine tuari henia neganai bona baine hamorua, bona ena tuari kohudia bona ena kohu baine abidia oho. ²³Tau ta dia lau ida na lau e inai henigumu bona lau ida asia gogo heboumu tauna na e gigi-rohorohomu. ²⁴Lauma dika ta na tau ta ena amo e lulua-lasimu neganai, ia na tano gagaena amo e hanaimu baine laga-ani gabuna ta e tahuamu, to gabu ta asine davariamui, ia sibona e tomui, "Na rakatania rumana ma baina lou henia." ²⁵Ia e loumu neganai, e itaiamu ruma lalona na, e daroa goevagoeva bona lalona kohudia na eatodia namonamo. ²⁶Bena ia na e loumu lauma dika hereadia hitu ma e boiridiamui ia ida bae noho hebou una rumai. Bena una tau ena noho na e dika hereamu dia guna e nohova bamona.²⁷Hari ini hereva e gwauraiua lalonai, hahine ta na hutuma lalodiamui e hereva badabada eto, Oi e havaramu bogana bona e ubumu ratana na namo." ²⁸A Iesu e haere eto, "Dirava ena hereva e kamonaimu bona e badinamu taudia hari nanamo herea."²⁹Taunimanima hegogona ba e badava bona ia ese e hereva henidia matama eto, "Ina uru na kara dika uruna idia na toa ta e tahuamu, to toa ta basine henidia a toa tamona na Iona ena toa. ³⁰Badina be Iona ena toa na Nineva taudia ediai hegeregere na ma unu bamona Taunimanima Natuna na ina uru taudia ediai danu."³¹Diho kahana pavapava hahinena na do baine duniadae hahemaoro neganai ina uru taudia ida bona bae dika hebou badina be ina hahine na tanobada dokona kahana amo ema e urava Solomona ena aonega herevadiala baine kamonaia, bona a itaia Solomona e hereaia tauna be iniseni ai.³²Nineva taudia na do bae dunidia-dae ina uru taudia ida bae dika hebou badina be Iona haroro dainai e helalo kerehai, bona aitaia Iona e hereaia tauna na iniseni ai.³³Asi tauna ta ese lamepa eha-araiamu murinai ma hehuni gabunai eatoamu eiava bose lalonai e atoamu, a lamepa taudae gabuna ai e tauadaemu unu amo rumai ba raka vareai taudia ese diari do bae itaia. ³⁴Umui matamui na tauanimui ena lamepa. Matamui namo neganai tauanimui idoinai na una diari ese eha-honuamu. A bema matamui na dika neganai tauanimui na dibura ese eha-honua. ³⁵Una dainai nahuamui ba toho una diari lalomui ai na basine dibura. ³⁶Una dainai, bema tauanimui idoinai na diari ese eha-honua, dibura taina danu lasi, a diari ai e honu, una lamepa e diarimu na heto, una hururuna danu oi latamu ai. ³⁷Hari ini hereva e gwauraidia murinai, Farasia tauna ta ese enoia ia ida bae aniani hebou. Bena ia ida e helai hebou bona e aniani. ³⁸Hari Farasia tauna na e hoa e itaia Iesu na imana asine huri bona e aniani. ³⁹A Lohiabada ese e hereva henia eto, "Hari umui Farasia taumui na emui kehere bona mereki murimuridia mo o hagoevamu a lalomui be dadidadi bona didika. ⁴⁰Umui na kavakava taumui! Ina murimuri vada e karaia tauna ese lalona danu asine karaia a?" ⁴¹A lalomui goevadia na ba heni, bona do baita gau iboudiai emui ai na ba goeva. ⁴²A Farasia taumui madi ihabaimui emui mint bona rue bona aniani avadia iboudiai na a haboumu karoada o hagwautamu to hahemaoro maoromaoro bona Dirava iurahenina be o readiamui. A ini ruaosi na boma karadia ruaosi basiona rea.⁴³Farasia taumu madi ihabaimui, badina be dubu lalodiai helai gabudia namodia mo o urahenimu bona o uramu hoihoi gabudia ai taunimanima ese bae hedavari henimui bona bae matauraimui. ⁴⁴Umui na ihabaimui umui na midave garadia asi toadia na hehebou taunimanima ese latamui ai e raka loamu badina be asi dibadia dainai. ⁴⁵Bena taravatu hahediba tauna ia ese e hereva henia eto, "Hahediba tauna e, ini hereva o gwauraimu gaudia na ai danu o gwau dika heniamimu." ⁴⁶Bena ia ese e hamoroa eto, "Umui taravatu taumui danu madi ihabaimui badina umui ese taunimanima na maduna o henidiamui bona ihuana danu metau, a umui sibomui ese danu edia maduna metau na imamui kwaki-kwakidia ai asio uramu ba daudia toho."⁴⁷Mdai ihabaimui badina umui tubumui ese peroveta taudia e aladia maseva, a umui ese idia garadia ma oha-ginidiamui. ⁴⁸Una dainai, umui ese tubumui, tamamui edia kara o gwaurai hedinaraimu momokani idia ese e aladia mase bona umui ese oha-momokaniamui, bona umui ese ma edia gara oha-ginidiamui.⁴⁹Badina una dainai danu Dirava ena Aonega na etomu, lau ese peroveta bona apostolo taudia do baina siaidia bona idia ese do bae dagedage henidia bona idia ese haida na do ba hamasedia." ⁵⁰Una dainai ina uru na peroveta taudia iboudiai raradia e hebuu tanobada e karaia matamana amo na idia latadiala. ⁵¹Abela rarana amo ema Zakaraia rarana daika be pata helagana bona ruma helagana padadiala e alaia mase, oibe na hamaoromuimu ina uru latanai na gwauraiua kaumu.⁵²Madi ihabaimui taravatu iha hedibalaina taumui badina be umui ese ina aonega ikehona gauna vada ome abia oho, umui na unu amo asio vareai, bona ba raka vareai taudia na umui ese o laodia ahumu.⁵³Iesu na ruma amo e raka oho murinai Farasia taudia bona Itorena taudia ese e badu henia bona e heiri-heiri henia gau momo e gwaurai dainai. ⁵⁴Bona e hakalava ia uduna amo baine lasi herevadiala amo bae idoia bona bae habadelaila.

¹Una neganai, taunimanima daha momo asi iduahidia na e hebou tamona, hutuma herea dainai e hemoitao-hemoitao, bona ia ese ena hahediba memerodia e hereva henidia matama eto, "Nahuamui na ba toho, Farasia taudia edia eha-tubuamu gauna una na edia koikoi garina.²A gau ta na dia hehuni una na asie hedinarai, eiava e huniva asie urava bae dibadia. ³Bena dibura lalonai e herevalaidiava na do bae hakaladia diari lalonai bona dahaka tai ai e boidobiva ruma daiutu lalonai herevadia na do bae gwaurai hedinarai ruma guhidia amo.⁴Lau ese umui na hamaoromuimu bamogu e, garidia na basio gari daidia be tauani do bae alaia mase, bona una garinai idia na asi dibadia ma dahaka bae kara. ⁵To lau ese na hamaoromuimu daika ba gari henia, garina henia tauna na daika be mai ena siahu. Ina ala-ala tauna na gehena gohuna ai do baine taho vareai. Oibe, na herevamu, ia hari garina ba gari.⁶Basiai monidia rua asie hoihoi laidia pene maragidia rua amo, a? A Dirava matanai na ta se laloa boiomu. ⁷A umui kwaramui huidia na ia ese na e duahidia vaitani, basio gari. Umui daramui na bisini momo daradia e hereadia.⁸A, lau ese na hamaromuimu, taunimanima vairadiai lau e gwaurai hedinaraimu tauna danu, Taunimanima Natuna ese baine gwaurai, ⁹a lau e dadaraigumu taunimanima vairadiai, na do baine dadaraia, Dirava ena aneru logora vairadiai. ¹⁰Bona taunimanima Natuna baine ere-dika henia tauna ena dika na do baine hegwauro, to Lauma Helaga baine hereva dika henia tauna ena dika na do basine hegwauro.¹¹Una dainai e synagogue bae laohaimui, bona hahemaoro taudia bona siahu taudia vairadiai ba gini neganai, gau ta basio lalo-hagui laia ede do ba hereva toma bona dahaka do ba gwaurai edia hereva ilao-ahudia, eiava dahaka do herevalai, ¹²badina be Lauma Helaga ese do baine hadibamu dahaka do ba gwaurai. ¹³Bena hutuma lalodia amo ta e hereva eto, "Hahediba tauna e, kakagu na boma hamaoroa ai raruosi emai koku na baine haridia." ¹⁴A Iesu ese e hamaoroa eto, "Tau e, daika ese lau na hahemaoro tauna ai e halaogu, eiava emui koku ihaerona tauna, a? ¹⁵Bena e hamaorodia eto, Nahuamui na ba toho bona sibona koku e gogodia vairadia amo, badina be taunimanima ta ena be mai ena koku momo to ena mauri na dia unuseni ai.¹⁶Bena Iesu ese sivarai hegeregere na e gwaurai, eto, "Taga tauna ta ena imea anina na momo herea, ¹⁷sibona ese e haeroa bona eto, Dahaka baina kara badina be egu imea anidia na momo a asi iha-boudia gabuna. ¹⁸Bena eto, "Ini hari baina kara toma. Egu roge hari baina rohoa, bona badana ta baina haginia, bona unuseni ai egu imea anidia bona egu koku do baina hatoo unuseni. ¹⁹Bena laumagu baina hereva henia, bainato, "Laumagu e, emu koku namodia momo vada name haboudia vaira laganidia momo daidiai. Ba laga-ani, ba aniani, ba inu-inu, ba moale. ²⁰T Dirave se e hamaoroa eto, "Kavakava taumu, ina hari hanuaboi ai laumamu na emu amo nabia ohomu, bona ini ome hegaegae gaudia be ma daika ena, a?" ²¹Bena ina na unu do baine heto daika be sibona mo ena koku e haboumu tauna enai, bona Dirava enai ia na dia taga tauna. ²²Bena Iesu ese ena hahediba memerodia e hamaorodia, eto, "Una dainai lau ese umui na hereva henimuimu, basio helalo momo emui mauri dainao, oi be dahka bavani - eiava tauanimu dainai dahaka do ba hedokilai. ²³Badina be mauri ese aniani mauri e herea bona tauani ese dabua e hereia. ²⁴Mani a laloa, galo manudia, unu idia na asie hadohaomu bona asie geigeimu. Idia na asi edia iha-boulaina rumana, eiava roge, to Dirava ese e ubudiamu. Umui na ini manu daediai! ²⁵A oi daika emu lalo-hekwarahi dainai ese dina ta baine atoa kau ena mauri iha-latana ai, a? ²⁶Bema oi na gau maragina ikarana ai basie karaia diba neganai, dahaka dainai gau oredia haida o lalo-hekwarahimu, a?" ²⁷Herahera e varamu mani a haeroa - idia be ede e vara tomamu. Idia na sie gaukaramu, eiavana asie tiriturimu. A na hamaoromuimu, Solomona ena hairai lalonai iena dabua hairaina na ini herahera ta ida se hegeregere. ²⁸Hari, bema Dirava ese tano ai e varamu avadia na unu eha-dabualaidia tomamu hari e varamu kerukeru be lahi lalonai ba tahodia vareai, ia na unu bamona ai umui danu do baine hadabualaimui, O abidadama maragi taumui! ²⁹Una dainai dahaka do bavani bona ba inu gaudia basio tahu, bona basio lalo-hekwarahi laidia. ³⁰Badina be ina tanobada besedia iboudiai, ese ini gau e tahumu, bona Tamamui na mai dibana vaitani unu gau na o ura-henimu. ³¹A ena basileia ba tahua bona ini gau iboudiai baine henimu. ³²Basio gari, seri maragina, badina be Tamamui na mai lalo namona ida basileia do baine henimu. ³³Emui koku ba hoihoi bona ogogami taudia ba henidia. Sibomu ese basie mouka-mouka pusedia ba karadia - emui koku namodia na ini basileia ai bavato una na seoremu, henao tauna, ta se vareaimu bona pitopito ese basie hadikadia ore. ³⁴Badina be emui koku namodia unuseni ai umui lalomui danu unuseni. ³⁵Emui rami latadia na gabamui varodiai ba lokudia vareai, bona emui lamepa na ba haradia; ³⁶bona umui danu biagumui dainai e narimu taudia na heheto, ia na headava ta ariana amo baine lou, bainema bona baine pidipidi neganai, iduara ba kehoa haraga ia dainai. ³⁷Hesiai memero dia be nanamo, daidia be biagudia do bainema neganai idia na nogadiai baine davaridia. Momokani vaitani na hamaoromuimu ia ese gabana varonai ena rami baine hekasilaia; bona aniani patanai bae ege-diho, bona bainema adia baine heni. ³⁸Enabe biagudia na noga horana iharuanai, eiava ihatoinei bona nogadiai do baine davaridia, unu hesiai taudia be nanamo. ³⁹A badiba, bema ruma biaguna na bema diba edena hora ai henao tauna na be maimu, ia ena ruma na do basie hamakohia. ⁴⁰Umui danu ba hegaegae, badina Taunimanima Natuna bainema horana umui na asi dibamui. ⁴¹Bena Petero e hereva, eto, "Lohiabada, ina sivarai hegeregere be ai mo o hamaoromaimu eiava taunimanima iboudiai danu, a? ⁴²Lohiabada e hereva eto, "Daika be mai ena kamoni bona mai aonegana koku ireguna heitatao tauna ia biaguna ese baine duanaia ena hesiai memero baine itadiatao bona adia aniani, baine henidia hora maorona ai, ani?" ⁴³Hesiai tauna be namo daika be biaguna bainema neganai, ia na baine davarida e gaukaramu. ⁴⁴Na hamaormui momokanimu, ia na biaguna ese do baine abiahidi ena koku baine itadiatao. ⁴⁵A bema una hesiai tauna na sibona lalonai baineto, "Lau biagugu ena loumai negana vada eme daudau herea, bona hesiai taudia bona hahinedia baine dadabadia matama, bona baine aniani bona baine inu-inu, bona baine kekero. ⁴⁶Una hesiai tauna biaguna baine gini dae ia ese asine haeroa dinana ta ai bona ia se diba horana ai bona ia ese

baine utu-sisi bona asi edia kamona taudia ida baine atoa hebou.⁴⁷ A una hesiai tauna na mai dibana biaguna ena ura be dahaka, bona asine hegaegae bona biaguna ena ura dalana se karadia ia na nega momo do bae kwadia, dikadika.⁴⁸ A ena ura se diba bona se karadia bena e diba ia danu do ba kwadia tauna ena hekwadi na baine hoho. A taunimanima daika be momo e henia na edia amo momo e ura henidia loumu, bona daika enai momo eha-ahulaia, ena amo danu e noidia loumu.⁴⁹ Lau nama na ina tanobada latanai lahi baina tahoa kau, bena na urava vada bema araia.⁵⁰ A lau na mai egu bapatiso ida ta do baine bapatiso laiagu bona ede bamona lalogu eha-hisiamu ela bona do baine guguru.⁵¹ Umui ese o laloamu lau ina tanobada nama na maino namailaia, a? Lasi, na hamaoromuimu a haheparara na mailaia.⁵² Badina be ini amo ela taunimanima laima ruma tamona lalonai na do bae haheparara - taunimanima toi taunimanima rua ida ba heiri-heiri bona taunimanima rarua na taunimanima tatoi ida bae haheparara.⁵³ Idia na do ba heparara tama bona natuna padadai bona natuna ia tamana padadai, sina bona natuna kekeni padadai, tama natuna kekeni na sinana ida padadai, hahine ravana kekenina ida padadia, bona kekeni ravana hahinena ida padadai.⁵⁴ Hari Iese ese danu hutuma e hereva henidia, eto, "Dina diho kahana amo ori e daemu o itamu neganai, haraga herea e gwaumu, medu do bainema benamedu na e dihomu.⁵⁵ Benadiho kahana amo lai e toamu neganai oi na ogwaumu nega na do baine gesegese, benae varamu.⁵⁶ Koikoi taumui! Umui na guba bona tanobadai na mai dibamui bona e gwauraidiamu, matona ini nega ai e varamu gaudia toadia be asi dibamu a?"⁵⁷ Bona dahaka dainai umui na sibomui emui ai maoro so hahemaorolaima, a?⁵⁸ Badina be oi na inaimu ida o laomu hahemaoro tauna vairana neganai, dala ai ina gau na ba hanamoa ia ida bena unu amo inaimu ese hahemaoro tauna dekena na basine laohaimu, bona hahemaoro tauna ese dibura ruma heitatao tauna baine siamu lao, bona dibura rumai baine tahomu vareai na garina.⁵⁹ Na hamaoromuimu, dibura ruma amo na basie siaimu lasi, ela bona emu abitorehai moni oredia na ba heni guguru.

13

¹Una negana ai haida e vaira bena Galileia taudia sivaraidia ia e hamaorolaia eto, Pilato ese idia raradia na edia boubou gaudia ida e bulo hebou. ²Iesu ese e haere henidia bena eto, umui o laloamu unu Galileia taudia edia dika ese Galileia taudia oreadia edia dika e hereadiamu badina una dala ai unu e hahisihisidia tomava dainai a? ³Na hamaoromuimu, lasi. To bema umui basio helalokerehai, iboumui ai unu ba mase toma.⁴Eiava unu taunimanima gwauta taurahaniosi Siloam ai kohoro e moru bena e aladia mase umui ese o laloamu edia dika ese Ieruselema ai, e nohomu taudia iboudiai edia dika e hereaia a? ⁵Na hamaoromuimu, lasi. To bema umui basio helalokerehai, iboumui ai unu ba mase toma.⁶Bena Iesu ese sivarai hegeregereana e hamaorodia eto, "Tau ta ena vine imeana lalonai suke auna ta e hadoa, bena huahua itahuna ela, to ta se davaria. ⁷Bena ia ese imea ireguna tauna, e hamaorodia eto, "aitaia, lau na lagani ihatoina nama ina suke auna ai huahua name tahua to gau ta asiname davaria ba utua oho. ⁸A ia ese e haere henia bena eto, Biagugu e, ina lagani mo do boma rakatania lau ese badina do baina geia hegege bona tano namona latanai baina atoa. ⁹Bena eto bema una neganai huahuana baine dobi, be namo A bema lasi, oi ese na ba utua oho!"¹⁰Hari Iesu na dina helagana ai dubu helaga ta lalonai ai e hahedibava, ¹¹bona unuseni ai hahine ta, lagani gwauta-taurahani lauma dikadia ese e boloa, doruna dika bona se maoro guguruva.¹²Una hora ai Iesu ese e itaia, bena e boiria kahi bena e hamaorodia eto, "Hahine e, "emu manokamanoka amo ame herua nege."¹³Bena imana latanai e atoa kau, una horanai doruna e maoromaoro bona ia ese Dirava e hanamoa. ¹⁴A dubu lohiana, e badu badina Iesu ese dina helagana ai e hamauria dainai. Hutuma e haere henia bona eto, "Dina tauratoi mimia taunimanima edia gaukara dinadia bona unu dinadia hahemaui totona baoma."¹⁵A Lohiabada ese e haere henia bena eto, "koikoi taumui e! umui ta dina helaga ai ena boromakau eiava doniki asio ruhaiaimu, ranu ihenina asio hakaua laomu a?"¹⁶A ina hahine, na Aberahamo besena hahinena, lagani gwauta taurahani Satani ese e guia, be dina helaga ai ia ina igui amo basine ruhaia a?"¹⁷Unu e gwau toma, e inai henia taudia iboudia ai vada e hemarai, A hutuma idoinai ese e moale henia e kara gaudia iboudiai hahenamodia dainai. ¹⁸Bena Iesu eto, "Dirava ena basileia be ede heto? bona dahaka ai baine hegeregerea?"¹⁹Ina na e kara sinapi nadinadina ta na heto tau ta ese eabia bena ena uma ai e tahoa, bena e tubu bona au badana ta ai ela, bona atai manudia na riginai ai e roho kau e laga'ani."²⁰Bena ma eto, "to Dirava ena basileia be dahaka ai baina hegeregerea?"²¹Ina na e kara asi e hatubua muramurana ta na heto Hahine ta ese eabia bena flaoa nau atoi ida e buloa ela bona idoinai vada e tubu."²²Bena Iesu na Ieruselema e lao heniava ai hanua badadia bona maragidia, lalodiai e hahedibava. ²³Bena tau ta ese hereva henia eto, "Lohiabada e, gagadoi mo bae mauri a? Ia e haere eto, ²⁴hededegwa ai ikoukou hekahi-hekahina amo ba raka vareai, badina be na hamaoromuimu, hutuma bae hetahu bae raka vareai toho, to basie karaia diba."²⁵Ruma biaguna baine toreisi bena iduara baine koua bena oi na murimuri ai ba gini bena iduara ai ba pidipidi ba gwau "Lohiabada e, iduara mai ame kehoa! A ia ese baine haere henimui bona baineto, "Umui be ede amo oma, asi dibagu umui!"²⁶Bena umui na baogwa, "aina umui vairamui ai baia aniani bona baia inuinu, emai ariara ai o hahedibava."²⁷A ia e haere eto, na hamaoromuimu, launa asi dibagu umui be ede amo oma. Karadika taumui iboumui ai, egu amo dauha aola."²⁸Una gabu amo, bae dorimui lasi murimuri ai ba tai bona gadigadimui ba hahedai bena umui ese Aberahamo, bona Isa'ako, bona Iakobo bona peroveta taudia iboudiai baitadia Dirava ena basileia lalonai. ²⁹Idia na dina dae amo bona dina diho amo, baema, Dirava ena basileia lalonai bae ege diho. ³⁰Bona baitala, haida na do bae gabe to bae guna, bona haida na do bae guna to bae gabe."³¹Una negana ai Farisea taudia haida ia dekena eo, e hamaorodia eto, "Ina gabu ba rakatania bona dauha baola, badina be Heroda e uramu oi baine alamu mase."³²Bena ia ese e hamaorodia eto, "aola bona ba hamaorodia uda sisiana, "ai itaia lau na ina harihari lauma dikadia na luludiamu bona hahemaui karadia na karamu bona kerukeru, bona dina ihatoina ai egu gaukara baine a haguguru. ³³A harihari bona kerukeru, egu laolao baine hesiriu bona bainela bona vaira dinadia, badina be peroveta tauna na se abia daemu

Ierusalem murimuri na ai basine mase.³⁴Ierusalem e, Ierusalem e, daika ese peroveta taudia e aladia bona dekemu e siaidia vasi taudia nadi amo o hododia. Nega ede hetomana na ura natumu baina haboudia. Kokoroku hahinena ese natuna hanina henunai e gorudia ahumu na heto, to oi na asio uramu.³⁵A itaia, emui ruma vada e negea badina lau ese umui na hamaoromui, umui ese ma basio itagu lou ela bona negana bainema bona umui baoto, "Lohiabada ladanai e maimu tauna aita hanamoa."

14

¹Hari, ina kara na e vara, Farasia hegunalai tauna ta ena rumai, bae aniani dainai dina helagana ta ai, bona idia ese ia e raraia taova. ²Hari ia vairanai be tau ta, tauanina rara e kwadogi gorere na ese eabia. ³Bena Iesu ese Iuda edia taravatu mai dibadia taudia bona Farasia taudia e nanadaidia eto, "Ina taravatu ai na maoro dina helaga ai tau ta ba hamauria, eiava lasi a?" ⁴A idia na asi regeregedia. Bena Iesu ese gorere tauna na e dogoatao bona eha-namoa guguru ena gorere amo; bona e siaia-oho. ⁵Bena ia ese e hamaorodia eto, "Umui ta bema emu boromakau natuna ta na guri ai baine moru, umui ese haraga basio ma veria dae Dina Helagana ai a?" ⁶Idia na ini gau haerena ta asie heni. ⁷Bena ia ese e vavedia taudia na sivari hegeregere na ta e henidia badina be e itadia idia na e urava helai gabudia namodiai mo ba helai. ⁸"Bema ta ese e vavemui headava ariana ilaohenina neganai, helai gabudia namodia basio helai eiava ta oi daemu ai e matauraiaumu tauna e vavea ena helai gabunai basio helai, ⁹bona umui e vavemui tauna baine ginidae neganai oi na baine hamaoromu baineto, "Oi o helai gabuna na ia a henia ina na ia baine helai gabuna" bona oi na mai hemaraimu ida helai gabuna maraginali do baine hahelaimu. ¹⁰A, bema oi na e vavemu neganai baola helai gabuna maragina ai ba helai diho, bona unu amo hevave tauna bainema neganai oi do baine hamaoromu baineto, "Turagu, aoma atai ai ame helai." Bena oi na do ba matauraumu una aniani gabunai e helai hebou taudia ese. ¹¹Badina be ta ta e ha-hebadamu tauna na do baine bada. ¹²Bena ia ese danu e vavea tauna eha-maoroa eto, "Aniani dabarana eiava aria ta o karaiaumu neganai, turamu na basio vavedia, eiava bamomu, eiava tadikakamu, eiava taga taudia, idia ese gabeai ma bae vavemu totona bona davamu iheni-loudia dainai. ¹³A, aria ta o boilaiaumu neganai, ologami taudia ba vavedia, ima hevari bona ae heveri taudia, bona mata kepulu taudia, ¹⁴bema oi na do ba namo, badina idia davana ihalouna na basie karaia diba badina be unu davadia do baine henimu-lou kara maoromaoro taudia edia toreisi-lou ai. ¹⁵Hari ia ida e aniani hebouva tauna ese ini hereva e kamonaidia neganai, ia na e hereva eto, "Dirava ena basileia ai baine aniani hebou tauna be namo." ¹⁶To, Iesu ese e hamaoroa eto, "Tau ta ese aria badana ta eha-hegaegaea bona hutuma e vavedia. ¹⁷Aniani ianina horanai, ena hesiai memerodia e siaidia bona e vavedia taudia bae hamaorodia baeto, "Aoma, badina be aniani vada eha-lai hegaegae. ¹⁸To idia iboudiai na eha-hekora. Tau ginigunana eto, "Lau na tano ta name hoia, bona bainala itana, basina vasimu." ¹⁹Tau ta ma eto, "Lau na boromakau rua-rua iboudiai laima na hahoidia, be do balaomu baina tohodia. Lau na basina vasimu." ²⁰Dounu ma ta eto, "Lau na hahine ta name adavaia una dainai basina vasimu." ²¹Bena hesiai merona ese ini hereva iboudiai na biaguna eha-maorolaia. Biaguna na e badu bona hesiai merona e hamaoroa eto, Aola haraga ariara ai bona hanua daladia bona ologami taudia, ima heveri, ae heveri taudia, bona mata kepulu taudia bona ae doko taudia iboudiai ba mailaidia baema. ²²Bena hesiai merona na eto, "Biagugu e, o hamaorogu kara vada name karaia bona ruma lalona na dounu mai helai gabuna." ²³Bena hesiai merona na biaguna ese e hamaoroa eto, "Aola, atai daladia bona henu daladialai taudia iboudiai ba hamaorodia baema bame vareai bona ina ruma na bame hahonua. ²⁴Badina lau ese na hereva henimuimu unu na vavedia guna taudia ese egu aria anianina basie mamia diba. ²⁵Hari taunimanima hutuma na ia ida e laova, bona ia na e gini hegiro bona e hamaorodia, eto, ²⁶bema tau ta na lau dekegu do bainema dainai, to ia na tamana bona sinana, bona adavana, bona natuna, bona tadina bona taihuna bona sibona ena mauri danu, iboudiai asine dadaraidia, ia na dia lauegu hahediba merona. ²⁷Tau ta ese sibona ena satauro baine huaia bona murigu ai baine raka ia na dia lauegu hahediba merona. ²⁸Badina be umui daika na o uramu kohoro ta baine haginia, to guna ia na asine helai bona ikarana davana na se haeroa - ia dekenai na hegeregere ela bona baine hagugurua diba, a?" ²⁹Benaini, ia ese una kohoro ihadaina gabua vada e karaia bona vada asine hagugurua bona taunimanima ese baitaia bona bae kirikiri-lai." ³⁰Idia ba hereva baeto, "Ina tau ese ina ruma na e karaia matama, to asine ha gugurua. ³¹Eiava hanu pavapavana ta ma tuari dainai hanua pavapavana ta ida bae hebou tamona, basine helai bona baine haeroa ia ena tuari taudia daha gwauta be kahana tuari taudia daha - ruahui do baine tuari henidia diba eiava?" ³²A bema lasi neganai, idia na dounu dadaudau lalonai, ia na ena memero ore na baine siaidia bae maino herevana bae karaia. ³³Bena una dala tamonai umui na ini gau iboudiai basio kahudia-nege neganai, umui na dia lau egu ahediba memero. ³⁴Una dainai damena na namo, a bema damena mamina na lasi neganai aniani ena ihanamonai mamina be dahaka, a?" ³⁵Ia na mai ena gaukara tano enai bona tano anina enai. Idia ese e tahoa lasimu. Mai taiana tauna baine hakala, totona, ia na baine hakaudia.

15

¹Harihari tax gogo taudia iboudiai bona kara dika taudia na e maiva Iesu bae hakala henia. ²A Farasia taudia bona Itorena taudia na e maumau etomava, "Ina tau na karadika taudia e haboudiamu bona ia ida e aniani heboumu." ³Bena Iesu ese ina sivarai hegeregere eha-maorodia. ⁴Edena tau umui padamui ai na mai ena mamoe iboudiai sinahu-ta, bona ta bema raka boio, unu mamoe taurahanita-ahui taurahani-ta na tano gagaena ai basinema rakatanidia bona e raka boio mamoe na murina amo basinema tahu diba ela bona baine davaria, a?" ⁵Bena eha davaria neganai pagana ai baine atoakau, mai moale badana ida. ⁶Ena ruma baine lou henia, bona turana bona dekena taudia baine boiridia baine hamaorodia, "Ai tame moale hebou, badina be egu mamoe ta e raka boio gauna na name davaria." ⁷Na hamaoromuimu danu, guba basileia ai

danu bae moale kara dika tauna ta baine helalokerehai dainai, a hari taurahanita-ahui taurahani-ta kara maoromaoro taudia daidia be asie uramu bae helalokerehai daidiai.⁸Eiava edena hahine na mai ena moni penedia gwauta, bena tamona baine boio, lamepa ta basinema haraia, bena ruma lalona baine daroa, bona baine tahua ela bona bema davaria, a? ⁹Bena baine davaria neganai, una hahine na turana bona dekena taudia baine boiridia hebou baineto, "Ai tame moale, badina be egu pene tamona e boio na vada name davaria." ¹⁰Ina dala tamona, umui na hamaoromuimu, moale na baine bada Dirava ena aneru vairadiai kara dika tauna ta do baine helalokerehai dainai.¹¹Bena ma eto, "Tau ta natuna na rua, ¹²bona tau muritai na tamana eha maoroa, "Tamagu e, lau egu kohu o karoaia gauna na ba henigu." Bena tamana ese ena kohu na eha-pararaia idia raruosi ediai.¹³Dina dia momo muridiai tau muritai na ena kohu iboudiai e abidia bona ela hanua daudauna ta, bona unuseni ai ena kohu iboudiai eha oredia ena lebulebu maurina ai. ¹⁴Hari ena kohu iboudiai e ore neganai, doe badana ta e kau una gabu ai e noinoiva ena ogogami lalonai,¹⁵bona ela una hanua tauna ta enai eha gaukara, bena e siaia boroma baine ubudia gaukarana e henia. ¹⁶Ia na e urava boroma e ubudia aniani dia baine anidia, ta ese danu ana aniani se heniva.¹⁷A ia na sibona lalona e parara, eto,"Lau tamagu enai e gaukaramu hesiai taudia na momo bona mai adia aniani, a lau be iniseni ai noho, hitolo ese be hamasegumu! ¹⁸Lau na baina tore-isi bona tamagu dekena bainala bona baine hamaoroa bainato, "Tamagu e, lau na vada na kara dika Guba tauna vairanai bona oi vairamu ai. ¹⁹Lau na dia hegeregere oi natumu ai ba halaogu, avabigu emu hesiai tauna ta ai ba halaogu mai davagu."²⁰Bena ia na e tore-isi bona tamana dekena ela. A ia dounu daudau lalona amo tamana e roha lao bona e itaia bona e bogaiahisi bona e heau henia, e rosia bona eha-rahua. ²¹Bena mero ese tamana eha maoroa eto, "Tamagu e, lau na kara dika Guba tauna bona oi vairamu ai. Lau na dia hegeregere oi natumu ai ba gwauraigu."²²A tamana ese ena hesiai memerodia eha maorodia, "Dabua namona ta a mailaia haraga ba hahedokilaia, bona imana gauna ba karalaia, bona tamaka ta ba hakaralaia aena ai. ²³Boromakau natuna ta ba alaia, ba mailaia bona baita ania bona baita moale! ²⁴Badina be ina lau natugu na e mase, hari ia na e mauri, ia na e boio, bona harihari ma tame davaria." Bena iboudiai e moale.²⁵Hari tau natuna roboana na imea ai. Ruma e raka henia kahiva ai, ane regedia e kamona bona e mavaruva. ²⁶Bena hesiai merona ta e boiria bona e henanadai ina be dahaka e varamu. ²⁷Hesiai merona ese eha maoroa, "Oi tadimu na ema bona tamamu ese boromakau natuna na eme alaia badina be eme davaria lou mai namona ida. ²⁸A tau guna na e badu bona asine ura baine raka vareai, bena tamana na e raka lasi bona tau guna na e noia. ²⁹To tau guna ese tamana e haere henia eto,"Aitaia, lagani momo oi emu ai name gaukara, bona emu taravatu ta asina makohia, a oi ese nani natuna ta do se henigu bamogu ida baiama moale, ³⁰a ina natumu na ema hari oi ese o henia kohudia iboudiai vada e peta-petalai ariara hahinedia ida, bena boromakau natuna ta na ome alaia ia dainai.³¹Bena tamana ese eha maoroa eto, "Natugu, oi na nega iboudiai lau ida, bona lau egu gau iboudiai na oi emu. ³²A ina na maoro baita aniani bona baita moale, badina ina tadimu na e mase, a hari eme mauri, bona e boio ina hari matame davaria."

16

¹Tesu ese ena hahediba ma e hereva henidia, eto, "Taga tauna ta na mai ena kohu ireguna tauna, bena ia enai haida ese e habadelaia eto, emu kohu na e petapeta-laiamu. ²Bena taga tauna ese e boiria, bena e hereva henia, eto, "Dahaka name kamona emu kara amo?" Emu heregu karadia herevadia ba hamaorogu, badina oina vada ba doko.³Bena hari kohu ireguna tauna lalona e hadaia, eto, Dahaka baina kara, biagugu ese ina dagi vada eme kokia egu amo? Lau na asi goadagu tano iruhanai, bona lau na hemaraimu baina noinoi. ⁴Mai dibagu dahaka baina kara, bema baine kokigu egu dagi amo neganai, taunimanima ese bae abigu dae edia ruma ai.⁵ABena ia ese biaguna enai e abitorehai taudia e boiridia, ta e nanadaia eto, "Emu abitorehai be hida? ⁶Ia eto, "Dehoro kavabu sinahu-ta." Bena e hamaoroa eto, "Emu abitorehai pepana avabia, bena a helai diho haraga bona imahui ba torea." ⁷Bena ta ma e nanadaia, eto, bona oi emu be hida? Ia eto, "Uit puse sinahu-ta." Bena eto, emu abitorehai pepana avabia, bona ba torea taurahani-ahui.⁸Bena Lohiabada ese kohu ireguna tauna mai koikoina e hanamoa badina be ena kara e karaia mai lalo-pararana ida. Badina be ina nega uruna taudia edia laloparara ese diari taudia edia laloparara e hereadiamu. ⁹Na hamaoromuimu, sibomui ba hetura heheni kohu dikadia amo, bona ba dabu neganai oi na basie ore rumadia ai bae abimui dae.¹⁰Gau maragina e karaia maoromu tauna ese gau badadia baine kara maoro, a gau maragina e karaia kereremu tauna ese gau badadia baine kara kerere. ¹¹Bena una dainai gau dikadia basio regu namonamo, daika ese kohu namodia baine henimu? ¹²Bona bema oi ese taunimanima idaudia edia kohu basio regu namonamo daika ese umui emui kohu baine henimu.¹³Hesiai tauna ta biguna rarua isiaidia basine lao heni diba, badina ne ta baine inai henia ta be baine lalokau henia, eiava ta baine badinaia, ta baine dadaraia.¹⁴Farasia taudia, moni e ura henia badamu ese una hereva e kamonaia neganai e kirikirilaia. ¹⁵Bena ia ese e e gwau henidia, eto, "Umui na taunimanima vairadiai sibomui o heimodai hehenimu, to Dirava ese lalomui e dibadidiamu. Badina be taunimanima ese e imodaimu gaudia na Dirava ese e dadaraidiamu.¹⁶Taravatu bona peroveta taudia edia hereva e miava ema bona Ioane ena nega. Una negana amo Dirava ena basilea e harorolaiaimu bona taunimanima iboudiai e didi vareaimu. ¹⁷Guba bona tanobada bae boio na mai dalana, a taravatu ena toutou ta baine boio na asi dalana.Adavana e hadihoamu bona hahine ta e adavaiaimu tauna na heuda-hanai tauna, bona e hadihoa hahinena e adavaiaimu tauna danu heuda-hanai tauna. ¹⁸Taga tauna ta e nohova, dabu kakakakadia bona aukadia e hadokilaiva bona dina iboudiai ai e moaleva bona aniani namo dia mo e aniva. ²⁰Ena ruma iduaranai noi-hegama tauna ta ladana Lasaro e hekureva tauna be toto ese e dudua hegege. ²¹Ena ura be taga tauna ana aniani momorudia bema ani. Sisia danu ela ia totona e demariva.²²Noi-hegame tauna vada e mase. Bena aneru ese eabia Aberahamo dekena e laohaia. Taga tauna danu vada e mase bona e guria, ²³mase gabuna ai, hisi eaniva lalonai, matana e roha dae daudauna ai bona

Aberahamo e itaia, Lasaro danu ia ohena ai.²⁴Bena e tai lolo eto, "Tamagu Aberahamo e, mani a bogagu hisi Lasaro a siaia, imana kwakikwakina ranu ai aine urua diho malagu mo ai name hagavea badina be lau na ina lahi hururu-hururuna ai hisi na animu.²⁵To Aberahamo eto, natugu e, a laloa o mauriva dinadia ai gau namodia o abiva bona Lasaro na gau dika dia e abiva, harihari ia na tauhala e abimu, a oi bona hisi o animu.²⁶Ina danu ita padadai koupa badana ta mia bona ene amo ta ini basine vasimu bona ene amo ta ini basine maimu.²⁷Bena Taga tauna eto, Tamagu e na noimumu ia na basiaia tamagu ena ruma bainela -²⁸Badina be tadikakagu na laima - ia ese baine hadibadia ina hisiani gabuna baema na garina.²⁹A Aberahamo eto, Mose bona peroveta taudia na dekediala ai, idia hari bae kamoni henidia.³⁰Ia eto, lasi Aberahamo Tamagu e, mase amo ta dekediala bema lao hari bema helalokerehai.³¹A Aberahamo eto, lasi idia na Mose bona peroveta taudia basiema kamoni henidia, mase amo ta bema tore isi danu basiema kamoni henidia.Translation done by: Ret/Dkh. Ori. C. Kohu on Friday (21/07/23), time: 12 10 am. Ready for quality checking.

17

¹Bena Iesu ese ena hahediba eha maorodia eto, "Hekwakwanai gaudia na do bae vara, to bae havaradia tauna hari madi ihabaina!²Ia enai namona na nadi metauna ta aiona bema gui laia bona davara ai bema tahoa dobi dia namo ia ese ini maragi-maragina ta baine hahekwakwanaia.³Sibomui ba henahuatoho. Bema tadikakamu na e kara dikamu, ba gwau henia; bona bema ia na e helalo-kerehai, ena dika na ba gwau-tao.⁴Bema ia na oi e kara dika henimu nega hitu dina ta ai, bona nega hitu oi baine lou henimu, be tomamu, "Vada name helalokerehai" Oi ese ena dika ba gwau-tao."⁵Apostolo taudia ese Lohiabada e hamaoroa eto, "Emai abidadama ame habadadia."⁶Lohiabada vada eto, "Bema emui abidadama na sinapi nadinadina na heto, umui ese ina budoa ba hamaoroa, 'Ba heraga isi, bona davara ai ba hehado," bona ia na oi be kamoni henimumu."⁷A umui daika, mai emu hesiai tauna ta tano iruanai eiava mamoe iregudiai, gabuna amo baine lasi na ba hamaoroa baoto,⁸Ina harihari aoma bona pata ai bame helai diho? ⁸(Kahanai) Lasi, ia ini basine gwau toma, 'Gau ta a hahegaegaea lau ese baina ania, bona emu dabua beletana arioa bona isiaigu ba laoheni lau na anianimu bona na inuimumu lalonai, bona ini gau muridiai oi na vada bo anianimu bona bo inuimumu, a?⁹Ia na asi ena tanikiu hesiai tauna enai badina be ia na e hamaoroa karadia e kara dainai, ani? ¹⁰Ina na hegeregere umui emu ai danu, bema umui na e hamaoromui gaudia iboudiai vada o karadia neganai, umui na baoto, "Ai na dia hesiai taudia namodia. Ai na dahaka baia kara gaudia mo ame karadia."¹¹Ia na Ierusalem e dae laova ai, ia na momokani Samaria bona Galileia padadia amo e hanai. ¹²Ia na hanua ta ai e vareaiva ai, lepera tataudia gwauta ese e hedavari henia. Idia na daudaunai e gini, ¹³bona gadodia eha bada, e tomava, "Iesu, Biagumai e, ame bogamai hisi."¹⁴Ia ese e itadia neganai, (ia ese) e hamaorodia eo, "Aola emui helaga taudia ese bae itamui." bona vada e vara, idia dala amo e laovai, idia tauanidia vada e goeva. ¹⁵Bena idia taudia ta, e diba ia na vada e namo, e lou ema, mai gadona badana ida Dirava e e hanamoava. ¹⁶Ia na e hetuitui Iesu aena badinai, e tanikiu henia. Ia na Samaria Tauna.¹⁷Bena Iesu e haere bona eto, "Una be dia gwauta osi eme hanamodia, a? A taurahani-ta be edeseni? ¹⁸Una na ta asie loumai Dirava bae imodaia, ina idau bese tauna sibona mo, a? ¹⁹Bena ia ese e hamaoroa eto, 'Atore-isi bona aola. Emu abidadama ese vada eme hanamomu.²⁰Farisea taudia ese e nanadaia eto, Dirava ena Basileia be edena nega do bainema, ia ese e haere henia eto, "Dirava ena Basileia na dia ita eda nari namonamo amo do bainema. ²¹Eiava dia baeto, 'Aitaia gauna oina!' eiava, 'Gauna ouna! Badina aitaia, Dirava ena Basileia na umui bogaragimui ai."²²Bena ia ese hahediba taudia e hamaorodia eto, "Dinadia na e maimu bona umui na ouramu Taunimanima Natuna ena dina ta baitaia neganai, a umui ese na basio itaiamu. ²³Bena idia ese bae hamaoromui baeto, Unu a rohalao! eiava ini a rohamai! Basio raka lasi eiava muridia ai basio heaukau, ²⁴badina kevaru diarina guba kahana amo guba kahana elaomu hegeregere, Taunimanima Natuna enai danu unu baine heto. ²⁵A ia na guna gau momo ai do baine hisihisi bona ina uru taudia ese do bae dadaraia. ²⁶Noa ena negai vada e vara hegeregere, Taunimanima Natuna enai danu ini do baine vara toma. ²⁷Idia be e anianiva, idia be e inuinuva, idia be e headavava, e headava heheniva - ela bona Noa lagatoi lalonai e vareai dinana, bona abata e kau bona iboudiai eha-buadia-tari. ²⁸Lota ena negai vada evara hetomana - idia be e anianiva, idia be e inuinuva, idia be e hoihoiva, idia be e hadohadova, idia be ruma e karava, ²⁹a una dinai Lota ese Sodoma e rakatania neganai, lahi mai siahua mase-masena guba amo e diho bona iboudiai e habuadia-tari. ³⁰Ina evara hegeregere danu Taunimanima Natuna ena hedinarai neganai na unu baine vara toma. ³¹Una dina ai, tau ta ruma guhinai bona ena kohu na ruma lalonai, na basio hadihoia ena kohu baine abidia oho; bona murimuri tauna danu, unu hetomana basio haloumai. ³²Lota adavana ba laloa. ³³Daika e hetahumu ena mauri baine abia, na baine reaia (ha boioa), a daika ese baine reaia (haboioa), na baine davaria. ³⁴Na hamaoromui, una hanuaboi ai taunimanima rarua na geda tamoni bae mahuta. Ta be baine abia, a ta be baine hoho. ³⁵Hahine rarua be uiti iririlaina nadina igirona gabunai. Ta bae abia-oho, a ta be baine noho. ³⁶Tatau rua uma ai bae gaukara ta baine heabi oho, ta be baine noho. ³⁷Bena idia e haere bona e hamaoroa eto, "Edeseni ai, Lohiabada? Ia ese e hamaorodia eto, "Tauani edeseni ai, galo danu unuseni ai do ba hebou."

18

¹Bena ia ese palabore ta e hamaorolai henidia, ede bae guriguri toma bona lalodia basie manoka, ²e tomava , hanua ta lalonai na hahemaoro tauna ta, ia na Dirava garina se gariva bona taunimanima se matauraidia. ³Una hanua lalonai na vabu ta; ia na una tau dekena emai loulouva bona e gwauva, 'Lau e dagedage henigumu tauna na a hahemaoro henia. ⁴Una tau na nega daudau lalonai se urava, to ini gau muridiai, ia na sibona e hereva, eto, 'Ena be lau na Dirava garina asi na garimu bona taunimanima asi na matauraidiamu, ⁵ina vabu ese lau e hahekwakwanaigumu dainai lau ese hahemaoro

ia baina henia bona ia ena mai loulou ese lau basine hamanoka-manokagu.⁶Bena Lohiabada, eto, "Ina hahemaoro tauna ena hereva a hakalaia? ⁷Dirava ese ena abihidi taudia , e tai boimu, e tai ranimu taudia, daidiai hahemaoro basine mailaia? Ia baine halahe daudau idia edia ai? ⁸Na hamaoromuimu, ia ese hahemaoro na baine mailaia haragaharaga. Benaini, Taunimanima Natuna bainema neganai, ia ese tanobada latanai abidadama baine davaria diba?⁹Bena ia ese ina palabore ma taunimanima haida e gwaurai henidia; ini taunimanima na sibodia lalodiai e gwaumu idia na mamaoro-mamaoro bona taunimanima haida idia ese e hadikadiava, eto, ¹⁰Tatau rarua na dubu helaga ela, bae guriguri totona - tau ta be Farasia tauna tau ta be tax gogo tauna. ¹¹Farasia tauna na e gini bena sibona dainai e guriguriva e tomava, 'Dirava na hanamomumu badina lau na dia taunimanima haida hegeregeregia - henao taudia, kara kerere taudia, heudahanai taudia - eiava dia ina tax gogo tauna danu. ¹²Lau na anivagamu nega rua pura ta lalaonai. Egu davari gaudia iboudiai karoadia gwauta lalodia amo karoa ta na henimu.¹³To tax gogo tauna na dahuai gini, matana danu se roha isi guba se itaia, tokemena e tutua e gwauva. "Dirava e karadika tau, a bogagu." hisi ¹⁴Na hamaoromuimu, ina tau e lou ena ruma lalona maoromaorona ida, to dia hari tau ta,badina daika sibona e heabi isimu tauna na do bae hamanaua, to daika sibona e hahemanaumu na basine vareai unuseni ai."¹⁵Taunimanima na natudia karukarudia e mailaidiava ia dekena, ia ese baine daudia toho totona, to diba-tahua taudia ese e itaia neganai, e gwautubu henidia. ¹⁶To Iesu ese maragidia e boiboilaidia, dekena baema, e gwauva. "Maragidia na a mailaidia dekegu, asio laodia-ahu. Badina be Dirava ena basileia na ene hetomadia edia. ¹⁷Na hamaoromui momokanimu, daika ese Dirava ena basileia basine abiadae ini maragidia na heto, taunimanima na basine vareai unuseni ai."¹⁸Ma lohia tauna ta ese e nanadaia, e gwauva, ahedibadiba tauna e, lau be dahka baina kara bena mauri hanaihanai baina abia? ¹⁹Iesu ese e haere henia eto, "Dahaka dainai lau o gwauraigumu namo? Lasi, ta dia namo, Dirava sibona mo. ²⁰Taravatu na mai dibamu - basio heudahanai, basio ala-ala, basio henaohenao, basio habade koikoi, sinamu bona tamamu ba matauraidia." ²¹To lohia tauna eto, ini gau iboudiai vada na badinadia eregabegu negana vaitani."²²Iesu ese ena hereva e kamonaia neganai e hamaoroa, eto, 'Gau tamona mo doini o dabumu, Emu kohu iboudiai na ba hoihoi laidia, bona ogogami taudia ba harihari henidia bona guba kohuna bavabia - bena baoma murigu ai bame raka. ²³A ia ese una hereva e kamonaia bena lalona e hisihisi bada, badina ia na taga tauna. ²⁴Iesu ese e raraia, eto, taga tauna na Dirava ena basileia lalonai na bae heloge. ²⁵Kamelo na kobi matunai e vareaimu be haraga, taga tauna na Dirava ena basileia ai baine vareai na mai hekwarahina ida. ²⁶E kamonaia taudia eto, "Be daika mauri baine davaria?" ²⁷A Iesu eto, taunimanima ese ikaradia asi dibadia gaudia na Dirava ese baine karadia diba. ²⁸Petero eto, ai na emai gau iboudiai vada a rakatani, oi vada a gavamu. ²⁹Ia ese e hamaorodia, eto, na hamaoromui momokanimu, ruma eiava adavana eiava tadikakana eiava tamana eiava sinana eiava natuna Dirava ena basileia dainai vada e rakatani. ³⁰Ia na ina negai gau momo be abimu, bona nega gabenai danu mauri hanaihanai baine abia. ³¹Ia ese gwauta raruosi e hakaudia siri, e hamaorodia eto, ita na Ierusalem ta dara daemu, unuseni ai peroveta taudia ese Taunimanima Natuna sivaraina e tore guna herevadia na iboudiai anidia do bae vara. ³²Badina be ia na idau bese taudia ediai taona do bae torea bae gonagonalai, bae hihiraia, bae kanudia. ³³Bae dadabaia, bae alaia mase, dina toi murinai ma baine toreisi lou. ³⁴Ina idoinai na asi dibadia. Hereva e kamonaia to lalodia na asie parara' ia ese e gwaurai herevadia anidia na asie davari. ³⁵Ia na Ieriko e raka henia kahi. Mata kepulu tauna ta dala isenai helainai e noi hegameva. ³⁶Hutuma dala amo e laova regedia e kamonaia, bena e henanadai, rege anina be dahaka? ³⁷Idia ese e hamaoroa, eto, Iesu Nasareta tauna e raka hanaimu. ³⁸Bena ia na e boibo eto, Iesu Davida Natuna e, ame bogagu hisi. ³⁹Vairai e raka taudia ese e gwau henia, basine hereva eto, to ia na e boi lalo-dika eto, Davida natuna e, ame bogagu hisi. ⁴⁰Bena Iesu vada e gini, eto, A hakaua mai. E raka kahi lao, bena Iesu e nanadaia eto, ⁴¹Dahaka emu ai baina kara? Ia eto, Lohiabada e, matagu boma hapapa. ⁴²Iesu eto, Matamu be papamu emu abidadama ese vada e hamaurimu. ⁴³Matana vada e papa, bena Iesu murinai e raka Dirava e imodaia. Una kara e itaia taudia iboudiai ese Dirava e hanamoa.

19

¹Iesu na Ieriko amo e raka hanaiva lalonai, ²Tau ta ladana Sakaio, bona ia na tax gogo taudia biagudia ta, bona ia danu taga tauna. ³Ia na e ura dikadika Iesu baine itaia, ia be daika, to hutuma daidiai se itaia, badina ia na kwadogi. ⁴Bena e heau guna ela budoa ta ai e hadae baine e itaia, badina Iesu na una dala amo bainela. ⁵Iesu na una gabu ai e kau, e roha dae bena e hamaoroa eto, "Sakaio e, a diho haraga, badina be hari dina emu ruma ai baina noho." ⁶Bena e diho haraga-haraga bena e abia dae mai moalena ida. ⁷E itaia taudia iboudiai ese e maumauraia, eto, "Ia ese dika rohoroho tauna e vadivadi heniamu."⁸A Sakaio e gini bena Lohiabada e hereva henia eto, "A itaia, Lohiabada e, egu kohu kahana na ogogami taudia aina henidia, bona ena kohu vada na abikava tauna na, nega hani baine henia lou." ⁹Bena Iesu ese e hamaoroa eto, "Harihari hahemauroi na ina ruma ai vada eme kau, badina be ia danu Aberahamo natuna. ¹⁰Badina be Taunimanima Natuna na boio taudia itahu dia bona ihamauridia totona ema. ¹¹Bena e kamonaiva taudia na, Iesu ese palabore hegeregeregia ta ma e hamaorodia, badina be Ierusalem vada e kahira-kahira, bona idia banava eto Dirava ena basileia una negana ai baine hedinarai. ¹²Una dainai ia eto, "Lohia ta hanua daudauna ela pavapava dagina baine abia bena ma baine lou. ¹³Bena ena hesiai taudia gwauta e boiridia, gold monidia ladadia mina ta ta amo e henidia bena eto, 'Ba hoihoilai ela bona lau baina lou mai.' ¹⁴To ena hanua taudia ese e lalodika heniava bena hesiai haida ia murina amo e siaidia, baeto 'Ai na asia uramu emai pavapava ai bainela. ¹⁵Hari pavapava dagina eabia, bena e lou, moni e henidia taudia e boiridia, edia hoihoi ai e davari gaudia baine diba dia. ¹⁶Gini-gunana ema vairana bena eto, 'Biagugu e, emu moni tamona amo moni gwauta vada na davari.' ¹⁷Ia ese e hanamoa eto, 'Namo herea, hesiai taumu namona badina be gau maragina o balaiaheni namonamo dainai, hanua gwauta lohiaida ai baola. ¹⁸Iharuana danu ema, Biagugu e, emu moni

tamona amo moni ima vada na davari.' ¹⁹Bena ia eto, hanua ima lohiadia ai baola. ²⁰Tama ema eto, Biagugu e, emu moni tamona binai, dabua ai na kumia na balaia heni, ²¹badina be oi garimu na gariva, oi na gwautora taumu. So atoa diho gauna o abia isimu, bona so hadoamu gauna o utuamu. ²²Ia eto, sibomu emu hereva amo baina hahemaoro henimu, oi na hesiai taumu dikana! Oi na dibamu lau na gwau-tora taugu, asi na toa dobi gauna na abia isimu, bona asi na hadoa gauna na utuamu? ²³Matogana edeheto egu moni na balaheni (banka) gabuna ta ai so atoa, bona bama loumai, bama abilou mai ato-kauna ida? ²⁴Bena dekenai e gini taudia e hamaorodia eto, 'Enai moni na avabihaia, moni gwauta tauna ba henia.' ²⁵A idia eto, 'Biagumai e, ia na mai ena moni gwauta. ²⁶Na hamaoromuimu, mai ena gau tauna na gau momo bae henia, to asi ena gau tauna enai sina miana gauna do bae abihaia. ²⁷A lau inaigu, asie urava baina lohiadia taudia, a mailaidia vairagu ai bavaladia mase. ²⁸Unu hereva muridiai, e gunalaidia, Ierusalem ai eha dara dae. ²⁹Ia na e raka lao Betefage bona Betania, Olive ororona, bona ena hahediba rarua e siaidia, ³⁰eto, "Vaira hanuadia aola." Ba raka vareai gabuna ai, doniki natuna ta hemata-kauna ai ba itaia latanai ta do se helai kau. Ba ruhaia ba mailaia. ³¹Bema ta ese baine nanadaimu, 'Dahaka dainai o ruhaiaimu?' Umui baoto "Lohiabada ese e ura heniamu." ³²E siaidia taudia na vada ela e hamaorodia hegeregereenai vada e davarai. ³³Idia ese doniki natuna e ruhava ai, doniki biaguna ese e nanadaidia, eto, "Dahaka dainai doniki natuna o ruhaiaimu? ³⁴Idia eto, "Lohiabada ese e ura heniamu." ³⁵Idia ese Iesu dekena e laohaia, bona edia dabua latana ai e laha bona Iesu e helai kau. ³⁶E laova ai, idia ese edia dabuana dala ai e laha. ³⁷Hanua vada e kahikahi Olive ororona e hekiva ai hahediba hutuma bada e koale hisidae, Dirava e imodaia mai lolidia ida e itava karadia siahudia iboudiai daidiai, "Aita hanamoa ³⁸Etomava, hanua pavapavana Lohiabada Idana ai e maimu! maino guba ai baine bada bona heimodai guba doriva-dorivana ai. ³⁹A Farisea taudia haida ese hutuma bogaragidia amo e hamaoroa, eto, "Hahediba taumu e, emu hahediba a gwau henidia." ⁴⁰Iesu ese e haere henidia eto, "lau na hamaoromuimu bema idia na asi regeregedia ini nadi bema lolo." ⁴¹Iesu na e raka kahira hanua e itaia, bona e tai henia, ⁴²eto, "Bema hari dina ai boma diba, madi, emu maino badina bema namo! to matamui amo vada e hehuni. ⁴³Badina be negana do baine ginidae oi inaimu ese tano bae larebaia, bae komu hegege, bona bae gugubamu kaha iboudia ai amo. ⁴⁴Tano ai bae kohumu tao bona natumu danu bae kohudia tao idia ese nadi ta nadi ta basine mia latamui ai, badina be asi dibamu ivadivadimu negana." ⁴⁵Bena dubu helaga ai e raka vareai, hoihoi taudia e luludia lasi, ⁴⁶e gwau henidia eto, "Vada e torea, 'Egu ruma na guriguri rumana, to umui ese dadidadi taudia edia kohu ai ome halaoa. ⁴⁷Iesu na dina iboudia ai dubu helaga lalonai e hahedibava. Hahediba taudia bona Itorena taudia bona hanua tau badadia ese ialana dalana e tahuava, ⁴⁸to dala ta asie davarai, badina be taunimanima iboudia ai na ia ikamonaina e urava.

20

¹Dina ta ai ia na dubu helaga lalonai e hahedibava sivarai namo e harorolaiava, bona hahelaga taudia bona itorena taudia bona tau-badadia ia dekena ela. ²E hereva henia, eto, "Mani a hamaoromai edena siahui ai ini gau o karamu? Eiava daika ese ina siahui e henimu. ³Bena ia ese haere henidia, eto, Lau danu mani umui henanadai, ta aina nanadailaimui, bona ba hamaorogu. ⁴Ioane ena bapatiso: be guba amo eiava taunimanima edia amo? ⁵Bena sibodia e hereva heheni eto, "Bema ita baitato, 'guba amo, 'Dahaka dainai so hamomokaniamu? ⁶A baitato "taunimanima edia amo? taunimanima iboudia ai ese nadi amo be hododamu, badina be idia na etomu Ioane na peroveta tauna. ⁷Una dainai idia ese e haere henia eto, ai na asi dibamai ia be ede amo. ⁸Bena Iesu eto, "O lau danu dahaka siahui ai ini gau na karalaimu na basina hamaorolaimuimu." ⁹Bena ia ese palabore ai e hereva henidia matama, "A tau ta ese vine imeana e hadoa, bona imea ireguna taudia eha-badinalaidia, bona hanua ta ela nega daudau e noho. ¹⁰Huahua negana ai (horana) hesiai tauna ta e siaia lao imea ireguna taudia dekedea, vine anidia baine abi, to imea ireguna taudia ese e dadabaia, bona e siai oho ima-kavakavana ida. ¹¹Bena hesiai tauna ta ma e siaia, to idia ese e dadabaia, e hahemaraia, ma ima kavakavana e haloua. ¹²Ihatoina danu e siaia, to ia danu ma e haberoa bona murimuri ai e tahoa lasi. ¹³Bena imea biaguna eto, Lau be ede baina kara toma? Lau natugu egu lalokau, hari baina siaia. Reana baitaia bae matauraia. ¹⁴To imea ireguna taudia ese e itaia, sibodia e hereva heheni eto, Dihina binai. Ai ta alaia mase, bona imea na baita abia ita eda. ¹⁵Bena e tahoa lasi imea lalona amo bona e alaia mase. Imea biaguna be ede baine kara toma idia edia ai? ¹⁶Ia na bainema bona imea ireguna taudia baina aladia, Vine imeana haida baine henidia." A idia na e kamoni, bona eto, "Lasi dia unu heto." ¹⁷A Ziesu ese e raraidia, bona eto, Buka ai torea herevana anina be dahaka? Ruma ikarana taudia ese e dadaraia nadina na daiguni nadina ai vada ela? ¹⁸Una nadi latanai baine moru tauna na baine makohi rohoroho. A una nadi ese baine kurea tao tauna na baina hapataia. ¹⁹Itorena taudia bona hahelaga taudia ese idabai-taona e ura una horana ai, badina idia dibadia una sivarai hegeregereena matana be idia ediai. ²⁰Bena e itaia tao, dibaka taudia e siaidia kara maoro-maoro taudia na heheto, bae nanadaidia ena hereva amo bae idoaia bona gavana imanai bona siahuna ai bae henia eto. ²¹Idia ese e nanadaia eto, Hahediba taumu e, ai dibamai emu hereva bona emu hahediba na mamaoro-mamaoro bona taunimanima oromadia so lalomu, a Dirava ena dala o hahedibalaia goevagoevamu. ²²Ina be maoro ai ese Kaisara ena tax baia heni, eiava lasi? ²³A Iesu na edia koikoi dibana, bona e haere eto, ²⁴Siliva monina ta ba haheitalaigu. Ina be daika laulauna bona ladana? Idia eto, Kaisara. ²⁵Bena ia eto, Una dainai Kaisara ena, Kaisara ba henia, Dirava ena, Dirava ba henia. ²⁶Bena aru taudia vairadia ai ena hereva amo e idoaia, ena haere e hoalaia, asi edia hereva ta. ²⁷Bena Sadukea taudia haida ia dekena ela: una oreka e tomava mase na basie tore isi lou, bona e nanadaia eto, ²⁸Hahediba Taumu e, Mose ese emai taravatu e henimai eto, "Tau ta baine mase bona vabuna baine noho asi natuna, vabu na ihana ese baine adavaia natuna baine havara mase tauna ena, ²⁹Unuhetomana tadikaka hahitu e nohova, bona tauguna ese hahine ta e adavaia, vada e mase, asi natuna. ³⁰bona iharuana, ³¹bona ihatoina ese adavaia; ela bona hahituosi ese vada eabia iboudia ai asi natudia, bona e

mase.³² Gabe amo hahine danu vada e mase.³³ Toreisi lou negana ai una, na daika adavana? Badina be hahituosi ese e adavaia.³⁴ Iesu e haere eto, ina nega (uru) taudia ese hahine eabimu bona e headavamu.³⁵ A do baema taudia na kara maoromaoro ai mase amo bae toreisi lou, na bae headava eiava basie headava;³⁶ bona basie mase lou, idia na aneru ida bae hegeregere; bona Dirava natuna ai baela, badina be idia na toreisi lou taudia.³⁷ A mase amo e toreisi lou, Mose ese uda ai e haheitalaidia, ia ese Lohiabada vada e gwauraia Aberahamo ena Dirava, bona Isa'ako ena Dirava, bona Iakobo ena Dirava.³⁸ Harihari ia na dia mase Diravana, to mauri taudia edia, badina be taunimanima iboudia ai na ia dainai e maurimu.³⁹ Itorena taudia e haere, eto, "Hahediba taumu e, hereva maorona bona."⁴⁰ Bena unu amo gauta asie henanadaialaia lou.⁴¹ Bena Iesu ese e nanadaia eto, "Edeheto idia na e tomamu Keriso na Davida natuna?"⁴² Badina Davida na sibona Salamo lalonai eto, Lohiabada egu Lohia e hamaoroa eto, 'Idibagu kahana ai ba helai,⁴³ ela bona inaimu iboudiai na oi aemu ihadaidia gaudia ai baina halaodia.'⁴⁴ Davida una daina Keriso 'e gwauraia Lohiabada,' O ede heto ia na ia (Dirava) natuna?"⁴⁵ Hari (Bena) taunimanima iboudia ai na e kamonaiva, ia ese ena hahediba e hamaorodia eto,⁴⁶ "Itorena taudia nahuadia ba toho, idia na e uramu dabua latadia bae rio, bae raka loa, bona e uramu hahenamo hereadaedia bae henidia hoihoi gabudiai, dubu ai bona anibou ai gabu hereadia ai bae helai.⁴⁷ Idia ese vabu edia ruma eha-ogogamidiamu, bona edia guriguri eha-daudaumu. Idia na dava metauna do bae abia.

21

¹ Hari Iesu na e roha-isi taga taudia e itadia edia harihari gaudia e udadiava moni mauana lalonai. ² Bena e roha-lao ogogami vabu hahinena ta e itaia moni pene rua e udadiho moni mauanai. ³ Bena e hereva eto, "Momokani, lau ese umui na hamaoromuimu ina vabu ese eme udaia monina na idia iboudiai edia eme uda gaudia e hereadiamu. ⁴ badina be edia taga amo harihari gaudia sisidia eme ato. A ina hahine na ena ogogami amo, ia baine maurilaia monina iboudiai eme ato. ⁵ Hari haida na dubu hairai nadidiai eha heraia bona mai herahia gaudia ida e herevalaidiava lalonai ia eto, ⁶ "Ini o itamu gaudia, dinadia na e maimu nadi ta na nadi ta latanai, na se makohi nadina latanai basine mia. ⁷ Bena idia ese e nanadaia eto, "Hahediba tauna e, ina be edena nega ai baine vara bona toana be dahaka ini gau do bae vara, a? ⁸ Bena ia eto, "Nahuamui ba toho ta ese basie koimui. Badina be hutuma na do baema lau ladagu ai be herevamu, "Lau na ia" bona "Nega vada eme kahira-kahira. Idia muridiai na basio raka. ⁹ Tuari bona dagedage herevadia ba kamoni negadiai basio gari, badina ini gau na do bavara guna, a ina na dia nega tamona dokona."¹⁰ Bona ia ese e hamaorodia "Tanobada ta na toreamu tanobada ta ida bae inai heheni bona basileia ta na basileia ta ida bae inai heheni. ¹¹ Tano marere badadia bona doe bona daihanai goreredia na bavara gabu ta ta lalodiai. Hahegari karadia bona guba amo toa badadia be varamu. ¹² A ini gau iboudiai do asie vara lalonai umui na do be dabaimui-taumu be dagedage henimuimu, bona be henimui hanaimu synagogue bona dibura ruma, be laohaimuimu hanua pavapavadia bona lohia taudia vairadia badina be lau ladagu dainai. ¹³ Ina na gau ta e henimuimu iha-momokani laimui ai baela. ¹⁴ Una dainai, lalomui na ha hadai, ilao-ahumui herevadia basie ha-hegaegaelai guna, ¹⁵ badina be lau ese hereva daladia bona aonega baina henimui bona inaimui na ilao-ahumui bona igwautubumui na basie kara. ¹⁶ A umui danu do taomui ba tore tamamui, sinamui ese, bona tadimui ese, bona varavaramui ese, bona bamomui ese bona idia ese do bae hamasemui. ¹⁷ Taunimanima ese do bae inai henimui, badina lau ladagu dainai. ¹⁸ Oi kwaramu huina ta basine boio. ¹⁹ Emui haheauka dainai laumamui na bae mauri. ²⁰ Ieruselema ba itaia tuari taudia ese e ginia-hegege neganai bona badiba ia igigi-rohorohona na ema kahikahi. ²¹ Bena Iudea ai e nohomu taudia na bae heau boio ororo baela bona bogaragidiai e nohomu taudia na do bae rakatanidia bona hanua ai asie nohomu taudia na basie vareai. ²² Badina be ina na kara davadia ihaloudia negana, e tore gaudia iha gugurudia. ²³ A unu dinadiai rogorogo hahine bona mararoto hahinedia madi ihabaimui! Badina be dika badaherea ina tano ai bona badu garagara taunimanima latadiai. ²⁴ Idia na dare matanai bae hamorudia, bona haida be bae guidia hanua idau-idau bae laohaidia bona Ieruselema na Idau bese taudia ese bae moia-tao ela bona Idau bese taudia edia nega baine guguru. ²⁵ Toa haida do ba vara dina, hua bona hisiu ai, bona tanobada besedia iboudiai bae kudou hetaha bona bae gari dikadika davara hurehure edia kiriri regediai. ²⁶ Taunimanima na gari ese be haketodiamu, bona tanobadai be varamu gaudia ese, badina be guba siahudia na be heude-heudemu. ²⁷ Bena idia ese Taunimanima Natuna na do bae itaia e maimu ori latanai mai siahu-badana bona hairai badana ida. ²⁸ A ini gau e hekara matamamu neganai, ba gini tore bona vairamu bavabia-isi badina be iruhamui-nege tauna na e mai kahikahimu. ²⁹ Bena ia ese sivarai hegeregere na ta e hamaorodia "Fig (Suke) auna bona au iboudiai aitadia. ³⁰ Tuhutuhudia e varamu negadiai, sibomu ese oi itaiamu lahara negana vada eme kahikahi. ³¹ Unu hetomana danu, umui ese ini gau o itadiamu e varamu neganai, umui na o dibamu Dirava ena basileia na eme kahikahi. ³² Momokani, na hamaoromuimu, inauru na basine ore, ela bona ini gau iboudiai na ba vara. ³³ Guba bona tanobada na bae ore, a lau egu hereva na basine ore. ³⁴ A sibomui ba henahua-toho, bona kudoumui na basie metau, inuimu gaudia, bona kekero daidiai, bona emu noho ai lalomui eha-metauamu lalo hekwarahidia daidiai, bona una dina na asi vanahana emu ai baine kahira. ³⁵ Ido na heto do baine kau ina tanobada ai e nohomu taudia iboudiai latadiai. ³⁶ A ba gima bona nega iboudiai ba guriguri bona unu amo ba goada una dika amo ba roho mauri bona Taunimanima Natuna vairanai ba gini. ³⁷ Bena unu dinadiai ia na dubu helaga lalonai eha-hedibava, bona hanuaboi ai ia na e laova ororo ta ladana Olive ai e nohova. ³⁸ Ina hari ia na taunimanima iboudiai ese emai heniamu daba kahadia ai dubu helaga lalonai ena hereva ikamonaidia.

22

¹Hari se hatubuamu Flaona Ariana, ladana e tomamu Lagau Hanai, vada e kahira-kahira. ²Hahelaga taudia badadia bona itorena taudia ese Iesu ede bae hamasea toma dalana e tahuava, badina idia na taunimanima garidia e gariva. ³Bena Satani na Iuda, ladana Isakariota, vada e boloa, ia na gwauta-rarua tauna ta. ⁴Bena ia vada ela dubu hahelaga taudia bona dubu helaga biagudia e hereva henidia, ia ese Iesu taona ede baine torea toma idia ediai. ⁵Idia vada e moale, bona eha momokania moni ia bae henia. ⁶Bena ia vada eura, bona ia taona itorena dalana vada e tahua matama hutuma edia amo ede baine abia-oho toma idia edia. ⁷Bena Se hatubuamu Flaoana dinana vada e kau, una dinai Lagau-Hanai mamoea ialana na e varava. ⁸Bena Iesu ese Petero bona Ioane vada e siaidia, e tomu, "aola bona ai daimai ai, Lagau-hanai anianina ba hahegaegaea, bona ai ese baia vasi ania. ⁹Bena idia ese e haere henia, eto, "Oi ouramu ai be edeseni ai baia hegaegaea, a?" ¹⁰Ia ese e haere henidia, eto, "Aitala, vada hanua lalonai o vareaimu neganai, ranu utu tauna ta ese baine hedavari henimui. Murina amo baola ia baine vareai rumana lalona ai ba vareai. ¹¹Bena ruma biaguna ba hamaoroa, baoto, 'Hahediba Tauna na oi e hamaormumu e tomu, "Vadivadi iabidaedia edia daiutu be edena, be lau bona egu hahediba ida Lagau-hanai Ariana do baia ania?" ¹²Ia ese atai daiutuna badana mai kohuna ida baine haheita laimui. Hegaegae karadia na unuseni ai bakaradia." ¹³Bena idia vada ela, bona gabuna e davaria ia ese e hamaorodia hegeregere. Bena idia ese Lagau-hanai Ariana vada eha hegaegaea. ¹⁴Horana vada e ginidae neganai, ia na ena apostolo taudia ida pata ai ege-diho. ¹⁵Bena ia ese e hamaorodia, eto, "Lau na egu ura bada ina Lagau-hanai na umui ida baina ania hebou gabeamo lau baina hisihisi. ¹⁶Badina be na hamaormumu, lau ese ina na basina ania ela bona ina na do baine guguru Dirava ena Basileia lalonai." ¹⁷Bena Iesu ese kehere ta eabia, bona e hanamoa, eto "Ina na avabia, bona iboumui ai ese ba inua. ¹⁸Badina na hamaormumu, lau ese ina vine ranuna ma basina inua ina nega amo, ela bona Dirava ena basileia bainema. ¹⁹Bena flaoa eabia, bona e hanamoa, e bitua bona e henidia, eto "Ina na lau tauanigu vada e heni umui daimui. Ini ba kara toma lau ba lalogu. ²⁰E aniani murinai kehere ma eabia, eto, "Ina kehere na herohemaino matamatana lau raragu ai, umui dainui baine hebubu. ²¹A aitaia, taogu itorena tauna imana na lau ida ina pata ai. ²²Badina Taunimanima Natuna na momokani be laomu vada e gwauraia hegeregere. A tauna itorena tauna hari madi ihabaina!" ²³Bena sibodia padadai e henanadai heheniva una be daika ese una kara do baine karaia. ²⁴Bena sibodia padadai hepapa-ahuahu danu e vara, idia be daika bae gwauraia hereadae. ²⁵Bena ia ese e hamaorodia, eto, "Bese idaudia na edia pavapava ese e lohiadimu, bona mai edia siahu taudia na e gwauraidiava?" ²⁶A umui emui ai na dia ini baine vara toma. Bema, daika na hereadae padamui ai na maraki-marakinai do bainela; bona daika e hegunalaimu na do hesiai tauna ai bainela. ²⁷Badina daika be hereadae, pata ai ege dihomu tauna eiava hesiai e laohenimu tauna? Una be dia pata ai ege dihomu tauna, a? To lau na bogaragimui ai hesiai taugu na heto. ²⁸A umui na lau egu hedibagani lalodai lau dekedekugu ai o nohova taumu. ²⁹Lau ese umui na gwaurai henimuimu, hegeregere Tamagu ese basileia ta vada e gwaurai henigu, ³⁰bona unu amo egu pata latanai bavaniani bona ba inuina egu basileia lalonai, bona terona latadai ba helai Isaraela iduhudia gwauta-rua ba hahemaoro henidia. ³¹Simona e, Simona e, aitaia, Satani vada e noinoi umui baine tapomui oho uit na heto. ³²A lau ese vada na guriguri laimui, emui abidadama na basine darere, bona oi, bema boloumu neganai, tadikakamu bame hagoadadia." ³³A Petero ese vada e hamaoroa eto, "Lohiabada e, lau na hegaegae oi ida baitala dibura rumana bona baita mase hebou." ³⁴Ia vada e haere, eto, "lau ese na hamaormumu, Petero, kokoroku do basine tai ina hari dina, oi ese lau ba goregu nega toi oi na asi dibamu lau." ³⁵Bena Iesu ese e hamaorodia, eto, "Lau ese na siaimui lasiva negadia ai, asi emui moni vainadia, eiava kohu uda pusedia, eiava asi emui tamaka, umui na gau ta ai so dabuva, umui be dahaka otomu, a? Bena idia vada, eto, "lasi." ³⁶Bena ia ese e hamaorodiava, eto, "A harihari, ta mai ena vaina, baine abia kau, bona ta mai ena kohu uda pusena danu unu heto. Ta bema asi ena dare ena dabua baine hoidia monidia amo ta baine hoia. ³⁷Badina lau ese na hamaormumu, ina lau sivaraigu vada e toredia na do bae guguru vaitani. Bona ia na kara havara taudia ida vada e duhaidia hebou." ³⁸Bena idia vada eto, 'Lohiabada e, aitaia! Dare ruaosi be ini." Bena ia ese e hereva henidia, eto, "ina na hegeregere." ³⁹Bena e raka lasi, vaevae ena kara Olive ororona ma ela, bona ena hahediba danu ia murinai ma e raka. ⁴⁰Harihari una gabu ai vada e kau neganai, ia ese e hanairiduum etim "Ba guriguri, be hedibagani lalona ai basio vareai." ⁴¹Bena dekedia amo e raka oho e tahoamu nadina ena moru hegeregere, bona e hetuitui e guriguriva, eto, "Tamagu e, bema ouramu neganai, ina kehere na egu amo avabia oho. Vadaeni, dia lauegu ura, a emu ura hari baine vara. ⁴²eto, Tamagu e, lalomu bema hegeregere ina kehere na egu amo boma abia oho; to dia lauegu ura, oiemu ura hari. ⁴³Bena aneru ta guba amo ienai e kau, ihagoadana totona; ⁴⁴a hisihisi bada ese ia lalona e gugubaia, bona e guriguri, goadagoda ela bona varahuna tano ai e moru, rara komutudia na heto. ⁴⁵Ena guriguri amo vada e toreisi negana ai, ema ena hahediba dekedia, bona mahutadia ai e davaridia badina be edia daradoko daidia ai. ⁴⁶Bena ia ese e hamaorodiava, eto, "Dahaka dainai o mahutamu, a? Atore isi bona ba guriguri, be hedibagani lalona ai basio vareai." ⁴⁷Ia dounu e herevava lalonai, hutuma vada e gini dae, bona tau ta ladana Iuda, gwauta rua tauna ta, ese e gunalaidiava. Ia vada ema Iesu dekena baine harahua totona, ⁴⁸A Iesu ese vada e hamaoroa, eto, "Iuda e, oi be Taunimanima Natuna taona ba torea haherahu amo, a?" ⁴⁹Hari Iesu ena hahediba taudia ese dahaka baine vara gauna e itaiava, idia vada eto, "Lohiabada e, dare amo ai alapadia, a?" ⁵⁰Bena padadai ta ese hahelaga tauna badana ta ena hesiai tauna vada e lapaia, bona taiana idibana e utua-oho. ⁵¹A Iesu vada e haere bona eto, "Ini na asio kara toma!" Bena taiana ai e dau kau, ia ese vada e hanamoa. ⁵²Bena Iesu ese idabai-taona ela taudia, hahelaga taudia badadia, dubu helaga biagudia bona hanua taudia badadia vada e hereva henidia, eto, "Lau be tuari ta na gunalaiamu, bona umui vada oma mai daremui bona karevamui ida, a?" ⁵³Lau be Dubu Helaga lalonai dina iboudiai umui ida negadai be imamui ta egu ai se tubuva. A ina na emui hora, bona dibura ena siahu negana. ⁵⁴Bena e dabaiatao, idia ese vada e laohaia, bona hahelaga tauna badana ena ruma. A Petero be daudaunai muridiai e raka? ⁵⁵Lahi ta magu bogaragina ai vada e karaia bona iboudiai vada e helai diho, Petero

vada padadiai e helai diho.⁵⁶ Hari hesiai hahinena ta, lahi diarina ai helaina ai vada e itaia, bona e raraia tarika-tarika, e tomava, "Ina tau danu ia ida." ⁵⁷ A Petero vada e hegore, e tomu, "Hahine e, lau na asi dibagu ia." ⁵⁸ Nega sisina murina ai taunimanima ta ese vada ma e itaia bona, eto, "Oi danu idia taudia ta." A Petero vada eto, "Tau e, lau na lasi." ⁵⁹ Hora ta murina ai, taunimanima ta ma dounu e tomava, "Momokani, ina tau danu ia ida, badina ia danu Galileia tauna ta." ⁶⁰ A Petero vada eto, "Tau e, lau na asi dibagu oi be dahaka o gwauraimu." Nega tamona, ia do e herevava ai, kokoroku vada e tai. ⁶¹ Bena Lohiabada e hegiro Petero vada e raraia, bona Petero vada e helaloune Lohiabada ese ia e hereva henia herevadia e lalodia, eto, "Kokoroku do basine tai, oi ese nega toi lau ba goregu." ⁶² Bena Petero vada e rakalsi, e tai dikadika. ⁶³ Bena Iesu itataona taudia ese vada e gonagona laia bona e dadabaia ("Bena itataona taudia ese, Iesu vada e gonagona laia bona edadabaia.") ⁶⁴ Idia ese daby ani e tarya-ahu bona vada e nanadaia, eto, "A peroveta laia! Oi be daika ese e kwadimumu, a?" ⁶⁵ Idia ese danu hereva dikadia momo e gwaurai heniaiva, eha dikakaia herea. ⁶⁶ Hari daba erere neganai, hanua taudia badadia iboudiai e hebou, hahelaga taudia badadia bona itorena taudia ida, bona idia ese vada e hakaua lao edia kansolo vairadia, ⁶⁷ etomu, "Bema oi na Keriso, a hamaoromai." A ia ese e hamaorodia, eto, "Bema ba hamaoromuimu, umui ese momokani basio abiadaemu; ⁶⁸ bona bema bama nanadaimui, umui na momokani basioma hahere. ⁶⁹ A ina hari amo ela, Taunimanima Natuna na Dirava siahuna idibana kahana ai baine helai." ⁷⁰ Bena idia iboudiai vada, eto, "Una dainai oi be Dirava Natuna, a? Bena ia ese vada e hereva henidia, eto, "Umui vada o gwaumu lau na ia." ⁷¹ Bena idia vada, eto "Ita be ma dahaka dainai hahebade tauna ta taura heniamu, a? Badina ita iboudai ese ia sibona uduna amo vada tame kamoni.

23

¹ Bena hebou taudia iboudiai e tore isi bena Pilato dekena e hakaua lao. ² Idia ese e hebadelaia, "Ai ese ina tau a davaria, emai bese lalodia e animu, bona Kaisara ena tax monina ihenina na e gwaua taomu, bona sibona danu e gwaumu ia na Keriso, pava-pava ta." ³ Bena Pilato ese e nanadaia, eto, "Oi Iudea taudia edia pava-pava a?" A Iesu ese e haere henia bona eto, "O ena vada o gwaumu." ⁴ Bena Pilato ese hahelaga taudia bona aru taudia, "e hamaorodia eto, "Kerere ta asiname davaria ina tau enai." ⁵ To idia na e hereva goadagoada, eto, "ia na ena hahediba herevadia ai Iudea idoinai vada e hahelogo-helogo bona Galileia amo e hamatama, ema bona ina hanua." ⁶ Pilato ese una hereva e kamoni, ia ese e nanadaia eto, ina Galileia tauna a? ⁷ Bena ia e diba ia na Heroda ena siahu henunai, oi ese o siaia Heroda dekena bae hakaua lao, daika be una negana ai Ierusalema ai. ⁸ Bena Heroda ese Iesu e itaia, ia na e moale e urava bema itaia badina nega daudau Iesu harina e kamonaiva, bona e urava toa haida ia ese bema kara bema bema ita, ⁹ bona hereva diagau e nanadailaia, to Iesu na se haere. ¹⁰ Hahelaga taudia bona itorena taudia unuseni ai e gini, ia e habadelaia goadagoada. ¹¹ Bena Heroda bona ena tuari taudia ese e kirikirilaia bona e gonagonalia. Dabua namohereana ta e hadokilaia, Pilato dekena ma e siaia lou lao. ¹² Una dina ai Pilato bona Heroda vada e herohemaino heheni, badina gunaguna idia raruosi e heinai heheniva. ¹³ Bena Pilato ese hahelaga taudia bona hanua lohiadia bona hanua taudia, e boiridia hegogo. ¹⁴ Bona e hamaorodia, eto, "Ina tau dekegu o mailai o tomamu taunimanima lalodia e animu, bona aitaia vairamui ai name nanadaia momo, O hahebadeia herevadia vada name tahu, to enai kerere ta asiname davaria. ¹⁵ Heroda danu unu heto, una dainai ia ese ma e siaia lou ita dekedai, bona ba itaia, ia ese mase karana ta se karaia. ¹⁶ Una dainai lau ese ia, baina dadabaia bona baina ruhaia nege, ¹⁷ Badina be vaia ena kara una aria negana ai dibura rumana ai e noho tauna ta baine ruhaia nege. ¹⁸ A iboudiai e lolo bou, eto, "Ina tau na herevana, to Baraba hari ba henimai!" ¹⁹ (Ia na dibura rumana ai e koua badina heatu bona ala-ala hanua lalonai e havara dainai.) ²⁰ Bena Pilato ese ma e hereva henidia lou, Iesu baine ruhaia nege eto, ²¹ to idia ma e lolo, eto, "Ba hasatauroa, ba hasatauroa." ²² Bena nega ihatoina ma e hereva henidia, "eto, Ina tau enai dika be dahaka? Lau na mase badina ta ienai asina davaria. Una dainai baina dadabaia murina lau ese baina ruhaia nege." ²³ To idia na e lolo lalo dika, eto, Ba hasatauroa bona idia eredia vada e kwalimu, ²⁴ Bena Pilato ese edia ura hegeregereana, e karaia. ²⁵ Hari heatu bona ala-ala dainai dibura ruma ai e nohova tauna e ruhaia nege, edia noinoi hegeregereana. A Iesu na e henidia edia ura bae karaia. ²⁶ Idia ese Iesu e hakaua lasi, bona Simona Kurene tauna ta gunika amo lasina ai e dabaia tao, satauro na ia pagana ai e atoa kau, baine huaia. ²⁷ Taunimanima hutuma, ia murina e raka, bona hahine e hebogahisi bona e tai. ²⁸ Bena Iesu e gini kerehai, e hereva henidia eto, "Ierusalema hahinemui e, lau taigu asio tai, a sibomui hari ba hetai heheni bona natumui taidia hari ba tai." ²⁹ Badina ba itaia, negana be maimu baeto, "Gabani hahinedia bona ratadia asie topo hahinedia hari nanamo." ³⁰ Una negana ai ororo badadia bae hereva henidia, baeto "A kuremai tao," bona ororo maragidia, bae hamaorodia, baeto a gorumai tao. ³¹ Badina be au maurina, ini e karaia tomamu, o kakorona na ede bae tomaia?" ³² Kara dika taudia rarua, danu ia ida e hakaudia lasi, bae hasataurodia hebou. ³³ Idia na gabu ta ia e kau, ladana na "Kwara koukouna," unuseni ai e hasatauroa, bona dika taudia danu - ta idibana ai, ta laurina kahana ai, e hasataurodia. ³⁴ Bena Iesu e guriguri eto, tamagu e, ina e karaiamu karana na asi dibadia, davadia na basio henidia, bona dabua e hari ta ta ahudia e abi. ³⁵ Hanua taudia na e gini, e herarai. Bona hanua lohiadia ese e kirikirilaia, eto, ia na idau taudia e hamauridiava, bema ia na Keriso, Dirava ena abihidi tauna, ia na sibona bema hahemaui. ³⁶ Tuari taudia ese e gonagonalia, e raka kahira, vine ranuna iditana e duduia dae. ³⁷ Bena eto, "bema oi na Iudea taudia edia Pava-pava, sibomu ba hahemaui." ³⁸ Revareva ta danu e torea, ia daenai e kapaia, eto, Iudea taudia edia Pava-pava. ³⁹ Bena ia ida e hasataurodia hebou taudia ta ese e gonagonalia, eto, "Oi na dia Keriso a? Sibomu a hahemaui, bona ai danu ba hamaurimai." ⁴⁰ A bamona ese e gwau henia, eto, "Oi Dirava garina so garimu a? Oi danu bo masemu, ia hegeregereana. ⁴¹ bona ina na maoro, badina ita raruosi baita mase eda kara dika davana. A ina tau na asi ena kerere." ⁴² Bena ia eto, "Iesu e, emu basileia bavabia negana ai, ba lalogu." ⁴³ Iesu ese e haere henia eto, "Na hamaoromu momokanimu, hari dina ai ita

raruosi paradaiso ai baita vareai."⁴⁴Una na dina tubua, bena unu amo ela dina gelona una tano idoinai vada e dibura.⁴⁵Dina e dibura bona dubu helaga seseahuna na boagaragina amo e hedare parara.⁴⁶Bena Iesu e tai lolo, eto, Tamagu e, laumagu na oi imamu ai na atoamu." unu e gwau toma, bena vada e mase.⁴⁷Hari tuari biaguna ese una kara e itaia, bena ia ese Dirava e imodaia, eto, momokani ina tau na kara maoromaoro tauna."⁴⁸Herarai taudia hutuma, ese una e vara gaudia e ita, bena kemia e pata, e lou.⁴⁹A ia bamona, bona Galileia amo e gavaia hahinedia na dauhai ginidia ai e herarai.⁵⁰A kaunsolo tauna ta ladana Iosepa, tau namona bona kara maoromaoro tauna, e nohova.⁵¹(Ia na kaunsolo edia henega ai bona edia kara ai na seura) ia na Iudea hanuana ta, ladana Arimatea, tauna, bona ia danu Dirava ena basileia e nariava.⁵²Ia na Pilato dekena ela Iesu tauanina e noia.⁵³Bena e abia dobi, dabua aukana ai e kumia, bona nadi hagana ai e geia kohuana lalonai e atoa. Una kohuana matamatana, lalonai tau ta do asie guria.⁵⁴Una dina na e hegaegae, bona dina helagana vada e matama.⁵⁵Bena Galileia amo e gavaia hahinedia na idia muridia amo ela, bona kohua e itaia, bena tauanina unusenai ai e guria danu e itaia.⁵⁶Bena e lou lao, muramura mai bonadia bona dahudahu murammuradia e abi hegaegae. A Dina Helaga ai e lagani, taravatu dainai.

24

¹Daba galuma-galumana ai, pura dina ginigunana ai, idia na gara ela, muramura mai bonadia eabi hegaegae na e laohai.
²Ela negana ai nadi na vada e hekure oho gara amo.³To e vareai negana ai, idia ese Lohiabada Iesu tauanina asie e davaria.⁴Unu e vara toma dainai, idia na e daradara ina gabu ai, haraga herea, tatau rarua dekedia ai e gini, mai dabua hururu-hururudia ida.⁵A hahine na e gari bona e goru diho vairadia danu tano ai e kau, tatau ese e hereva henidia eto, "Dahaka dainai mauri tauna mase gabuna ai o tahamu?"⁶Ia na dia inisenia ai, a e tore isi! Galileia ai e nohova negana ai e hamaoromui herevana ba laloa,⁷eto, taunimanima Natuna na dika taudia ediai taona bae torea bona bae hasatauroa, a dina "ihatoina ai baine toreisi lou."⁸Bena hahine ese ena hereva e helaolaia-une,⁹bona gara amo e lou ela, unu gau iboudiai gwauta-taosi mai bamodia ida edia ai e haripiulaidia.¹⁰Hahine dia bini: Maria Magadala, Joanna, bona Maria, Iakobo sinana, bona bamodia haida, ini kara Apostolo taudia e hamaorolaidia.¹¹To ini hereva na gori na heto Apostolo taudia ediai, bona hahine na asie abidia dae.¹²Petero, na ede bamonai, e tore isi, e heau ela gara, bena e igo diho, dabua mo e ita. Bena ela, sibona e lalohadaiva dahaka e vara.¹³Una dina ai, idia raruosi hanua daudau ta baela ladana Emausa, Ierusalem bona una hanua padana na maela (mile) tauratois sisivana.¹⁴Idia na hari e herevalai gaudia na e herevalai heheniva.¹⁵Bena edia hereva-hereva bona e henandai hehniva lalonai, Iesu na dekedia e raka lao bona idia ida ela.¹⁶A matadia asie papa asi dibadia ia.¹⁷Bena Iesu ese e hereva henidia eto, umui na dahaka dalai ai o herevalai hehenimu? "Bena idia na e gini vairadia e hua."¹⁸Bena idia ta ladana na Kleopa, ese e haere henia eto." Oi na Ierusalem ai o loa edeamu bona una dainai hari e vara gaudia na asi dibamu a?"¹⁹Bena Iesu ese e haere henidia eto, "Dahaka gau" Idia eto, "Iesu Nasareta tauna, ia na peroveta tauna ena kara bona ena hereva mai siahudia Dirava vairanai bona taunimanima iboudia ai vairadia ai,²⁰bona hahelga taudia bona hanua lohiadia ese e revaia mase bona e hasatauroa.²¹A ai banava ato ia na Isaraela edia hahemaui tauna. To latanai ini gau iboudiai na dina toi ai e vara.²²A harihari hahine haida lalomai ai ese e hahoamai, daba matana ai gara ela,²³bona tauanina asie davaria, e lou ema e tomu aneru haida e itadia e hamaorodia ia na vada e mauri.²⁴Bena bamomai haida danu ma gara ela hahine edia hereva hegeregerena ai e davaria to asie itaia."²⁵Bena Iesu ese e gwau henidia eto, "Kavakava taumui bona lalo-duhu taumui peroveta taudia edia hereva asio abi daemu!²⁶Dia maoro a, Keriso unu baine hisihisi toma, bona hairaina baine abia?"²⁷Bena Mose bona peroveta taudia edia buka ai ia sivaraina e tore herevadia iboudia ai anidia ia ese e hadibalaidia.²⁸E lao henia hanuana vada e kahira-kahira, bena ia na baine raka hanai eto.²⁹To raruosi ese e rua, eto, "baita noho, badina adorahi bona dina vada be dihomu." Bena ia na idia ida ruma ai e dae kau.³⁰Unu e vara toma, tatoisi aniani gabuna ai ege diho, ia ese parao eabia, e hanamoa, bona e bitua, bona raruosi e henidia.³¹Bena matadia e papa, bona e diba ia, bena vaira dia amo e puki (boio).³²Bena raruosi e hereva heheni eto, "laloda vada e siahua, dala ai e hereva henida, bona buka helaga anina e hadibalaida.³³Bena idia e tore isi Ierusalem e lou henia, gwauta-taosi mai bamodia ida heboudia ai e davaridia,³⁴eto, Lohiabada na momokani e toreisi, bona Simona enai e hedinarai."³⁵Bena idia ese dala ai, e vara gaudia na e hamaorolaidia, bona parao atagana ibituna ai lalodia e parara danu e herevalaia³⁶Edia hereva lalonai, Iesu bogaragidia ai e gini, bena e hereva henidia eto, maino emui ai baine mia.³⁷A idia na gari ese e butudia tao bona e gari dikadika, banava eto lauma ta e itaia.³⁸Bena Iesu eto, "Dahaka dainai o hekwakwa hanaimu, bona dahaka dainai lalomui daradara ai e honumu."³⁹Imagu bona aegu ame ita, lau binai. Ame daugu toho bona ba ita. Badina be laulau na asi hidihona bona asi turiana, hari lau o itagumu hegeregerena.⁴⁰Unu e gwau toma, bena imana bona aena e haheitalaidia.⁴¹Idia na dounu e daradara badina edia moale bona edia hoa daidiai, bena ia ese e nanadaidia eto, "mai amui eiava?"⁴²Bena idia ese gwarume e gabua gauna taina e henia,⁴³bona eabia bona e ania idia vairadia ai.⁴⁴Ia ese e hereva henidia eto, "ta noho hebouva negadai na hamaoromuiva, Mose bona peroveta taudia edia buka ai bona Salamo ai lau sivaraihu e tore gaudia iboudia vada bae momokani."⁴⁵Bena ia ese daradia e keho buka helaga bae lalo-paralalaia, bena e hereva henidia eto,⁴⁶ini vada e torea toma: Keriso na baine hisihisi, bona baine toreisi lou mase amo dina ihatoina ai;⁴⁷bona helalo-kerehai bona dika igwautakodia ia ladana tanobada besedia iboudia ai bae harorolaia, Ierusalem amo bae matamaia.⁴⁸Umui na ini gau ihamomokanidia taudia.⁴⁹Lau ese Tamagu e gwauraiha hamata gauna baina siaia latamui ai baine kau. A umui na taoni (city) ai ba noho ela bona atai amo siahua baine diho gauna do bavabia.⁵⁰Bena ia ese e hakaudia lasi ela bona Betania vada e kahi-kahi, bena ima e duduia isi bena e hanamodia.⁵¹Hari e vara gauna, ena hahenamo lalonai, ia na idia edia amo e

heabi oho bona e dae guba ai.⁵²Idia ese e toma henia diho, bona e lou Ierusalem mai moaledia ida,⁵³bona dubu helaga e loulou henia, Dirava e imodaia.

John

1

¹Matamana neganai, una hereva na Dirava ida. Una hereva na Dirava. ²Ia na matamanai Dirava ida/una na matamanai Dirava ida. ³Gau iboudiai na ia ena amo e vara, bema ia lasi neganai gau ta danu basi ema hekara, ini e kara gaudia. ⁴Ia enai na mauri, bona una mauri na taunimanima ena diari. ⁵Una diari na e kiam dibura ai, bona dibura ese na se laoa-ahu. ⁶Tau ta Dirava ese e siaia, una tau ladana na Iaone. ⁷Ia ema na una diari baine hahedinarai, (ita) iboudai ese baita abiadae, ia ena amo. ⁸Ioane na dia una diari, to ia ema na una diari baine hahedinarai. ⁹Diari mamokanina, una diari na taunimanima iboudiai e henidia, ina tanobadai. ¹⁰Ia na tanobada ai bona tanobada danu ia ena amo e hekara. To tanobada na ia na se dibaia. ¹¹Ia na sibona ema, to se abiadae. ¹²To momo ese eabiadae, bona ladana e hamomokania, bona ia ese maoro e henidia Dirava natuna ai baela. ¹³Idia na dia rara amo e vara, dia tauani ena ura, dia taunimanima ena ura, to Dirava ena amo. ¹⁴Ina hereva na tauani ai vada ela bona ita bogaragidai e nohomu. Hairaina danu ta itaiamu. Ia hairainai vara edeana tamana ena amo ema. Harihari badai e honuhonu dae bona hereva momokani. ¹⁵Ioane ese e hahedinarai bona e tai, 'egwa, Lau ese na gwauraiamu taunabinai.' Lau murigu ai bainema tauna na lau danu be hereagumu. Ia na lau vairagu ai. ¹⁶Ia ena honuhonu dae iboudi ese ta abia, bona ena harihari bada murina, murina ta abiamu. ¹⁷Taravatu na Mose e henia. Hariharibada bona hereva momokani be Iesu Keriso ena amo ema. ¹⁸Ta ese Dirava na do se itaia, hora ta lalonai. Dirava natuna vara edeana, tamana ohenai, sibona e haripiumu. ¹⁹Ina na Ioane ena gwau hedinarai. Iuda taudia ese hahelaga taudia bona Levi oreana, Ierusalem amo e siaidia Ioane bae nanadaia, "Oi be daika?" ²⁰Ia na egwau hedinarai - bona se hegore, to egwau hedinarai - "Launa dia Keriso." ²¹Ba henanadai, "oi be daika? oi be Elia? Ia eto "Lau na dia ia" ma eto "oi be peroveta ta?" ia e haere eto "lasi." ²²"Bena idia ese e hamaoroa," Oi be daika be ai emai haere na e siaimai taudia baia henidia? Oi sibomu be dahaka ogwaumu? ²³Ia eto, "Launa gado ta, tano gagaenai e taimu: Lohiabada ena dala ba hamaoromaoroa." Peroveta isaia e hereva hegeregere. ²⁴Hari e siaidia taudia haida be Farisea. ²⁵Bena e nanadaia bona e hereva henia, dahaka dainai o hebapatisomu, A oi be dia Keriso o gwaumu, dia Elia eiava dia peroveta ta. ²⁶Ioane e haere eto, Lau na ranu ai na habapatisomuimu, umui bogaragimui ai ta gini, umui asio diba. ²⁷Ia na lau murigu amo ema, lau na dia hegeregere ia ena tamaka varodia baina ruhada. ²⁸Ini kara na Betania ai e vara, Ioridaena unu kahanai Ioane na baptiso e karava. ²⁹Daba ai Ioane ese Iesu e itaia ia dekena ela, bona e hereva eto, "A itaia, Dirava ena mamoe natuna, ina tanobada ena kara dika be kokidiamu. ³⁰Ina na lau ese na gwauraiamu, lau murigu ai tau ta bema imu, ia na hereadae, ia na lau vairagu ai ema. ³¹Lau na asi dibagu ia, to iana do baine hedinarai Isaraela ediai, lau na ranu ai na baptisomuimu. ³²Ioane egwau hedinarai, Lauma na itaia guba amo e diho ia latanai. ³³Ia na asi na dibaia, to e siaigu launa ranu ai baina baptiso, bona e hamaorogu eto, 'daika o itaia Luma e diho bona ia latanai, tauna bunai, ia na Lauma Helaga ai baine baptiso. ³⁴Launa na itaia bona na dibaia, ia na Dirava natuna. ³⁵Dina matamatanai Ioane na ena hahediba rarua ida gigin. ³⁶Bena e roha lao Iesu e itaia e raka e maiva bona Ioane e hereva Aitaia, Dirava ena mamoe. ³⁷Hahediba raruosi e kamoni, Iesu murinai e raka. ³⁸Iesu e hegiro e itadia, ia e gavaia, bona e hereva henidia, umui be dahaka o uramu? E haere henia, "Rabbi (motu gado ai Rabbi na hahediba tauna) oi be ede kahai o nohomu?" ³⁹E hamaorodia aoma baitaia, bona idia na ela ia ena noho gabuna e itaia. Bena ia ida e noho una dinanai. una na hora gwauta (10th hour). ⁴⁰Raru lalona amo ta Ioane e hereva Iesu murinai bae raka, na Anderea, Simona Petero tadikakana. ⁴¹Ia ese tadikakana e davarua guna, Simeona, bona e hamaoroa, ai na Messiah a davarua (motu gado ai na Keriso). ⁴²Bena ia ese e maiaoa Iesu dekena, Iesu ese e itaia bona eto" oi na Simeona, Ioane natuna. Oi na baia gwauraimu kepa (baita hanaiaimu na Petero). ⁴³Dina ta Iesu e ura bainela Galileia, Filipi ma e davarua, bona e hamaoroa, "murigu ai a raka." ⁴⁴Filipi na Betasida tauna, Anderea bona Petero, ema hanuana amo. ⁴⁵Filipi ese Nataniela e davarua, e hamaoroa :Mose ese e tore taravatuna bona peroveta dia, ai ese a davarua. Iesu Iosepa natuna Nasareta amo ema. ⁴⁶Nataniela ese e hamaoroa "gau namodia haida Nasareta amo eme vara? Filipi ese e hamaoroa, aoma ba itaia. ⁴⁷Iesu ese Nataniela e itaia ia e mai heniava, bona e herevalaia, "Aitaia, ia na Isaraela tauna korikori. Ia enai na kerere ta lasi. ⁴⁸Nataniela ese e hamaoroa, ede bamoni o dibagu? Iesu ese e haere henia eto, "guna, Filipi ese do se boirimu, oi suke auna henunai, vada na itamu. ⁴⁹Nataniela ese e halou henia, "Rabbi, (hahediba tauna) oi na Dirava natuna. ⁵⁰Iesu ese ma e halou henia, "Badina name hereva henimu, na itamu suke auna henunai, oi ese o hamomokaniamu? oi ese gau hereadae dia bo itamu, ini daediai. ⁵¹Bena e hamaoroa eto, momokani, momokani na hamaoromumu, guba ba itaia baine hekeho. Dirava ena aneru bae dae bona bae diho taunimanima natuna enai. Translator: Mr. Taru Andrew Kamea. Completed on Friday (30/12/23), time: 10.00 am. Ready for quality checking.

2

¹Dina toi murinai, headava ta e karaia Kana Galileia hanauana ta ai, bona Iesu sinana danu unuseni ai. ²Iesu bona ena hahediba ida danu e vavedia, una headava ela. ³Vine ranuna e ore, bona Iesu sinana ese e hamaoroa, eto, "Idia na asi edia vine." ⁴A Iesu ese e haere henia, eto, "Hahine e, una be dahaka lau egu ai bona oi emu ai? Egu nega na do se kau." ⁵Bena sinana ese hesiai taudia e hamaorodia, "Dahaka e hamaoromumu, na ba karaia." ⁶Unuseni ai nadi hodudia autauratoi hehelai Iudea taudia edia hahegoeva karadia daidiai ta ta anidia na mita rua - toi sisivana. Iesu ese e hereva henidia eto,

"Ranu hodudia na ranu amo a hahonudia. "Bena e hahonudia dae roha. ⁸Ma e haduadia eto, "Haida a seidia bena ba laohai anibou biaguna dekena. Bena idia ese e laohai. ⁹Anibou biaguna ese vine ranuna ai e halaoa ranuna e inua toho, a ia be asi dibana ede amo ema, ranu iseina memero dia sibodiamo mai dibadia. Bena anibou biaguna ese headava matamata tauna e boiria, e hereva henia. ¹⁰Una dainai, iboudiai vine ranuna namo-hereana e nuia diho gunamu bena ia ese e hakekerodiamu murinai vine ranuna mia-namona e nuia dihomu. To ia ese vine ranuna namo-hereana vada o dogoa tao ema bona ina harihari. ¹¹Iesu ena toa ginigunana na ini e hahedinarai toma, Kana, Galileia kahana ai e karaial una amo ia hairiana e hahedinarai, bona ena hahediba ese e abidadama henia. ¹²Una murinai ia mai sinana ida, bona tadina bona ena hahediba ida, e diho ela Kaperanauma ai, unuseni ai dina dia hoho e nohova. ¹³Iuda taudia edia Lagau-Hanai Ariana vairadiai e hure negana ai Iesu na Ierusalem ai eha dara dae. ¹⁴Dubu Helaga ai boromakau bona mamoe bona pune ihodia taudia e davaridia, bona moni e senisiva taudia danu helai diai e davaridia. ¹⁵Bena hekwadia kwanauna e hatua, iboudiai Dubu Helaga amo e luludia lasi, mamoe bona boromakau danu. Moni e senisi taudia danu edia moni ia ese e bubu-nege, bona edia pata e uhe hebubu. ¹⁶Bena pune ihodia taudia e gwau henidia eto, Ene na avabi oho, Tamagu ena ruma na hoihoi rumana ai basio halaoa. ¹⁷Bena ena hahediba vada e helalo une, Buka Helaga ai ini e torea toma eto, emu ruma iurahenina ese baine hamasegu. ¹⁸Bena Iuda taudia ese e nanadaia eto, Oi ini o kara tomamu anina be dahaka? Emu siahu toana ba henimai. ¹⁹Iesu ese e haere henidia eto, ina Dubu Helaga ba rohoa bena lau ese dina ihatoinal baina haginia lou. ²⁰Iuda taudia eto, Ina Dubu Helaga na lagani harihui tauratoi lalonai e haginia bona eha-orea, bena oi ese dina toi murinai ba haginia lou o tomu a? ²¹A ia ese tau-anina Dubu Helaga ida e hahegeregere. ²²Una dainai ia ese mase amo e tore isi negana ia ena hahediba ese una hereva e helalolai une, ia na unu e gwau toma. Bena idia ese Buka Helaga bona iena hahediba herevadia danu vada e abi dae. ²³Iesu Lagau-hanai Ariana dinadia ai Ierusalem ai e nohva negana ai hutuma ese e abibiraia, e karava toadia e ita daidia. ²⁴A Iesu ese idia se abidadama henidia, badina be ia taunimanima iboudiai mai dibana. ²⁵Bona ta ese taunimanima ta herevana bema hamaorolai na asi badina, badina be taunimanima lalodia vada e diba waitani. Translator: Ret/Dkh. Mrs. Ori Claudie Kohu. Completed on Tuesday (30/05/23), time: 12.45pm. Ready for quality checking

3

¹Hari unuseni ai Farasea tauna ta ladana be Nikodemo, Iuda edia hahekau tauna. ²Ia na hanuaboi ta ai Iesu dekena ela ia e hereva henia eto, "Rabi e, ai dibamai oi na hahediba tauna daika be Dirava ena amo, badina o karamu toada na Dirava ese basine bamoa tauna ese basinema kara diba. ³"Iesu e haere bona eto," momokani waitani na hamaoromuimu, taunimanima ta na basine vara lou, ia na Dirava ena basileia basine itaia." ⁴Nikodemo ese e hamaoroa eto, "Taunimanima na burukana negana ai be ede baine vara lou toma? Ia sinana bogana ai nega iharuana basine vareai lou bena baine vara, ia momokani Iesu e haere eto, "Momokani waitani na hamaoromumu taunimanima na ranu amo bona lauma, ena amo basinema vara ia na Dirava ena basileia lalonai basinema raka vareai diba, ⁶tauanina ena amo e varamu be tauanina ena, bona lauma ena amo e varamu be lauma ena, ⁷na hereva henimu basio hoalaia, 'Oi na ba vara lou! ⁸Lai be ena ura gabuna amo e toamu, bona regena o kamonaumu to asi dibamu ede amo e maimu eiava ede e laomu. Lauma ena amo e varamu taudia iboudia ai danu unu heto. ⁹"Nikodemo e haere bona eto, "Ini gaudia be ede ba vara toma? ¹⁰Iesu ma e haere bona eto, "Oi na Isaraela taudia edia hahediba tauna ta, bona ini gaudia na doini so dibamu a? ¹¹Momokani waitani na hamaoromumu, ai na dibamai gaudia a herevalaimu, bona ai ita gaudia a gwauraimu, to emai hereva na asio abi daemu. ¹²Bema ina tanobada gaudia na herevalai henimumu gaudia aso abi daemu, o guba gaudia baina herevalai henimu gaudia be ede bavabi dae toma? ¹³Tau ta se dae guba ai Taunimanima Natuna sibona mo guba amo e diho. ¹⁴Mose ese gaigai tano gagaena ai e piua isi hegeregere, Taunimanima Natuna danu unu bae piua isi toma, ¹⁵unu amo bae abidadama henia taudia iboudiai ese mauri hanaihanai bae abia. ¹⁶Badina be Dirava ese tanobada ini e lalokau henia toma, Natuna vara edeana vada eme heni, bae abidadama henia taudia iboudiai na basie mase a mauri hanaihanai bae abia, ¹⁷Badina be Dirava ese Natuna tanobada e siaia mai na dia tanobada ihahemaoro henina, to tanobada hari ia bagunai do baine mauri. ¹⁸E abidadama henia taudia na se hahemaoro henidiamu to seabidadama henia taudia na idau negai vada e hahemaoro henidia badina be idia ese Dirava natuna vara edeana na se abidadama henia dainai. ¹⁹A hahemaoro badina bina. Diari na tanobada vada ema, bona taunimanima ese dibura e ura henia badamu badina be edia kara na didika. ²⁰Badina be kara dika taudia iboudiai ese diari e inai heniamu, bona diari se mai heniamu, edia kara bae hedinarai na garina. ²¹Ede heto, kara momokani tauna ese diari emai heniamu, unu amo Dirava lalonai e karamu karadia na bae hedinarai. ²²"Unu gau muridiai, Iesu bona ena hahediba Idua tanona ela unuseni ai ia na idia ida e nohova bona e bapatisova." ²³Hari Ioane danu Aenon ai Salim kahana ia e bapatisova badina be ranu na bada unusenai. Taunimanima na ia dekena e laova bona e bapatisodiava, ²⁴badina be Ioane na dibura rumana ai do se koua ahu negana ai. ²⁵Una negana ai gwau tubu e vara Ioane ena hahediba haida bona Iuda tauna ta ida hahegoeva karadia hepapa-ahuahulai. ²⁶Bena idia na Ioane dekena ela bona e hamaoroa eto, "Rabi e, Ioridaena sinavaina unu kahana ai oi idia o nohova, oi ese o herevalaia tauna na vada e hahebaptisomu, bona taunimanima logora na ia dekena e laomu. ²⁷"Ioane e haere bona eto," A tau ta gau ta basiema abia ela bona guba amo bema henia. ²⁸Umui sibomui danu mai dibamui lau nato, 'Lau na dia Keriso,' a lau na ia vairanai e siaigu guna! ²⁹"Hahine matamatana eabia tauna headava matamata tauna buna, hari headava matamata tauna turana danu e ginimu bona ere e kamonaumu, headava matamata tauna gadona e moalelaiamu. Una dainai, ina laegu moale vada e guguru. ³⁰Ia na baine bada, a lau be baina maragi. ³¹Atai amo, ema tauna na gau iboudiai daediai, tano amo ema tauna na tano tauna bona tano herevadia e gwauraimu. A guba amo ema

tauna na gau iboudiai daediai.³² Ia ese e ita bona e kamoni gaudia e gwaurai hedinaraimu a tau ta ese ena hereva se abiadae.³³ A daika ese ena hereva eabia daemu tauna ese Dirava e gwauraimu Dirava na momokani.³⁴ Badina be Dirava ese e siaia tauna ese Dirava ena hereva e gwauraimu. Badina be Dirava ese laumana e henimu neganai dia taidia taidia se henimu,³⁵ Tamana ese Natuna e lalokau heniamu bona gau idoidiai ia imana ai vada e atoa.³⁶ Natuna eabdadama heniamu tauna ese mauri hanaihanai baine abia, A natuna e gwau-e-de-e ese heniamu tauna mauri basine abia. A Dirava ena badu na ia latana e karamu. RDK LOHIA KOHU ESE E HAGUGURUA, THURSDAY (11/07/24), TIME:5.40 AM

4

¹Lohiabada vada e diba Farasea taudia vada e diba Iesu ese hutuma vada e abidia, ena hahediba ai vada e halaodia bona e bapatisodia, a Ioane be gadoidia mo e abidia.² Gau tamona Iesu ese se bapatisodia, to ena hahediba hari.³ Ia ese Iudea e rakatania, Galileia e lou lao.⁴ Ena dala be Samaria tanona amo e raka hanai.⁵ Bona Samaria hanua ta e lasi ladana na Sukara; una hanua na Iakobo ese natuna Iosepa e henia tanona badibadinai.⁶ Iakobo ena ranu gurina be unuseni ai. Iesu na tauna e boera laolao dainai bona dinatubua ai ranu gurina badibadinai e helai diho.⁷ Samaria hahinena ta ranu utu ela bona Iesu ese e noia eto ranu kurita taina a henigu.⁸ Badina be ena hahediba na hanua ela aniani bae hoi totona.⁹ Hari hane Samaria ese e henia eto, Badina be dahaka oi na Iuda taumu, lau be Samaria hahinegu, ma egu ranu o noimu? Ia unu e gwau toma badina Iuda taudia bona Samaria taudia na asie hetura heheniva.¹⁰ Bena Iesu esee haere henia, eto, "Dirava ena harihari gauna boma diba, bona boma diba ia ese mauri ranuna bema henimu."¹¹ Hahine na eto, asi emu tu-dobi gauna, guri danu dobu hari mauri ranuna be ede amo bo abiamu?¹² Oi ese senemai Iakobo o hereaiamu a? Ia ese ina ranu gurina e henimai, ia ese e inuava natuna verina bona ena boromakau seridia danu e inuva.¹³ Iesu ese ma e haere henia eto, Ina ranu bae inua taudia iboudiai na bae ranu mase lou,¹⁴ a lau ese baina heni ranuna baine inua tauna na basine ranu mase ela bona hanaihanai.¹⁵ Hari hahine ese e noia, eto, tau e, ena ranu ame henigu, bona basina ma ranu mase lou, bona ranu utu danu ini basinama.¹⁶ Bena Iesu e hamaoroa, eto Aola adavamua a ha boiria raruosi baoma.¹⁷ Hahine eto, Lau na asi adavagu.¹⁸ Iese eto, vada o hereva maoromu, o tomamu, "Lau na asi adavagu," badina be adavamua laima vada o abidia, bona harihari o abimu tauna na dia oi adavamua. Emu hereva na momokani.¹⁹ Hari hahine eto, Gauka e, lalogu vada eme parara, oi na peroveta tauna.²⁰ Tubumai tamamai na ina ororo ai e toma dihova a umui Iuda taumui na o tomava toma-diho gabuna korikori na Ierusalema ai mo.²¹ Iesu eto, egu hereva avabia dae, nega ta be maimu ina ororo ai bona Ierusalema ai danu Tamada basio toma henia diho.²² Umui Samaria taumui ese o toma diho heniamu Diravana na asi dibamui, a ai be a toma diho heniamu Diravana na dibamai. Badina be ahemaui na Iuda taumai emai amo.²³ A nega ta be maimu, harihari vada be kaumu ai bona momokani ai badina be Tamada ese unu bae toma diho henia taudia na e tahudiamu.²⁴ Dirava the Lauma, bona bae toma henia diho taudia ese lauma ai bona momokani ai bae toma henia diho.²⁵ Hahine na eto, Lau na dibagu Mesia, (Keriso e gwauraimu na do bainema) bona bainema neganai ia ese gau iboudiai baine gwaurai hedinarai.²⁶ Iese ese e hamaoroa, eto Tauna bina lau, vada na hereva henimumu.²⁷ Una negana ai ena hahediba vada e lou, ia dekenai e kau, bona e hoa badina be ia na hahine ta ida e hereva herevamua. A ta ese se nanadaia, "Dahaka o tahuamu?" eiava "Dahaka dainai ia ida o hereva herevamua."²⁸ Bena una hahine ese ena hodu e rakatania hanua ela ia ese hanua taudia e hamaorodia eto,²⁹ Aoma, tau ta aitaia, egu kara iboudiai ia ese e hamaorolaigu. Dahaka o tomamu, ia na Keriso eiava?³⁰ Bena idia na hanua amo e aru lasi, ia dekena ela.³¹ Una negana ai ena hahediba ese e hamaoroa, eto Rabi e, avaniani.³² A ia ese e hamaorodia, eto, Lau na mai agu, umui asi dibamui gauna,³³ Bena ena hahediba na sibodia e hananadai heheni, eto, Ta ese ana aniani vada e mailaia eiava?³⁴ A Iesu ese e hamaorodia, eto, Agu aniani bunai e siaigu Diravana ena ura baina karaia, iena gaukara baina hagugurua.³⁵ Umui na mai emui hereva ta, ani, o tomamau "Hua hani baela bona uit iutuna negana baine gini dae? A na hamaoromuimu a gaga isi, uma ba ita, anidia vada e lo, iutuna negana hegeregere.³⁶ Iutuna tauna ese davana e abiamu, bona uma anina e habouamu, mauri hanaihanai gauna. Una dainai, ihadona tauna bona iutuna tauna bae moale hebou.³⁷ Badina be vaia e gwauraimu herevana be momokani ihadona tauna be idau, iutuna tauna danu idau.³⁸ Lau ese na siaimui, asio hekwarahilaia gauna na ba utua haida be vada e hekwarahi umui ese edia hekwarahi anina vada ome abia.³⁹ Samaria taudia hutuma una hanua lalonai ese Iesu e abiabiraia.⁴⁰ Una dainai, hari Samaria taudia na ia dekena ela, e noia, dekediai baine noho, ena dina rua unuseni ai e noho.⁴¹ Bena ena hereva daidiai hutuma ese e abiabiraia.⁴² Bena idia ese una hahine e hamaoroa, eto, Ai na dia harihari oimu hereva dainai asi abiabiraia badina be ai sibomai vada ame kamoni bona ame diba, ina na momokani tanobada ihamaurina tauna.⁴³ Una dina rua e ore, bona ia na e tore isi Galileia ela.⁴⁴ Iese vada e hereva eto, peroveta tauna na ena hanau korikori taudia ese basie matauraia.⁴⁵ A Galileia ai e lasi negana ai na Galileia taudia ese e abia dae dainai; badina be idia danu una aria ela.⁴⁶ Galileia hanuana ta ladana Kana, ai e lasi; una vanegai ranu vine ranuna ai e halaoa gabuna. Lohia ta Kaperanaumai natuna vada e gorerea;⁴⁷ ia e kamoni Iesu na Iudea amo vada ema, Galileia ai vada e kau, bona Iesu dekena ela, e noia, bainela natuna baine hamauria; badina be mero na e mase rea, mase reava.⁴⁸ Iesu eto, Umui na toa bona hoa karadia basio ita, umui na basio kamoni.⁴⁹ Hari lohia eto, Lohiabada e, mani aitala, natugu vada be masemu.⁵⁰ Bena Iesu e hamaora etim Aola, natumu vada eha mauri. Una tau ese Iesu ena hereva e abia dae, vada ela.⁵¹ Dala amo e laova ai, ena hesiai taudia vada ema; ia ida e hedavari, bona eto, mero na vada e hamauri.⁵² Bena ia ese e nanadaia, edena horai tauna vada edai namo, varanai dina tubua kahanai ena gorere siahuna e doko.⁵³ Bena tamana na e helaloune, ia ese Iesu e hereva henia horana bunai, bona Iese ese e hamaoroa, eto "Natumu vada eha mauri." Bena ia bona ena ruma taudia iboudiai ese vada e abidadama henia.⁵⁴ Toa iharuana binai,

5

¹Ini gau muridiai Iudea taudia edia aria ta e karaia, bona Iesu vada e dae lao Ierusalem. ²Ierusalem ai mamoe iduarana badina be digu gohuna ta, Heberu gadodiai ladana be Betesata, bona ia na mai ena ahekerukeru dehedia ima.

³Taunimanima hutuma gogore, mata kepulu, ae hedairiki eaiva ima heveri, ae heveri taudia unusenai ai hehekure.

⁴Badina be aneru ta vaia e diho loulouva, una gohu e haraivaiava bena ranu iharaivana murinai e turu dae guna tauna ena gorere vada e namova. Gorere idau idau unu e namo tomava. ⁵Tau ta na unuseni, ia ena gorere laganina be toi-ahui taurahani. ⁶Bena Iese ese unuseni ai hekurenai e itaia bona gabeamo e diba ia na nega daudau vada unusenai, ia ese e hamaoroa eto, "Oi ouramu banamo, a?" ⁷Gorere tauna ese e haere henia, eto, "Lohiabada e, asi idurugu tauna ta, bema ranu na e lohilohiamu neganai, ia ese baine atogu dobi gohu lalonai. A gohu lalona ai nadihomu neganai, ta da ma vairaguai e dihomu." ⁸Iesu ese e hamaoroa, eto, "Atoreisi, emu geda avabia-isi, bona ba raka." ⁹Gorere tauna na e namo taku, bona ena geda eabia-isi bona vada e raka. Una dina be Dina Helagana. ¹⁰Una dainai Iudea taudia ese e hanamoa tauna e hamaoroa, eto, "Ina na Dina Helagana bona emu geda o abia loamu na dia maoro." ¹¹A ia ese e haere henidia, eto, "Vada e hanamogu tauna ese e hamaorogu, eto, 'Emu geda avabia-isi bona ba raka.'" ¹²idia ese e nanadaia, eto, "Una be edena tau ese oi e hamaoromu, 'Gau bavabi-isi bona ba raka?'" ¹³badina e hanamoa tauna na asi dibana daika badina be Iese vada hehuni ai e raka oho badina hutuma bada unusenai dainai. ¹⁴Gabeamo, Iesu ese tauna vada e davarua dubu lalonai bona e hamaoroa, eto, "Aitaia, oi na vada ome namo! Basio kara dika lou, bona dika badana ta emuai na basine vara." ¹⁵Ina tau na e raka lasi ela bona Iudea taudia e hamaorodia ia e hanamoa tauna na Iesu. ¹⁶Badina be ini gau daidiai Iudea taudia ese Iesu vada e dagedage henia, badina be ini gau na Dina Helaga ai e karadiava. ¹⁷A Iesu ese e haere henidia eto, "Lau Tamagu na e gaukaramu ema hari dina danu, bona lau, danu, na gaukaramu." ¹⁸Badina be ini kara daidiai Iudea taudia ese Iesu e tahuava bae alaia mase badina be ia na dia Dina Helaga taravatuna mo e hamakohiava, a e tomava Dirava na ia sibona Tamana, sibona Dirava ida e hegeregereva dainai. ¹⁹Una dainai Iesu e haere bona e hereva henidia, eto, "Momokani vaitani na na hamaoromuimu, Natuna na sibona gau ta se karaiamu, a Tamana e karamu gaudia mo e itamu, badina dahaka Tamana ese e karamu, ini gau na Natuna ese danu e karadiamu." ²⁰Badina Tamana ese Natuna e lalokau heniamu bona ia sibona ese e karamu gaudia iboudiai e haheitalaiamu, bona ia ese kara badadia ini kara daediai ma baine haheitalaia unu amo umui na ba hoa. ²¹Badina Tamana ese mase taudia e hatoredia isimu bona mauri e henidiamu, hegeregere Natuna danu e uraheniamu taudia na mauri baine henidia. ²²Badina Tamana ese danu tau ta se hahemaoro heniamu, a ia ese hahemaoro idoinai vada Natuna e henia. ²³Una dainai taunimanima iboudiai ese Natuna bae matauraia Tamana e matauraiamu hegeregere. Natuna se matauraiamu tauna ese ia e siaia Tamana se matauraiamu. ²⁴Momokani, momokani na hamaoromuimu, egu hereva e kamonaiaimu bona lau e siaigu tauna e abiabiraiaimu tauna ese mauri hanaihanai vada eabia bona hahemaoro lalonai do basie vareai, ia na vada mase amo e hanai mauri ai. ²⁵Momokani, momokani na hamoromuimu, nega na e maimu, bona negana binai, mase taudia ese Dirava Natuna gadona bae kamonaiaimu, bona bae kamonaiaimu taudia na do bae mauri. ²⁶Badina Tamana lalonai mauri e miamu hegeregere, Natuna danu unu e henia toma mauri ia lalonai baine mia, ²⁷bona Tamana ese Natuna vada maoro e henia hahemaoro gaukarana baine karaia badina be ia na Taunimanima Natuna dainai. ²⁸Ina na basio hoa laia, badina nega ta na e maimu, gara ai e nohomu taudia iboudiai ese ia gadona do bae kamonaiaimu, ²⁹bona bae raka lasi. E kara namo taudia ese Toreis-lou maurina bae abia, bona e kara dika taudia ese hahemaoro toreisi-louna bae abia. ³⁰Sibogu egu amo gau ta basine karaia diba. Na kamonaiaimu hegeregere amo, na hahemaoromu, bona egu hahemaoro na maoromaoro badina be lau na dia sibogu egu ura na tahuamu, a e siaigu tauna ena ura mo. ³¹Bema lau na sibogu baina hegaurai, egu hegaurai herevadia na dia momokani. ³²Lau na ta ese e gwauraiumu, bona mai dibagu ia ese e gwauraiumu herevadia na momokani. ³³Umui na o hesiaiva Ioane dekena baela, bona ia ese hereva momokani e gwauraiuva. ³⁴Harihari lau e gwauraiumu herevana na dia taunimanima edia amo. A ini hereva na gwauraimu na umui ihamaurimu. ³⁵Ioane be lamepa ta e hururuva bona e diaraiva, bona umui danu o urava nega taina ia diarinai o moaleva. ³⁶A lau e gwauraiumu herevana ese Ioane ena e hereaiamu, badina Tamagu ese e henigu gaukaradia do baine hagugurudia, ini na karamu gaukaradia ese lau e gwauraiumu, Tamagu ese e siaigu. ³⁷Vada e siaigu Tamaguna sibona ese lau e gwauraiumu. Umui ese hora ta a erena do so kamonaiaimu bona oromana do so itaia. ³⁸Ena hereva umui lalomui ai na se miamu, badina una e siai tauna, ia na asio abiabiraiaimu dainai. ³⁹Umui ese Buka Helaga Herevadia o tahumu badina be o tomamu mauri hanaihanai na lalodiai ba davarua, a ini Buka Helaga Herevadia tamodia ese na lau e gwauraiumu, ⁴⁰bona umui na asio uramu dekegu baoma bona mauri bavabia. ⁴¹Lau na dia taunimanima edia amo hahenamo na abiamu. ⁴²A lau na mai dibagu umui, Dirava ena lalokau sibomui lalomui ai na lasi. ⁴³Lau be Tamagu ladanai vada nama, bona umui ese na so abigudaemu. Bema ta ma bainema sibona ladanai, umui ese bo abia daemu. ⁴⁴Umui ese be ede bavabiabiraigu toma, umui be ta ta sibomui o heimodai hehenimu, a Dirava tamona ena amo e maimu heimodaina be so tahuamu, a? ⁴⁵Basi laloa lau sibogu ese baina habadelaimui Tamagu vairanai. Ihabadelaimui tauna na Mose, enai emui helaro vada o atoa. ⁴⁶Badina bema Mose vada o abiabiraiaimu, umui ese lau bavabiabiraigu, badina be ia ese lau sivaraigu vada e torea. ⁴⁷A bema umui ese iena toretore na asio abidaemu, egu hereva be ede bavabidae toma. Translation done by: Mr. Peter English on Wednesday (16/08/23), time: 9.04am. Ready for quality checking.

¹Ini gau muridiai, Iesu na ela Galileia Gohuna kahana, ladana ta be Tiberia Gohuna. ²Hari hutuma bada danu ia murinai, e raka badina idia ese e itaia toa haida e ita gorere taudia latadiai. ³Iesu na ororo ai e daradae bona unuseni ena hahediba memerodia ida e helai. ⁴(Hari Lagau Hanai ariana, Iudea taudia edia aria danu eme kahikahi), ⁵Iesu e gaga-isi neganai, hutuma bada e itadia ia dekena e maiva, ia ese Filipi eha-maroa eto, "Ita be edeseni aniani baita hoi idia na do bae aniani, a?" ⁶(A Iesu e hereva na Filipi baine tohoa badina Filipi na vada e diba ia be dahaka do baine kara). ⁷Filipi ese e haere henia eto, "Sinahu-rua dinadia penedia hegeregereana aniani gaudia mo baita hoidiamu, basine davanamu ediai bona sisi sisidia mo be animu. ⁸Ena hahediba merona ta ladana Anderea tadina be Simona Petero ese Iesu eha maoroa eto, ⁹"Meromero ta na mai ena parao ima bona gwarume rua, to ini be ede baita karadia tomamu ini taunimanima hutma padadiai, a?" ¹⁰Iesu eto, "Taunimanima iboudiai ba helaidia diho." (Hari una gabu ai na rei bada herea e vara). Bena taunimanima iboudiai e helai diho bona e duahidia iboudiai daha-ima. ¹¹Bena Iesu ese parao e abi, eha namodia murina e helai taudia iboudiai e henidia. Gwarume rua danu unu hetomana e karaia, aniani na e momo ediai. ¹²Taunimanima na bogadia e kunu neganai ia ese ena hahediba memerodia hamaorodia eto, "Aniani bahudia midia iboudiai na ba gogodia bona taina basine boio. ¹³Bena idia ese iboudiai e gogodia bona aniani bahudia na bosea gwauta-rua eha honudia; hari taunimanima ese e ani ore momorudia. ¹⁴Bena taunimanima ese ia e karaia toana e itaia neganai, idia eto, "Ina na momokani peroveta tauna daike be do bainema ina tanobada. ¹⁵Iesu na e diba idia na ia ba dabaia-tao bona edia hanua pavapava ai bae halaoa neganai, ia na idia edia amo e lasi ororo ma e lou henia. ¹⁶Hanua e boi neganai, ena hahediba memerodia na e diho davara kahana ela. ¹⁷Idia na vanagi ai e gui, bona davara amo Kaperanauma e lao henia. Gabu vada e dibura to Iesu na idia dekedia do sela. ¹⁸Lai badana ta e toa bona davara hurehure danu e bada. ¹⁹Idia na vanagi e baraia, soradia ima eiava tauratoi sisivana ai Iesu e itaia davara kopinai e raka idia dekedia e laova bona iboudiai e gari. ²⁰A ia ese e hamaorodia eto, Ina na lau! Asio gari! ²¹Bena e urava ia bae abiadae vanagi ai, bona nega tamona idia na e lao henia tanonai e gini dae. ²²Dina ai, taunimanima hutuma na e gini gohu kahanai idia ese vada e itaia vanagi haida na lasi to vanagi tamona mo to una avanagi tamonai Iesu na se gui, a ena hahediba memero sibodia mo e gui bona e lao siri. ²³Ede bamonai, Tiberia amo vanagi momo ema kahikahi hari ia ese parao Lohibada ese eha namoa bona e anidia gabuna. ²⁴Hutuma na hetahu amo e diba Iesu eiava ena hahediba memero na dia unuseni, idia na edia vanagi ai e gui bona ela Kaperanauma Iesu itahuna ela. ²⁵Gohu kahana ai idia ese e davaria murinai, eha maoroa eto, "Hahediba tauna e, edena negai ini oma, a?" ²⁶Iesu ese e haere henidia eto, "Momokani vaitani na hamaoromuimu, umui ese lau o tahugumu badina dia unu toa o itadia dainai, a badina umui ese unu parao o ani bona bogamui e kunu dainai." ²⁷Aniani e oremu gauna dainai basio gaukara, to aniani e miamu ela bona mauri hanaihanai dainai. Unu na Taunimanima Natuna ese do baine henimui badina be Tamada Dirava ese ia toana eme atoa oi emu ai. ²⁸Bena idia ese e nanadaia eto, "Ai be ede baia kara toma bona Dirava ena gaukara do baiama karadia, a?" ²⁹Iesu e haere eto, "Dirava ena gaukara binai: e siaia tauna na ba kamona henia." ³⁰Bena idia e henanadai eto, "Dahaka toa ta boma karaia bona ai ese baia itaia bona baia kamona henimu, a?" "Oi be dahaka bo karamu a?" ³¹Ai tamamai na manna e aniva tano gagenai. Vada e torea eto, "Ia ese guba amo aniani parao e heniva bae ani." ³²Bena Iesu ese e haere henidia eto, "Momokani vaitani na hamaoromuimu, Dia Mose ese aniani parao e henimuiva guba amo, a lau Tamagu ese aniani parao korikorina eme henimui guba amo. ³³"Badina be Dirava ena aniani na guba amo eme diho bona mauri eha-varaiamu ina tanobadai." ³⁴Bena idia ese Iesu e hamaoroa eto, "Lohiabada e, ina aniani na nega iboudiai ba henimai." ³⁵Iesu ese e hamaorodia eto, "Lau na mauri anianina, dekegu bainema tauna na do basine hitoloa bona daika lau e kamona henigumu tauna na do basine ranu mase diba. ³⁶A umui na na hamaoromuiva, una na momokani, umui ese vada eme itagu bona umui ese na asio kamona henigumu. ³⁷Daidia Tamagu ese e henigumu taudia iboudiai na lau dekegu do baema, bona daika lau dekegu bainema tauna na lau ese do basina tahoa lasi. ³⁸Badina be lau na guba amo name diho, dia lau egu ura hari baina karaia. ³⁹Ina na lau e siaigu tauna ena ura, lau na ta basina ha-boioa daidia be lau eme henigu, a lau ese do baina torea-isi nega dokonai. ⁴⁰Badina be ina na Tamagu ena ura, daika ese Natuna baine itaia bona baine kamona henia taudia iboudiai na mauri hanaihanai do bae abia bona lau ese do baine torea-isi nega dokonai. ⁴¹Bena Iudea taudia ese ia ena hereva dainai e maumau henia badina ia eto, "Lau na aniani guba amo name diho." ⁴²Bena idia na e hereva eto, "Ina Iesu na dia Iosepa natuna, ita na mai dibada tamana bona sinana be daidia, a?" "Edena dalai ia na harihari e gwaumu, "Lau na guba amo name diha a?" ⁴³Iesu ese e haere henidia eto, "Ena sibomui padamui ai o maumaumu na aha-dokoa." ⁴⁴Asi tauna ta lau dekegu na basinema ela bona Tamagu daika be lau e siaigu tauna ena amo baine henigu, bona lau ese do baina torea-isi nega dokonai. ⁴⁵Ini na peroveta herevadia vada e torea eto, "Bona taunimanima iboudiai na Dirava ese do baine hadibadibadia." E kamonaidia bona dibadia herevadia Dirava ena amo taudia iboudiai na lau dekegu e maimu. ⁴⁶Tau ta ese Tamada na do se itaia, to ia daika be Dirava ena amo - ia ese Tamada vada e itaia. ⁴⁷Momokani vaitani, na hamaoromuimu, e kamonaumu tauna ese mauri hanaihanai do baine abia. ⁴⁸Lau na mauri anianina. ⁴⁹Umui tamamui ese manna e aniva tano gagenai bona idia na e mase. ⁵⁰Ina aniani na guba amo eme diho, bona unu amo tau ta ese do baine ania na do basine mase. ⁵¹Lau na una mauri anianina guba amo name diho, bema tau ta ese ina aniani baine ania neganai, ia na do baine noho hanaihanai. Lau ese do baina henimui anianina, ina tanobada baine mauri dainai na lau hidiogu. ⁵²Bena Iuda taudia na sibodia e hepapa-ahuahu e gwauva, "Ina be edena dala ai ina tau na hidihona baine heni bona baita ania, a?" ⁵³Bena Iesu ese e hamaorodia eto, "Momokani vaitani na hamaoromuimu, umui ese Taunimanima Natuna hidihona basio ania bona rarana basio inua neganai umui sibomui ese mauri na basio abia." ⁵⁴"Lau hidihogu baine ania bona raragu baine inua tauna na mauri hanaihanai baine abia, bona do

baine tore-isi nega dokona ai. ⁵⁵Badina be lau hidihogu na una aniani korikori bona raragu ai na inuna korikorina. ⁵⁶Lau hidihogu baine ania bona raragu baine inua tauna na lau lalogu ai baine noho, bona lau danu ia lalonai. ⁵⁷Tamada e maurimu ese vada e siaigu, bona lau na maurimu badina be Tamada dainai, bona daika ese lau hidihogu baine abia, ia danu do baine mauri badina be lau daigu ai. ⁵⁸Ina na mauri anianina guba amo vada eme diho, dia tamamui ese e aniva bona e mase anianina. Ina aniani baine ania tauna na do baine mauri hanaihanai. ⁵⁹Iesu ese ini gau na e herevalaidia synagogue lalodiai eha hedibava negadai, Kaperanauma ai. ⁶⁰Bena ena hahediba momo ia murinai e rakava taudia ese ini hereva e kamonaidia bona eto, "Ia ena hahediba herevadia na auka, daika ese do baine abidia-dae toma, a?" ⁶¹Badina be Iesu na sibona e diba waitani ini hahediba memero edia maumau bona ia ese e hamaorodia eto, "Ini ese eha hekwakwanaimuimu, a?" ⁶²Bena ina na dahaka, bona umui ese Taunimanima Natuna ba itaia baine dae guba ai guna e nohova gabuna, a?" ⁶³Ina na Lauma daika be mauri e havaraiaumu hidiho na gau ta se namolaiaumu. Ini name herevalai henimui na lauma herevadia, bona idia na e maurimu. ⁶⁴A doini umui haida ese in hereva na asio kamonaumu. "Badina be Iesu na matamanai vada e diba daidia be ini hereva na basie kamonaidia bona daika be ia taona do baine tore. ⁶⁵Bena ia eto." Bena una dainai lau ese na hamaoromuimu tau ta lau dekegu basinema ela bona Tamagu ese baine duanaia tauna mo. ⁶⁶Badina be una dainai, ena hahediba memero momo na e rakatania bona murinai danu asie raka. ⁶⁷Bena Iesu ese ena hahediba memerodia gwauta ruaosi eha maorodia eto, "Umui danu asio uramu ba raka oho, a?" ⁶⁸Simona Petero e haere eto, "Lohiabada e, ai be ma daika dekena baiala, a? Mauri hanaihanai hereva-dia na oi emu ai mo, ⁶⁹ai ese ame kamonaidia bona ama ame diba oi na Dirava ena Helaga Tauna. ⁷⁰Iesu ese e hamaorodia eto, "Lau ese umui gwauta-ruaosi na asi na daunaimui bona umui ta na diabololo, a?" ⁷¹Ia na Iuda Simona Isakariota natuna, badina be ina na ia gwauta ruaosi padadai daika be Iesu taona baine torea. Translator: Ret/Dk. Lohia Gari Completed on Thursday (29/05/23), time: 3.45 pm. Ready for quality checking

7

¹Ini gau muridiai Iesu na ela Galileia asine ura Iudea lalonai bainela badina Ida taudia be ia ihamasena dalana e tahuava. ²Hari Iudea taudia edia Kalaga Ariana eme hori. ³Tadikakana ese e hamaoroa eto, "Ina gabu na ba rakatania, bona Iudea aola bona emu hahediba memerodia ese oi o karamu gaudia na do ba itadia. ⁴Badina tau ta na hehuni ai basine gaukaramu, bema ia sibona na e uramu hutuma ese ba dibaia neganai. Bema oi na ini gau ba karadia sibomu ba hedinarai ina tanobadai. ⁵Badina ia tadikakana ese danu ia na asie hamomokaniva. ⁶Una dainai Iesu ese e hamaorodia eto, "Lau egu nega na do asine kau, a emui nega na hora iboudiai e horimu. ⁷Ina tanobada ese umui na asine inai henimuimu, a lau e inai henigumu, badina be lau ese na herevalaia hedinaraimu e karamu karadia na didika. ⁸Umui hari una aria ba laohenia, lau na basinala una aria badina egu nega na do asine ginidae. ⁹Ini hereva e gwaurai murinai ia na e noho Galileia ai. ¹⁰A ia tadikakana na una aria e laohenia murinai ia danu hehuni ai ela ta na asine diba. ¹¹Hari Iudea taudia be una aria lalonai ia e tahuava bona e tomava, "Ia be edeseni ai a?" ¹²Hutuma bada na e maumauva ia dainai. Haida eto, "Ia na tau namoa. ¹³A haida eto, "Lasi, ia ese taunimanima e hakarohodia roho-rohomu." ¹⁴Una aria ena doko e kahiva lalonai, Iesu na dubu helaga ela bona e hahediba matama. ¹⁵Iudea taudia na e hoa bona eto, "Ina tau ese buka helaga herevadia be ede e diba toma badina ia na asi ena diba tauna, a?" ¹⁶Bena Iesu ese e haere henidia eto, Lau egu hahediba herevadia na dia lau egu a lau e siaigu tauna ena amo. ¹⁷Bema tau ta na e uramu ia ena ura baine kara, ia ena hahediba herevadia na do baine dibadia una na Dirava ena amo eiava lau sibogu egu hereva. ¹⁸Sibona ena hereva e gwauraimu tauna na sibona hairaina e tahuamu tauna, a daika tau na e siaia tauna ena hairai e tahuamu na tau momokanina bona ia enai na kara kerere-kerere ta lasi ia lalonai. ¹⁹"Mose ena taravatu asie henimui, a? A doini taravatu na asio badinamu. ²⁰"Dahaka dainai umui ese lau iha-masegu daladia o tahumu, a?" ²¹Taunimanima e haere eto, "Oi na lauma dika emu ai. ²²Daika na oi ihamasemu daladia e tahumu, a?" ²³Iesu ese e haere henidia eto, "Lau ese kara ta na karaia bona umui na o hoa una kara dainai. ²⁴Una dainai Mose ese e peritomemui, (una na dia Mose ena amo a tubumui edia amo) bona tau ta na Dina Helaganai baine peritome. ²⁵Bema tauta na Dina Helagana ai peritome baine abi una na Mose ena taravatu asio hamakohiamu neganai, dahaka dainai lau o badu henigumu badina lau ese tauta na hagoevaia guguru Dina Helagana ai, a?" ²⁶Basio hahemaoro emu roharoha dainai, a ba hahemaoro maoromaoro. ²⁷Bena haida na Ierusalema amo ema eto, "Ina tauna dia ia hari umui ese o tahuamu do ba hamasea a?" ²⁸Aitaia ia na e hereva hedinaraimu, bona idia na hereva ta asie gwauraimu. Hegunalai taudia na momokani ina tau na Keriso, a?" ²⁹A ita na mai dibada ia be ede amo ema. To Keriso bainema neganai tau ta na basine diba ia be ede amo ema. ³⁰Bena Iesu na dubu lalonai e tai lolo, e hahedibava bona e hereva eto, "Umui na mai dibamui lau bona ede amo nama. Lau na dia sibogu nama, a lau e siaigu tauna na momokani, a umui na asi dibamui. ³¹Lau na mai diabagu ia badina be lau na ia ena amo nama bona ia ese e siaigu. ³²Una dainai idia na e urava ia bae dabaia tao ta ta imana enai asine kau ia bae abia, badina ena nega do se kau dainai. ³³A haida una hutuma lalonai ese e hamomokania bona eto, "Keriso do bainema neganai, ia na toa momo do basine kara, ina tau ese eme kara hegeregere baine kara a?" ³⁴Farasia taudia na e kamona taunimanima ese hereva maragi ai Iesu e herevalaia bona helaga taudia bona Farasia taudia ese dubu gaukara taudia haida e siaidia Iesu bae dabaia tao. ³⁵Bena Iesu eto, "Lau na doini ina hora sisina lalonai, bona bainala e siaigu tauna dekena. ³⁶Umui ese do ba tahugu, to do basio davarigu, bona lau bainala gabuna, umui na do basima diba. ³⁷Iudea taudia na sibodia e hereva heheni eto, "Ina tau be edekaha belamu bona ita ese na basita davariga dibamu, a?" ³⁸Ina hereva anina be dahaka eto, "Umui ese ba tahugu do basio davarigu, bona lau bainala gabuna umui na do basima, a?" ³⁹Hari una aria dinana orenai, Iesu na e gini tore bona e tai lolo eto, "Bema tau ta na ranu ese e masea, dekegu ainema

lau egu ai ranu baine inu.³⁸ Lau e hamomokanigumu tauna na Buka Helaga ai e torea hegeregereana e gwaumu mauri ranuna sinavaidia na bogana amo baine aru lasi.³⁹ A ia ena hereva na Lauma e gwauraiava daidia be ia e hamomokaniamu taudia ese do be eabiamu, badina Lauma na do se heni bona Iesu na una hairai na do se abia.⁴⁰ Bena taunimanima haidia ese ini hereva e kamoni neganai, eto, "Momokani ia na peroveta tauna."⁴¹ Haida be eto, "Ina na Keriso". A haida na eto, momokani Keriso na Galileia amo basinema diba, a?"⁴² Buka Helaga ai asine torea eto, "Keriso na Davida garana amo do bainema bona Betelehema amo, Davida e nohova hanuana a?"⁴³ Bena taunimanima padadiai haheparara vada e vara, badina be Iesu dainai.⁴⁴ Bena haida na e urava ia ba dabaia-tao to imadia ia enai ta se kau.⁴⁵ Bena Itorena taudia bona Farasia taudia ese e siaidia taudia na nanadaidia eto, "Dahaka dainai una tau na asio abia asio o mailaia a?"⁴⁶ E siaidia taudia na e haere eto, "Ia e hereva e herevalaiva daladiai na asie herevalai diba."⁴⁷ Bena Farasia taudia ese e haere henidia eto, "Umui danu ia ena hereva ese basieme hakaumu kerere a?"⁴⁸ Lohia taudia ese eiava Farasia taudia ese ia e abiabiraianu a?"⁴⁹ A taunimanima hutuma taravatu asi dibadia taudia na eme gwau-tubudia.⁵⁰ Nikodem (Farasia tauna ta Iesu dekenela) ese e hamaorodia eto,⁵¹ Ita eda taravatu ai taunimanima ta na asine hahemaoro henia gunamu, a ena hereva be do asie hakalaia bona asie dibamu ia be dahaka e kara una unu e torea toma a?"⁵² Idia ese e haere henia eto, Oi danu dia Galileia amo a?" Ba tahua bona ba itaia peroveta tauna ta na Galileia amo ema."⁵³ Bena idia na ta ta edia ruma e lou henidia. Translation done by: Ret/Dk. Lohia Gari on Wednesda (16/08/23), time: 7.47am. Ready for quality checking.

8

¹Iesu na olive ororona ela. ²Daba matana ai ia na dubu e lou lao, bona taunimanima iboudiai ema, Ia na e helai diho bona e hadibadia. ³Itorena taudia bona Farasea taudia ese hahine ta dekenela e laohaia heuda hanai ai e davaria. Idia ese bogaragidia ai e haginia. ⁴Bena Iesu e nanadaia eto, "Hahediba tauna e, ina hahinena na heuda-hanaina ai vada a davaria. ⁵Hari ina taravatu lalonai, Mose ese vada e hagamai unu bae kara toma taunimanima dia na nadi ai ba hododia mase; Oi be dahaka o tomamu ia enai?" ⁶Idia na unu e hereva toma na ia bae dibagania bona bae habadelaia, a Iesu na e igo diho bona tano ai e toretore imana kwakikwakina amo. ⁷Ida ese e nanadaia loulou, ia na e toreisi bona e hamaorodia, eto, "Umui ta bogaragimui ai asi ena kara dika, ia ese nadi matamana baine tahoa ina hahine baine hodoa." ⁸Bena ma e igo diho, bona tano ai e toretore imana kwakikwakina amo. ⁹Idia ese ena hereva e kamoni ai, ta ta amo e raka lasi varaguna amo e matamaia. Bena Iesu sibona mo e noho, hari bogaragai e gini hahinena ida. ¹⁰Iesu ma e tore isi bona e nanadaia eto, "Hahine e, hari e hahebadelaimu taudia be edeseni ai? Ta ese e hadikamu a?" ¹¹Hahine na eto, "Lohiabada e asi tauna," Iesu eto, "Lau ese danu asi na hadikamumu. Aola basio kara dika lou." ¹²Bena Iesu ese e haroro henidia, lou eto, "Lau na tanobada diarina, daika murigu ai baine raka tauna na dibura lalonai basine loa, a mauri diarina do baine abia." ¹³Farisea taudia ese e hereva henia eto, "Oi na sibomu o hegwaauraimu, emu hegwaaurai na dia momokani." ¹⁴Iesu e haere bona e hamaorodia eto, "Enabe sibogu na hegwaauraimu, to egu hegwaaurai na momokani. Badina lau na mai dibagu ede amo nama bona ede bainala danu dibagu, a ede amo nama bona ede bainala umui na asi dibamui." ¹⁵Umui na taunimanima edia hahemaoro dalana ai o hahemaoromu, lau ese ta asi na hahemaoro heniamu. ¹⁶Bena bama hahemaoro, edeheto, egu hahemaoro bema momokani badina lau na dia sibogu, a Tamagu e siaigu tauna ese e bamogumu. ¹⁷Emui taravatu ai ini e torea toma taunimanima rarua hereva tamona bae gwaurai hebou una na vada momokani. ¹⁸Lau na sibogu na hegwaauraimu, bona Tamagu e siaigu Diravana ese e gwauraimu. ¹⁹Una dainai idia ese e nanadaia eto, "Tamamu be ede seniai?" Iesu e haere eto, "Umui na asi dibamui lau eiava Tamagu danu asi dibamui, boma diba lau, Tamagu danu boma diba." ²⁰Unu hereva be Iesu ese moni ihabouna gabuna ai e gwaurai, dubu helaga lalonai e hahedibava negana ai, bona tau ta ese se dabaia tao badina be ena nega na do se kau. ²¹Iesu ese ma e hereva henidia, eto, "Lau na dauha bainala, bona umui ese ba tahugu bona emui kara dika ai vada ba mase. Ba laomu gabuna, umui na basio mai dibamu." ²²Bena Iuda taudia e henanadai heheni eto, "Ina ia be sibona baine heala a? Una dainai e tomu "Bainala gabuna umu na basioma diba?" ²³Iesu ese ma hamaorodia eto, "Umui na henu amo, Lau na atai amo. Umui na tanobada taumui; Lau na dia tanobada taugu. ²⁴Una dainai, na hamaoromui nato emui kara dika ai vada ba mase. Badina ela bona umui ese lau bavabiabiraigu, emui kara dika ai vada ba mase." ²⁵Bena idia ese una dainai e nanadaia eto, "Oi na daika?" Iesu ese e hamaorodia eto, Lau be dahaka na herevalai henimuiva matamana negana amo. ²⁶Lau na herevamui diagau do baina gwaurai bona baina hahemaoro henimui danu. Gau tamona, e siaigu Diravana na momokani; bona iena amo na kamoni herevadia na tanobada na hamaorolaiamu." ²⁷Idia na lalodia asie parara ia ese Tamana e herevalaiva. ²⁸Bena Iesu ma eto, umui ese Taunimanima Natuna ba piua isi negana ai vada ba diba LAU NA IA, bona kara ta danu sibogu asi na karaianu, a Tamagu ese e hadibagumu hegeregereana ai na herevamui. ²⁹E siaigumu Diravana ese e bamogumu, bona ia ese se rakatanigu, badina be iena ura karadia nega idoidiai na karamu. ³⁰Ini hereva e gwaurai negana ai hutuma ese eabiabiraia. ³¹Bena Iesu ese Iuda taudia ia eabiabiraia e hamaorodia eto, umu ese egu hereva ba badinaia bona egu hahediba korikori ai baola, ³²bona hereva momokani danu badibaia, bona hereva momokani ese baine ruhamui nege." ³³Idia na e haere eto, "Ai na Aberahamo garana bona ai na tau ta isiaina asi a laoheni, edeheto oi na o tomu, baia heruha nege?" ³⁴Iese ese e haere henidia eto, "Momokani, momokani, na hamaoromui kara dika taudia na dika ese e guidiamu. A idia na dika isiaina e lao henimu. ³⁵To hesiai tauna na ruma ai se noho hanaihanaimu, natuna hari ruma ai e noho hanaihanaimu. ³⁶Una dainai, bema natu ese baine ruhamui nege, umu na ba heruha nege momokani. ³⁷Lau mai dibagu umui na Aberahamo garana, to umui na ouramu bavalagu badina be egu hereva na asio abia daemu. ³⁸Lau na tomu, Tamagu enai na itava gaudia na gwauraimu; una dainai umu ese tamamui enai o kamonaiva gaudia o karamu." ³⁹Idia ese

e haere henia eto "Ai Tamamai be Aberahamo." Iesu eto, bema umui na Aberahamo natuna, umui na Aberahamo ena kara boma kara.⁴⁰ A harihari ouramu bavalagu hereva momokani Dirava enai na kamonaiva na gwaurai henimuimu taugu. Aberahamo na unu se kara toma.⁴¹ Umui ese tamamui ena kara ba kara. Idia eto, "Ai na dia ariara natudia, ai tamamai na tamona, Dirava mo."⁴² Iesu ma eto, Tamamui bema Dirava umu ese lau boma lalokau henigu, badina be Dirava ena amo nama bona lau binai, badina be lau na sibogu asi nama to ia ese e siaigu.⁴³ Dahaka dainai egu hereva lalomui se pararamu? Ina na badina umui ese egu hereva so kamonaumu.⁴⁴ Umui na tamamui diabolou, ena amo oma, bona ouramu tamamui ena hegahusi karadia ba kara. Ia na matamana amo ala-ala tauna bona hereva momokani se badinaumu badina be ia lalonai hereva momokani na lasi. Ia na hereva koikoidia e gwauraimu neganai, ena kara korikori na bunai badina ia na koikoi tauna bona koikoi idoidiai tamadia.⁴⁵ Doini, badina be hereva momokani na gwauraimu, umui ese na asio abidaemu.⁴⁶ Umui daika ese kara dika vada egu ai o davaria? Bena hereva momokani na herevalaiamu, dahaka dainai asio abigudaemu?⁴⁷ Daika Dirava ena amo ema tauna ese Dirava ena hereva e kamonaumu, badina be ini gau daidiai umui na asio kamonaumu, badina umui na dia Dirava ena amo oma."⁴⁸ Bena Iuda taudia ese e haere henia bona eto, "Emai hereva be dia maoro ato oi na Samaria tauna bona lauma dika ese e bolomu a?"⁴⁹ Iesu e haere eto, "Lau na lauma dika ese se bologu, lau ese Tamagu na matauraumu, bona umui ese lau asio matauraigumu."⁵⁰ To lau ese hairagu asi na tahuamu; ta ese e tahuamu bona hahemaoro e karamu.⁵¹ Momokani, momokani, na hamaoromuimu, bema ta ese egu hereva baine badinaia na basine mase diba." (mase na basine e itaia)⁵² Bena Iuda taudia eto, "Harihari vada ame diba momokani lauma dika ese vada e bolomu, Aberahamo bona peroveta taudia vada e mase; a oi na o tomamu, bema ta ese lau egu hereva baine badina na basine mase diba."⁵³ Tamada Aberahamo vada e mase, o hereaiamu a? Peroveta taudia danu vada e mase. Oi be daika?"⁵⁴ Iese e haere eto, " Bema sibogu bama heimodai, egu heimodai na asi anina, Ina na lau Tamagu ia ese e imodaigumu - umui o tomamu ia na umui emui Dirava."⁵⁵ Umui na asi dibamui ia, a lau be mai dibagu. Bema lau bama toma, 'Lau na asi dibagu ia,' bama koikoi, umui hegeregereumu. Edeheto, lau na mai dibagu bona ena hereva na badinaumu.⁵⁶ Tamamui Aberahamo na e moaleva lau egu nega baine itaia, bona e itaia mai lalo-namona (moalena) ida."⁵⁷ Una dainai Iuda taudia ese e hamaoroa eto, Oi laganimu na do dia imahui, bona oi ese Aberahamo vada o itaia a?"⁵⁸ Iesu ese e hamaorodia eto, "Momokani, momokani, na hamaoromuimu, Aberahamo do sevara lau be vada na nohova."⁵⁹ Bena idia ese nadi eabi ia ba hodoa, a Iesu na e komu bema dubu amo e raka lasi.RDKH. ORI KOHU ESE E HAGUGURUA, DINANA: WED (24/07/24), TIME: 8.00 AM.

9

¹Iesu na raka hanaina ai tau ta e itaia matana kepulundia ai e vara. ²Bena ena hahediba ese e nanadaia, eto, Rabi e, daika ena kara dika dainai ina tau matana kepuludia ai e vara? Ia eiava tamana sinana?³Iesu e haere eto, "Dia ina tau eiava tamana sinana edia kara dika dainai, to Dirava ena gaukara siahuna iena amo baine hedinarai. ⁴Lau e siaigu Diravana ena gaukara dinai baita kara hanua baine boi ta basine gaukara diba. ⁵Tanobada ai na nohomu negana ai lau na tanobada diarina.⁶Unu e gwau toma murinai bena tano ai e kanudi, kanudina amo kopukopu e manea, bena mata-kepu tauna matana e dahu laidia. ⁷Bena e hamaoroa, eto, "Aola Siloama gohuna ai ba huria. (Siloama anina na "siaia"). Una dainai ia na ela e digu, bena e lou ema matana vada e papa.⁸Bena dekena taudia bona vaevae e noi hegameva ai e itaiva taudia e henenadai, eto, Ina na vanegai e helaiva e noi hegameva tauna eiava? ⁹Haida eto, gauna bunai. Ma haida eto, Lasi, ina na ia ida-idana. Ia sibona eto, Lau binai. ¹⁰Bena idia ese e nanadaia, eto, Matamu ede e papa toma? ¹¹Ia e haere, eto, Tau ta ladana Iesu, ese kopukopu e manea, matagu e dahudia bena e hamaorogu, eto, "Aola, Siloama gohuna ai ba digu." Nala na ha digu bena matagu vada e papa. ¹²Bena idia ese ma e nanadaia, eto, Ia be edesenai ai? Ia eto, Asi dibagu. ¹³Idia ese hari matana e papa tauna na Farasea taudia dekedie e hakaua lao. ¹⁴Iesu ese kopukopu e manea bona una tau matana e hapapa dinana be Dina Helaga. ¹⁵Una dainai, Farasea taudia ese e nanadaia, matana ede e papa toma. Ia eto, Ia ese matagu kopukopu amo e dahu, na huri, bena matagu vada e papa. ¹⁶Bena Farasea taudia haida eto, "Ina tau na Dirava ena amo sema badina ia ese Dina Helaga se badinaumu. "Haida eto, "Ede bamonai kara dika tauna ta ese toa unuhetomadia baine kara? Unu amo edia hegogo vada e haheparara. ¹⁷Bena idia ese mata-kepu tauna ma e nanadaia lou eto, "Oi matamu na ina tau ese e hapapa oi ese be ede o gwaurai tomamu? Mata-kepu tauna e haere eto, " Ia na peroveta tauna."¹⁸ Iuda taudia hari tau matana vada e kepu guna gabeai e papa herevana asie abia dae ela bona idia ese tamana sinana e boiridia.¹⁹ Bena tamana sinana e nanadaidia eto, "Ina mero be umu natumui a? Matana kepuluna ai e vara o tomu a? O ede bamonai matana vada e papa? ²⁰Bena tamana sinana e haere eto, "Ai dibamai natumai bina matana kepuludia ai e vara. ²¹To harihari matana ede e papa toma, ai na asi dibamai, bona daika ese matana e hapapa, ai na asi dibamai. A nanadaia, ia na bada. Sibona baine hereva."²² Tamana sinana unu e gwau toma badina Iuda taudia garidia e gari. Badina be Iuda taudia na vada e gwaubou bema tau ta ese baine gwaurai Keriso, ia na dubu amo bae tahoa lasi. ²³Una dainai tamana sinana eto, "Ia na bada, ba nanadaia."²⁴ Bena idia ese mata-kepu tauna nega iharuana ma e boiria lou, bena e nanadaia eto, "Dirava ba heatolaia. Ai na vada dibamai una tau na kara dika tauna."²⁵ Ia e haere eto, "Lau asi dibagu ia na kara dika tauna eiava lasi. Gau tamona dibagu, matagu na kekepu, to hari eme papa. ²⁶Bena idia ese ma e nanadaia lou eto, Ia ese oiemu ai dahaka e karaia?Matamu be ede e hapapa toma? ²⁷Ia e haere, eto, vada na hamaoromui vaitani, to asio kamonaumu! Dahaka dainai umui na o uramu ma kamona lou? Umui danu iena hahediba ai baola o tomamu a?"²⁸ Bena idia ese e gwau dika henia eto, "Oi hari iena hahedia, A ai na Mose ena hahediba. ²⁹Ai na dibamai Dirava ese Mose e hereva henia, a una tau be ede amo ema asi dibamai.³⁰ Matana e papa tauna ese e haere henidia, eto, lau na name hoa, badina be asi dibamui ia na ede amo ema, a ia ese lau matagu e hapapa. ³¹Ai dibamai Dirava ese kara dika

taudia ere dia se kamonaumu, to ena ura karadia e karamu tauna hari erena e kamonaumu.³²Tanobada matamana amo ta ese matana kepuludia ai e vara tauna ta matana e hapapa sivaraina asita kamonaui. ³³Bema ina tau na Dirava ena amo basinema mai, ia ese gau ta basinema karaia diba. ³⁴Idia ese e haere henia, bema eto, Oi na kara dika ai o vara, bema oi ese ai o hadibamaimu? Bema e tahoa lasi murimuri ai. ³⁵Iesu na e kamonaui idia ese vada e lulua lasi dubu amo. Bema Iesu ese e davarua e nanadaia, eto, Oi ese Dirava natuna o abiabiraiaumu a?" ³⁶Ia e haere bema eto, ia be daika, Lohiabada e, bema baina abiabiraia?" ³⁷Iesu ese e haere henia eto, "Vada ome itaia, bona ia na ina harihari e hereva henimumu." ³⁸Bema ia eto, "Lohiabada e, vada name kamonaui," bema ia ese e toma henia diho. ³⁹Iesu eto, Hahemaoro totona ina tanobada nama una dainai mata-kepulu taudia na mailaidia matadia bae papa bona mata-papa taudia na matadia bae kepulu." ⁴⁰Farasea taudia haida na ia dekenai bema idia ese una hereva e kamonaui bema e nanadaia eto, "Ai danu matamai kekepulu a?" ⁴¹Iesu ese e haere henidia eto, "bema matamui kepulu, asi emui kara kerere, to umui na o tomu, 'Ai na mata-papa taumai,' una dainai emui kerere na mia." Translation done by: Rev. Eiwana Zecharaias on Wednesday (29/08/23), time: 3.30pm. Ready for quality checking.

10

¹Momokani vaitani, na hamaoromuimu, tau ta mamoe edia magu ikoukouna amo asine vareaimu, to dala idauna ta amo e vareaimu, una tau na henaona bona dadidadi tauna. ²A tau ta ikoukou amo e raka vareaimu tauna na mamoe iregudia tauna. ³Ikoukou inarina tauna ese ikoukou e kehoamu ia ena mamoe veridia ese erena e kamonaumu, ladadia e boiridiamu ia ena bona ia ese eha-kaudia lasimu. ⁴Ena mamoe na eha-kaudia lasimu neganai, ia ese e gunalaidiamu bema ena mamoe seridia na ia murina ai e rakamu badina ia erena na mai dibadia. ⁵A idia na idau tauna ta murinau basie raka, a ena amo bae raka-oho, badina ina idau tauna erena na asi dibadia. ⁶Iesu ese sivarai hegeregereana ai e hamaorodia, to idia na asie diba ia be dahaka e gwaurai henidia. ⁷Bema Iesu ese ma e hamaorodia lou eto, "Momokani vaitani, na hamaoromuimu lau na una mamoe seridia edia ikoukou. ⁸Lau vairagu ai vada ema taudia iboudiai na henaona bona dadidadi tauna, to mamoe seridia ese asie kamonaui henidia. ⁹Lau na ikoukouna. Bema tauta na lau egu amo baine raka vareai, ia na do baine mauri bona egu amo baine raka vareai bona baine raka lasi bona laga-ani do baine davarua. ¹⁰Henaona tauna na asine mai kavamu, to e maimu baine henaona bona ala-ala, bona hahebuatari totona. Lau na nama bema idia na mauri do bae abia bona mauri bae abia lavadae helaoreana. ¹¹Lau na mamoe iregudia tauna. Mamoe iregudia tauna namona ese ena mauri e atoa dihomu ena mamoe seridia dainai. ¹²A hesiai tauna mai davana na dia mamoe iregudia tauna bona unu mamoe seridia na dia ia ena. Una tau na uda sisiana e itaiamu e maimu neganai mamoe na e rakatanidiamu, e heau boiomu bona uda sisiana ese mamoe eha-kaudia ohomu bona eha-karohodia rohorohomu. ¹³Ia na e heau boiomu badina ia na hesiai tauna mai davana bona mamoe na asie regudiamu. ¹⁴Lau na mamoe iregudia tauna namona bona mai dibagu idia na lau egu, bona lau egu dainai mai dibadia lau. ¹⁵Unu hetomana danu, Tamagu na mai dibana lau bona lau na mai dibagu Tamagu, bona egu mauri na atoa-dihomu ini mamoe serina daidiai. ¹⁶Lau na mamoe seridia haida danu mai egu, idia na dia ina mamoe maguna ai. Lau ese danu baina mailaidia, idia ese eregu do bae kamonaui, bona seri ba tamona bona iregudia tauna danu tamona. ¹⁷Una dainai Tamagu ese lau e lalokau henigumu, egu mauri baina atoa-diho bema ma baina abia-lou. ¹⁸Tau ta ese lau egu amo basine abia-oho to sibogu ese baine atoa diho. Egu mauri baina atoa diho maorona na lau egu ai bona baina abia lou maorona na lau egu ai. Ina hahegani na Tamagu ena mo vada na abia. ¹⁹Ini hereva daidia Iuda taudia padadiai hahe-parara lou. ²⁰Badina be idia momo na eto, "Ia na lauma dika ta ese e rohea, bona eme kavaia. Dahaka umui ese ina tau o kamonaui heniamu, a?" ²¹Haida e hereva eto, "Ini na dia lauma dikana ese e rohea tauna ena hereva. Lauma dikana na asi ena diba mata kepulu taudia matadia baine hapapa, ia ese hari ani?" ²²Bema Dubu ihahelagana neganai, Ierusalem ai na paraka negana, ²³bona Iesu na dubu lalonai, Solomona ena dehe ai e rakava. ²⁴Bema Iudea taudia ese e ginia-hegege bona e hamaoroa eto, "Oi ese daradara lalonai oha-nohomaimu, ela bona edena nega ba-hadibamai a? Bema oi na Keriso mani a hamaoromai hedinarai. ²⁵Vada na hamaoromui, to umui ese na asio hamomokani. Egu gaukara na Tamagu ladanai na karamu, ini ese e gwauraiagu hedinaraimu." ²⁶"To doini umui ese na asio hamomokanigumu. Badina umui na dia lau egu mamoe. ²⁷Lau egu mamoe na lau eregu e kamonaumu. Lau na mai dibagu idia bona murigu ai e rakamu. ²⁸Lau ese mauri hanaihanai na henidiamu, bona momokani idia na do basie mase, bona ta ese basie kokidiamu imagu amo. ²⁹Lau Tamagu daika be ia ese idiana lau e henigu na haida iboudiai e hereadia. Tamagu imana amo ta ese basine kokidia oho diba. ³⁰Lau bona Tamagu na tamona." ³¹Bema Iudea taudia na nadi eabi e urava ia bae hodoa. ³²Iesu ese e haere henidia eto, "Lau ese Tamagu ena amo kara namodia momo name haheita-lai henimui. Badina be dahaka ini ededia gaukara amo umui ese lau nadi ai ba hodogu, a?" ³³Iudea taudia e haere eto, "Ai na oi baia hodomu na dia ini gaukara namodia dainai, a Dirava o hadikaiaumu dainai, bona badina oi na taunimanima mo, sibomu Dirava ai o hegauraimu. ³⁴Iese ese e haere henidia eto, "Emui taravatu ai ini asie torea toma. "Umui na dirava, a?" ³⁵Bema ia ese e gwauraidia dirava daima be ina hereva na Dirava ena amo ema (bona hereva helaga na basio hamakohidia), ³⁶umui na vada ia o gwauraiamu daika be Tamana e abia oho bona ina tanobada e siaia mai o gwauraiamu. "Oi na Dirava o hadikaiaumu badina lau natomu lau na Dirava Natuna a?" ³⁷Bema lau na Tamagu ena gaukara asina karadiamu neganai, lau na basio hamomokanigu. ³⁸A, bema lau ese na karadiamu, enabe launa asio hamomokanigumu neganai, ini gaukara na ba hamomokani bema unu amo ba diba bona ba lalo-parara una na Tamagu lau lalogu ai, bona lau na Tamagu lalonai. ³⁹Una dainai idia na e urava ia mo bae dabaia tao lou to ia na idia imadia amo e raka oho. ⁴⁰Bema ia na e raka oho ela Ioridaena kahana Ioane e bapatiso matam gabua ela bona unuseni ai e nohova. ⁴¹Taunimanima hutuma danu ia dekena ema, bona idia eto, "Momokani, Ioane na toa ta asine karaia to Ioane

ese ina tau e herevalai gaudia iboudiai na momokani. ⁴²Bena unuseni aitaunimanima momo herea ese eha-momokania. Translation done by: Ret/Dk. Lohia Gari on Wednesday (19/07/23), time: 3.45 am. Ready for quality checking.

11

¹Hari tau ta ladana Lasaro na vada e gorerea. Ia na Betani hanuana amo, Maria bona kakana Mareta edia hanua. ²Una Maria be muramura mai bonana namona amo Lohiabada e dairia bona huina amo aena e dahudia, ia tadikakana Lasaro vada e gorere. ³Bena hahine raruosi ese Iesu boiboia e kara, e tomu, "Lohiabada e, aitaia, emu lalokau tauna vada e gorerea." ⁴A Iesu e kamoni neganai, ia eto, "Ina gorere na dia mase gauna, a ina na Dirava hairaina dainai unu amo Dirava Natuna do bae haheatolaia." ⁵Hari Iesu ese Mareta bona tadina Maria bona Lasaro na e lalokau henidiava. ⁶Ia e kamoni Lasaro vada e gorerea neganai, Iesu na momokani dina rua ma e noho una e nohova gabunai. ⁷Bena gabeamo, hahediba e hamaorodia, eto, "Iudea ma aita lou lao." ⁸Hahediba ese e hamaoroa, eto, "Rabi e, ina harihari Iudea taudia na e uramu oi nadi amo bae hodomu, bona oi ma unu bo lou laomu, a?" ⁹Iesu e haere, eto, "Dina ta ena hora be dia gwauta rua, a? Bema tau ta na dina-horana ai e rakamu, ia na basine hekwakwanaimu, badina be ia na ina tanobada diarina amo e itamu." ¹⁰Ede bamona, bema tau ta na hanuaboi ai e rakamu, ia na baine hekwakwanai badina be diari na dia ia lalonai." ¹¹Ini gau e gwaurai, bona gabeamo, (ini gau muridai) ia ese e hamaorodia eto, "ita turada Lasaro na vada e mahuta, a lau na laomu na ia mahuta amo baina haoa dainai." ¹²Una dainai, hahediba ese e hamaoroa, eto, "Lohiabada e, bema ia na vada mahuta, ia na do baine noga." ¹³Hari Iesu ese ena mase e herevalaiava, a idia edia lalohadai ia na mahuta laga-anina e hereva laiava. ¹⁴Una dainai Iesu ese e hamaorodia namonamo, eto, "Lasaro na e mase." ¹⁵Lau na, umui daimui ai na moalemu, lau na dia unuseni ai, unu amo umui danu bavabidadama. A aitala ia dekena. ¹⁶Bena Toma, ladana e tomava Hekapa, ese bamona hahediba e hamaorodia, eto, "ita danu aitala, unu amo Iesu ida baita hamase hebou." ¹⁷Una dainai, Iesu ema neganai, ia vada e diba Lasaro tau-anina na dina hani gara lalonai e mia. ¹⁸Hari Betani na Ierusema kahanai, edia daudau na maela rua hegeregere. ¹⁹Iudea taudia hutuma ema Mareta bona Maria dekedie, taudia ihalodia taihudia e mase dainai. ²⁰Bena Mareta, e kamoni Iesu bainema neganai, vada ela baine hedavari henia, a Maria be ruma lalonai helai. ²¹Bena Mareta ese Iesu vada e hamaoroa eto, "Lohiabada e, bema oi na vada iniseni ai, lau taihugu na basinema mase." ²²To ina harihari, lau na mai dibagu oi dahaka Dirava enai bo noiambu, ia ese na be henimumu. ²³Iesu ese e hamaoroa eto, "oi taihumu na baine tore-isi lou." ²⁴Mareta ese e hamaoroa eto, "Mai dibagu, ia na do baine toreisi-lou nega dokona toreisi-lou lalonai." ²⁵Iesu ese e hamaoroa eto, "lau na toreisi-lou bona mauri; daika ese lau eabiabiraigumu tauna enabe ia na baine mase, ia na do baine mauri;" ²⁶bona e maurimu bona eabiabiraigumu tauna na basine mase, lasi ona lasi vaitani. Oi ese egu hereva o abidaemu, a? ²⁷Ia ese e hamaoroa eto, "Oibe, Lohiabada, na abiadaemu oi na Keriso, Dirava Natuna, tanobada ai do bainema tauna." ²⁸Ia ini e gwautoma murinai, ia na ela bona taihuna Maria mo e boiria hehuni. Ia ese e hamaoroa eto, "Hahediba Tauna na vada ema bona ia na oi e boirimumu." ²⁹Iesu na hanua lalonai do se raka vareai a ia na dounu Mareta ida e hedavari gabunai noho. ³⁰Bena, Iudea Taudia, ia ida ruma lalonai e nohova bona eha marumaruava taudia, ese Maria e itaia vada e toreisi haraga bona e raka lasi murimuri ai neganai, idia ese vada e gavaia, e tomava gara e laova unuseni ai baine ha tai. ³¹Bena Mary na Iesu ela gabuna ai e kau, bona vada e itaia, ia na e hetuitui bona e hamaoroa, eto, "Lohiabada e, bema oi na iniseni ai, lau taihugu na basinema mase." ³²Una dainai Iesu ese mai taina ida e itaia, bona Iudea Taudia danu mai taidia ida ia ida ema neganai, ia na laumanai lalona emetau bona e lalo hisihisi; ³³bena ia eto, "Ia be edeseniai o guria?" Idia ese e hamaoroa, eto, "Lohiabada aoma bona ba itaia." ³⁴Iese vada e taiva. ³⁵Bena Iudea Taudia, eto, "Aitaia ena lalokau na bada Lasaro enai!" ³⁶A haida be e tomava, "Ina tau, mata kepulu tauna matana e hapapa, ese ina tau ena mase basine lao-ahu diba danu, a?" ³⁷Bena Iesu ma, mai lalona metauna ida, e lou lao gara gabuna. Ina be nadi kohuana ta, nadi ta amo e laoa-ahu. ³⁸Iesu eto, "Nadi na avabia-oho." Mareta, e mase tauna taihuna, ese Iesu e hamaoroa, eto, "Lohiabada e, ia tauna na vada e bodaga, badina ina na vada dina ihananina." ³⁹Iesu ese e hamaoroa, eto, "Lau ese oi asina hamaoromu, bema oi vada o abidadama, oi ese Dirava hairaina do baitaia, ani?" ⁴⁰Bena idia ese nadi vada e abia-oho. Bena Iesu e gagaisi bona eto, "Tamagu e, na hanamomumu badina o kamoni henigumu." ⁴¹Vada dibagu oi ese nega iboudiai o kamoni henigumu, a badina be hutuma ese e ginigu hegege dainai, lau na ini nagwau tomamu, badina be idia ese bae hamomokania lau na oi ese o siaigu." ⁴²Ini e gwautoma murinai, ia na mai erena badana ida e lolo-isi, eto, "Lasaro e, a raka lasi!" ⁴³Mase tauna vada e raka lasi; ia aena bona imana be dabua amo e guidia, bona ia vairana be dabua ta amo e guia, Iesu ese e hamaorodia, eto, "Aruhaia bona a kahua nege." ⁴⁴Bena Iudea taudia hutuma unu ema Maria dekena bona Iesu dahaka e kara e itadia, ese ia na abiabiraia. ⁴⁵A haida be ela Farasia Taudia dekedie bona Iesu ese vada e kara gaudia e hamaorolaidia. ⁴⁶Bena helaga taudia badadia bona Farasia taudia ese edia kaunsolo e haboudia bona eto, "Ita be dahaka baita karamu? Ina tau ese toa momo e karamu." ⁴⁷Bema ita ese ini bamona baita rakataniamu, taunimanima iboudiai ese be abiabiraiaimu, bona Roma taudia be maimu eda gabu bona eda bese ruaosi eda amo be abidia ohomu." ⁴⁸Vadaeni, a tau ta bogaragidiai, ladana be Kaiafas, ia be helaga tauna badana una lagani ai, ese e hamaorodia, eto, "Umui na gau ta asi dibamui." ⁴⁹Umui ese na so laloamu emui ai namona na tau ta baine mase taunimanima daidiai, bema bese idoinai na do asine eore. ⁵⁰Ina hereva e gwaurai na dia ia sibona ena amo. To, una lagani ai, ia na helaga tauna badana dainai, ia na e peroveta Iesu na do baine mase bese dainai; ⁵¹bona dia bese mo dainai, a Dirava natuna danu unu e hakarohodia na do baine haboudia oreka tamoni. ⁵²Bena una dina amo idia ese Iesu ialana dalana vada e tahua. ⁵³Una dainai, Iesu vada Iudea besedia bogaragidia asine rakaloava, a una gabu e rakatani tano gagaena badina hanua ta ela ladana Efaraim. Unuseni a e noho ena disciples ida. ⁵⁴Iudea taudia edia Lagau-hanai Ariana do sekau ai, idia na do bae hahegoeva guna dainai. ⁵⁵Bena idia ese Iesu e tahua, bona Dubu Helaga lalonai ginidiai e

hereva heheni, eto, "Umui be dahaka otomamu? Ia be basine maimu ina aria, a?"⁵⁷ Helaga taudia badadia bona Farasia taudia ese hereva e halasia, bema ta e diba Iesu be edeseniai, ia ese baine hamaorodia, bena idia ese do bae dogoa tao. Translation done by: Peter English on Wednesday (16/08/23), time: 12.07pm. Ready for quality checking.

12

¹Una dainai, dina tauratoi dounu mimia ela bona Lagau-hanai Ariana, Iesu na Betania ela, Lasaro, vanegai Iesu ese mase amo e hatorea isi tauna, ena hanua bunai.²Bena unuseni ai idia ese adorahi anianina e dabaraia. Ia ana, Mareta ese isiaidia e lao heniva, a Lasaro bona taunimania haida na Iesu ida ege diho.³Bena Maria ese muramura mai bonana nadi kiama-kiamana amo e karaia gauna e abia, Iesu aena ruaosi e dairilai, bena huina amo ma e dahu kaukau. Ruma na una muramura bonana namona ese e hahonua.⁴A Iuda Isakariota, ena hahediba tauna ta, Iesu taona baine torea tauna, eto,⁵"Dahaka dainai ina muramura mai bonana se hoihoilaia dollar toi-ahu bema abilai bena ogogami taudia bema harihari henidia?"⁶Ia unu egwau toma, na dia ogogami taudia e bogadia hisiva dainai, a badina be ia na hena tauna. Ia be moni baegena dekenai bona e udava monidia na e vai henaova.⁷Una dainai Iesu eto, "A rakatania. Vada e abia hegaegaemu, lau igurigu dinana gauna."⁸Ogogami taudia na nega iboudiai dekemui ai nonoho.⁹Iuda taudia hutuma e kamoni Iesu na unuseni ai, bena una gabu ela, dia Iesu mo dainai, to Lasaro, Iesu ese mase amo e hatorea isi tauna, itana totona.¹⁰To hahelaga taudia e henega bou, Lasaro danu bae alaia eto;¹¹badina be ia dainai Iuda hutuma danu e raka ohova, Iesu e abiabiraia.¹²Daba ai, aria dainai e hegogo taudia hutuma bada vada ela. Bena e kamoni Iesu na Ierusalem ai bainea dara dae,¹³idia ese reta e abi, ia vairana ela, bena e tai lolo, eto, "Hosanna! Lohiabada ladanai e maimu tauna aita hanamoa, Ia na Isaraela edia pavapava."¹⁴A Iesu ese doniki natuna ta e davarua bena latanai e helai kau; vada e torea hegeregere.¹⁵"Siona natuna kekenina e, asio gari: A itaia, emu pavapava na e maimu, doniki natuna doruna ai e helaimu."¹⁶Ena hahediba na unu hereva anidia asi dibadia una negana ai: a Iesu hairaina e abia negana ai, idia vada e helaloue, ini gau iboudiai na ia dainai vada e tore bona idia danu unu e kara toma.¹⁷Taunimania hutuma na ia ida e nohova, ia ese Lasaro gara amo e boiria lasi bona mase amo e hatorea isi negana ai, bena idia ese harina e piua.¹⁸Una dainai hutuma bada ia vairana ela, badina be idia na vada e kamoni ia ese una toa e karaia.¹⁹Bena Farisea taudia na e hereva heheni, eto, "O itaiamu, umui na o dareremu; a itaia, tanobada idoinai be ia enai vada e taomu."²⁰Aria negana ai toma-diho totona e dara dae taudia haida na Helene taudia.²¹Idia na Filipino, Betesaida Galileia tauna, dekenai ela, e hamaoroa, eto, "Gauka e, ai na a uramu Iesu baia itaia."²²Filipo na ela Anderea e hamaoroa; bena Aniderea, Filipino ida ela, Iesu e hamaoroa.²³Bena Iesu ese e haere henidia, eto, "Negana vada eme gini dae, Taunimania Natuna ese hairaina vada baine abia."²⁴Momokani waitani na hamaoromuimu, uit nadinadina na tano ai basine moru bona basine mase, ia na sibona baine mia kava; a baine mase, anina badana baine dobi.²⁵Ena mauri e ura heniamu tauna ese mauri baine reaia; a ena mauri ina tanobada e inai heniamu tauna ese mauri baine abia tao ela bona hanaihanai.²⁶Tau ta baine ura lau isiaigu baine lao henia, ia ese baine gavagu; bena lau baina noho gabunai na egu hesiai tauna danu baine noho. Bema tau ta ese lau isiaigu baine lao henia, Tamagu ese do baine hanamoa.²⁷Harihari kudougu eme hetaha bona dahaka baina gwaurai? Bainato, "Tamagu e, ina hora amo bame hamaurigu." Badina binai hari ina hora ai vada name kau.²⁸Tamagu e, ladamu a heatolaia. Bena gado ta guba amo ema, eto, "Vada name heatolaia bona ma baina heatolaia."²⁹Bena hutuma unuseni ai gigini vada e kamoni bena eto, "guba eme rahua. Ma haida eto, "Aneru ta ese e hereva henia."³⁰Iesu na e haere, eto, "Una gado na dia lau daigu ai, a umui daimui ai."³¹Harihari ina tanobada na e hahemaoro heniamu: harihari ina tanobada lohiana bae lulua lasi.³²Lau na tanobada ai bae piugu isi, unu amo taunimania iboudiai lau dekegu ai baina veridia."³³Ia na unu e gwau toma, ena mase dalana e hahedinarai.³⁴Bena aru taudia ese e haere henia, eto, "Ai taravatu amo vada a kamoni, Keriso na do baine noho hanaihanai. Badina be dahaka oi na o tomu. "Taunimania Natuna bae piua isi?" "Ina Taunimania Natuna be daika?"³⁵Iesu eto, "Nega sisina diari na doene dekemui ai, ba raka balaheni diari o abiamu negana ai, dibura ese baine butumui tao na garina. Dibura lalonai e rakamu tauna na e lao heniamu gabuna asi dibana."³⁶Diari o abiamu neganai, diari bavabiabiraia, diari memeromui ai ba hahelao helaoreana." Iesu na unu e hereva toma, bena e raka oho, e noho hehuni.³⁷Ene be Iesu ese toa diagau vairadia ai e karava, to idia ese asie abiabiraia.³⁸Una dainai, Isaia, peroveta tauna, ena hereva vada e momokani, eto, "Lohiabada e, daika ese emai hereva eme abia dae?" "Bona Lohiabada imana danu daika enai eme hedinarai?"³⁹Una dainai idia ese asie abiabiraia, badina be Isaia ma eto,⁴⁰"Ia ese matadia vada e hakepulu, lalodia danu vada e haduhu; matadia amo ba ita na garina. Bona lalodia amo bae diba na garina. Bena bae helalokerehai baina hamauridia na garina."⁴¹Isaia na unu e gwau toma, badina be ia ese Iesu hairaina e itaia, bena e herevalaia.⁴²Hanua lohiodia hutuma ese e abiabiraia, to asie gwaurai hedinarai, Farisea taudia daidiai; dubu amo bae doridia lasi na garina.⁴³Badina be taunimania edia heimodai e ura henia bada, Dirava ena heimodai e ura henia maragi.⁴⁴Bena Iesu e tai lolo, eto, "Lau e abiabiraigumu tauna ese dia lau mo, a e siaigu Diravana danu e abiabiraigumu."⁴⁵Bona lau e itagumu tauna ese e siaigu Diravana danu e itaiamu.⁴⁶Lau na tanobada vada nama, diari na heto; una dainai e abiabiraigumu taudia iboudiai na dibura lalonai basie noho.⁴⁷Tau ta ese egu hereva baine kamoni to basine abia dae, lau ese basina hahemaoro henia, badina be lau na dia tanobada ihahemaoro henina a tanobada ihamaurina totona nama.⁴⁸E dadaraigumu bona egu hereva se abi daemu tauna, na mai ena hahemaoro, na gwaurai herevadia ese bae hahemaoro henia dina gabena ai.⁴⁹Badina dia lau sibogu ese egu hereva asina gwaurai, a Tamagu e siaigu Diravana, ese e haganigu dahaka hereva dahaka hereva baina gwaurai, bona ede baina gwaurai toma.⁵⁰Lau dibagu danu, ena hereva na mauri hanaihanai, una dainai, egu herevana Tamagu ese e haduagu hegeregere vada na gwauraimu.

¹Lagau-hanai dinana vada eme kahikahi, Iesu dibana ena negana vada eme kau ina tanobada baine rakatania Tamana dekena bainela. Sibona e lalokau henidiava taudia ina tanobadai, danu e lalokau henidiava ela bona dokona. ²Aniani lalonai diabolose Iuda Isakariota Simona natuna, lalona vada e ania vaitani Iesu taona do baine torea. ³Iesu danu dibana Tamana ese gau idoidiai e henia, ia imana lalonai, bona dibana danu Dirava ena amo ema Dirava dekena ma bainela. ⁴Ia na aniani gabuna amo e tore isi bona ena dabua e kokia (dokia) oho. Bena taoele ta eabia e rioa. ⁵Bena disi ai ranu e seia ena hahediba aedia e huri bona taoele e rioa gauna amo aedia e dahu kaukau. ⁶Bena Simona Petero dekena ai e kau, bona Petero ese Iesu e hamaoroa eto, "Lohiabada e, oi na lau aegu ba huria a? ⁷Iesu ese e haere henia eto, "Dahaka na karamu harihari lalomu se pararamu, A gabe amo lalomu do baine parara". ⁸Petero eto, "Aegu na basio huri lasi vaitani." Iesu ese e haere henia eto, "Bema basinama hurimu oi na asi ahumu dekegu ai." ⁹Simona Petero e haere eto, "Lohiabada e, dia aegu mo ba huri, a imagu bona kwaragu danu." ¹⁰Iesu eto, "Vada e digu tauna aena mo baina huri na hegeregere tauna idoinai eme goeva. Umui danu gogoeva to dia iboumui ai." ¹¹(Badina be ia na taona baine torea vada dibana una dainai eto, "Dia iboumui ai gogoeva?" ¹²Iesu ese aedia e huri murina ena hahedoki ma e kokia oho bona e helai diho, e hamaorodia, eto, "Vada na karamui karana anina dibamui a? ¹³Umui ese o gwauraimu 'hahediba tauna' bona 'Lohiabada,' bona umui na hereva maoromu, badina lau bunai. ¹⁴Benaini lau binai, Lohiabada bona Hahediba, aemui name huri, umu danu aemui do ba hehuri heheni. ¹⁵Badina lau ese hahegegeregere ta vada na henimui lau ese na karaiaumu karana na umui danu ba kara. ¹⁶Momokani vaitani na hamaoromuimu, gaukara merona ese biaguna se hereaiamu, eiava hesiai tauna e siaia tauna se hereaimu. ¹⁷Bema oi na ini gau o dibadiamu, boma kara boma namo. ¹⁸Lau na dia iboumui ai asi na gwauraimuimu; na abidia hidi taudia na dibagu - A buka helaga ai e torea herevana na do baine guguru! eto, "Lau ida na aniani heboumu tauna ese aena gedunai amo e lahagu." ¹⁹Harihari ela do se vara gauna na hamaoromuimu gunamu bema baine vara neganai, na ba diba e gwauraimuimu gunu tauna na LAU. ²⁰Momokani vaitani na hamaoromuimu, egu hesiai tauna e abiadaumu tauna ese lau e abigu daemu, bona lau e abigu daemu tauna ese e siaigu Dirava danu eabia daemu. ²¹Iesu unu e gwau toma, bona lalona e hekwarahi eto. "Momokani vaitani, na hamaoromuimu umui ta ese taogu do baine torea." ²²Hahediba na e roha heheni, bona e daradara ia be daika e gwauraimuimu. ²³A Iesu ena hahediba ta, Iesu ena lalokau, na pata badinai ege diho Iesu ohenai. ²⁴Una dainai Simona Petero na hahediba, baine "nanadaidia e gwauraimuimu tauna be daika." ²⁵Bena ia na e mede kerehai Iesu kementa ai e tabe kau eto, "Lohiabada e tauna be daika?" ²⁶Iesu eto, Ai na dau dobi aniani taina baina henia be ia. Bena aniani taina e abia vasiahu ai e dau dobi Iuda Isakariota, Simona natuna e henia. ²⁷Iuda ese eabia bona Satana ese e boloa bona Iesu ese e hamaoroa eto, ba karaia gauna na ba karaia haraga. ²⁸Aniani ai e ege diho taudia na asi dibadia ia na dahaka dainai unu e kara toma. ²⁹Haida banava eto Iuda ese moni mauana e nariava dainai Iesu ese vada e hanamoa aria negana ai bae ania gaudia na baine hahoi eiava ogogami taudia baine harihari henidia. ³⁰Una dainai, Iuda ese aniani eabia bona e tore isi e raka lasi. Hanua vada e boi. ³¹Iuda e raka lasi murina, Iesu eto, "Harihari Taunimanima Natuna eme heatolaia, Dirava danu vada eme heatolaia ia dainai. ³²Dirava na bae heatolaia ia dainai, bona Dirava ese ia baine heatolaia, ina harihari. ³³Natugu e, nega dia daudau lau umui ida ta nohomu. Umui ese do ba tahugu, a Iuda taudia na hamaorodia hegeregeregere, nato "Bainala gabuna na basiola diba," umui danu unu na hamaoromuimu tomamu. ³⁴Hahegani matamatana name henimui, be helalokau heheni, lau ese na lalokau henimuimu hegeregeregere, umui danu ba helalokau heheni. ³⁵Unu amo taunimanima iboudiai bae diba umui na lau egu hahediba, bae helalokau heheni dainai. ³⁶Simona Petero ese e nanadaia eto Lohiabada e, ede baola? Iesu eto Bainala gabuna na harihari murigu amo basiola, a gabeamo vada baola. ³⁷Petero ese ma e nanadaia, eto, Badina be dahaka ina harihari basina gavamu diba? Egu mauri na oi daimui ai baina atoa diho. ³⁸Iesu eto, Emui mauri na lau daigu ai bavatoa diho a? Momokani vaitani, na hamaoromuimu kokoroku do basine tai, oi ese hatoi ba goregu. Translation done by: Mrs. Ori. C. Kohu on Thursday (06/07/23), Time: 05.05 am. Ready for quality checking.

¹Kudoumui na basie hetaha. Umui ese Dirava bavabidadama henia, lau danu bavabidadama henigu. ²Tamagu ena ruma ai noho gabudia na momo herea. A bema lasi negana ai, vada nama hamaoromuimu, badina lau na ba laomu gabu ta baina hahegaegaea umui emui, ³bema bainala gabu ta baina hahegaegaea umui emui, lau na ma balou maimu bona sibogu ese bainame abimui, unu amo lau edeseni ai umui danu unuseniai. ⁴Umui na dibamui lau ba laomu (gabuna) dalana. ⁵Toma ese Iesu e hamaoroa, eto, "Lohiabada e, ai na asi dibamai oi be ede bo laomu, ai dala be ede baia diba toma, a? ⁶Iesu ese e hamaoroa, eto, "Lau na dala, bona hereva momokani, bona mauri; Tamagu dekena baema taudia iboudiai (edia dala na lau) na lau egu amo baema. ⁷Bema lau vada boma dibagu, umui ese Tamagu danu vada boma dibaia. Ina harihari amo ela vada ome dibaia bona ome itaia. ⁸Filipi ese Iesu e hamaoroa eto, "Lohiabada e, Tamada a haheita laimai, bona emai ai vada baine hegeregeregere." ⁹Iesu ese e hamaoroa eto, Lau na umui ida nega daudau tame noho bona umui na dounu so dibamu lau be daika, Filipi? vada e itagumu tauna ese Tamagu vada e itaia. Ede bamona ai oi ma otomu, "Tamagu a haheita laimai?" ¹⁰Umui ese so abia daemu lau na Tamagu lalonai bona Tamagu na lau laloguai, a? Na herevalai henimuimu herevadia na dia lau sibogu ese na hereva laimu, a Tamagu lau laloguai e nohomu na ena gaukara e karaiaumu. ¹¹Bavabigu dae lau na Tamagu lalonai, bona Tamagu lau laloguai, eiava bavabigudae badina na karamu karadia mo daidiai. ¹²Momokani, momokani, na hamaoromuimu, e abigudaemu tauna ese na karamu karadia danu do baine kara, bona ia ese kara badadia ini kara daediai baine karadia badina be lau na Tamagu dekena ba laomu. ¹³Ladagu

ai gau iboudiai ba noinoi laidia, lau ese na baina karaia, unu amo Tamagu hairaina baine hedinarai Natuna ena amo.
¹⁴Bema gau ta ladagu ai ba noia, lau ese na baina karaia.¹⁵Bema o lalokau henigumu, egu hahegani ba badinadia,¹⁶bona lau ese Tamagu baina noia, ia ese Hekaha Tauna ta ma baine henimui bona ia na umui ida ela hanaihanai.¹⁷Hereva Momokani Laumana. Tanobada ese na basine abiadaemu badina be se itaiamu bona se dibaiaumu. A umui na dibamui ia, badina ia na umui ida o nohomu bona ia na lalomui ai.¹⁸Lau ese basina rakatanimui ihareha hetomadia; lau na baina loulmai dekemui.¹⁹Nega kwadogi do mia bona tanobada ese vada basine itagu loumu, a umui ese ba itagu. Badina be lau na maurimu, umui danu ba mauri.²⁰Una dina ai umui na bo dibamu lau na Tamagu lalona ai, bona umui na lalogu ai, bona lau na umui lalomui ai.²¹Egu hahegani e abia daemu bona e badinamu tauna ese lau e lalokau henigumu, bona e lalokau henigumu tauna na Tamagu ese baine lalokau henia, bona lau ese baina lalokau henia bona ienai do baina hedinarai.²²Iuda (dia Isakariota) ese Iesu e hamaoroa eto, "Lohiabada e, dahaka dainai oi na ai emai ai do ba hedinarai bona tanobada enai be lasi, a?"²³Iesu e haere bona e hamaoroa eto, "Bema tau ta ese e lalokau henigumu, ia ese egu hereva do baine badina. Lau Tamagu ese baine lalokau henia, bona ai na baiama ia dekena bona ia ida baia noho hebou.²⁴Asine lalokau henigumu tauna ese egu hereva na se badinamu. O kamonaimu herevana na dia lauegu amo a Tamagu e siaigu tauna ena amo.²⁵Lau ese ini hereva vada na hamaoromui, dekemui ai na nohova neganai.²⁶Vadaeni, Hekaha Tauna - ia na Lauma Helaga Tamagu ese lau ladagu ai baine siaia - ia ese gau iboudiai baine hadibalaimui bona ia ese na hamaoromui herevadia iboudiai do baine hahelalomui-une.²⁷Maino na emui ai na rakataniamu; egu maino na henimuimu. Lau na dia tanobada e henimu hegeregere na umui na henimuimu. Kudoumui na basie hetaha, bona basio gari.²⁸Vada o kamoni na hamaoromui, nato, 'Lau na ba raka ohomu, bona ma baina loulmai dekemui?' Bema umui ese lau o lalokau heniguva, umui na ba moale badina launa na laomu Tamagu dekena, badina Tamagu ese lau na e hereagumu.²⁹Harihari vada na hamaoromui guna karana do sevarai, unu amo karana bae vara, umui ese na bavabia dae.³⁰Lau na umui ida basina hereva daudau, badina ina tanobada lohiana na e maimu. Ia na asi ena gau ta lau egu ai,³¹a tanobada na baine diba maoro lau ese Tamagu na lalokau heniamu, bona Tamagu ese e haduagumu hegeregere na karadiamu. Aita toreisi bona ini amo aitala. Translation done by: Mrs. Boio English on Wednesday (16/08/23), time: 5.46pm. Ready for quality checking.

15

¹Lau na vine korikori, bona Tamagu na uma biaguna.²Do basie huahua rigidia iboudiai ia ese baine abidia oho, bona do bae huahua rigidia iboudiai, ia ese baine abidia bona idia na huahuadia momo ma bae vara.³Umui na vada o goeva badina lau ese vada na hamaoromu hereva dainai.⁴Lau lalogu ai ba noho, bona lau na umui lalomui ai baina noho. Hegeregere na rigi na basine huahua bema sibona neganai ela bona vine lalonai baine mia, bona unuhetomana umui na do basio huahua ela bona lau lalogu ai ba noho neganai.⁵Lau na vine umui na rigi. Daika lau lalogu ai e nohomu bona lau ia lalonai, ia na huahuana momo do baine vara, badina lau lasi neganai umui na gau ta basio karaia.⁶Bema tau ta lau lalogu ai se nohomu, ia na do ba tahoa oho rigi hegeregere na bona baine kakoro bona rigi bae haboua lahi lalonai ba tahodia vareai bae aradia ore.⁷Bema umui na lau lalogu ai bona bema egu hereva danu umui lalomui ai neganai, dahaka ba noi gaudia iboudiai do baina karaia umui emui ai.⁸Tamagu na ba heatolaia ini daidiai umui huahuamu momo daidiai bona umui na lau egu hahediba memerodia.⁹Tamagu ese e lalokau henig hegeregere na, lau ese umui danu nalalokau henimuimu. Egu lalokau lalonai ba noho.¹⁰Bema lau egu hahegani ba badinadia, umui na egu lalokau lalonai ba noho, lau ese Tamagu ena hahegani na badinamu hetomana bona ena lalokau lalonai na nohomu.¹¹Ini gau na vada na hamaoro laimui bona unu amo lau egu moale na umui lalomui ai bona unu amo emui moale na baine guguru.¹²Ina na lauegu hahegani umui na ta ta ba helalokau heheni, lau ese na lalokau henimuimu hegeregere na ai.¹³Tau ta na asi ena lalokau herea daena a ina mo - Una ia ese ena mauri e atoa diho ia turana daidiai.¹⁴Umui na lau turagu veridia, bema umui ese lauegu hahegani gaudia ba karadia neganai.¹⁵Lau ese umui na asina gwauraimuimu hesiai memerodia, badina be hesiai merona na asi dibana ia biaguna be dahaka e karamu. A lau ese umui na lau turagu ai na gwauraimuimu badina be gau iboudiai lau ese na kamoni herevadia. Tamagu ena amo, lau ese umui vada name hadibalaimui.¹⁶Umui ese lau asio abigu-hidi, a lau ese umui na abimuihidi bona na duanaimui bona unu amo umui na baola bona huahuamui ba vara, bona huahua mui do bae mia. Bona unu amo dahaka gau Tamagu enai ba noi, lau ladagu ai, ia ese baine henimui.¹⁷Ini gau na hamaoromuimu, bona umui na ta ta ba lalokau heheni.¹⁸Bema ina tanobada ese e inai henimuimu, vada ba diba ina na lau e inai henigu guna umui be gabeai.¹⁹Bema umui na ina tanobada ena, tanobada ese bema ura henimu ia ena na heto.²⁰Ba helalotao, hereva ta lau ese na hamaoromui nato, "Hesiai merona ta ese biaguna na basine hereaia." Bema idia ese lau e dagedage henigumu, umui danu do bae dagedage henimui, bema idia ese lauegu hereva vada bema badina, umui emui hereva danu ba badina.²¹A ini gau iboudiai na umui do ba kara henimui, badina lau ladagu dainai, badina be asi dibadia lau be daika ese e siaigu.²²Bema lau na basinama mai bona basiname hereva badina, idia na basiema kara dika, a harihari idia na asi edia ha-hekora edia kara dika daidiai.²³Lau e inai henigumu tauna ese Tamagu danu e inai heniamu.²⁴Bema lau ese na basinama karadia, una umui padamu ai na ta ese se karadia, neganai idia na asi edia kara dika, a harihari idia ese eme itaia bona lau bona Tamagu e inai henimaimu.²⁵A ini na bavara dalanai edia taravatu ai e torea herevana baine momokani, "Idia ese lau e inai henigu asi badinata ai.²⁶Tauhalo Tauna lau ese do baina siaia umui dekemui Tamagu ena amo - Ia na hereva momokani Laumana daika be Tamagu ena amo - bainema, ia ese lau do baine gwauragu hedinarai.²⁷A umui danu lau o gwauragu hedinaraimu badina be umui na lau dekegu ai una matamana ai. Translator: Ret/Dk. Lohia Gari Completed on Thursday (22/06/23), time: 3.45 pm. Ready for quality checking.

16

¹Ini gau na vada name herevalai henimui bena umui na basio keto. ²Idia ese synagogue amo do bae tahomui lasi. A hora na e maimu umui do bae alamui mase taudia banava baine lalohadai ina na edia boubou gaukarana ta Dirava ena. ³Idia na ini do ba kara toma badina be Tamagu na asi dibadia eiava lau danu. ⁴A lau ese ini gau vada name hamaoromui bena unu amo horana do baine ginidae neganai, umui na ba helalotao ini na hamaomui gaudia. To matamana ai lau ese ini gau na asi na hamaoro-laimui, badina be lau na umu ida nonoho. ⁵A harihari, lau na e siaigu tauna dekena balaomu, benaini umui ta ese lau na asio nanadaigu, "Oi be ede bolaomu?" ⁶Benaini ini gau name gwaurai henimui, kudoumui na dara doko ese eme hahonua. ⁷A momokani na hamaoromuimu, ina na emui namo dainai lau na bainala dahu ai. Badina be ema lau na basinala dahuai neganai, Tauhalo Tauna na do basinema umui dekemui. ⁸Ia, Tauhalo Tauna, bainema neganai, ia ese tanobada na baine hahedinarai henia kara dika na kerere, bona kara maoromaoro bona hahemaoro baine hahedinarai henia, ⁹kara dika baine hahedinariaia, badina be lau asie hamomokanigu, ¹⁰bona kara maoromaoro baine hahedinarai badina be lau na Tamagu dekena balaomu, bona umui ese lau na basio itagu, lou, ¹¹bona hahemaoro bame hahedinarai badina ina tanobada lohiana na vada eme hahemaoro henia - ¹²Lau ese gau momo herea nama hamaorolai henimui to harihari basio lalodia taomu. ¹³A Hereva Momokani, Laumana bainema neganai, ia ese do bain hakaumui hereva momokani ai badina be dia ia sibona ena amo baine herevalaidia. A e kamonaimu herevadia baine gwauraidia, bona vaira ai do bae vara gaudia baine gwauraidia. ¹⁴Ia ese lau do baine heatolaigu, badina be lau egu amo baine abi herevadia na ia ese do baine hamaorolaimui. ¹⁵Tamagu enai gau iboudiai na lau egu. Una dainai na hamaoromuimu, Lauma ese lau egu amo baine abidia, bona ia ese do baine hamaoromui. ¹⁶Nega sisina lalonai umui ese lau basio itagumu, bona ma nega sisina lalonai umui ese lau bo itagu loumu. ¹⁷Bena ena hesiai memerodia haida na sibodia e henanadai eto, "Ina be dahaka ia na ita eha-maorodamu nega sisina lalonai umui ese lau basio itagumu bona ma nega sisina lalonai umui ese lau bo-itagu loumu bona badina be Tamagu dekena bainala, a?" ¹⁸Una dainai idia e hereva eto, "Ina be dahaka ia e gwaumu, nega sisina lalonai a?" Ai na asi dibamai ia be dahaka e gwauraimu. ¹⁹Iesu na e diba edia henanadai bena ia ese ehamaorodia eto, "Ini gau daidiai umu na sibomui o henanadai hehenimu, una lau name gwau herevana. "nega sisina lalonai umui ese lau do basio itagu bona ma nega sisina lalonai umui ese bo itagu lou, a?" ²⁰Momokani waitani na hamaoromuimu umui na bo taitaimu bona bo rohe-ahumu a ina tanobada na be moalemu. Dara doko ese be hahonumuimu, to emui dara doko na moale gauna ai belaoimu. ²¹Rogo-rogo hahinena ta ena mara neganai ia na e hisihisimu, badina ena mara horana dainai a natuna e varamu murinai ena hisihisi na se lalodia taomu badina be natuna e vara ina tanobada moalena dainai ²²Bema hari umui na o dara dokomu, a lau ese ma baina itamu lou bena lalomui na do ba moale bona tau ta ese una moale na emui amo basine abia oho. ²³Una dina ai umui na lauegu ai gau ta do basio noia. Momokani waitani na hamaoromuimu bema umui na Tamagu enai gauta do ba noia lau ladagu ai, ia ese do baine henimui. ²⁴Ema bona ina hari umui ese gauta do asio noia lau ladagu ai. Ba noinoi bona do badavaria unu amo emui moale na do baine guguru. ²⁵Ini na hereva hegeregeregia ai name hamaoro - henimui, a horana na e maimu lau ese umui na hereva hegeregeregia na basina hereva henimui, a una gabunai, lau ese Tamagu na hereva hedinaraidia baine hamaoromui. ²⁶Una dinana ai umui na lau ladagu ai do ba noinoi bona lau na dia asina gwaumu Tamagu enai umui do baina guriguri - laimui, ²⁷badina Tamagu sibona ese umui na e lalokau henimuimu badina be umui ese lau oha-momokanigumu lau na Tamagu ena amo nama. ²⁸Lau na Tamagu ena amo nama, bona ina tanobada nama. Ma na gwau loumu ina tanobada do baina rakatania bona Tamagu dekena ma bainela. ²⁹Ena hahediba memerodia vada e hereva eto, "Aitaia, harihari oi na ome hereva maormaoro bona oi na dia hereva hegeregeregia o herevamu. ³⁰Harihari aina ame diba oi na gau iboudiai na odiba waitani, bona asi tauna ta oi baine nanadaimu badina be ini gau daidiai ai ese aha-momokaniamu oi na Dirava ena amo oma. ³¹Iesu e haere eto, "Harihari umui ese lau oha-momokanigumu a?" ³²Aitaia, horana e maimu bona vada eme ginidae umui iboumui na bo raka ohomu emui hanua bo laomu, umui ese lau sibogu mo bo rakatanigumu. A, lau na dia sibogu badina be Tamagu na lau ida. ³³Ini gau na vada na hamaorolaimui unu amo ba maino lau lalogu ai. Ina tanobadai na noho dika lalodia bo vareaimu, a ba gini auka, lau ese tanobada vada name hadarerea. Translator: Ret/Dk. Lohia Gari Completed on Thursday (22/06/23), time: 3.45 pm. Ready for quality checking.

17

¹Iesu ese ini gau e herevalaidia murinai matana e roha dae guba e itaia, eto, "Tamague e, hora vada eme kau, Natumu ba heatolaigu bena Natumu ese baine heatolaimu - ²Badina be oi ese siahua vada o henia ia ese taunimanima iboudia ai baine lohiaida bona o henia taudia iboudia ai na ia ese mauri hanaihanai do baine henidia. ³Mauri hanaihanai binai: Idia ese oi Dirava korikori tamona, bae dibamu, bona Iesu Keriso danu oi ese o siaia tauna. ⁴Na heatolaimumu tanobada ai. Egu gaukara o henigu baina kara gaudia vada name hagugurudia. ⁵Harihari, Tamagu e, bae heatolaigu oi hairamu amo na abia tanobada do se hekara negana ai. ⁶Tanobada ai o henigu taudia na ladamu vada na hadibalaidia. Idia danu oi emu. ⁷Harihari idia na dibadia vada o henigu gaudia idoidiai na oiemu amo ema, ⁸badina be ohenigu herevadia vada na henidia. Ida ese eabi dae bona e diba momokani lau na oiemu amo nama, bona e hamomokaniamu danu oi ese o siaigu. ⁹Idia daidiai na noinoimu, dia tanobada dainai asi na noinoimu. A o henigu taudia daidiai na noinoimu, badina be idia na oiemu. ¹⁰Gau iboudiai lau egu na oiemu, bona oi emu danu lau egu, bona idia edia amo lau hairaigu vada na abia. ¹¹Lau na harihari dia ina tanobada ai, to ini taunimanima hari tanobada ai, a launa na vasimu dekemu. Tamagu Helagana e, vada o henigu taudia na ladamu ai ba dogodia tao bona idia na bae tamona, hegeregeregia ita raruosi na tamona. ¹²Lau do idia

dekeddia ai, na dogodia taova oi ladamu ai, o henigu ladana bunai. Na gimadiamu, bona idia ta asi e mase, a e baia tauna mo sibona, buka herevana iha-momokanina.¹³ A harihari ba vasimu dekemu, ini hereva na gwauraimu tanobada ai na egu moale baine guguru lalodiai helaoreana.¹⁴ Emu hereva na vada na henidia, bona tanobada ese vada einai henidia badina idia na dia ina tanobada ena.¹⁵ Asina noimumu tanobada ena amo bavabidia oho, A tau dikana ena amo ba hamauridia.¹⁶ Idia na dia ina tanobada ena, hegeregere na lau danu dia ina tanobada ena.¹⁷ Hereva momokani ai ba hahelagadia. Emu hereva na momokani.¹⁸ Vada o siaigu tanobada ai hegeregere nai, lau ese danu vada na siaidia tanobada ai.¹⁹ Bona idia daidia ai sibogu name helaga, hegeregere na idia danu hereva momokani ese baine hahelagadia helaoreana.²⁰ To dia idia daidiai mo na noinoimu, a eabi-abiraigumu taudia daidiai danu na noinoimu edia hereva amo.²¹ Una dainai iboudia ai na bae tamona, una hegeregere na oi, Tamagu e, oi na lau laloguai bona lau na oi lalomu ai. Unuhetomana idia danu ita lalodai bae noho, unu amo tanobada ese bae abia dae oi ese o siaigu.²² O henigu hairanai, idia danu vada na henidia, una dainai idia na bae tamona, hegeregere na ita raruosi ta tamonamu.²³ Lau na idia lalodiai ai, oi danu lau lalogu ai - una dainai idia na ba hatamondia guguru, bona tanobada na baine diba oi ese vada o siaigu, bona oi ese o ura henidiamu lau o ura henigumu hegeregerea.²⁴ Tamagu e, oi ese unu o henigu taudia, lau na uramu lau baina noho gabuna ai idia danu bae noho, bona vada o hengu hairaina idia danu ba itaia, badina be oi ese o ura henigumu tanobada do se karaia negana ai.²⁵ Kara maoro-maoro Tamagu e, tanobada na asi dibana oi, A lau be mai dibagu oi; bona idia na dibadia oi ese o siaigu.²⁶ Oi ladamu vada na hadibalaidia, bona ma baina hadibalaidia bona o ura henilaigumu ura-henina na idia lalodia ai baine mia, bona lau danu idia lalodia ai."Translation done by: Ret/Dkh. Ori Claudie Kohu on Friday (28/7/23), time: 2.50 pm. Ready for quality checking.

18

¹Iesu na unu hereva e gwaurai murinai, ena hahediba ida e raka lasi Kidron kouranai e hanai, unuseni ai imea ta ai e vareai ena hahediba ida. ²Hari Iuda, taona baine torea tauna, una gabu danu dibana, badina Iesu nega momo ena hahediba ida una gabu na e laova. ³Bena Iuda, ese tuari taudia bona Farasea taudia bona hahelaga taudia edia hesiai taudia e abidia bona uma ela mai lamepadia bona kede bona tuari gaudia danu eabi kau. ⁴Bena Iesu, na e diba ienai bae vara gaudia iboudiai, vairadia e raka lao bona e nanadaidia, eto, "Umui be daika o tahuamu?" ⁵Idia e haere, eto, "Iesu tau Nasareta" Iesu ese e haere henidia, eto, "Lau oina." A Iuda tao tore tauna danu tuari taudia ida gigini. ⁶Iesu unu e hereva toma, "Lau oina," bona idia na e raka muri tano ai e keto. ⁷Bena ma e nanadaidia lou, eto, Umui be daika o tahuamu?" Idia ma eto, "Iesu tau Nasareta." ⁸Iesu e haere, eto, Vada na hamoromui lau oi na. Bema umui na lau o tahugumu, idia hari baela." ⁹Unu e gwau toma ena hereva ihamomokanina, eto; "vada o henigu, taudia ta asina reaia." ¹⁰Simona Petero, na mai ena dare, bona e veria lasi hahelaga tauna badana ena hesiai tauna taia na idibana e utua oho. Una hesiai tauna ladana be Malako. ¹¹Una dainai, Iesu ese Petero e hereva henia eto, ena dare na iudalaina gauna ai avatoa lou. Kehere na Tamagu ese vada eme henigu, na basina inua a? ¹²Bena tuari taudia mai biagudia ida, bona Iuda taudia edia hesiai, taudia ese Iesu e dabaia tao bona e guia. ¹³Bena e hakaua lao guna Ana dekena, badina ia na Kaiafa ravana, ia na hahelaga tauna bada una lagani ai. ¹⁴Kaiafa ese Iuda taudia danu vada e hamaorodia guna eto "Tau ta baine mase hanua taudia daidiai ihanamomui gauna bunai." ¹⁵A Simona Petero na Iesu e gavaia, bona hahediba ta danu. Una hahediba tauna na hahelaga tauna badana mai dibana, bona ia na Iesu ida hahelaga tauna badana ena ruma maguna lalonai e raka vareai. ¹⁶A Petero na iduara badinai gini murimuri ai. Bena hari hahediba, hahelaga tauna badana idia e manada tauna, e raka lasi ikoukou igimana kekeni e hereva henia bona Petero e hakaua vareai. ¹⁷Bena ikoukou igimana kekenina, ese Petero e nanadaia eto, oi na una tau ena hahediba ta ani? Ia e haere eto, "Lau na lasi." ¹⁸Gaukara taudia bona hesiai taudia danu unuseni ai gigini, bona lahi e karaia, paraka dainai, bona e heganava. A Petero danu idia ida gigini e heganava. ¹⁹Bena hahelaga tauna badana ese e nanadaia ena hahediba bona iena hahedibadiba herevadia. ²⁰Iesu e haere, eto, taunimanima iboudiai na hereva henidia hedinarai. Nega iboudia ai dubu lalodiai bona Dubu Helaga ai na hahedibava Iuda taudia iboudiai e hebouva gabudia ai asina hereva hehuniva. ²¹Dahaka dainai o nanadaigumu? Egu hereva e kamonaiva taudia na ba nanadaidia idia na dibadia ede na hahediba tomava. A itaia, ini taunimanima dibadia dahaka na herevalaiva. ²²Iesu unu e hereva toma, bona hesiai tauna ta ese e pataia, eto, hahelaga tauna badana unu o haere henia tomamu a? ²³Iesu na e haere eto, Bema bama hereva kerere, egu kerere na boma gwauraia hedinarai, a bama hereva maoro dahaka dainai o patagu? ²⁴Bena Ana ese mai iguina ida e siaia lao, Kaiafa hahelaga tauna badana dekena. ²⁵Simona Petero na dounu lahi badinai e giniva e heganava. Taunimanima ese e nanadaia eto, oi na iena hahediba ta ani? Ia ma e haere eto, Lau na lasi. ²⁶Hahelaga tauna badana ena hesiai tauna ta, Petero ese taia na e utua oho tauna varavarana, eto, Ia ida imea lalonai asi na itamu a? ²⁷Petero ma e hegore lou, bona kokoroku vada e tai. ²⁸Bena idia ese Iesu na Kaiafa ena amo ma e hakaua lao gavana ena ruma. To una na daba matana dainai, idia na gavana ena ruma lalonai na asie raka vareai, badina be idia na e helaga Lagau-hanai ariana bae ania dainai. ²⁹Una dainai, Pilato na e raka lasi dekeddia ai eto, "Dahaka dainai ina tau o hahebadelaiaimu?" ³⁰Idia ese e haere henia bona eto, Bema ina tau na asi ena kara dika, ai ese basiaima maialaia dekemu." Una dainai Pilato ese e hamaorodia eto, ³¹Sibomui ese avabia, bona ba hahemaoro henia emui taravatu hegeregere nai, "Iuda taudia eto, ai na asi siahumai tau ta baia alaia mase." ³²Unu amo Iesu ena hereva vada e momokani ede baine mase toma na vada e gwauraia hedinarai. ³³Bena Pilato na gavana rumana lalonai ma e raka vareai lou bona Iesu e boiria bona ia ese e hereva henia eto, "Oi na Iuda taudia edia Pavapava a?" ³⁴Iesu e haere, eto, "Sibomu ene o hereva tomamu, eiava haida ese unu e hereva laigu toma?" ³⁵Pilato e haere eto, Be lau na Iuda tangu a? Emu taunimanima korikori bona hahelaga taudia ese dekegu e hakaumu mai. "Dahaka o kara?" ³⁶Iesu e haere eto, "Egu basileia na dia ina tanobada gauna,

Bema egu basileia na ina tanobada gauna, egu hesiai taudia na bema tuari Iuda taudia imadia amo bema hamaurigu. To harihari egu basileia na dia iniseni ai. ³⁷Pilato eto, Benini oi na hanua ta pavapavana a? Iesu e haere eto, Oi na o gwaumu lau na hanua ta pavapavana. Badina binai launa na vara, ina tanobada vada nama, hereva momokani ibadinana taudia iboudia ai ese lau eregu e kamonaimu. ³⁸Pilato eto, hereva momokani be dahaka? Unu e gwau toma, bema ma e raka lasi lou Iuda taudia e hamaorodia eto, Kerere ta ina tau enai asi name davaria, ³⁹to vaevae eda Lagau-hanai Ariana neganai tau ta baina ruhaia nege. Umui be o uramu Iuda taumui emui Pavapava baina ruhaia nege a? ⁴⁰Bena idia na e lolo eto, lasi dia ina tau, to Baraba hari. Una Baraba be dadidadi tauna.

19

¹Bena Pilato ese Iesu e abia, e siaia lao, tuari taudia ese e dadabaia. ²Bena idia ese havava gauna ginigini na ia kwarana ai e atoa kau bona dabua kakakakana e hakaralaia. ³Bena e raka kahi, e hamaorodia eto, Iudea taudia edia pavapava e, ba mauri, bena e pataia. ⁴Pilato ma e raka lasi, eto, a itaia, vairamui amo name hakaua lasi, ba diba, ia ena amo kerere ta asiname davaria. ⁵Bena Iesu na e raka lasi, havava gauna ginigini na kwarana bona dabua kakakakana danu tauna ai, bena Pilato eto, Ina tau aitaia. ⁶Hahelaga bona hesiai taudia ese e itaia, bena e lolo eto, Ba hasatauroa, ba hasatauroa, Pilato eto, umui sibomui ese avabia, ba hasatauroa badina be lau ese ina tau enai kara kererena ta asi name davaria. ⁷Iuda taudia ese e haere henia eto, ai na mai emai taravatu, emai taravatu dainai baine mase, bona ia na sibona e hegaurai, e tomava ia na Dirava Natuna. ⁸Pilato na una hereva e kamoni neganai na e badu dikadika. ⁹Gavana ena ruma ai e raka vareai lou, Iesu e nanadaia eto, Ede amo oma? A Iesu na se haere? ¹⁰Bena Pilato eto, so hereva henigumu a? Asi dibamu lau na mai siahugu baina ruhamu nege bona baina hasatauroa a? ¹¹Iesu eto, Atai amo siahu basinema henigu, asi emu siahu boma noho, taogu e torea tauna ena dika ese oiemu e hereaiamu. ¹²Unu amo Pilato ese Iesu iruha-negena dalana e tahua, a Iuda taudia na e lolo eto, ena tau bo ruhaia negemu, oi na dia Kaisara turana. Bema tau ta e gwaumu ia sibona na hanua ta pavapavana, ia ese Kaisara einai heniamu. ¹³Pilato ese ina hereva e kamoni, bena ia ese Iesu ma e hakaua lasi ia na hahemaoro gabuna ai e helai diho, una gabu ladana na Nadi Dehena, Heberu gadodia ai ladana be 'Gabata'. ¹⁴Una be lagau hanai ariana eabia hegaegae dinana, negana be dina tubua, Pilato ese Iudea taudia e hereva henidia eto, A itaia, emui pavapava binai. ¹⁵Bena idia e lolo eto, avabia oho, avabia oho, ba hasatauroa Pilato ese e nanadaia eto, asi emai pavapava ta, Kaisara sibona. ¹⁶Bena Iesu vada e heni, bae hasatauroa, idia ese e abia, e hakaua lao. ¹⁷Iesu ese ena satauro e huaia lao, gabu ta ladana, Kwara-Koukou gabuna. Heberu gadodiai ladana na 'Golgota.' ¹⁸Unusenai idia ese e hasatauroa bona tatau rarua danu ta kahanai, ma ta kahanai. ¹⁹Bena Pilato ese revareva e torea satauro dorinai e kapaia kau. E torea revareva na be ina. Iesu tau Nasareta, Iudea taudia edia pavapava. ²⁰Iuda taudia hutuma ese una revareva e dudua Iesu e hasatauroa gabuna bona hanua badana padadia na dia daudau. Una revareva na Heberu, Roma bona Helene gadodiai e torea. ²¹Iudea bona hahelaga taudia badadia ese Pilato e hamaoroa Basio torea Iudea taudia edia Pavapava ini ba torea toma, Lau na Iudea taudia edia Pavapava. ²²Pilato e haere eto, vada na torea vaitani. ²³Bena hari Iesu e hasatauroa taudia ese Iesu ena dabua eabi, e dare, bena haniosi ta ta ese ahudia eabi. A ena hahedoki se turia gauna idoinai vada e hatua. ²⁴Badina sibodia e hereva heheni eto, basita darea, a mari hari baita karaia bena baita diba daika ese baine abia. Unu amo buka helaga ai e torea herevana vada e momokani, eto, Idia ese egu dabua e hari, egu hahedoki na mari amo e abia. Hari tuari taudia na unu e kara toma. ²⁵Satauro badinai Iesu sinana bona Maria Kleopa adavana Maria hane Magadala gigini. ²⁶Iesu ese sinana bona e lalokau henia hahedibana na unusenai ginidiai e itadia, bena sinana e hereva henia eto, Hahine e, a itaia, natumu be ena. ²⁷Hahediba danu e hereva henia, eto, a itaia, sinamu be ena. Unu muridiai, una hahediba ese ena ruma ai e abia dae. ²⁸Unu muridiai, Iesu na vada dibana gau iboudiai vada e hagugurudia, bona buka helaga herevana ihamomokanina laina herevana eto, ranu ese vada eme masegu. ²⁹Hodu auta unusenai, vine ranuna iditana ai e honu bona puta na una vine ranuna iditana lalonai e urua-utu, au ai e iria kau, bena e duduaia dae uduna ai. ³⁰Iesu ese vine ranuna iditana e abia, bena eto, vada eore. Bena kwarana e gelo diho, Laumana e henidae. ³¹Una dina be lagau hanai ariana iabi hegaegaena dinana, Bena dina helaga ai mase taudia na satauro ai bae mia garina, badina una dina helagana badana, Iuda taudia ese Pilato e noia, e hasatauro dia taudia aedia bae hakwaidudia bona bae abidia oho. ³²Badina bunai, tuari taudia na ela, tau gunana aena e hakwaidudia, ma iharuana aena danu. Iesu ida e hasatauro dia hebou taudia. ³³Bena Iesu ma e lao henia, to e itaia vada e mase vaitani. Una dainai, ia aena asie hakwaidudia. ³⁴A tuari tauna ese Iesu ohena e togea, rara bona ranu e lohilohe dobi. ³⁵E itaia tauna ese vada eme gwauria hedinarai, bona ena herevana momokani Iesu dibana ena hereva na momokani, una dainai vada bavabia dae. ³⁶Badina be una kara e vara, buka herevan ihamomokani laina eto, turiana ta asie hakwaidua. ³⁷Ma ta danu eto. Idia ese bae togea tauna na bae raraia. ³⁸Unu gau muridiai, Iosepa, Arimatea tauna, Iesu enai e hahediba hehuni Iuda taudia garidia tauna ta ese Pilato e noia, Iesu tauna baine abia oho. ³⁹Nikodemo danu gunaguna hanuaboi ai Iesu dekena ela tauna, muro bona aloe muramuradia e hebulo na e abi kau, metaudia na kilogram toi-ahui sisivana. ⁴⁰Bena idia raruosi ese Iesu tauna e abia, dabua aukana mai muramura ida e kumilaia, Iuda taudia edia mase iguridia karadia hegaegaedia. ⁴¹Iesu e hasatauroa gabuna ai be imea ta, bona una imea lalonai na gara matamata ta lalonai mase tauna ta do asie atoa. ⁴²Idia ese Iesu unusenai e atoa, badina be una dina na lagau hanai ariana iabi hegaegaena dinana, bona una gara na kahirakahira. Translation done by: Dkh. Konio Kila on Wednesday (16/08/23), time: 7.58pm. Ready for quality checking.

¹Pura dina gini-gunana ai, Maria, hane magadala, na daba vaburana ai gara ela, bena nadi e itaia gara amo vada e hekei oho. ²Bena e heau lou ela, Simona Petero bona Iesu ese e lalokau henia hahedibana dekediala ela, eto, idia ese Lohiabada na gara amo vada e abia oho, edeseniai e atoa na asi dibamai. ³Bena, Petero bona hari hahediba ta e raka lasi, gara e heau lao. ⁴Raruosi e heau hebou, bena hari hahediba ta ese Petero e heautania, iana gara ai e kau guna. ⁵Bena ia na e igo vareail, dabua aukadia e ita, tano ai e heato, a gara lalonai se raka vareai. ⁶Simona Petero ese e gavaia, ela gara lalonai e raka vareai. Bena ia ese dabua aukadia e ita, tano ai e heato. ⁷Bona dabua danu. Iesu kwarana e kumilaia gauna na dabua aukadia ida asi e heato hebou, a idau gabu ai e heloku. ⁸Bena gara ela guna hahedibana na e raka vareai, e ita bona e abi dae. ⁹Badina be idia na buka herevana do asie diba, ia na mase amo baine toreisi lou. ¹⁰Bena hari hahediba na edia ruma e lou heni. ¹¹Maria na gara murimurina mai taina ida e giniva e taiva ai, e igo vareai, gara lalona e itaia. ¹²Bena ia ese aneru rarua mai dabua kurokurodia ida e itadia, Iesu tauna e atoa gabunai: Ta be aena gabunai ma ta be kwarana gabunai hehelai. ¹³Idia ese e hereva henia eto, hahine e, dahaka dainai o taimu? Ia ese e haere henidia eto, egu Lohiabada na e abia oho, bona e atoa gabuna na asi dibagu. ¹⁴Unu e gwau toma bena e roha hegiro, Iesu na gininai e itaia, to asi dibana una be Iesu. ¹⁵Iesu ese e nanadaia eto, hahine e dahaka dainai o taimu? Daika o tahuamu? Maria banava eto, ia na uma inarina tauna ta. Bena eto, gauka e, bema oi ese ia tauanina o laohaia gabu ta negana ai, a hamaorogu, bena bainala baina ha abia. ¹⁶Iesu, eto, Maria e! Maria na e gini hegiro, eto Raboni! (una hereva anina be hahediba taumu). ¹⁷Iesu ese e hamaoroa eto, taugu ai do basio dau kau. Badina be tamada dekena do asina dae kau. A varavaragu hari dekediala aola. Ba hamaorodia do aina dae kau tamagu bona tamamui, egu Dirava bona emui Dirava dekenai. ¹⁸Bena Maria, hane magadala, na ela hahediba e hamaorodia eto, Lohiabada na itaia. Bena Iesu ese e herevalai henia herevadiala na e hamaorodia. ¹⁹Una pura dina gini-gunana hanuaboina ai, hahediba ese edia ruma iduarana e koua ahu, Iuda taudia garidia. Bena Iesu na ela idia bogaragidiai e gini eto, maino avabia. ²⁰Unu e gwau toma, bena imana ruaosi bona ohena danu e haheitalaidia bena hahediba e moale Lohiabada e itaia dainai. ²¹Iesu ese ma e hereva henidia eto, maino avabia. Tamada ese e siaigu hegeregerena ai lau ese danu umui baina siaimui. ²²Unu e gwau toma bena e hahoho henidia eto, Lauma Helaga avabia. ²³Edia dika ba gwautao taudia iboudiai na edia dika bae hegwaui tao. A edia dika basio gwautao taudia iboudiai na edia dika do bae mia. ²⁴Toma, gwautao-rua taudia ta, e nemaia hekapa, idia ida asie hebou Iesu dekediala ela hanuaboina ai. ²⁵Badina, hahediba oredia ese e hamaoroa, eto, ai ese Lohiabada na ame itaia. A Toma eto, bema ikoko berodia ia imana ai basina itamu, imagu kwaki kwakina na basina atoa kaumu. Bona imagu na ia ohena ai basina toia vareaimu negana ai, lau ese basina abia daemu. ²⁶Dina taurahani e ore, bena ena hahediba na ruma lalonai ma e heboulou, Toma danu idia ida. Ena be iduara e koua ahu, to Iesu na ela bogaragidiai ma e gini eto, maino avabia. ²⁷Bena ia ese Toma e hereva henia, eto, imamu kwaki-kwakina na atoia mai, lau imagu ba daua toho: Bona ohegu ai imamu danu ba toia vareai, bena basio daradara: bavabiabiraigu. ²⁸Toma ese e haere henia, eto, egu Lohiabada, egu Dirava? ²⁹Iesu eto, vada ome itagu dainai o abiabiraigumu, ena be asie itagu to e abiabiraigumu be nanamo. ³⁰Toa diagau Iesu ese ma e kara, ena hahediba: A idia na ina buka lalonai asi e tore guguru. ³¹A ini hidaosi mo vada e tore, umui ese bavabia dae Iesu na Keriso, Dirava Natuna bena bavabiabiraia mauri bavabia ia ladana ai. Translation done and completed by Dk. Karoho Kila on 15/05/23, Time: 10.35 pm

21

¹Una gaudia murudia esu sibona ma e hedinarai lou hahediba ediai Tiberia davarana ai. Ina na sibona ede e hedinarai toma: ²Idia na e noho hebouva - Simona Petero, bona Toma e Nemaha hekapa, bona Natanaela Galileia Kana amo, bona Sebedeo natuna raruosi, bona Iesu ena hahediba rua danu. ³Simona Petero ese e ohamaorodia eto, "Lau na ba haodamu." idia eto, "ai danu oi ida baitala," idia ela bona vanagi auta ai e hagui, a una hanuaboi gauta asie abia. ⁴Daba rerena ai, Iesu na kone ai e gini, ena hahediba na asi dibadia una be Iesu. ⁵Bena Iesu ese e nanadaidia eto, "Natugu e, mai amui eiava?" idia e haere eto, "Lasi." ⁶Bena ia ese e hamaorodia eto, "emui reke na ena vanagi na idibana kahana ai, ba torea bona haida ba davari." una dainai idia ese reke e torea bona bae veria eto to asie goada badina gwarume diagau daidiai. ⁷A Iesu ese e lalokau henia hahedibana ese Petero e hamaoroa eto, "Una na Lohiabada." Una dainai Simona Petero ese una hereva e kamonaia una na Lohiabada, ena dabua e karaia (badina ena dabua e kokia oho), bona davara ai e pau dobi. ⁸A hahediba haida na vanagi ai e diho (badina be kone na dia daudau, a roha imahui sisivana bona idia ese reke gwarume ai e honu e veria. ⁹Una dainai idia na kone ai e toa, bena lahi mai gidana unuseni ai e itaia, bona latanai gwarume haida hehato, bona parao. ¹⁰Iesu ese e hamaorodia eto, "harihari oabi gwarume dia haida ma a mailai." ¹¹Simona Petero na vanagi ai e gui kau bona reke kone ai e haroroa, gwarume badadia ai e honu, momoherea, a reke na se hedare. ¹²Iesu ese e hamarodia eto, "Aoma bona ame aniani." A hahediba ta ese danu se nanadaia, "Oi be daika?" idia dibada una na Lohiabada. ¹³Iesu ela bona parao eabia bona e henidia, bona gwarume danu. ¹⁴Una na nega ihatoina Iesu sibona ena hahediba ediai e hedinarai mase amo e toreisi lou murina. ¹⁵E aniani vaitani murina, Iesu ese Simona Petero e nanadaia eto, "Simona Ioana natuna, idia ese e lalokau henigu maragimu, oi ese o lalokau henigu badamu a?" Petero e haere eto, "Oibe Lohiabada, oi dibamu na lalokau henimumu." Iesu ese e hamora eto, "egu mamaoe ba ubudia." ¹⁶Ia ese nega iharuana ma e nanadaia lou, eto, Simona Ioana natuna, "Oi lau o lalokau henigumu?" Petero e haere eto, Oibe Lohiabada, oi dibamu na lalokau henimumu, "Iesu ese e hamaora eto, "Egu mamaoe ba regudia." ¹⁷Ia ese nega ihatoina ma e nanadaia eto, "Simona Ioane natuna, oi lau o lalokau henigumu a?" Petero na lalona e hisihisi, badina Iesu ese nega ihatoina e nanadaia, "eto oi lau o lalokau henigumu? Ia e haere eto, "Lohiabada e, oi na gau iboudiai dibamu, vada dibamu na lalokau henimumu." Iesu ese e hamaoroa eto, "Egu mamoe ba ubudia. ¹⁸Momokani, momokani, na hamaoromumu,

tauhaumu negana ai, oi ese emu rami o rioava bona emu ura gabudia ai o ha loava, a ba buruka negana ai, imamu ba toia roro bona ta ese rami baine hariolaimu bona basio ura henia gabuna baine laohaimu."¹⁹Hari Iesu unu hereva toma amo ia ese edena mase ai Petero ese Dirava baine heatolai e hahedinarai. Ia hereva murinai, ia ese Petero e hamaoroa eto, "murigu ai a raka."²⁰Petero e gini kerehai bona Iesu ena lalokau hahedibana e itaia idia e gavadia, anibou ai Iesu kemena ai e tabe kau bona e nanadaia eto, "Lohiabada e, taomu itorena tauna be daika?"²¹Una dainai Petero ese ia e itaia bona Iesu e nanadaia eto, "A Lohiabada, una tau na ede baine heto?"²²Iesu ese e haere henia eto, "bema baina ura ia na do baine noho ela bona lau baina lou mai, una be dahaka oiemu ai? A oi hari murigu ai ame raka."²³Una hereva na Iesu tadikakana bogaragidiai e piua, una hahediba na basine mase. A Iesu ese Petero se hamaoroa hari hahediba na basine noho ela bona lau baina lou, una be dahaka oiemu ai?"²⁴Hahedibana bina ini gaudia e gwauraidia hedinaraimu, bona e toredia gaudia, bona ita dibada ena hereva na momokani. ²⁵A kara diagua Iesu ese e kara, iboudiai na bema tore lau na tomamu tanobada sibona rumadia na basinema hegeregere unu buka e tore ihanoudia ai. Translation done by: RDK. Lohia Kohu, completed on Friday (24/03/23), Time: 8 am at Ret/Dk. Lohia Gari's place.

Acts

1

¹Teophilo, egu buka gunana lalonai na torea, Iesu ena kara iboudiai sivaraidia e kara bona ena hahediba, ²ema bona ia e heabi isi dinana ai, murinai ia ese abidia hidi hahedibadia Lauma Helaga lalonai e haganidia. ³Hisi e ani murinai, ia na maurinai sibona mai toa momokanidia diagau ida edia ai e hedinarai, badina be dina hari-ahui lalodiai ediai hedinarai bona ia ese Dirava ena basileia gaudia e herevalai henidaia. ⁴Bena idia ida e nohobou, ia ese e taravatudia eto Ierusalem basio rakatania, Tamada ese e gwauraia hamata gauna, "Egu amo o kamonaia gauna do bavabia." ⁵Una Ioane na ranu amo e bapatisova, a dina dia hoho bae lao bubuni bena Lauma Helaga bapatisona bavabia. ⁶Una neganai idia na hebou tamona, idia ese e nanadaia, eto, "Lohiabada e, basileia ina nega ai Isaraela ba henia lou eiava?" ⁷A ia ese e haere henidia eto, "Tamada sibona ena siahui ai vada e hagendaia dinadia bona negadia umui na basio diba." ⁸A Lauma Helaga latamui ai baine kau bona siahui, bavabia, bena lau igwaurai hedinarai taumui ai baola Ierusalem ai bona Iudea idoinai bona Samaria kahana idoinai, ela bona tanobada dokona." ⁹Bena idia ese ini gaudia e gwaurai, idia na e roha dae, ia na e heabi-isi, bena ori ta ese e govaia ahu matadiai vada asie itaia lou, ¹⁰idia na guba ai e gaga dae, ena heabi-isi e raraia bena e hoa dagu, tatau rarua mai dabua kurokurodia ida idia dekediai e gini. ¹¹Idia eto, "Galilea taumui e, dahaka dainai oginimu guba ai o gaga daemu? Ina Iesu na emui amo vada eme heabi-isi guba e laomu, na do ma baine lou mai ina harihari, ome itaia eme dae hegeregere." ¹²Bena idia na Ierusalem e lou henia ororo ladana e hatoa olive amo, Ierusalem kahairana ai dina Helaga laolaona sisivana. ¹³Bena idia na e gini dae e dae ela atai daiutuna vaia edia noho ruma bunai, Petero bona Ioane raruosi bona Iakobo bona Aniderea, Fiipo, bona toma, Batolimeo, bona Mataio, Iakobo Alfero natuna bona sinana selote taihuna, bona Iuda Iakobo natuna. ¹⁴Idia iboudiai e guriguri hebou mai lalodia tamona dia ida, hahine haida danu idia ida e hebou, bona Maria Iesu sinana bona Iesu tadikakana danu. ¹⁵Una negana ai Petero na tadikakana bogaragidia amo e gini - tore taudia na sinahu ta ruahui sisivana - bena eto, ¹⁶"varavara, tadikakagu e, revareva helagana vada baine guguru, Lauma Helaga ese Davida uduna amo e gwauraia herevana Iuda sivaraina, daika be Iesu idabai taona taudia e hakaua lao." ¹⁷Badina be ia na emai orea tauna ta bona emai gaukara ai danu ia na mai ahuna." ¹⁸(hari momokani ina tauna ena kara dika davana, amo tano ta e hoia bena e moru hedagwa, bona nuana e pou, bona bogarauna e hegigi lasi. ¹⁹Ina na Ierusalem ai e nohomu taudia iboudiai e diba bena idia ese una tano ladana na edia gado ai e hatoa "Akeledama," anina be rara tanona." ²⁰"Badina be Salamo bukana ai vada e torea eto, Ena tano baine degedege rahu, bona tau ta unuseni ai basine noho, bona ta ese ena hegunalai dagina baine abia." ²¹Ina na momokani, una dainai, ina tau ena amo daika se nega iboudiai ai e bamomaiva Lohiabada Iesu e vareai bona e lasi bogaragi mai amo, ²²matamana una Ioane enai bapatiso eabi dinana amo ema ena heabi-isi ita eda amo - ini ta na basinema Iesu ena toreisi lou igwaurai hedinaraina ai baine bamoda." ²³Idia ese tatau rarua e atodia vada Iosepa e nemaia Barasaba, daika ladana ta danu Iusto, bona Matia. ²⁴Bena idia na e guriguri eto, "Lohiabada e, oi, na taunimanima iboudiai lalodia dibamu, ini tatau raruosi idia na oi ese oabidia hidi tauna hahedinarai. ²⁵hesiai gaukarana bona aposetolo dagina baine abia badina be Iuda ese e ginia muri ela ena gabu korikori vada e abia." ²⁶Idia na mari edia ai e kara, bena mari na Matia enai e moru, bena ia na aposetolo gwauta taosi ida e duahidia lou. RDK. LOHIA KOHU ESE E HAGUGURUA, DINANA (04/08/24), TIME: 12.25

2

¹Penticose dinana ai idia iboudiai gabu tamona ai e hebou. ²Bena guba amo rege ta e rege dagu, lai badana huna na heto, e helai bou rumana e hahonua. ³Bona lahi maladia na heheto e heita, idia ta ta tubuadia ai e hururu. ⁴Bena Lauma Helaga ese e hahonudia bona idau gado-idau gado ai e hereva, Lauma ese e henidia hegeregere. ⁵Una negana ai Iuda taudia Ierusalem ai e nohova, Dirava garina e gariva taudia, tanobada tanodia logora amo ema. ⁶Una rege e kamona ai, hutuma e hebou, bena laumadia e daure, badina be ta ta e gado ena gado e kamona. ⁷Iboudiai e daradara bona e hoa, eto, ini e herevamu taudia na dia Galilea taudia a? ⁸O edeheto ita iboudai tata ena gado ena gado korikori ai eda hereva ta kamona? ⁹Patia amo, Media amo, Elam amo, Mesopotamia amo, ¹⁰Frugia amo, Pamfulia amo, Aigupito amo, bona Kurene amo (Una na Afrika kahana ta). Haida be vadivadi taudia Roma amo, haida be Iuda taumai; haida be Iuda ai e

halaodia taudia; ¹¹haida danu Krete taudia bona Arabia taudia. Tatau bini Dirava ena hoa gaudia e herevalai henidamu, eabi gado korikori ai. ¹²Iboudiai e hoa bona e daradara, e hereva heheni; eto, Ina na dahaka? ¹³A haida ese e kirikiri laidia, eto, Idia na vine ranuna matamatana e inua, e kekeromu. ¹⁴A petero na gwauta-taosi ida e gini tore, erena e habadaia, e haroro henidia, eto, Iudea taumui bona Ierusalem ai o nohomu taumui e, ina na ba haeroa, bona egu hereva ba kamoni. ¹⁵Ini na dia kekero, umui o laloamu hegeregere, badina be ina na doini daba. ¹⁶A ina na Joel, peroveta tauna, e gwauraia guna herevana, eto, ¹⁷Dirava eto, tanobada dokona dinadia ai lau laumagu baina seia dobi, taunimanima iboudiai latadiai; bena natumui mamaruanedia bona hahinedia do bae peroveta, bona emui eregabe bae matahanai; bona emui iahu bae nihi. ¹⁸Oibe, unu dinadai egu hesiai taudia bona hahinedia latadiai. ¹⁹Bena hoa gaudia guba ai baina hedinarai, bona toa gaudia tanobada ai, rara bona lahi bona kwalahu. ²⁰Dina do baine dibura, hua na rara ai bainela, Lohiabada ena dina badana bona hereadaena baine kahira-kahira negana ai. ²¹A Lohiabada ladana bae hatoa taudia na bae mauri. ²²Isaraela taumui e, ina hereva ba kamoni, Iesu, tau Nasareta, Dirava ese dekemui e siaia vasi, bona siahu karadia bona hoa karadia bona toa na bogaragimui ai e hahedinarai, Dirava ese ia imana amo e karava; umui danu dibamui. ²³Ia hari, Dirava ena lalohadai bona ena diba ese e henimui tauna, umui ese murimuri taudia imadia amo vada o hasatauroa. ²⁴A Dirava ese e hatorea isi-lou, mase ena igui e ruha, badina be mase na ia idogo-taona asi dibana. ²⁵David a danu ia herevana e gwauraia; eto, Lohiabada na nega idoinai vairgau ai na itaia, badina be ia na idibagu kahana ai, badina baina marere helaoreana. ²⁶Badina lalogu eme hisi dae, matagu eme moale bada, hidoguna helalo ai baine taruha; ²⁷badina be laumagu na mase taudia edia gabu ai basio rakatania, bona emu Helaga tauna na basine pata. ²⁸Mauri daladia vada o hadibagu; oi vairamu itana ai egu moale baine guguru. ²⁹Varavaragu e, seneda Davaida herevana na hamaoromui; ia na e mase, e guria bona garana doini mia ita dekada ai. ³⁰To ia be peroveta tauna; dibana danu Dirava vada e gwau henia hamata, ia besena ta ese ena terona ai baine helai kau eto. ³¹Una dainai e diba guna herevana e gwauraia, Keriso ena toreisi-lou herevana, ia na mase taudia edia gabu ai baine noho, bona tau-anina baine pata. ³²Hari Iesu na Dirava ese e hatorea isi; ai iboumui ai danu dibamai. ³³Bona Dirava ese imana idibana amo e abia isi; bena ia ese Tamana e gwauraia hamata Laumana Helagana vada e abia, bona vada e seia dobi; umu ese harihari o itaiaumu bona o kamoni. ³⁴Badina be Davida na gubai se daekau, a ia hari eto, 'Lohiabada ese egu Lohiabada e hamaoroa eto, 'Lau idibagu kahana ai ba helai, ³⁵ela bona oi inaimu na Aemu ihadaidia gauna ai baina halaodia." ³⁶Una dainai Isaraela besena iboudiai na bae diba waitani Dirava ese Lohiabada bona Keriso au vada e halaoa, ina Iesu, umui ese o hasatauroa. ³⁷Hari idia ese ini hereva e kamoni, kudoudia e hetaha, bena idia ese Petero bona apostolo oreana, ida e nanadaidia eto, varavaragu e, ede baia kara toma? ³⁸Bena Petero ese e haere henidia eto, "Ba helalokerehai, na gwaumu, bona iboumui ai baptiso bavabi, Iesu Keriso ladanai emui dika igwautaoa totona, bena Lauma Helaga hariharina do bavabia. ³⁹Badina be gwau-hamata be umui emui ai bona natumui ediai bona dahuai nohodia taudia ediai, Lohiabada eda Dirava ese baine boiridia taudia iboudiai ediai. ⁴⁰Hereva diagau amo ma e sisiba henida bona e haduadia eto, uru gageva-gagevana amo ba roho mauri. ⁴¹Bena erena e abiadae taudia na baptiso e abia bona una dina tamona ai taunimanima daha-toi sisivana na edia ore a e varea ai. ⁴²Bena idia na apostolo edia hahediba heboudia ai e noho taritariva aniani danu e bitu hebouva bona e guriguri hebouva danu. ⁴³Gari ese iboudiai e butudia tao bona hoa karadia bona toa diagau aposetolo ese e kara. ⁴⁴Bena abidadama taudia e noho hebou bona gau iboudiai e abi hebou. ⁴⁵Edia kohu bona edia tano danu e hahoi davadia e hari hagau-hagau, ta ta ena dabu ena dabu hegeregere. ⁴⁶Dina iboudiai mai lalodia tamoni e hebou Dubu Helaga lalonai. Bona edia rumai e aniani hebou mai moaledia ida bona mai lalodia tamona ida, ⁴⁷Dirava e imodaia bona taunimanima ese e lalo namo henidia, bona Lohiabada ese e hamauridia taudia na dina iboudiai dekada ai e haboudia. Translation done by: Mr. Igo Kohu Lohia, on Thursday (29/06/23), time: 01.00am. Ready for quality Check.

3

¹Nega ta, dina gelona gurigurina negana, Petero Ioane ida dubu helagana ai e dae kau. ²Unuseni ai tau ta ae hedairiki ai e vara, dina iboudiai e huaia laova, dubu helaga iduarana ladana "Hereadae" badinai e hahelaiava, bena dubu helaga ai e daeva taudia ediai e noi hegameva. ³Ia ese Petero bona Ioane e itadia, dubu helaga ai e dae kau negana ai, bena ediai ma e noinoi. ⁴A Petero Ioane ida ese e raraia tao, eto, Ba raraimai. ⁵Ia ese una hereva e kamoni, ia banava eto, gau ta bae henia. ⁶A Petero eto, Silver bona gold na asi egu, a dekegu ai e miamu gauna hari na henimumu, Iesu Keriso, tau Nasareta; ladana ai a raka. ⁷Imana idibana amo e veria tore, bena aena bona aena komukomuna vada e hedai kunu. ⁸Bena e roho isi, e gini tore, e raka matama. Bena idia ida dubu helaga lalonai e raka vareai, e raka roho isi, Dirava e heatolaia. ⁹Hutuma ese e itaia, e raka bona Dirava e heatolaia; ¹⁰bona dibadia ia na vaia dubu helaga iduarana ladana "Hereadae" badibadinai e helaiva bona e noi hegameva tauna; bena e hoa dikadika bona e daradara bada, ienai e vara gauna dainai. ¹¹Aena vada e namo tauna ese Petero bona Ioane e dogodia taova ai, taunimanima hutuma ese e heau henidia hebou, dehe ta ai ladana na "Solomona ena dehe" laumadia na e daure. ¹²Petero ese e itadia, bena hutuma e hereva henidia, eto, Isaraela taumui e, dahaka dainai ina gau o hoalaiaumu? Bona badina be dahaka o raraimai taomu? O laloamu ai na sibomai emai siahu eiava emai namo daidiai ina tau a hamauria a? ¹³Aberahamo bona Isa'ako bona Iakobo edia Dirava, bona tamada edia Dirava ese ia Natuna e heatolaia, to umui ese Pilato o henia, bona Pilato urana e urava baine kahua nege neganai na umui ese o dadaraia. ¹⁴Helaga bona Kara Maoromaoro tauna umui ese o dadaraia, a ala-ala tauna be o noia baine hamauria oto. ¹⁵Mauri Biaguna, be umui ese o alaia mase; to Dirava ese mase amo ma e hatorea isi, ini ai be dibamai taumai. ¹⁶Bena ina ia ladana e abidadama henia tauna o itamaimu bona umui dibamui tauna, ia ladana ese vada e hagoadaia; oibe, ia iabidadama henia ese ina tau vada e hamauria umui iboumui ai vairamui ai. ¹⁷Varavaragu e, dibagu umui na mai emui

lohia ida unu o kara toma na lalomui asie parara dainai.¹⁸ A Dirava ese peroveta taudia iboudiai ududia amo Keriso na hisi baine ani herevadia vada e gwaurai; unu hereva vada e hamomokani vaitani.¹⁹ Una dainai, ba helalo lou, ba helalo kerehai, bena emui dika bae heabi oho, bona hahemaui negadia na Lohiabada ena amo baema.²⁰ Bona ia ese Keriso ma baine siaia, gunaguna vada e gwaurai hidi emui Iesu bunai.²¹ A guba ai baine heabi dae guna, ela bona gau iboudiai ihamatamatadia negadia. Dirava ese nega gunadia amo ena peroveta taudia helagadia ududia ai vada e gwaurai hegeregere.²² Mose ese seneda e hamaorodia eto, Lohiabada emui Dirava ese peroveta tauna ta do baine haginia umui emui, varavaramui edia amo lau bamogu. Ia ese baine gwaurai henimui herevadia iboudiai na ba kamoni.²³ Bona una peroveta tauna basie kamoni henia taudia iboudiai na taunimanima padadia amo bae mase ore.²⁴ Oibe, bona peroveta taudia iboudiai danu, Samuela ena amo ema bona hari, ini dina vada e gwaurai.²⁵ Umui na peroveta taudia natudia, bona Dirava ese umui senemui e gwau henidia hamata, Aberahamo e hanamolaia eto, oi garamu edia amo tanobada besedia iboudiai do bae namo.²⁶ Dirava ese Natuna vada e haginia, bena e siaia guna emui ai, ihamaurimui bona emu dika amo ihaloumui totona. Translation done by Rev. Eiwana Zacharias on Friday (13/09/24), time: 7.16 am

5

¹Tau ta ladana be Anania, adavana Sapira ida, tano ta e hoia; ²to idia ese tano davana kahana e moia tao (adavana danu dibana), bena kahana mo e laohaia aposetolo taudia vairadia ai eatoa diho.³ Bena Petero eto, "Anania e, dahaka dainai Satani ese lalomu e hahonua, bena Lauma Helaga o koia bena tano davana kahana o dogoatao? ⁴Do asio hoia negana ai, tano na oiemu, bona o hoia negana ai davana na oiemu, hari ina kara be ede o lalohadailaia toma? Oi ese taunimanima some koia, a Dirava." ⁵Una hereva e kamonaia murinai, Anania na e hekida diho bena e mase, bena harina e kamoni taudia iboudiai e gari dikadika. ⁶Bena eregabe e toreisi, dabua ai e hiria, bena e huia lasi, e guria. ⁷Hora toi sisivana vada ela, adavana ma e raka vareai, asi dibana dahaka e vara. ⁸Bena Petero ese e hamaoroa eto, " Ahamaorogu umui ese tano o hoia gauna be ina." Bena ia e haere eto, oibe, davana gauna bena. ⁹Bena Petero ese e hamaoroa eto, Edeheto umui raruosi lalomui o hatamona Lohiabada ena Lauma ba dibagania oto? Adavamui igurina taudia aitadia iduara ai gigini, oi danu ma bae huamu lasi." ¹⁰Bena ia danu e moru Petero aena badinai bena vada e mase. Hari eregabe tatau dia e vareai, masena ai e davaria, bena e huia lasi, e guria adavana dekenai. ¹¹Una negana ai ekalesia idoinai bona harina e kamoni taudia iboudiai gari bada ese e abidia (butudia tao).¹² Toa bona hoa karadia diagau aposetolo ese e karava taunimanima vairadiai. Idia iboudiai danu mai lalodia tamona ida Solomona ena dehe ai e hahebouvai. ¹³A taunimanima iboudiai ai na asi goadadia idia ida bae hebou; Edeheto taunimanima ese e imodaidiava. ¹⁴Dounu hutuma bada Lohiabada e abidadama heniava ena orea ai e hebouvai, tatau bona hahine. ¹⁵Gorere taudia danu e huadia lasiva edia bedi ai ariara ai e kurediava, Petero baine raka hanai negana ai ia laulauna ese haida baine hakerukerudia helaoreana. ¹⁶Ierusalem badina hanuadia taudia hutuma bada danu e hebouvai, gorere taudia bona lauma dikadia ese e bolodia taudia danu e laohaidia bena ibouboudiai ai e hagevadia. ¹⁷A hahelaga tauna e toreisi, bona ia e bamoa taudia (Sadukea taudia edia orea); bena e mama (vagege) henidia, ¹⁸bona aposetolo taudia e dabaidia tao, bena dibura rumana ai eatodia. ¹⁹A hanuaboi ai Lohiabada ena aneru toi ese dibura rumana iduarana e kehoa e hakaudia lasi, bena eto, ²⁰aola, bena ba gini dubu laloni ina mauri herevana idoinai taunimanima iboudiai ba herevalai henidia. ²¹Una hahedua e kamoni bena daba matanai dubu ai e dae kau e hahediba. A hahelaga tauna badana mai bamona ida ela, kaunsolo taudia bona Isaraela tau-badadia iboudiai e boiridia hegogo, bena ena hesiai taudia dibura rumana e siaiadia lao aposetolo taudia bae mailaidia (hakaudia).²² A hesiai taudia ela to dibura rumana ai asie davaridia, bena e lou ela, e haripiu, ²³eto, a ginidae negana ai dibura rumana vada e hekou kunuka-kunuka bona hegima taudia danu iduara badibadidiai gigini, to iduara a kehoa negana ai, ruma lalona na asi tauna. ²⁴Hari dubu helaga biaguna bona hahelaga taudia ese ina hereva e kamoni, e daradara bada, asi dibadia unu kara anidia be dahaka. ²⁵Bena tau ta dekedie ela bena e hamaorodia eto, "Aitaia, dibura rumana ai o koudia taudia na dubu laloni gigini bena taunimanima e hadibadia mu. ²⁶Bena dubu helaga biaguna ena hesiai taudia ida ela, aposetolo eha-kaudia lou, to asie dagedage henidia, taunimanima ese nadi amo ba hododia na garina. ²⁷E hakaudia vareai, kaunsolo taudia vairadiai e haginidia. Bena hahelaga tauna badana ese e nanadaidia, eto, ²⁸Ai ese a haduamui, ato "Una tau ladanai basio hahediba." A harihari emui hahediba herevadia ese Ierusalem vada eme hahonua bona o habadelaimaimu, una tau ena mase dainai. ²⁹Bena Petero, aposetolo oreadia ida e haere, eto, "Ai na Dirava ikamoni henina be namo taunimanima ikamoni henia be dika. ³⁰Tamamai edia Dirava ese Iesu vada e hatorea isi, umui ese o alaia mase satauro ai o tauadae. ³¹Dirava ese vada e abia dae ia imana idibana ai Lohiabada bona Hahemaui tauna ai vada e halaoa, Isaraela taudia baine hahelalodia kerehai bona edia dika baine gwau tao. ³²Ai na ini gau a gwauraimu, Lauma Helaga danu e gwauraimu, Dirava ese ia ikamoni henina taudia vada e henidia. ³³Kaunsolo taudia ese unu hereva e kamoni ai, e badu dikadika e urava aposetolo bae aladia mase. ³⁴A kaunsolo ta Farasea tauna, ladana Gamaliel, taravatu ihahedibaina tauna, taunimanima iboudiai ese e matauraiava e tore isi bena e haduadia (haganidia) aopsetolo na bae raka lasi nega taina murimuri ai do bae noho. ³⁵Bena e hamaorodia eto, "Isaraela taumui e, sibomui nahuamui ba toho bena ini taunimanima ede ba karadia toma. ³⁶Idau nega ai Theuda e ginitore sibona e gwauva ia na herea tauna, bena taunimanima sinahu-hani ia enai e tao. E alaia mase, bona ena orea taudia e hakarohodia bona e haoredia. ³⁷Ia murinai, Iuda tau Galilea e ginitore taunimanima ladadia itoredia neganai bona taunimanima haida ienai e tao. To ia danu e alaia mase bona ena orea taudia danu e hakarohodia. ³⁸Harihari na hamaoromuimu, ini tatau edia amo raka siri, sibodia ba rakatanidia, badina be ini hereva bona kara bema taunimanima edia amo anidia na basiema vara. ³⁹To bema Dirava ena amo, umui na basioma haoredia diba eiava readia sibomu boma hedavari umui danu Dirava o tuari heniamu. ⁴⁰Bena

aposetolo e boiridia vareai e dadabadia bena e haganidia Iesu ladana ai basie haroro, bena e kahudia nege. ⁴¹Una dainai, aposetolo ese kaunsolo e rakatania mai moaledia ida badina be Iesu ladana bagunai hisi e ani. ⁴²Una murinai, dina iboudia ai, dubu ai bona ruma ta ta lalodia ai, e hahedibava bona Iesu Keriso sivaraina namona iharorolaina asie hadokoa. Translation done by: Mrs. Ori. C. Kohu on Wednesday (09/08/23), time: 4.52am . Ready for quality checking.

6 ¹una dinadia ai ibadinana taudia eha-hutumava bena Helene gado ai e hereva taudia ese Helene gado ai e hereva taudia e maumauraidia matama badina be edia hahine vadodia na dina iboudiai aniani iharina ai e dabu loulouva. ²Bena aposetolo ese Iesu ibadinana taudia hutuma e haboudia eto, Ai ese Dirava ena hereva iharorolaina baia hadokoa aniani iharina totona na dia namo. ³Una dainai varavaramai e, umui na taumui hahitu avabidia hidi haridia namodia taudia Lauma bona aonega ai e honumu taudia bena ina gaukara ba henidia. ⁴A ai ese nega idoinai guriguri bona haroro baia goadalaia. ⁵Ina hereva na iboudiai ese e abiadae bena haida e gwauraidia hidi Stefano abidadama bada bona Lauma Helaga ese e rohea tauna Pilipo bona Prokoro bona Nikodemo bona Timona bona Pamena bona Nikolao ia na tau Anitioka Iuda tauna ai e halaoa. ⁶Unu hahituosi na idia ese aposetolo vairadiai e haginidia. Bena aposetolo na e guriguri guna bena imadia latadiai e ato kau. ⁷Bena Dirava ena hereva e piua rohoroho bona Iesu ibadinana taudia Ierusalema ai eha-hutumadiava bona hahelaga taudia hutuma ese danu e abiabiraia. ⁸Stefano na harihari-bada ai bona siahui ai e honu bona ia ese hoa karadia bona toa badadia taunimanima vairadia ai e karava. ⁹Bena e ruhadia nege oreana edia dubu taudia haida bona Kurene bona Alesanderea bona Kilika bona Asia taudia haida ese Stefano ida e hepapa-ahuahu. ¹⁰To idia na asi siahudia bae gwau-tubu badina be ena hereva na aonega bona Lauma ai e hahonua. ¹¹Una dainai idia ese haida lalodia e ani baeto Ai na ena hereva a kamoni Mose bona Dirava e hadikalaidia. ¹²Unu amo idia ese hanua taudia bona heitatao taudia bona Itorena taudia e hahehou-heroudia bena ia dekena e heau lao vada e dabaia tao Kaunsolo taudia vairadiai e laohaidia. ¹³Bena idia ese hahebae koikoi e haginidia tore, idia eto, Ina tau ese ina gabu helagana bona taravatu ihadika laina herevadia na se hadokomu. ¹⁴Ai ese danu ena hereva a kamoni, eto Iesu, tau Nasareta, ese ina gabu baine rohoa, bona Mose ese e henida karadia danu baina ha-idaui. ¹⁵Bena Kaunsolo gabunai e helaiva taudia iboudiai ese e raraia tao, vairana e itaia, aneru ta vairana na heto. Translation done by: Mrs. Ori. C. Kohu on Sunday (13/08/23), time: 12 midday. Ready for quality checking.

7

¹Bena helaga tauna badana eto, "Ini gau (hereva) momokani, a?" ²Bena Stefano eto, "Tatau, tadikaka, bona tamagu logora, lau a kamoni henigu: Hairai Diravana na ita tamada Aberahamo enai e hedinarai Mesopotania ai, gabe amo ia na Haran ai e nohova, ³bona ia ese vada eha maoroa eto, 'emu tano amo bona emu bese amo baola, bona baoma lau ese baina haheita laimu tanona lalonai. ⁴Bena ia vada Kaldea taudia edia tano amo e raka-lasi bona Haran ai e nohova; unu amo, tamana ena mase murinai, Dirava ese e mailaia ina tano lalonai, ina harihari umui ese o noho laiamu. ⁵A ia ese tano ahuna ta se henia - sisiba taina danu lasi. To e gwauhamata ena tano ta baine henia, bona murina garadia (besedia) danu baine henidia - enabe ia na do asi natuna ta. ⁶A Dirava ese vada ini e hereva henia toma, ia garana logora idau tano ai do bae noho, bona unu tano e noholaimu taudia ese hesiai taudiai bae halaodia bona do bae hahisi-hisidia lagani sinahu-hani. ⁷To lau ese idia isiaidia e lao henimu besedia na do baina hahemaoro henidia, Dirava eto, 'bona una murinai idia na do bae rakalasi bona lau bae tomadiho henigu ina gabu ai.' ⁸Bena Dirava ese Aberahamo peritome taravatuna vada henia, bona Aberahamo vada Isaak tamana ai ela, bona dina ihatauranina ai e peritomea; bona Isaak be Jacob tamana ai ela, bona Iakobo be iduhu ikwaradia taudia gwaute ruaosi tamadia ai ela. ⁹Badina be iduhu ikwaradia taudia na Iosepa e mama henia, idia ese e hoihoi laia Aikupito ai; a Dirava be ia ida. ¹⁰Bona ia ese e hamauria ena hisihisi iboudiai lalodiai. Ia ese hahenamo bona aonega e henia, Parao, Aikupito Pavapavana vairanai bona ia ese eabia hidi Aikupito bona ena ruma taudia baine lohiadia. ¹¹Una nega ai, doe ta vada e kau, Aikupito ibounai lalonai bona Cannan ai, bona hisihisi badaherea bona tamada (seneda) ese aniani se davaria. ¹²A Iakobo e kamoni Aikupito na mai uitina neganai, ia ese tamada (seneda) e siaidia lao edia laolao gini-gunana. ¹³Edia laolao iharuana ai, Iosepa ese tadikakana eha dibadia ia be daika, bona Iosepa ena bese Parao ese vada e dibadia. ¹⁴Bena tadikakana e siaidia-lou, Iosepa ena gwaukau tamana, Iakobo bona varavarana iboudiai, taudia hitu-ahu-laima boiboidia e kara. ¹⁵Bena Iakobo vada e diho lao Aikupito ai, bona unuseni ai e mase, ia bona ita seneda. ¹⁶Idia vada e huadia lao Sekem bona gara lalodiai e atodia Aberahamo ese Hamoro natuna edia amo silva monidia ai e hoidia Sekem ai. ¹⁷Gwau-hamata negana vada e kahira-kahira neganai - Dirava ena gwau-hamata Aberahamo enai - taunimanima vada e hutuma bona e pere rohoroho Aikupito ai, ¹⁸ela bona papavapa idauna ta ma Aikupito e lohiaia ia na asi dibana Iosepa. ¹⁹Ia ese eda taunimanima e dibaganidia bona seneda eha hisihisidia, eha duadiava natudia karukarudia bae hahedinaraidia bena idia na basie hamauridia. ²⁰Una negai, Mose vada e vara; bona ia na rahonamo merona Dirava enai. Ia na hua toi e ubua ia Tamana ena ruma ai. ²¹Ia murimuri ai eatoa neganai, Parao natuna kekenina ese vada e abia bona sibona ese e naria natuna na heto. ²²Mose na Aikupito taudia edia aonega idoinai vada eha dibalaia, bona ia na e goada herea ena hereva bona kara lalodiai. ²³A ia laganina e haria-hui hegeregere ai, lalona vada e hadaia, tadikakana Isaraela taudia, do baine vadivadi dia. ²⁴Isaraela tauna ta e itaia Aikupito tauna ta ese eha dikaiava, Mose ese gwauna egwa, Aikupito tauna e alaia mase, ²⁵badina be eto tadikakana lalodia vada bae parara Dirava na imana amo idia eha mauridiava, to idia na se lalopararava. ²⁶Dina iharuana ai, ia na ema Isaraela taudia haida e heaiva dekedea, bona ia ese eha marumarudia bae maino, eto, "Tatau e, umui na tadikaka. Dahaka dainai o hahedika hehnimu, a?" ²⁷A dekena tauna e hadikaiava tauna ese e doria oho, eto, "Oi be daika ese ai emai

lohia bona hahemaoro tauna ai eha laomu, a? ²⁸Oi na souramu lau bavalagu, varani Aikupito tauna o alaiava na heto, oi ourama, a? ²⁹Bena Mose na ina hereva dainai e heau ela Midiana tanona ai idau tano e e noho taunai ela, unuseni natuna maruanedia rarua eha varadia. ³⁰Lagani haria-hui vada eore, aneru ta enai e hedinarai Sinai ororona tanona gagaenai, au ginigini e araiava hururuna lalonai. ³¹Mose ese lahi e itaia neganai, ia na e hoa; bona e raka kahikahi itana totona, unu amo Lohiabada gadona vada eto: ³²'Lau na senemui edia Dirava, Aberahamo ena Dirava, Isaak ena bona Iakobo ena.' Bena Mose tauanina idoinai e heude-heude bona seura baine roha kau. ³³Bena Lohiabada ese e hamaoroa eto, "Emu tamaka aemu amo a kokidia oho, badina be oi oginimu gabuna na tano helagana. ³⁴Momokani lau ese egu taunimanima Aikupito ai, edia hisihisi vada na itaia bona edia ganagana vada na kamoni, bona lau vada na diho mai idia ihamauridia; una dainai harihari aoma lau ese baine siaimu Aikupito baola." ³⁵Ina Mose tamona, idia ese e ihi-ihiraiava, etomu, 'Daika ese emai lohia bona emai hahemaoro tauna ai vada e halaomu?' Tauna ia bunai Dirava ese vada e siaia, edia lohia bona edia hahemaori tauna ai e halaoa - au ginigini lalonai Mose enai e hedinarai aneuna imana amo. ³⁶Ina Mose ese Aikupito amo e hakaudia lasi, hoa karadia bona toa idauida e karava Aikupito ai bona Davara Kakakana ai bona tano gagenai ai, lagani haria-hui lalodiai. ³⁷Ina Mose tamona ese Isaraela natudia e hamaorodia, eto, 'Dirava ese tadikakamui bogaragimui amo emui peroveta tauna ta baine haginia-tore, peroveta tauna ta lau hegeregeregu. ³⁸Tauna binai, ia na tano gagaena hegogona lalonai ia Sinai Ororona ai e hereva heniava aneuna ida, bona ia na ita seneda ida; tauna binai mauri herevadia vada eabidia ita baine henida. ³⁹Tauna binai, ita seneda ese ikamonai henina seurava, a idia ese vada e dadaraia, bona kudoudia ai eurava Aikupito ma bae lou lao. ⁴⁰Idia ese Aaron vada e hereva henai, eto, 'ita igunalaida diravadia haida a karadia. Badina ina Mose, ita e hakaudia lasi Aikupito tanona amo, ita na asi dibada dahaka vada enai eha vara. ⁴¹Bena una nega ai idia ese boromakau natuna laulauna ta vada e karaia, bona boubou gaudia e laohai kaivakuku e henai bona e moaleva badina edia ima karakara gaudia daidiai. ⁴²A Dirava ese vada e muridia bona e raka tanodia guba hisiudia bae tomadiho henidia, hegeregereuna Peroveta taudia edia buka ai vada e torea, eto, 'Isaraela taumui e, lagani hari-ahui tano gagaenai umui ese ala-ala boromakau dia bona boubou gaudia ta vairagu ai o atodia, a? ⁴³Umui ese Moleke ena dabua dubuna bona emui hisiu diravana Refan o abidia daeva, bona laulau o karadia bae tomadiho henidia: bona lau ese baina lao haimui Babulonia unukahana. ⁴⁴Dabua dubuna, taravatu ihahedinaraina gauna na seneda ese tano gagaena ai eabia, hegeregereuna Mose e hereva henai tauna ese e haduaiava ia ese e itaia oromana hegeregereuna ai do baine karaia. ⁴⁵Dabua dubuna binai, ita seneda Iosua neganai ese danu vada eabia bona idia ese vada e mailaia idau besedia lalodiai. Dirava ese vada e luludia lasi seneda vairadia amo ema bona Davida negana ai. ⁴⁶Ia vada Dirava ena hahenamo eabia, bona e noinoiva Iakobo ena Dirava ena noho gabuna ta baine davarai. ⁴⁷To, Solomona ese Dirava ena ruma vada e karaia. ⁴⁸To, Herea Mikamika na dia ima karakara rumadiai e nohomu, peroveta tauna ena hereva hegeregereuna, eto, ⁴⁹Guba na egu helai gabuna, bona tanobada na lau aegu iato-kauna gauna, Umui be ruma ede bamona ta ba karaia lau egu.' Lohiabada e gwaumu, eiava Egu laga-ani gabuna be dahaka, a? ⁵⁰Ini gau iboudiai be dia imagu ese e karadia, a? ⁵¹Umui na aio auka bona kudoumui bona taiamui na do asie peritomedia. Umui ese nega iboudiai Lauma Helaga o laoa ahumu; senemui ese e laoa ahuva hegeregereuna. ⁵²Eedia peroveta taudia vada umui senemui ese se dagedage henidia, a? Idia ese Kara Maoromaoro tauna ena mai e gwaoria gunava taudia na e aladia maseva, ina harihari umui na ia taona itorena bona ialana taudiai vada ome lao, ⁵³umui na aneru ese e heni taravatuna vada oabia, to asio badinaia. ⁵⁴Ini hereva e kamoni neganai, kansel taudia na e badu dikadika bona gadigadidia Stefano e gariri henai. ⁵⁵A ia, Lauma Helaga ai e honuhonudae, e gaga-isi Dirava hairaina guba ai vada e itaia; bona ia ese Iesu e itaia Dirava idibana kahana ai e gini. ⁵⁶Stefano, eto "Aroha lao, guba na itaiamu vada e hekeho, bona "Taunimanima Natuna na Dirava idibana kahana ai e gini. ⁵⁷Iniseni ai, kansel taudia ese taiadia e koudia bona e lolo mai eredia badadia ida, iboudiai ese ia vada e heau henai. ⁵⁸Bena hanua amo e dabua lasi murimuri ai, idia ese nadi amo e hodoava. Herarai taudia ese edia (murimuri) dabuadia e atodia diho eregabe merona ta ladana Saulo aena badina. ⁵⁹Idia ese Stefano e hodoava lalonai, ia na e boi lasiva bona e tomamu, "Lohiabada Iesu, laumagu na avabia." ⁶⁰A ia na e hetuitui, e lolo mai erena badana ida eto, "Lohiabada e, ina kara dika davana na basio henidia." Ia ini e hereva toma negana ai, ia vada e mahuta.

11

¹Harihari aposetolo bona tadikaka Iudea ai vada e kamoni idau bese taudia ese danu Dirava ena hereva vada e abiadae. ²Harihari Petero vada e dae Ierusalem ai neganai, ia na e peritomedia oreana taudia ese e hepapa-ahu-ahu henai; ³idia eto, "Oi be se peritomedia taudia ida o hebouva bona idia ida o anianiva!" ⁴A Petero ese gau iboudiai e hamaorolaidia goevagoeva; ia eto, ⁵lau be Iopa hanuanai na guriguriva, bona egu mata hanai ai lau ese (gau ta - udauda gauna ta) na itaia dabua bada hereana na heto, isena haniosi ai guba amo e tua dobiva. Lau e diho heniguva. ⁶Lau ese na raraiava bona na lalohadai laiava. Lau ese tanobada ai aedia hani ai e rakamu gaudia na itadia, bona e dagedagemu manudia, bona e raumu manudia bona guba ai e rohomu manudia na itadia. Bena ere ta danu na kamoni, e hamaorogu eto, "A tore isi, Petero; avaladia bona bavanidia?" ⁸A lau nato, "Dia unu heto, Lohiabada e; badina lau na dia helaga bona dia namo gauna ta vada na ania ema bona ina nega." ⁹A ere na nega iharuana guba amo ema, eto, "Dirava ese dahaka e gwauraidia nanamo, na basio didika." ¹⁰Nega ihatoina vada ini e vara toma, bona gau idoidiai guba ai ma eabidae lou. ¹¹Aitaia, nega tamona taunimanima tatoi vada ai a nohova rumana vairanai gini; idia na Kaisarea amo vada e siaidia lau dekegu baema. ¹²Lauma Helaga ese e haganigu idia ida bainala, basina lalo daradara idia ediai. Ini tadikaka tauratoi osi danu lau ida vada ala, bona una tau ena ruma ai a vareai. ¹³Bena ia ese vada e hamaoromai ia ese aneru ta vada e itaia ena ruma lalonai gini bona e tomamu, "Tatau asiadia Iopa baela bona Simona, ladana Petero, bae boiria. ¹⁴Ia ese hereva

ta baine hamaorolaimui unu amo umui na bo maurimu - umui bona emui ruma taudia iboudiai.¹⁵ A egu hereva na matamaiava ai, Lauma Helaga na idia latadiiai vada e diho, guna ita latadai danu e diho hegeregere.¹⁶ Bena Lohiabada ena hereva vada na helaloune lai, ia eto, "Ioane momokani ranu amo e bapatisova; a umui na Lauma Helaga lalonai do bae bapatisomui."¹⁷ Bena bema Dirava ese idia na harihari gauna tamona e henidia hegeregere ita ese Lohiabada Iesu Keriso ta abidadama henia neganai vada e henida, lau be vada daika, bona lau ese ?Dirava baina laoa-ahu, a?"¹⁸ Idia ese ini gau e kamonaidia neganai, idia na asi edia halou herevadia, a idia ese Dirava e imodaia, e tomu, "Bena Dirava ese helalokerehai maurina Bese Idaudia danu vada e henidia."¹⁹ Harihari momokani unu Stefano negana dagedagena ese e hakarohodia taudia vada ela Fonisia, bona Saiprus, bona Antioka, sivarai namo be dia haida e harorolai henidiava a Iudea taudia sibodia mo.²⁰ A taudia haida be Saiprus bona Sirene amo ema Antioka bona Helena taudia danu e hereva henidiava, Lohiabada Iesu sivaraina namona e harorolaiava.²¹ Lohiabada imana na idia ediai; bona hutuma bada ese edia hereva eabidae, Lohiabada vada e lou henia.²² Harihari idia sivaraidia vada Ierusalem ekalesia dia ese e kamonaia bona idia ese Banabas vada e siaia lasi bainela bona Antioka.²³ Ia ema bona Dirava ena hariharibada eitaia neganai, ia vada e moale; bona iboudiai e hagoadadia Lohiabada enai bae noho mai kudoudia iboudiai ida.²⁴ Badina ia na tau namona bona Lauma Helaga bona abidadama ai e honu-honudae, bona Lohiabada ibadinana taudia vada e hutumava.²⁵ Bena Banaba vada e raka lasi ela Tasia Saulo itahuna.²⁶ Ia ese e davarua neganai, ia ese e hakaua lao Antioka. Unuseni ai, idia raruosi lagani ta dubu taudia ida e hebouva bona hutuma e hadibadiava. Harihari hahediba taudia na ekalesia dia e gwaurai guna Antioka ai.²⁷ Harihari ina nega ai peroveta taudia haida vada Ierusalem amo ema Antioka.²⁸ Taudia ta, ladana Agabus, vada e ginitore bona Lauma ese e hadibaia vairai doe badana ta na baine vara tanobada idoinai latanai. Ina na Klaudio negana ai vada e vara.²⁹ Una dainai, hahediba e lalohadai, bema bae karaia diba, idia ta ta edia heduru bae siai lao tadikakadia Iudea ai e nohova taudia ediai. Bena unu vada e kara toma; ³⁰idia ese edia moni Banaba bona Saulo imadiiai eato dubu taudia badadia bae henidia.

12

¹Harihari una nega ai, Pavapava Heroda ese dubu taudia haida latadiiai imana e atoakau e urava baine hakaudia kerere.² Ia ese Iakobo, Ioane tadikakana, dare amo vada e alaia mase.³ Gabeamo Iudea taudia edia moale aitadia amo, ia ma e urava Petero danu baine guia. Harihari una be Parao-setubumu Ariana dinadia ai.⁴ E guia murinai, ia ese dibura rumanai vada eatoa, tuari taudia hani eatodia ia ba itaia tao, e urava Lagauhanai Ariana murinai, baine mailaia taunimanima vairadia.⁵ Una dainai, Petero na dibura rumanai eatoa; a dubu taudia ese Dirava e guriava ia dainai.⁶ Una hanauboi ai Heroda ese baine hakau lasi murimuri ai baine hakotaia eto, Petero na tuari taudia rarua padadiiai e mahutava, seini rua amo e guia, a vaira iduarana e naraiava taudia danu dibura rumana e nariava.⁷ Aitaia, Lohiabada ena aneru ta e hedinarai dekenai, bona dibura rumana danu e hadiaria. Ia ese Petero ohenai e pata bona vada e hanogaia, etomava, "A toreisi haraga," bona ena seini imana amo vada e moru.⁸ Bena aneru ese vada e hamaoroa, eto, "Sibomu emu dabua a karaia bona emu tamaka ba karadia." Petero vada unu e kara toma. Aneru ese vada e hamaoroa, eto, "Murimuri dabuana a karaia bona murigu amo baoma."⁹ Bena Petero vada aneru e gavaia bona e raka lasi. A ia na sedibava aneru ese dahaka e karava be momokani. Badina ia e tomava ia na e mata-hanaiva.¹⁰ Idia ese hegima tauna ginigunana bona iharuana vada e hanaidia murinai, idia vada ema hanua badana vareaina aurina iduarana; idia daidiai sibona vada e hekeho. Bena idia e raka lasi bona dala ta amo e laovai, bona aneru ese una hora ai vada e rakatania.¹¹ Petero e helaloune neganai, ia vada eto, "Harihari name diba momokani Lohiabada ese ena aneru vada e siaia lau baine rauagu Heroda imana amo, bona Iudea taudia ese e naridiava gaudia iboudiai amo."¹² Ia ese ina gabu e dibaia neganai, ia vada ela Ioane, ladana ta danu Mareko, sinana Maria ena ruma, taunimanima momo e hebouva bona e guriguriva.¹³ Ia ruma maguna iduarana ai e kokokoko neganai, hesiai kekenina ta ladana Roda ema iduara ikehona totona.¹⁴ Ia ese Petero gadona e dibaia neganai, ena moale bada amo, iduara na sekehoa; a e heau vareai ruma lalonai, e hamaorodia una be Petero iduara ai gini.¹⁵ Bena idia ese e hamaoroa eto, "Oi na kavakava," A ia na dounu e ura dikava. Bena idia eto, "Una na ia ena aneru,"¹⁶ A Petero be dounu e kokokokova, bona idia ese iduara vada e kehoa neganai, idia ese eitaia bona e hoa.¹⁷ Bena Petero ese imanai e hadibadia rege basie habada, bona e hamaorodia Lohiabada ese ede bamonaia dibura rumana amo e harakaia lasi. Ia ese vada e hamaorodia, eto, "Ini gau na Iakobo bona tadikakana ba hamaorolaidia." Bena ia ese vada e rakatanidia bona gabu ta ma ela.¹⁸ Hari daba e rere neganai, tuari taudia padadiiai rege maragina dikana ta sedae una dahaka Petero enai e vara gauna amo.¹⁹ Heroda ese ia e tahuava bona sedavaria murinai, ia ese tuari taudia vada e nanadaidia bona e tamanudia mase ahuna do bae abia. Bena ia vada Iudea amo ela Kaisarea bona unuseni ai vada e noho.²⁰ Hari Heroda vada e badu dikadika Taire bona Sidoni taudia ediai. Una dainai idia iboudiai ia dekenai vada ela. Idia ese Pavapava iduruna tauna, Balatus lalona vada e hanamodia baine durudia. Bena idia na herohehaino e noinoi laia, badina be edia hanua anianidia na Pavapava ena hanua amo eabidiava.²¹ Unu amo eabiahidi dinana ai, Heroda na pavapava dabuadia e karadia. Ena terona ai helainai, ia ese vada e haroro henidia.²² A taunimanima vada e loloi, eto, "Ina na dirava ta gadona a dia taunimanima ta gadona."²³ Una hora ai, Lohiabada ena aneru ta ese vada e rahua mase, badina be ia ese Dirava se heatolaiava dainai, bona biluga logora ese vada eania bona e mase.²⁴ A Dirava ena hereva vada e bada bona e pere rohoroho.²⁵ Bena Banabas bona Saulo edia gaukara e haguagurudia neganai, idia ma e lou lao Ierusalem, Ioane ladana ta danu Mareko, idia ida ela hebou.

13

¹Hari Ekalesia oreana Antioka lalonai, be mai edia perveta bona hahediba taudia. Idia na Banaba bona Simeona (daika be Nigera), bona Lukio Kurene raruosi Manaen (ia na Heroda Gaubada ida e ubua hebou tauna bona Saulo. ²Una neganai idia na Lohiabada e toma henia dihova bona e anivagava, Lauma Helaga ese e hamaorodia eto, "Umui ese Banaba bona Saulo, ida na ba hahelagadia lau egu gaukara ta ikarana vada na abidia hidi." ³Una dainai idia na e anivaga bona e guriguri bona imadia na raruosi latadai e ato kau, bena e kahudia nege. ⁴Momokani Banaba bona Saulo na Lauma Helaga ese e siaidia lasi bona kone amo e lasi Seleuka ai, bona unu amo lagatoi ai egui Kupro motumotu e heau lao. ⁵Una neganai idia na Salami hanuana ai e vareai, idia ese Dirava ena hereva Iuda taudia edia Dubu Helaga lalodai vada e harorolaia matama. Ioane Mareko danu idia raruosi e durudia. ⁶Una neganai idia ese una motumotu idoinai e rakaia hegege ela bona Rafo, idia ese babalau, Idua peroveta koikoi tauna ta e davaria, ladana na Bariesu. ⁷Ia na gavana tauna, Seregio Paulo, dekenai e nohova una gavana be lalo-parara tauna. Ina tau ese Banaba bona Saulo e habadelaidia badina ia e ura Dirava ena hereva baine kamonaia. ⁸A Eluma "hari babalau tauna" (ladana ihahegeregerena bunai) raruosi e gwaudia tubu ena ura be gavana ena heabidadama amo baine hakaua oho. ⁹A Saulo, daika ladana ta be Paulo, na Lauma Helaga ai e honu, ia ese Eluma e raraia tao ¹⁰beni eto, "Oi na diabololo natuna, koikoi ai o honuhonu dae bona dika idoinai ese e hahonumu. Kara maoromaoro iboudiai o inai henimu. Oi na kara maoromaorodia ihagagevadia, basio hadoko a?" ¹¹Hari ba itaia, Lohiabada imana na oi latamu ai be atoamu, bona oi matamu na bae kepulu. Oi ese dina basio itaia ela bona nega ta. Una horana ai kahu bona dibura e moru. Eluma enai, e hakepulua bona e loa eva-eva taunimanima e noidia ia imanai bae bi bae hakaua. ¹²Gabeai e vara gauna gavana ese e itaia, e abiadae badina ia na e hoa Lohiabada ena hahediba herevadia ai. ¹³Hari Paulo mai bamona ida lagatoi amo Pafo e heautania, beni Perega ai e diho una na Pamfulia tanona ai. A Ioane Mareko ese e rakatanidia beni Ierusalem e lou henia. ¹⁴A Paulo mai bamona ida na Perega amo e varai gunika kahana ela bona Antioka ai e kau Pisidia tanona ai. Dina Helaga ai idia na dubu ai e raka vareai beni e helai diho. ¹⁵Taravatu bona peroveta bukadia e duhai murinai, dubu biagudia ese gwaukau na dekedie e siaia lao, eto, "Varavaramai e, bema mai emui hahealo herevadia taunimanima ediai, mani a gwaurai. ¹⁶Beni Paulo e tore isi bona imana ai e taodia ahu; ia eto, Isaraela taumui bona umui daika Dirava o matauraiaumu taumui e a kamonaia. ¹⁷Ina bese Isaraela ena Dirava ese seneda e abidia hidi bona e hahutumadia Aigupito tanona ai e nohova negana ai, bona imana eabia isi amo ia ese e hakaudia lasi. ¹⁸Badina lagani hariahui sisivana tano gagenai ai e haheauka henidia. ¹⁹Murinai ia ese Kana'ana tanona besedia hitu e habuadia tari; ia ese tano na Isaraela taudia e henidia edia tano korikori ai e halaoa. ²⁰Unuseni ai lagani sinahu hani imahui sisivana ini gau iboudiai e vara. Murinai ini gaudia idoidiai Dirava ese hahemaoro taudia e henidiava ema bona Samuela peroveta tauna ena nega. ²¹Beni Isaraela taudia ese pavapava ta henanadailaia beni Dirava ese Saulo Kisa natuna, Beniamina ena iduhu tauna, e henidia, lagani hariahui ia ese e pavapava dia. ²²Murinai Dirava ese ia eabia oho pavapava dagina amo, Dirava ese Davida ma e haginia edia pavapava ai e halaoa. Davida dainai Dirava ese e herevalaia, hedinarai eto, lau ese Davida Iese natuna vada name davaria egu lalokau tauna, egu ura karadia iboudiai do baine kara! ²³Ina tau garana amo Dirava ese Isaraela edia hahemaori tauna, Iesu, e havaraia ena gwauhamata hegeregerena. ²⁴Ia na do sema negana ai Ioane ese helalokerehai Bapatiso Isaraela taudia iboudiai vairadiai vada e harorolaia. ²⁵A Ioane ena gaukara dokonai ia eto, 'Umui na dahaka o tomamu lau be daika? Lau na dia ia. A kamonaia, tau ta murigu ai be maimu, lau na dia namo ena tamaka varona baina ruhaia? ²⁶Tatau, varavaragu e, Aberahamo garana logora e, bona Dirava garina o garimu taumui e, ina hahemaori herevna na ita dekada vada e siaia mai. ²⁷Badina be Ierusalem ai e nohomu taudia, bona edia lohia, ese ia asie dibaia, bona peroveta taudia edia hereva dina Helaga iboudiai e duahi to lalodia asie parara una dainai e revaia mase bona peroveta taudia edia hereva e hamomokani. ²⁸Ena be ihamasena badina ta asie davaria, to idia ese Pilato e noia baine alaia mase. ²⁹Ia hereva iboudiai vada e tore guna herevadia na idia ese e hamomokani, idia ese au dorina amo e abia dobi beni gara lalonai e atoa. ³⁰A Dirava ese mase amo e hatorea is. ³¹Ia ida Galileia amo Ierusalem ela taudia ese dina diagau lalodai e itaia loulou, harihari idia ese taunimanima vairadiai e gwaurai hedinaraimu. ³²Una dainai ai ese sivarai namona umui a harorolai henimuimu Dirava ese seneda e henidia gwauhamatana. ³³Badina be Dirava na ena gwauhamata ita eda ai na e hagugurudiamu, ia ese Iesu ihatoreisina ai vada e hamomokania natuna edia, Salamo iharuana lalonai e tore na heto, 'Oi na lau natugu, hari dina Lau na oi tamamu ai name lao! ³⁴Momokani ia na mase amo vada e hatorea isi unu amo e gwaurai eto, 'Davida na henia gwauhamatadia helagadia bona momokanidia do baina henimu. ³⁵Una dainai Salamo ta lalonai ma eto, emu helaga tauna basio kahua nege basine pata gauna baine itaia! ³⁶Badina be Davida ese ena uru ai Dirava isiaia e lao heniva, ia na mase, bona senena logora ida e hahebou bona tauanina be e pata. ³⁷A Dirava ese e hatorea isi tauna na pata asi dibana. ³⁸Una dainai umui badiba, bona varavaragu e, ia bagunai dika igwautao dia, bona gaudia amo Mose ena taravatu ai basio heruha diba. ³⁹Ia bagunai kamonaia taudia iboudiai edia dika logora amo eme heruha. ⁴⁰Una dainai nahuamui ba toho peroveta taudia ese e gwaurai gaudia na umui emui ai bae momokani na garina. ⁴¹Aitaia, heihihirai taumui e, a itaia, bona ba hoa bona ba mase; badina be kara ta emui mauri dinadia ai na kariaia, a karana umui ese na basiomu abiadae diba, enabe bema ta ese bema hamaoromu!" ⁴²A Paulo bona Banaba e raka lasi taunimanima ese e noidia Dina Helaga gabenai unu hereva tamona na ma bae gwaurai lau idia vairadiai. ⁴³Dubu Helaga hebouna e ore, Iuda taudia hutuma bona Dirava garina e gariva taudia ese Paulo bona Banaba e bamodia, raruosi ese e hereva henidia bona e hahalodia eto, dirava ena hariharibada bae badinaia tarikatarika. ⁴⁴Dina Helaga iharuana ai, hanua taudia hutuma bada e hebou Dirava ena hereva bae kamonaia. ⁴⁵A Iuda taudia ese aru taudia e itadia idia na e vagege bona Paulo ena hereva e gwauatubu bona ere dika henia. ⁴⁶A Paulo bona Banaba e hereva goadagoda bona eto, "Dirava ena hereva a harorolai henimu guna na mai badina, to umui ese o dadaraiaumu bona sibomui o laloamu dia nanamo mauri hanaihanai basio abia o tomamu,

Aitaia, ai na idau bese taudia baia hageredia.⁴⁷Badina be Lohiabada ese vada e haganimai eto, "Lau ese vada na atomui idau bese taudia edia diari ai baola, unu amo hahemaui ai baola ela tanobada dokona."⁴⁸Idau bese taudia ese una hereva e kamonaia, idia na e moale bona Lohiabada ena hereva e imodaia. A hutuma e abidia hidi mauri hanaihanai e abiabiraia.⁴⁹Unu amo Lohiabada ena hereva na unu tano idoinai e hapiua rohoroho.⁵⁰A Iuda taudia ese lohia hahinedia, hanua tau badadia lalodia eani Paulo bona Banaba na bae dagedage henidia bona edia tano amo e luludia lasi.⁵¹A Paulo bona Banaba ese aedia palapaladia kahudia e davedave oho idia ihabadelaidia karana, bena ikonio ela.⁵²Iesu ibadinana taudia na moale ai e honu bona Lauma Helaga ese e rohedia.RDK. LOHIA KOHU ESE E HAGUGURUA. (07/07/24), TIME: 9.10 PM.

14

¹Ikonio ai ma e vara lou Paulo bona Banaba na raruosi Iuda taudia edia dubu lalonai e raka vareai bona sivarai namona e harorolaia Iuda taudia bona Helene taudia hutuma bese ese eabia dae.²To Iuda taudia haida ese asie abia dae Helene taudia lalodia eani bona tadikakadia e dagedage henidia.³Una dainai raruosi na unu seniai taina e noho daudau, Lohiabada dainai e haroro goadagoad, neganai ia ese Lohiabada ena hariharibada hereva mai toadia bona hoa karadia ida Paulo bona Banaba imadia amo e karava.⁴To hanua taudia hutuma na ehehari, taunimanima haida Iuda taudia edia kaha ai, A haida aposetolo taudia ediai e taova.⁵A Helene bona Iuda taudia haida ese edia hanua Lohiadia lalodia eani idia ese Paulo bona Banaba na bae adikadia bona nadi amo bae hododia,⁶rarusi na ediba bena e heau Lukaonia tanona ela, Lusteria bona Derebe hanuadia ai bona una tano idoinai,⁷unusenai idia ese sivarai namona e harorolaia hesiriu.⁸Lusteria ai ae-hedairiki, tauna ta e helaiva, sinana bogana, amo unu e havaraia toma asi raka dibana.⁹Ina tau ese Paulo ena haroro e kamonaia. Paulo ese e raraia bona eitaia ena abidadama ese na baine hamauria diba.¹⁰Bena ia na e lolo eto, "Aemu ai a gini tore." bena ia na e roho isi bona e raka hegege.¹¹Bena aru taudia ese Paulo ena kara eitaia, idia e lolo LUKaonia gaodiai eto, "Dirava be taunimanima heidaidadia vada eme diho ita dekedai." ¹²Idia ese Banaba e hatoa "Deo," bona Paulo "Hereme," Badina ia na hereva herea tauna.¹³Deo haroro tauna, ena dubu be hanua murinai, boromakau mamaruanedia bona herahera gaudia na ikoukou e laohai, ia bona aru taudia e ura bae haboubou.¹⁴A aposetolo, Banaba bona Paulo, e kamoni, edia dabua e dare bona e heau lasi haraga hutuma bogaragidiai e tai lolo, ¹⁵bona eto, "tatau e, dahaka dainai ini gaudia o karadiumu? Ai danu taunimanima mo umui o hemamimu hegeregereana a hemamimu. Ai ese sivarai namo umui dekemui ai harorolaianu, umui ese ini gau asi anidia ba rakatani mauri Diravana, daika be guba, bona tanobada, bona davara, bona lalodiai e miamu gaudia idoidiai e kara." ¹⁶Uru gunadia edia nega ai ia ese bese idaidau iboudiai e henidia sibodia edia ura daladia ai bae raka.¹⁷To semarere, sibona ihahedinaraina toadia mo se nege, a hahenamo karadia e karamu bona medu guba amo e henimu bona madinamo negadia, anianidia bogamui e hakunudiamu bona e hamoalediamu.¹⁸Enabe Paulo bona Banaba na unu e hereva aru taudia e rudia boubou gaudia ihenidia ai.¹⁹A Iuda taudia haida na Antioka bona Ikonio amo ema bona hutuma lalodia eani. Bena idia ese Paulo na nadi amo e hodoa bona hanua amo e veria lasi, e laloa ia na vada e mase.²⁰A Iesu ibadinana taudia ese e ginia hegege, ia na e toreisi bona hanua e lou henia. Daba ai, ia na Banaba ida Derebe ela.²¹Idia ese hanua lalonai sivarai namona e harorolaia murinai bona Iesu ibadinana taudia hutuma eabidia, idia na e lou Lusteria, bona ela Ikonio, bona ela Antioka maragina.²²Idia ese Iesu ibadinana taudia e hagoadadia bona e hahalodia Iesu bae abiabiraia tarikatarika, bona e hamaorodia eto, "Ita na hisihisi momo lalodia amo Dirava ena basileia lalonai baita raka vareai."²³Una neganai idia ese ekalesia oreadia iboudiai lalodiai heitatao taudia vada eabidia hidi, bona guriguri mai anivagadia, ai e hamomokanidia Lohiabada ena, ia e abiabiraia taudia ena.²⁴Bena idia Pisidia tanona amo e raka hanai bona Pamfulia tanona amo e lasi.²⁵Bena idia na Perega ai sivarai namo e harorolaia; ma e diho ela Atalia hanuana.²⁶Unu amo lagatoi auta ai e gui Antioka badana ela, hari vada e ha-orea gaukarana dainai Dirava ena hariharibada lalonai e hahelagadia guna gabuna ai e kau.²⁷Bena ida na Antioka ai e kau bona ekalesia taudia e haboudia, Dirava idia edia ai e kara gaudia idoidiai sivaraidia, bona ia ese abidadama iduarana idau bese taudia ediai ede e kehoa toma herevadia e gwaurai.²⁸Idia na Iesu ibadinana taudia dekedai ai e noho daudau.RDK. LOHIA KOHU ESE E HAGUGURUA (06/07/24), TIME: 8.10 PM

15

¹Tatau haida na Iudea amo e diho ela Antioka. Varavara e hadibadia, eto, basie peritomemui, Mose ena taravatu hegeregereana, umui na hahemaui basio abia.²Paulo bona Banaba na idia ida e heai bona e hepapa-ahuahu bada herea dainai, idia na e hahedua, Paulo bona Banaba, ma haida danu, Ierusalem baela, aposetolo bona heitatao taudia dekedai, una hereva bae nanadailaidia.³Ekalesia taudia ese edia dala matamana ai e bamodia bena Foenikia bona Samaria tanodia e rakadia hanai, bese idau-idau taudia ese e helalo-kerehai sivaraina e gwauraia bena varavara iboudiai e moale bada.⁴Idia na Ierusalem ai e ginidae ai, dubu taudia apostolo bona heitatao taudia ese e abidia dae; bena idia na Dirava ida e kara bouva gaudia idoidiai e hamaorolaidia.⁵A Farasia oreana amo Iesu vada eabiabiraia taudia haida na e tore isi, eto: Maorona binai idau taudia danu bae peritomeidia, bona bae hadibadia danu Mose ena taravatu bae badinaia.⁶Bena aposetolo bona heitatao taudia e hebou, una hereva e haeroa.⁷Bena e hepapa-ahuahu daudau, murinai Petero e toreisi, eto: Tatau bona varavaragu e, dibamui Dirava ese umui bogaragimui amo e abiguhidi, lau udugu amo bese idaudia taudia ese sivarai namo bae kamoni bona bae abiadae.⁸Bona taunimanima kudouna mai dibana Diravana ese idia ediai e hedinarai, bona Lauma Helaga e henidia, ita e henida hegeregereana.⁹Ita bona idia se-haidauda badina edia abidadama ese lalodia vada e hagoevadia.¹⁰Dahaka dainai Dirava o dibaianu taumui ese ia ibadinana taudia na maduna metau o ato

kaumu. Tubuda bona ita danu ihuana asita hegeregere maduna na. ¹¹Ita ta abia daemu Iesu Keriso ena harihari-bada dainai baita mauri, idia danu unuheto. ¹²Hebou taudia iboudiai asi regeregedia. Bena Banaba bona Paulo edia hereva mo e hakala henia; Dirava ese bese idau-idau taudia bogaragidiai toa bona hoa karadia idia imadia amo e karava sivaraidia raruosi ese e gwaurai. ¹³Edia hereva e ore, bena Iakobo na e hereva, eto, Bamogu bona varavaragu e, a kamoni henigu. ¹⁴Simona ese e hamaorodia, Dirava ese na gunaguna bese idau-idau e hanamodia, edia bese bae abia hidi ia ladana baine nanoe laia. ¹⁵Una na peroveta taudia edia hereva eme hegeregere: E torea, eto, ¹⁶Ini gau muridiai baina lou mai Davida ena kalaga e kohu gauna ma baina haginia lou, e hegigi rohoroho, ma baina hadaia lou bona baina haginia vaitani. ¹⁷Bena taunimanima gabedia ese Lohiabada bae tahua. Oibe, bese idau-idau lau ladagu vada e nemailaidia na bae tahua. ¹⁸Lohiabada e tomamu ini gau e gwaurai hedinaraiwa guna negana amo ema hari. ¹⁹Bena lau na tomamu bese haida ese Dirava e hagereamu ita ese be basita haraivadia. ²⁰Ai ta tore henidia, baitato, kaivakuku ihaboulaidia gaudia basie ani, bona basie heuda-hanai bona aiodia e taudae gaudia hidodia bona rarana basie ani. ²¹Badina sene negadia amo ema ina hari, Mose na mai ena haroro taudia hanua iboudiai lalodiai bona dina helaga iboudiai ena taravatu na dabu lalodia ai e duahiamu. ²²Bena apostolo bona heitatao taudia, ekalesia taudia ida lalodia e hadai edia ore a amo haida bae abidia hidi Paulo bona Banaba ida baela Antioka. Taudia be ini Iuda e nemaia Baraseba bona Sila idia raruosi na varavara ikwaradia taudia. ²³Ina revareva imadia ai e torea e laohaia aposetolo taumai bona ekalesia hegunalai taumai bona bese taumui Antioka ai bona Suria ai bona Kilikia ai o nohomu iboumui ai ba namo ba mauri. ²⁴Aina vada ame kamoni haida emai amo e vasi, edia hereva amo e haraivamu bona e hadaradaramui to ai ese asia hamaorodia toma. ²⁵Badina be, ai iboumai ai emai lalo-hadai tamona binai tatau haida baia abidia hidi baia siaidia emai lalokau taudia Banaba bona Paulo bae vasi. ²⁶Taudia raruosi bene edia mauri e nege daure, eda Lohiabada Iesu Keriso ladana dainai. ²⁷Badina bunai Iuda bona Sila a siaidiamu, ini hereva hegeregere mo ududia amo ma bae gwaurai. ²⁸Badina be Lauma Helaga bona ai atomamu ina na baine namo: maduna metaudia na pagamui ai basia ato kau; a ini mai badidia gaudia mo baia ato kau. ²⁹Kaivakuku ihaboulaidia gaudia rara bona aiodia e gigi gaudia hidiodia na basio ani, bona basio heuda-hanai. Unu gau idoidiai na basio abi dae vada ba namo, ba mahuta. ³⁰Badina be, e siaidia taudia na Antioka ela, kamoni taudia unuseni ai e haboudia, bena revareva e henidia. ³¹Idia ese e duahia, bona unu hahealo herevadia e moalelai. ³²Iuda bona Sila na peroveta taudia: badina be raruosi ese hereva diagau amo e hadibalaidia bona e hagoada laidia. ³³Idia na unuseni ai dina haida ma e noho: Bena varavara ese e tu-dia, mai mainodia ida ela e siaidia taudia dekedia. ³⁴A Sila na ena ura dainai dounu e halaheva. ³⁵Paulo bona Banaba na Antioka lalonai e nohova, e hahedibava bona Lohiabada ena hereva e haroro laiaiva hutuma ida. ³⁶Dina haida vada ela bena Paulo ese Banaba e hereva henia, eto, Aitala Lohiabada ena hereva aita harorolai henidia hanuadia iboudiai baita lou henidia varavara baita itadia ede e hetomu. ³⁷Bena Banaba e urava Ioane Mareko na idia ida ma baela. ³⁸A Paulo ena lalo-hadai be ia bae laohaia na dia namo badina be Pamfulia ai e rakatanidia, edia gaukara ai se bamodia. ³⁹Una gwauna raruosi e heai, bena e haheparara Banaba ese Mareko e abia lagatoi auta ai egui Kupro ela. ⁴⁰A Paulo ese Sila e abia hidi, varavara ese Dirava ena harihari-bada ai e hahelagadia bena e tore isi. ⁴¹Suria bona Kilikia tanodia e rakadia hanai ekalesia oreadia e hagoadadia.

16

¹Paulo na Derebe bona Lusteria ai e lasi, unuseni ai Iesu ibadinana tauna ta e nohova, ladana na Timoteo: sinana be Iuda hahinena sivarai namo e abiabiraia, a tamana be Helene tauna. ²Varavarana Lusteria bona Ikonio taudia ese e gwauraiava tau namona. ³Paulo ese e ura henia, ia ida baela: bena eabia e peritomea, Iuda taudia unu gabu ai e nohova daidiai; badina be iboudiai dibadia tamana be tau Helene. ⁴Hanua-hanua e rakadia hanai ai, aposetolo bona Ierusalemia ekalesiana ita-taudia taudia edia hahegani e henidia, bae badina dia helaoreana, ⁵badina be, ekalesia oreadia iboudiai edia abidadama e goada e laova bona dina iboudiai ekalesia taudia na e hutuma e laova. ⁶Bena Paulo mai bamona ida Frugia bona Galatia tanodia e rakadia hanai: badina Lauma Helaga ese e gwaudia ahu, Asia tanona ai sivarai namo basie haroro laia eto. ⁷Idia na Musia hetoana ai e kau, Bitunia baela e tomava, to Iesu Laumana ese e ru-udia. ⁸Bena Musia amo e raka hanai, ma taina ma e raka lao, Troa hanuana ai. ⁹Hanuaboina ai Paulo vada e nihi, ena nihi ai Makedonia tauna ta e itaia, ia vairana ai e gini, e noia, eto, Makedonia aoma bame durumai. ¹⁰Una Paulo ena matahanai dainai, ai ese Makedonia ai baia heau hanai dalana a tahua haraga-haraga, ato sivarai namo baia henidia helaoreana Dirava ese vada e boirimai. ¹¹Badina bunai, Troa ai lara akidaia isi, bena a heau maoromaoro Samotrake ala, daba ai ma a heau Neapolis ai a hakau. ¹²Unu amo Filipi ala una na Makedonia hanua badana: bona Roma tuari oreana ta ese danu e noholaiava. ¹³Dina helaga ai hanua amo a raka lasi sinavai isena ala: badina a diba guriguri gabuna na unuseni ai, a helai diho bena e hebouva hahinedia a hereva henidia. ¹⁴Unseni ai hahine ta ladana Ludia, dabua kakakakadia e hoiva hahinena ena hanua Tuatira ai. ¹⁵Na Dirava e toma henia dihova. Emai hereva e kamoni bona Lohiabada ese kudouna e kehoa, bena ia ese Paulo e hakala henia. ¹⁶Ia mai ena ruma taudia ida bapatiso e abi; bena ia ese e noimai, eto, lalomui ai boma gwau lau na Lohiabada iabiabiraina hahinegu, egu ruma baitama lao, unuseni ai boma noho, ia ese e hamaoromai bena ala. ¹⁷Nega ta guriguri gabuna a laova ai, babalau laumana ese e roheava kekenina ta vairamai ema, una kekeni biaguna ese kohu momo iena babalau karadia amo eabiva. ¹⁸Ia na Paulo bona ai murimai ai e raka bena e lolo, eto, idia raruosi na herea mikamika Diravana edia hesiai taudia, hahemaui dalana e hamaoro laimuimu. ¹⁹Dina momo unu e kara tomava, bena Paulo lalona e hesiku, e gini hegiro. Hari lauma e gwau henia, eto, Iesu Keriso ladanai na hagamumu ena amo a raka lasi. Bena una hora lalonai e raka. ²⁰A biaguna ese e itaia, edia kohu iabilaidia karana e doko bena idia ese Paulo bona Sila e dabaidia tao hoihoi gabuna e laohaidia hanua Lohiadia vairadia ai. ²¹Hahemaoro taudia vairadia ai e hakaudia lao, eto,

ini raruosi na Iudea taudia eda hanua e neneamu.²¹ Bona kara haida, iabi-daedia bona ibadinadia na mai taravatuna ita Roma tauda eda, karadia danu e gwaurai hedinaraimu.²² Aru taudia ese Paulo bona Sila e gonagona laidia bona hahemaoro taudia e haere edia dabua bae dare oho, au amo bae dadabadia.²³ E dadabadia dikadika, bona dibura rumana inarina tauna e hamaoroa baine gimadia namonamo.²⁴ Unu e hamaoroa toma dainai, ia ese raruosi laloma daiutuna ta ai e koudia, aedia danu au matudia ai e kapu tao kunuka-kunuka.²⁵ Malokihi ai, Paulo bona Sila e guriguriva bona Dirava ihanamolaina anedia e abiva: dibura taudia ese danu e hakala henidiava.²⁶ Bena tano e marred dagu, dibura rumana e heude-heude, iduara iboudiai sibodia e hekeho bona edia igui iboudiai e heruha.²⁷ Dibura rumana inarina tauna na mahuta amo e noga, iduara e ita iboudiai e hekeho: bona ia ese ena dare e veria lasi, sibona baine heala mase eto, badina ia banava dibura taudia e heau lasi eto,²⁸ A Paulo na e lolo badabada, eto, sibomu asio heala badina be ai iboumai ai iniseni ai.²⁹ Dibura rumana inarina tau a e boiboi, kede bae mailai: bona e heau vareai, Paulo bona Sila vairadia ai e goru diho mai heude-heudena ida.³⁰ Bena ia ese e hakaudia lasi, eto, Lojiamui e, ede baina kara toma bona mauri baina abia?³¹ Raruosi e haere, eto, Lohiabada Iesu bavabiabiraia bona ba mauri, oi bona emu ruma taudia.³² Bena raruosi Lohiabada ena herevai ia bona ena ruma taudia e hamaoro laidia.³³ Bena hanuaboi lalona ai ia ese raruosi e laohaidia berodia e dairi: bona ia bona ena ruma taudia bapatiso vada e abia.³⁴ Bena ena ruma ai e hakaudia dae, adia e dabaraia, e aniani. Bena ia mai ena ruma taudia ida e moale bada, Dirava e abidadama henia dainai.³⁵ Daba ai hahemaoro taudia ese edia hesiai taudia e siaidia, eto, ene tatau ba ruhada nege.³⁶ Dibura rumana igimana tauna ese Paulo e hamaoroa, eto, hahemaoro taudia edia gwaukau e siaia, baina ruhamui nege e tomu, badina bunai, a raka lasi mai mainomui ida aola.³⁷ A Paulo, eto, aina Roma tanona ai a ohomu taumai. Asie hahemaoro henimai guna a taunimanima vairadiai vada e dadabamai kava bona dibura rumana ai e koumai, bona harihari bae ruhamai nege hehuni a? Lasi vaitani, idia sibodia baema, bae hakau mai lasi.³⁸ Bena hesiai taudia ela, unu herevana hahemaoro taudia e hamaoro laidia idia na e kamoni raruosi na Roma ena gabu taudia, bona e gari.³⁹ Bena ela, raruosi e hamarumaru dia, bona e hakaudia lasi, e noidia danu una hanua na bae rakatania, eto.⁴⁰ Raruosi na dibura rumana amo e raka lasi, Ludia ena ruma ela, unuseni ai idia na varavara ida e hedavari bona hahealo herevadia amo e hagoadadia bona Filipi e rakatania.

17

¹Idia raruosi na Amfipoli bona Apolonia e rakadia hanai. Tesalonika ai e kau, Iuda taudia edia dubu ta be unuseni ai.
²Paulo na dubu ai e dae kau, vaia ena kara hegeregereana, bona dina helaga toi ai buka helaga na idia ida e nohobou laia.
³E hadibalaidia goevagoeva Keriso ena hisi-ani bona ena toreisi lou na mai badidia. Bona e hamaorodia, eto, ina Iesu na harorolai henimuimu na Keriso.⁴Idia haida be e kamoni, bona Paulo bona Sila ida e hebouva; bona Helene taudia, Dirava garina e gariva hutuma bona lohia hahine dia dia gadoi danu idia ida e hebouva.⁵Una dainai Iuda taudia oredia vada e mama. Bena hoihoi gabuna ai e noho kava taudia dikadia haida e abidia, bona hanua taudia hutuma e haboudia. Helogo-helogo bada herea e havaraia. Bena Iason ena ruma e darea, Paulo bona Sila e tahudia. Hanua taudia vairadiai, bae veridia lasi, eto.⁶To asie davaridia; bona idia ese Iason bona varavarana haida ida, e dabuidia lasi. Hahemaoro taudia vairadiai e veridia lao, e lolo eto. Tanobada idoinai vada e hegiro hedagwamu taudia iniseni ai danu vada eme kau.⁷Bona Iason ese vada e abidia dae ena ruma ai. Idia ese Kaisara ena taravatu e tata utumu, pavapava ta ma e gwauraiamu ladana Iesu.⁸Aru taudia bona hahemaoro taudia ese una hereva e kamoni neganai na kudou dia e hetaha.⁹Idia ese Iason mai bamona ida taravatu e henidia, bona e ruhada nege.¹⁰Varavara ese Paulo bona Sila na hanuaboi ai e siaidia haraga ela Berea raruosi e kau, bona Iudea taudia edia dubu ai ma e dae kau.¹¹Ini na asi regedia taudia, dia Tesalonika taudia hegeregereana; badina be idia ese hereva e hakala henia mai lalo-haragadia ida. Bona dina iboudiai buka helaga lalodiai e hetahu, ini gau na momokani eiava lasi.¹²Badina be hutuma ese edia hereva eabidae, bona Helene lohiaida danu, tatau bona hahine, dia gadoi.¹³A Iuda taudia Tesalonika ai harina e kamoni Paulo ese Dirava ena hereva na Berea ai e harorolaiava, bona unu ela, hanua taudia e raraidia auka-auka bona eha garidia.¹⁴Bona varavara ese Paulo e siaia lasi haraga kone ai; a Sila bona Timoteo be unuseni ai e noho.¹⁵A Paulo inarina taudia ese e hakaua lao, Atena ai e rakatani, bona ena hereva e loulaia, Sila bona Timoteo edia, raruosi na ia dekena baela haraga eto,¹⁶Paulo ese Atena ai raruosi e naridiava negana ai lalona e hekwarai, badina be una hanua na e itaia, kaivakuku ai e honuhonu dae.¹⁷Bona ia na dubu ai Iuda taudia bona Dirava e toma henia diho taudia ida e hereva herevava, bona hoihoi gabuna ai danu, daba, daba idoidiai, unuseni ai e davaridia taudia ida.¹⁸Bona Epikuro ena oreana bona Stoa oreana taudia haida Paulo ida e hepapa-ahuahu. Haida eto, ina hereva kava tauna be dahaka e gwauraimu haida ma eto, ia na Dirava idaudia e gwauraidiamu dahaka. Idia na unu e gwautoma badina be ia ese Iesu bona ena toreisi-lou sivaraina namona e harorolaiava.¹⁹Bona idia ese Areo ororona e hakaua lao; bona eto emu hahediba matamatana na anina mani boma hadibalaimai.²⁰Badina be emu hereva mamidia na idau a tomamu, una dainai a uramu anidia korikori baia ma dibadia.²¹Badina be Atena taudia iboudiai bona idau hanua taudia unusenai e nohova danu edia kara tamona be dina iboudiai hereva matamatadia e gwauraiava bona e kamonaiva.²²Bona Paulo na Areo ororona bogaraginai e gini, e haroro, eto, Atena taumui e, name itamui umui ese emui dirava o matauraidia hereamu.²³Badina be na raka heniva ai, o toma heni dihomu gaudia na itava negana ai boubou patana ta na davarai, latanai revareva ini e torea toma asi dibada Diravana ena benaini asi diabmui Diravana o toma henia dihomu na lau ese aina dibalaimui.²⁴Tanobada bona lalonai e miamu gaudia idoidiai ikaradia Diravana ese guba bona tanobada na e lohiaidiamu: ia na taunimanima imadia ai e karava dubudia lalodiai se nohomu.²⁵Taunimanima imadia ese danu ia isiaina asie lao henimu, gau ta bema dabu na heto: badina be ia ese mauri bona laga bona gau idoidiai danu taunimanima iboudiai e henidiamu.²⁶Rara tamona ai ia ese

taunimanima besedia iboudiai vada e karadia, tanobada kopina idoinai bae noho henia, edia nega bona edia tano hetoadia vada e gwaurai. ²⁷Dirava bae tahua totona: bona bae darahua bona bae davararia readia, gau tamona, ia bona ita ta ta padada na dia daudau. ²⁸Badina be ia lalonai ta maurimu, bona ta marere-mareremu bona ta nohomu, emui ane isisibadia taudia haida ese vada e gwaurai hegeregere, eto, badina be ita danu ia natuna. ²⁹Benaini, ita na ia natuna: badina dia maoro lalodia ai baitato Dirava na golo eiava siliva eiava nadi, kwara-herea bona aonega taudia ese e korova gaudia na heto. ³⁰Dirava ese unu mata-lahui negadia na selalo taomu; A harihari ia ese taunimanima iboudiai gabu idoidiai e hagianidiamu, ba helalokerehai. ³¹Badina be ia ese dina ta vada e gwaurai hidi. Una dina ai ena abihidi tauna ese tanobada idoinai baine hahemaoro henia mai maoromaorona ida: Bona ihamomokanina toana taunimanima iboudiai vada e henidia. Toana binai mase amo e hatorea isi. ³²Mase ihatore-isi louna herevana e kamoni negana ai haida ese e kirikiri laia. Ma haida eto, ina hereva na emu ai ma baia kamoni lou. ³³Bena Paulo ese e rakatanidia. ³⁴A haida na ienai e taova. Bona ena hereva e abia dae: ta be Dionusio, Areo ororna tauna ta: Bona hahine ta ladana be Damari: Bona ma haida danu idia ida.

18

¹Unu gau muridiai, ia ese Atena e rakatania. ²Unuseni ai ia ese Iuda tauna ta e davararia, Ponto edia bese tauna, ladana na Akula, ia adavana Priskila ida Itali amo ema Klaudio ena hereva hegeregere, eto Iudea taudia iboudiai Roma bae rakatania dainai. Bena Paulo na idia raruosi dekedie ela. ³Ia bona idia edia moni idavarina gaukara na tamona dainai. Ia na idia ida e nohova bona idia ida edia moni idavarina gaukarana be tamona dainai, Ia na idia ida e nohova bona e gaukara hebouva. Edia gaukara na dabua rumadia ihuridia. ⁴A dina helaga iboudiai ia na dubu ai e harorova, Iuda taudia bona Helene taudia lalodia eani tohova. ⁵Sila bona Timoteo na Makedonia amo e kau una negana Paulo e haroro goada goadava, Iuda taudia eha dibadia goevagoeva, Iesu na Keriso. ⁶A idia ese e gwautubu mai ere dikadia ida, bona ia ese ena dabua e odaraia, eto, raramui na sibomui kwaramui ai baine mia, dia lau egu kerere, harihari ela, lau na idau bese taudia dekedie bainala. ⁷Bena ia ese una gabu e rakatania, ela, tau ta ladana Titio Lusto ena rumai e nohova, una tau ese Dirava e toma henia dihova. Ia ena ruma danu dubu ida e gini hetabira. ⁸Krispo, dubu biaguna ese Lohiabada eabiabiraiava ena ruma taudia ida Korinto taudia hutuma danu Paulo ena haroro e kamonaia, e abia dae, bona bapatiso eabi. ⁹Bena Lohiabada ese hanuaboi ai Paulo nihi ai e hereva henia, eto, asio gari ba hereva, udumu basio daia kapu. ¹⁰Badina lau na oi dekemui ai na nohomu. Tau ta ese basine guru henimu, basine hadikamu, badina be lauegu taunimanima na hutuma ina hanua lalonai. ¹¹Unai dainai, Paulo na lagani ta hua tauratoi unuseni ai e noho, Dirava ena hereva e hadibalaia. ¹²Galio be Akaia tanona e lohiaia matama negana ai, Iuda taudia ese Paulo e dagedage henia mai lalodia tamona, bona hahemaoro gabuna e hakaua lao, ¹³eto, Ina tau ese taunimanima lalodia e animu, taravatu e tataia utumu dalana amo Dirava bae toma henia diho e tomu. ¹⁴Paulo baine hereva etto, to Galio ese Iuda taudia e hamaorodia eto, Iuda taumui e, kara dika eiava kerere badana ta ai boma hahebadelaia, bama kamoni henimui, bema namo. ¹⁵To ene hereva bona lada bona emui taravatu henanadaia na sibomui ba tahu; lau ese ene gau basina hahemaorolai. ¹⁶Bena ia ese hahemaoro gabuna amo e luludia lasi. ¹⁷Bena idia iboudiai ese dubu biaguna, Sostene, e dabaia tao, hahemaoro gabuna vairanai e dadabaia. A Galio na una kara se haerolaia. ¹⁸Paulo na dina hoho, dounu e nohova, bona ia ese varavara logora e hatonidia, lagatoi ai e gui, Suria bainela. Priskila bona Akula ese e bamoa Kenkrea ai huina vada e utua, badina be mai ena gwauhamata. ¹⁹Tatoi Efeso ai e heau kau; unuseni ai ia ese raruosi e rakatanidia. Ia sibona dubu ai e dae kau, Iuda taudia ida e hereva-hereva. ²⁰Bena idia ese e noia baine noho tari tari; to ia ese edia noinoi se abia dae. ²¹E hatonidia eto, Dirava baine ura, ma baina lou mai dekemu ai. Bena Efeso e heautania. ²²Kaisarea ai e diho, bona Ierusalem ai eha dara dae, ekalesia oreana e hahenamo henia. Bena Anitioka ela. ²³Nega taina unuseni ai e noho, bona ma eha laolao, Galileia bona Frugia tanodia ela, ekalesia oreadia e igodia ita, Iesu ibadinana taudia iboudiai e hagoadadia. ²⁴Una negana ai Iuda tauna ta, ladana Apolo, na Efeso ela. Ia na Alesandra tauna, mai aonegana, Buka Helaga dibana herea tauna. ²⁵Ina tau na ta ese Lohiabada ena dala vada e hadibalaia; bona ia ese Iesu sivaraina e gwaurai mai siahuna ida, bona e hahedibalaia goevagoeva. Gau tamona bapatiso na Ioane ena bapatiso mo dibana. ²⁶Ia na dubu lalonai e haroro matama mai haheaukana ida. Unuseni ai Priskila bona Akula ese ena hereva e kamoni, bona edia ruma e hakaua lao; bona raruosi ese Dirava ena dala e hadibalaia maoromaoro. ²⁷Ena ura be baine heau hanai, Akaia bainela; una dainai varavara ese Iesu ibadinana taudia unuseni ai e tore henidia, e noidia bae abia dae. Ia na unuseni ai e kau, bona Dirava ena hariharibada dainai vada e kamoni taudia na ia ese e durudia badava. ²⁸Badina be ia ese taunimanima vairadiai Iuda taudia e gwaudia tubu vaitani. Buka Helaga amo vada e hahedibalaia, Iesu na Keriso.

19

¹Apolo na Korinto ai e nohova negana ai, gunika kahana amo e lasi Efeso ai e kau, Iesu ibadinana taudia haida unuseni ai e davaridia. ²Paulo ese e nanadaia eto, Iesu o abiabiraia negana ai Lauma Helaga danu oabia a? Idia e haere eto, "Lasi, Lauma Helaga herevana ta asia kamonaia." ³Bena Paulo eto, "Dahaka bapatiso na o abia?" Idia eto, Ioane ena bapatiso." ⁴Bena Paulo eto, Ioane ese helalokerehai bapatiso na mo e heni. E hamaorodia danu ia murina amo bainema tauna danu bae abiabiraia, Iesu bunai. ⁵Una hereva e kamoni, bona Lohiabada Iesu ladanai bapatiso ma e abia. ⁶Bena Paulo ese imana na idia latadiai e ato kau, Lauma Helaga na idia latadiai vada e diho, bona idia na gado idau ai e hereva bona e peroveta danu. ⁷Taudia iboudiai gwauta rarua sisivana. ⁸Bena Paulo na dubu ai e dae kau hua toi davana, e haroro loulouva mai haheaukana ida Dirava ena basileia herevana e hahedibalaia taunimanima lalodiadia e aniva. ⁹A haida

ese lalodia e ha-aukadia e gwau ede-ede, bona dala matamatana e gonagonalai hutuma vairadiai. Una dainai Paulo ese e rakatanidia Iesu ibadinana taudia danu e hakaudia oho, bona dina iboudiai Turano ena hahediba rumana ai e hahedibava.¹⁰ Lagani rua unu e kara tomava, una dainai Asia tanona ai e nohova taudia Lohiabada ena hereva e kamonaiva, Iuda taudia bona Helene taudia danu.¹¹ Dirava ese siahu karadia hereadia danu Paulo imana amo e karava,¹² bona unu amo muko bona rami Paulo tauanina e dogotao ena amo e laohai gorere taudia dekedie edia gorere e ore bona lauma dikadia ese e rakatanidia.¹³ A Iuda taudia haida vaia lauma dikadia ilulu-ohodia karadia e laolaiva taudia danu una gabu ai. Idia ese Iesu ladana e hatoa matama lauma dikadia ese e bolodia taudia latadiai eto, Paulo ese Iesu e harorolaia tauna ladanai a haganimuimu a raka lasi.¹⁴ Skeva, Iuda tauna bona hahelaga tauna ta, natuna mamaruanedia hahituosi unu e kara tomava.¹⁵ Bena lauma dikana ese e haere henia eto. "Iesu na mai dibagu, bona Paulo danu dibagu; a umui be daidia?"¹⁶ Bena hari lauma dikana ese e boloa tauna na idia latadiai e roho kau e hadareredia bona e dadabadia. Ela bona idia na una ruma amo e heau lasi asi dabua dia bona mai berodia ida.¹⁷ Iuda taudia bona Helene taudia Efeso ai e nohova ese harina e kamona. Bena gari ese iboudiai e butudia tao, bona Lohiabada Iesu ladana e imodaia.¹⁸ Bona kamona taudia hutuma danu iboudiai ema edia kara e gaurai hedinarai.¹⁹ Bona babalau taudia dia gagadoi edia buka e habou taunimanima iboudiai vairadia ai e gabu. Buka davadia e hakaudia, bona e davariadia siliva monidia gerebu (daha) ima.²⁰ Una dainai Lohiabada ena hereva vada e vara rohorohova bona e kwalimuva.²¹ Paulo na ena gaukara e hagugurua Efeso ai, bona lalona Lauma enai e hadaia Makedonia bona Akaia tanodia amo baine raka hanai Ierusalem baina; eto, "Unu bainala guna, gabeamo Roma baina ha-itaia."²² Bena ia ese iduruna taudia rarua Timoteo bona Erasto, Makedonia e siaidia lao. A ia sibona Asia kahana ai e nohova.²³ Una negana ai helogo-helogo dia maragi e vara, Iesu ena dala dainai.²⁴ Badina tau ta ladana be Demetrio, siliva igaukaralaina tau, Artemis, ena siliva dubu-dubudia e karava unu amo ena gaukara oreana taudia ese moni diagau e abiva.²⁵ Ia ese idia bona gaukara hegeregerea e karava taudia e haboudia, eto, "Tatau e, dibamui ina gaukara amo eda moni ta abimu."²⁶ O itaiamu bona o kamona danu, dia Efeso ai mo, to Asia tanona idoinai danu, ina tau Paulo ese taunimanima hutuma bada lalodia e animu. E tomamu taunimanima imadia ese e karamu diravadia na dia dirava korikoridia.²⁷ Ina na ita e hadikadamu, eda moni idavarina gaukarana taunimanima ese bae dadaraia, bona dia una mo a Artemisi (Diana) ena dubu danu bae dadaraia. Oibe, Asia idoinai bona tanobada taudia ibouboudiai e toma henia dihomu diravana dagina herea-daena baine heabi oho.²⁸ Idia ese unu hereva e kamona negana ai e badu dikadika, e lolo loulou, eto, "Efeso diravana herea mikamika."²⁹ Hanua idoinai helogo-helogo vada e bada, bona idia iboudiai e heau ela, herarai rumana. Idia ese Paulo e bamoava taudia Gaio bona Aristako Makedonai amo ema e guidia.³⁰ Paulo ena ura baine raka vareai hanua taudia dekediai, to Iesu ibadinana taudia ese e ruua.³¹ Asia lohiadia haida Paulo turana ese danu gwaukau e siaia e noia herarai rumana ai basine raka vareai eto.³² Haida ese hereva ta e lololaiva, ma haida hereva ta, bona hebou na e helogo ahuahuva dainai hutuma na hebou badina asi dibadia.³³ Bena hutuma bogaradia amo Alesana ema, Iuda taudia ese taunimanima vairadiai e doria laova. Una dainai Alesana ese imana ai taodia ahu, taunimanima baine haere henidia eto.³⁴ To idia ese e itaia ia na Iuda tauna, bona iboudiai hereva tamona e lololaia loulouva ela bona hora rua sisivana eto, "Efeso diravana Artemisi (Diana) na herea mikamika."³⁵ Bena hanua ena toretore tauna ese hutuma e hatuidia, eto, Efeso taumui e, daika tanobada ai asi dibana Efeso na Artemisi (Diana) badana ena dubu igimana, bona deo (heaven) ena amo e moru gauna danu igimana.³⁶ Ini hereva be asi igwau-tubudia, una dainai ba noho namonamo basio kara havara-havara una be namo.³⁷ Badina be ini o hakaudia mai taudia na dia dubu ai asie dadidadi eda dirava hahinena danu asie hadikaia.³⁸ Una dainai, Demetrio mai ena gaukara taudia ida lalodia baeto tau ta ese vada e hadikadia, hahemaoro rumadia vada eme hekeho gavana danu noho. Benaini bae hahebade heheni.³⁹ A bema idau hereva ta mia, hebou korikori ai bae herevalai.⁴⁰ A hari dina ena helogo-helogo dainai bae hahebade laida be baita kerere. Badina be ina helogo-helogo dainai bae habadelaida na asi anina bona ina hebou badina na basita gwauraia diba. Ia e hereva vaitani, bona e haganidia bae karohe. DAVAI HENI LOHIA ESE E HAGUGURUA.

20

¹ Helogohelogo e doko murinai, Paulo ese Iesu ibadinana taudia e heboudia bona e hahealo henidia murinai, e hatonidia bona e rakatanidia Makedonia ela.² Unu gabu e rakadia hanai bona hereva momo ai e hahealo henidia, bona Akaia ela.³ Hua toi unuseni ai e noho murinai, lagatoi ai baine gui Suria baina eto, to Iuda taudia haida ihadikana karadia e henegalaia dainai ia ese lalona e hadaia Makedonia amo baine lou.⁴ E bamoala bona Asia taudia bini Sopatera Puro tau Berea natuna, bona Aristako bona Sekunde, a Tesalonika taudia Gaio tau Derebe, bona timothy, bona Tukiko bona Trofimo Asia amo.⁵ A idia ese e gunalaimai bona Troa ai e narimai.⁶ Bena ai na Flaoa asie hatubua Ariana dinadia e ore murinai Filipi a heautania, bona dina ima Troa ai a heaukau. Idia dekediai a kau dina hitu unusenai a noho.⁷ Bena pura dinana ginigunana, anibou ianina e hebou negana ai, Paulo ese Iesu ibadinana taudia e haroro henidia, badina be daba ai baine heau eto, ena haroro e hadaudaua ela bona malokihi.⁸ Atai daiutuna ai a hebou lamepadia na momo.⁹ Eregabe tauna ta ladana na Eutuko, gaba mauruna ai e helaiva. Bena mahuta ese e hametaua matana. Paulo ese ena haroro e hadaudau dainai, e mahuta hedavahue, bona ruma atai harana toi kahana amo e moru dobi bona e aba isi negana ai ia na vada e mase.¹⁰ A Paulo na e diho, latana e goru, bona e rosia. Bena ia eto, "Asio helogo helogo ia na doini e maurimu."¹¹ Bena ma e daekau lou bona Flaoa atagana e bakia bona e anianai. Idia ida e hereva hereva ela bona daba e rere, bona e raka oho.¹² Idia ese eregabe tauna e hakaua lao mai maurina ida bona lalo-namo na e badahere.¹³ A ai sibomai na vada a gui guna bona Aso ai baia heaukau, unuseni ai a laloa Paulo baine gui kau. Ia sibona na uu e

hamaoromai toma, badina be ia e lalao tano amo baine raka. ¹⁴Una dainai ai na ia ida Aso ai a hedavari, egui kau bena Mitulene ala. ¹⁵Unu amo ma a heau lao bena kerukeru Kioso daenai a hetu vanega Samo ai a heaukau bona vaira negai Mileto ai a heaukau. ¹⁶Badina be Paulo lalona eto Efeso baine heau hanai be namo, nega daudau Asia ai baine halahe na garina. Badina be ia na e gava, bema mai dalana, Pentekose dinana ai Ierusalem ai baine noho eto. ¹⁷Bena Mileto amo ia ese gwaukau Efeso e siaia lao bona ekalesia oreana ita taona taudia ia deken a baela. ¹⁸Bena idia na dekenai e kau negana ai, ia ese e hereva henidia eto, Asia tanona ai dina ginigunana ai umui sibomui na mai dibamui. ¹⁹Lohiabada isiaina na lao heniva mai managu ida bona mai iruru matagu ida bona hisihisi ese e butugu taova badina be Iuda taudia edia henega dikadia daidiai. ²⁰Umui dibamui ihanamolaimui herevadia iboudiai na hamaorolai henimuiva ta asina hunia, bona na hadibamuiva taunimanima vairadiai bona ruma ta amo ela ruma ta, ²¹Iuda taudia bona Helene taudia danu na hereva henidia Dirava enai bae helalokerehai bona eda Lohiabada Iesu bae abidadama henia. ²²Harihari baitaia, lau na Ierusalem baina, lauma ese vada e guigu dainai, asi dibagu dahaka egu ai baine vara unusenai. ²³Gau tamona hanua hanua lalodiai Lauma Helaga ese vada e hamaorogu igui bona hisihisi momo vairaigu ai e narimu. ²⁴A sibogu egu mauri na basina lalao gau hereadaena, egu heau baina ha-orea bona hesiai ialo-henina Lohiabada Iesu ese vada e henigu, Dirava ena hariharibada sivaraina namona baina gwauraia hedinarai vada baina haugurua. ²⁵Harihari Aitaia, launa mai dibagu emui ai na lalao basileia na harorolai henimui taumui, iboumui ai ese vairagu basio itaia lou. ²⁶Una dainai ina dina ai na hamaoromuimu lau na taunimanima iboudiai raradia amo name goeva. ²⁷Badina be Dirava ena ura idoinai vada na hamaorolaimui sina taina asina moia tao.

²⁸Dibagu lau baina raka oho murinai, uda sisiadia kavakavadia be bogaragimui ai do bae raka vareai bona seri na bae hadikaia. ²⁹Dibagu umui sibomui emui amo tatau haida do bae ginitore hereva goevagoevadia bae gwaurai kamoni taudia bae hakaudia kerere. ³⁰Una dainai ba gima, ba helalotao lagani toi vaitani umui ta ta isisiba henimui asina hadikoa na sisiba heniui boiva bona na sisiba henimui raniva mai iruru matagu ida. ³¹Harihari Dirava imana ai bona ena hariharibada herevana ai na atomui taomu ia na mai goadana baine haginimui maoro bona ahumui baine heni ena helaga taudia iboudiai bogaragidiai. ³²Tau ta ena silver eiava gold eiava dabua asine hekise hekise henia. ³³Umui sibomui dibamui ini imagu ruaosi gaukaradia amo egu dabu gaudia bona bamogu edia na abiva. ³⁴Ini gaudia iboudiai lalodiai, lau ese dala namona na hahedinarai henimui ita na baita gaukara auka manoka-manoka taudia baita kahadia, bona Lohiabada Iesu ena hereva, balalao tao ia sibona eto, "Gau ihenina na namo bada gau iabina be namo maragi." ³⁵Unu gaudia e gwaurai murinai, tuina e hadai bena idia iboudiai ida e guriguri. ³⁶Idia iboudiai na e tai dika dika, idia ese Paulo aiona ai e hegagui dae bona e harahua. ³⁷Idia lalodia e hisihisi bada badina be ena hereva dainai ia vairana basie itaia lou eto, bena dala ai e bamo ela lagatoi. RDK. LOHIA KOHU ESE E HAGUGURUA DINA 23/07/24 (TUE), HORANA: 12.40 AM

21

¹Bena edia amo a raka oho neganai a heau, maoromaoro bona Kosa ai a kau, bena dina gabenai ala Roda, bena unu amo ala Patara. ²Unuseni ai Foenikia bainela kadana ta a davarai, bena a guikau a heau. ³Kupro a itaia bena laurina kahana ai a rakatania, a heau ala Suria bena Turo ai a diho, badina be kada kohuna unuseni ai bae vaia dainai. ⁴Bena una murinai hahediba a davaridia, idia dekedia ai dina hitu a noho. Lauma ena amo idia ese Paulo e hamaoroa loulouva Ierusalem basinela. ⁵Unu dinadia e ore, bena emai laolao ala, idia iboudiai, mai adavadia bona natudia, e bamomai dala ai ela bona hanua isena a rakatania. Bena kone ai a hetuitui, bena a guriguri, ⁶bona a hahetoni heheni. Kada ai gui, bena e lou edia ruma. ⁷Emai laolao Turo ai e ore, Tolemaia ai a heau kau. Unuseni ai tadikaka a hahenamo henidia bona dina tamona idia ida a noho. ⁸Bena daba ai ala Kaisarea. Filipino ena ruma ai a vareai, evanelia tauna, ia na hahituosi tauna ta, bena ia ida a nohova. ⁹Ia na mai natuna ulatodia hahani e peroveta va. ¹⁰Dina hoho unuseni ai nohomai ai, peroveta tauna ta ladana Agabo Iudea amo e diho ema. ¹¹Bena ema dekemai Paulo ena belta (eiava riorio dabuana aukana) e abia. Sibona aena bona imana e guidia bena eto, Lauma Helaga be ini e gwau tomamu, Iuda taudia ese Ierusalem ai ina belta (riorio dabuana aukana) biaguna ini bae guia toma, bena idau bese taudia bae henidia. ¹²Una hereva a kamoni neganai na, ai bona una gabu taudia na Paulo a noiava Ierusalem ai na basine ha dara dae. ¹³Bena Paulo e haere, eto, "Umui be dahaka o karamu, o taimu bona lalogu o hamakohiamu? Lau be vada name hegaegae, dia una mo bae guigu, a baina mase danu Ierusalem ai Lohiabada Iesu ladanai." ¹⁴Paulo lalona ianina asia hegeregere dainai emai noinoi a hadokoa ato, "Lohibada ena ura mo baine karaia." ¹⁵Unu dina muridia ai, emai kohu abidia bena ala Ierusalem ai a hadara dae. ¹⁶Hahediba haida Kaisarea amo danu ai e bamomai. Idia ese tau ta ladana Nason, tau kupro, Iesu ibadinana tauna gunana ta, ena rumai e abi mai dae baia noho. ¹⁷Ierusalem ai a kau neganai, tadikaka ese mai moaledia ida e abimai dae. ¹⁸Dina gabenai Paulo na ai ida ala Iakobo deken a bona ore ita-taona taudia danu e vaira. ¹⁹Paulo ese e hahenamo henidia, bena Dirava ese bese idau-ida taudia bogaragidiai iena hesiai amo e karava karadia iboudiai sivaraidia e gwaurai. ²⁰Idia na e kamoni, Dirava e heatolaia, bena idia ese ia e hamaoroa eto, "Oi itaiamu tadikakagu e, Iuda taudia daha daha ese Iesu vada e badinaiamu. Idia danu taravatu e badinaia tarika-tarikamu. ²¹Idia na vada e kamoni oi ese, Iuda taudia bese idau-ida bogaragidia ai e nohomu na o hadibadiamu Mose bae rakatania, bona natudia basie peritome dia, bona sene karadia basie kara. ²²Una dainai, ede baita kara toma? Idia na momokani bae kamoni oi vada oma. ²³Una dainai ini kara ai a hamaorolaimu na ba karaia. Tatau hahani bini hehelaga edia gwauhamata dainai. ²⁴Oi ese bavabidia idia ida ba hahegoeva, bona edia negenege ba davanadia, bena huidia ba utu. Unu amo taunimanima iboudiai bae diba oi harimu e kamonaiva na asi anina, bae diba danu o kara maoromaoromu bona taravatu o badinaiamu. ²⁵A bese idau-ida taudia na emai lalo-hadai vada a tore henidia, ato, kaivakuku ihaboulaidia gaudia bona rara bona aiodia e gigi gaudia hidiodia na basie ani, bona

basie heuda-hanai. ²⁶Una dainai, Paulo ese hari tatau na e abidia, kerukeru idia ida bae hahegoeva, dubu lalonai e raka vareai, hahelaga taudia bae ore dinadia baine gwaurai hedinarai bona boubou gaudia idia ta ta daidiai baine ato. ²⁷Hahegoeva dinadia hituosi kahira-kahira e ore murinai, Iuda taudia haida Asia amo ese Paulo e itaia dubu helaga lalonai, bena idia ese aru taudia lalodia e ani, bena e dabaia tao. ²⁸E lolo eto, "Isaraela taumui e, a durumai. Ina tau ese taunimanimi iboudiai gabu idoidiai e hadibalauidiamu ita beseda, bona taravatu, bona ina gabu bae inai henidia. Ina danu, ia ese Helene taudia na dubu helaga lalonai vada e hakaudia vareai, ina gabu helagana vada e hadikaia." ²⁹Badina be idia ese e itadia guna Trofimo, tau Efeso ida, hanua lalonai bena banava eto Paulo ese dubu helaga lalonai vada e hakaua vareai. ³⁰Hanua idoinai e haraivaia, bena hanua taudia e aru ela Paulo e dabaia tao. Dubu helaga amo e veria lasi, bena iduara iboudiai e kou. ³¹Idia ese bae alaia mase eto, Ierusalema idoinai e helogo-helogova harina na tuari biaguna badana e kamoni. ³²Bena ia ese tuari taudia mai biagudia ida e hakaudia haraga-haraga bena hutuma dekedie e heau lao. Aru taudia ese tuari biaguna badana mai ena ore a taudia ida e itadia, bena Paulo idadabana e hadokoa. ³³Bena tuari biaguna badana e raka kahira Paulo e abia, bena ena ore a taudia e haduadia gadea rua amo bae guia. Bena e nanadaia ia be daika bona ena kara be dahaka. ³⁴A hutuma bogaradiamo haida e hereva ta ma haida e hereva ta e lololai. Bena helogo-helogo dainai ia na hereva maorona idavarina asi dibana. Una dainai, e hahedua, Paulo na tuari kohorona lalonai bae hakaua vareai. ³⁵Vadavada ai e kau ai, tuari taudia ese e huaia dae badina be aru taudia na mai edia dagedage. ³⁶Badina be hanua taudia ibouboudiai ese e gavaia e lolo eto, "Aine mase." ³⁷Kohoro lalonai bae hakaua vareai eto, Paulo ese tuari tauna badana e noia, eto, "Mani bama hereva henimu a?" Tuari biaguna badana eto, Helene gadodia mai dibamu a? ³⁸Oi na dia hari Aigupito tauna, gunaguna ala-ala e havaraia bona ala-ala taudia daha hani tano gagaena e hakaudia lao a? ³⁹Paulo eto Lau na Iuda taugu egu hanua na Taso Kilikia tanona ai, harina dia maragi hanuana. Una dainai, na noimumu, mani emu kara taunimanimi aina hereva henidia. ⁴⁰Tuari biaguna badana e gwau maoro, bena Paulo na vadavada ai e gini imana ai taunimanimi e taodia ahu. Idia na asi regeregedia bena ia ese Heberu gadodia ai e hereva henidia eto,

22 ¹²³⁴⁵⁶⁷⁸

23

¹Bena Paulo ese kaunsil taudia e raraidia tao; ben ato, varavaragu e, lau na mai lalo-goevagoevagu ida vada na nohova Dirava vairanai, ema bona harihari. ²Bena hahelga tauna badana, Anania, ese badibadinai e gini taudia e haduadia, uduna bae huaria. ³Bena Paulo ese e gwau henia, eto, Dirava ese oi do baine huarimu; oi na e hakurokuroa habana na heto; Oi na taravatu ai ba hahemaoro henigu totona o helaimu ani? Matona, taravatu o tataia utumu, o haduadiamu bae huarigu. ⁴Badibadinai e gini taudia eto, Dirava ena hahelaga tauna badana o gonagonalaiamu a? ⁵Paulo e haere, eto, varavaragu e, asi dibagu ia na hahelaga tauna badana; a dibagu vada e torea, Emu bese lohiana na basio ere dika henia. ⁶Paulo ese kaunsil taudia e itadia eto, haida be Sadukea taudia, ma haida be Farisea taudia; bena bogaragidiai e lolo, eto, varavaragu e, lau na Farisea taugu; bona Farisea tauna natuna. Mase taudia edia tore-isi-lou name laroa dainai o hahemaoro henigumu a? ⁷Ia na unu e gwau toma; bena Farisea taudia bona Sadukea taudia e hepapa-ahuahu, edia hebou e haheparara; ⁸badina be Sadukea taudia e tomamu tore-isi-lou na lasi, aneru lasi, lauma danu lasi, a Farisea taudia ese iboudiai e gwauidiamu. ⁹Bena helogo helogo vada e badava; itorena taudia haida Farisea oreana amo e gini tore, e hereva goada goada, eto, ina tau enai kara dika ta asiame davarua; lauma ta eiava aneru ta ese vada e hereva henia dahaka. ¹⁰Hepapa-ahuahu na e habadaia; bena tuari badana e gari, idia ese Paulo bae darea na garina. Una dainai, ia ese ena ore a taudia e haduadia, bae diho, bogaragidia amo bae hakaua oho, kohoro lalonai ma ba hakaua vareai. ¹¹Hanuaboi ai Lohiabada na Paulo badibadinai e gini, eto, Ba goada balaheni, badina be Ierusalema ai vada o gwauidia hegeregerena ai Roma ai danu ma ba gwauidia. ¹²Dabai ai Iuda taudia haida e henega, e gwau hamata mai hereva metau dia ida, basie aniani bona ranu basie inua ela bona Paulo bae alaia mase. ¹³Unu e gwau hamata toma taudia na hari-ahui mai dikoana. ¹⁴Idia na hahelaga taudia bona hanua tau-badadia dekedie ela, eto, Ai na vada ame gwau hamata mai hereva metaudia ida, basia aniani ela bona Paulo baia alaia mase. ¹⁵Una dainai, umui na kaunsil taudia ida tuari biaguna ba noia, ia ese Paulo ma baine hakaua diho dekemui ai, boma ura ia herevana boma tahua goevagoeva na heto. A ai na baia hegaegae noho, bena dekemui ai do basine raka kahi mai, vada baia alaia mase. ¹⁶A Paulo vavana ese edia bani-tao herevana e kamoni, bena tuari taudia edia kohoro ai e raka vareai, Paulo e hamaorolaia. ¹⁷Bena Paulo ese tuari biaguna maragina ta e boiria, eto, Ina tauhau na tuari biaguna badana dekena a hakaua lao, badina be ia na hereva ta aine hamaorolaia e tomu. ¹⁸Una dainai, ia ese e hakaua lao, tuari biaguna badana dekena eto, hari mai iguina tauna, Paulo, ese e boirigu, e noigu, ina tauhau na oi dekemu baina hakaua mai eto, badina be ia na hereva ta aine hamaorolaimu e tomu. ¹⁹Bena tuari biaguna badana ese ia imana eabia e hakaua siri, e nanadaina hehuni eto, dahaka ba hamaorogu o tomu? ²⁰Ia na e haere eto, Iuda taudia vada e henega bou, bae noimu kerukeru Paulo ba hakaua diho, kaunsil taudia dekediai, bae nanadaia goevagoeva totona. ²¹To basio kamoni henidia, badina tatau haria-hui mai dikoana na Paulo ese e bani heniamu, bona vada e gwau hamata eto, aniani basie eani bona ranu basie inu ela bona bae alaia mase. Idia na harihari e hegaegae nohomu, badina be lalodia e tomamu oi ese edia noinoi bavabia dae. ²²Una dainai, tuari biaguna badana ese tauhau na e tuia, e tamanua, eto, tau ta basio hamaoroa oi ese unu gau vada o hamaorolaia. ²³Bena ia ese tuari biagudia rarua e boiridia, eto tuari taudia sinahu-rua bona hosi ai e guimu taudia hitu-ahui bona io taudia sinahu-rua ba haboudia hegaegae, hari hanuaboi hora taurahani ta Kaisarea baela. ²⁴Hosi ta danu bae henidia, Paulo ena gui gauna. Bena gavana

Feliki dekena ba laohaia mai maurina ida.²⁵ Revareva danu e torea, ini e torea toma: ²⁶Lau Kludio Lusua ese oi Feliki gavana taumu namo-hereana, na hahenamo henimumu. ²⁷Ina tau be Iuda taudia ese e dabaia tao, bae alaia mase eto; bena lau na tuari oreana ida ala na hamauria, badina be na diba ia na Roma tauna. ²⁸Lau na ura e hahebadelaia anina baina diba, una dainai na hakaua diho edia hegogo badana lalonai. ²⁹Unuseni ai na davaria idia ese edia taravatu herevadia ai e habadelaiava, a ihamasena eiava iguina badina ta asie gwaurai. ³⁰A vada eme hamaorogu haida na bae bani tao, bena bae alaia mase; una dainai na siaia vasi haraga-haraga dekemu ai; bona ihabadelaina taudia danu vada bae vasi, oi vairamui ai bae habadelaia. ³¹Una dainai e haduadia hegeregereana ai tuari taudia ese Paulo e abia, hanuaboi ai Antipatri e hakaua lao. ³²Kerukeru idia na edia kohoro e lou lao; a hosi ai e gui taudia be Paulo ida ela. ³³Kaisarea ai e lasi; bena hari revareva na gavana e henia, Paulo danu e hakaua vareai ia vairanai. ³⁴Paulo ese hari revareva e duaiaia vaitani, bena e henanadai eto, ia be edena gabu tauna? Vada e kamoni ia na Kilikia kahana tauna. ³⁵Bena eto, E hahebadelaimu taudia do baema, bena vairadiai emu hereva idoinai baina kamoni. Bena e haduadia, Heroda ena hahemaoro rumana ai do bae gimaia. Translation done by Rev. Eiwana Zacharias on 08/08/24, time: 8.00 am.

24

¹Dina ima e ore ai Ananias hahelaga tauna badana, hanua tau-badadia haida ida, bona haroro mai dibana tauna ta ladana Teretulo unu ela. ²Bena Paulo na governor vairanai e gini, Teretulo ese governor enai e habadelaia matama, eto, "Badina be oi daimu ai maino ai a nohomu, bona emu aonega dainai ina bese ena dala vada eme maoromaro, ³una dainai ai ese nega idoidiai bona gabu iboudiai oi emu hereva abiadaemu bona a hanamomumu. ⁴Edeheto, baina haturiamu na garina na noimumu, mani ame bogamai hisi emai hereva kwadogina ba kamoni. ⁵Badina be ai ese ina tau a davaria ia na dika ihavarana tauna Iuda taudia iboudiai tanobada kahadia idoidiai ia ese e hahelogo-helogodiamu ia danu Nasareta oreana ihakauna tauna ta. ⁶Ia ese Dubu Helaga e hadikaia toho, to ai ese a dabaia tao baia hahemaoro henia emai taravatu hegeregereana ato. ⁷A Lusua, tuari biaguna badana ema imamai amo eabia oho mai dagedagenai ida. ⁸Mani oi sibomu ese ba nanadaia ini kara idoidiai e habadelaimumu herevadia sibomu ba diba gaudia amo ai ese a habadelaiamu. ⁹Iuda taudia ese ena hereva e abiadae unu hereva iboudiai na mo-momokani. ¹⁰Gavana ese Paulo e lodu henia, bena Paulo e haere, eto, "Lau dibagu lagani momo oi ese ina bese vada o hahemaoro henidia, una dainai sibogu herevagu ai na gwaurai mai moalegu ida. ¹¹Boma tahua boma diba dina gwauta-rua vada ela lau na toma-diho totona Ierusalemia ai na hadara dae. ¹²Tau ta ida hepapa-ahuahumai ai asie davarigu, eiava hutuma na habadudia, bona dubu ai eiava hanua ariaradiai ai heolog-helogo ta asina havaraia. ¹³Idia danu harihari e habade laigumu herevadia na oi vairamu ai basie hamomokani dibamu. ¹⁴A ina-na na gwaurai hedinaraimu oi vairamu ai, idia ese kererena, e gwauraimu dalana ai lau ese senemai edia Dirava na toma henia dihomu. Lau na gau iboudiai taravatu ai bona peroveta bukadia ai e torena na abidaemu danu. ¹⁵Mai egu helaro danu Dirava enai ini hahebadade taudia hegeregereana mase taudia do bae toreisi lou kara maoromaoro taudia bona asi edia kara maoromaoro taudia danu. ¹⁶Ina danu na goadalaiaimu lalogu na basine kerere helaoreana Dirava vairanai bona taunimanima vairadiai. ¹⁷Lagani haida vada e lao bubuni bena nala harihari gaudia bona boubou gaudia egu hanua baina laohai nato. ¹⁸Unu na kara toma, bena na hahegoeva ai na Dubu Helaga ai, e davarigu aru taudia na lasi, helogohelogo danu lasi. ¹⁹A Iuda taudia haida Asia amo be unuseni ai oi vairamu ai bema mai bema habadelaigu, idia na egu kara dika ta bema diba una na bema maoro. ²⁰Eiava, ini vada ema taudia ese bema hamaorogu egu kara dika be edena e davaria Iuda kaunsolo taudia vairadia nagini negana ai. ²¹A ina hereva tamona na gwaurai badabada idia bogaragidia ai ginigu ai nato, "Mase taudia edia toreisi lou herevana dainai, hari dina o hahemaoro henigumu, ²²Bena Felix hari 'Dala' vada e diba maoromaoro tainai idia e gwaudia tubu eto, "Bema Lusua tuari biaguna badana bainema neganai emui hereva baina tahua namonamo. ²³Bena tuari biaguna e hagiania Paulo baine gimaia, to basine koua kunuka-kunuka, bona basine gwaua tao turana haida ese danu bae igoa ita. ²⁴Dina haida muridia ai, Felix na adavana Darusila, Iuda hahinena, ida ema bena Paulo hesiaina e kara bena ia ena amo e kamoni Keriso Iesu iabiabiraina herevana. ²⁵A Paulo ese kara maoromaoro bona boga auka bainema hahemaorona danu e herevalaia, Felix na e gari, eto, Harihari aola nega baine namo ma baina boirimu lou. ²⁶Ia danu mai ena helaro Paulo ese moni baine henia ia iruhana davana una dainai ia ese e boiria loulouva, ia ida e hereva-herevava. ²⁷A lagani rua vada e lao bubuni, bona Porokio Festo ese Felix e boloa, A Felix na Iuda taudia lalodia ihanamodia urana e urava dainai, ia ese Paulo na igunai e rakatania.

25

¹Festo na baine lohia tanona ai e vareai, bena dina toi murinai, Kaisarea amo ela bona Ierusalemia. ²Hahelaga taudia bona Iuda ikwaradia taudia ese Paulo e habadelaia Festo enai, ³benai idia ese e noia bona e nanadaia ia ihadikana ai baine durua - bena Festo ese Paulo na Ierusalemia bae hakau mai - badina be idia ese dalai bae bani henia bae alaia mase eto. ⁴Festo ese e haere henidia eto, Paulo bae gimaia Kaisarea ai, bona asi vanahana lau danu unu bainala. ⁵Ma eto, "Una dainai, umui bogaragimui ai hegunalai taudia danu lau ida bainala. Bema hari tau mai ena kerere, idia ese bae habadelaia. ⁶Festo na idia dekedai ai e nohova dina taurahani eiava gwauta dahaka, bena Kaisarea ela. Dina gabenai ia na hahemaoro gabuna ai e helai bena e hahegani (gwau lasi) Paulo na bae hakaua mai ia vairanai. ⁷Paulo na e ginidae, bena Ierusalemia amo e diho taudia ese e ginia hegege, hereva metaudia momo e habadelaia, to asie hamomokanidia. ⁸Bena Paulo e haere eto, "Lau na gauta asina karaia kerere, Iuda taudia ediai eiava dubu enai, eiava Kaisara enai, taravatu asi na tataia utu. ⁹To Festo, na e urava Iuda taudia lalodia baine hamoaledia dainai, ia ese Paulo e haere henia

eto, "O uramu be Ierusalem a ba hadara dae unuseni ai baina hahemaoro henimu ini hereva daidiai a?" ¹⁰A Paulo eto, "Lau na Kaisara ena hahemaoro gabunai na ginimu ia ese baine hahemaoro henigu." Lau be gau kererena ta asi na karaia Iuda taudia ediai, oi danu mai dibamu. ¹¹Bema dounu bama kerere bona mase karana ta bama karaia vada bama mase, basinama gwau ede-edo. A bema edia hahebade asi anina, tau ta ese idia imadia ai basiema tahogu kau diba. Kaisara ladana bama hatoa ia vairanai baina hahemaoro. ¹²Unu amo Festo Kaunsol taudia ida vada e hereva-hereva, bena ia e haere eto, "Kaisara ladana ome hatoa. Kaisara dekena do baola!" ¹³Dina haida vada ela, Pavapava tauna Agripa bona Berenike ida Festo ihanamona totona Kaisarea ela. ¹⁴Idia na dina hoho unuseni ai e nohova, Festo ese Paulo herevana na gaubada e hamaorolaia eto, "Tau ta be iniseniai Feliki ese dibura rumana ai e rakatania. ¹⁵Lau Ierusalem nala negana ai hahelaga taudia bona hanua tau-badadia ese ia herevana e hamaorolaigu, bona e noigu danu baina hahemaoro henia. ¹⁶Bena na haere henidia nato Roma taumai na unu asia kara tomamu e hahebadelaiaimu tauna na ihabadelaina taudia ida do asie hegaga heheni bona do se haere henidia negana ai asie hahemaoro heniamu. ¹⁷Una dainai, idia na iniseni ai e hebou negana ai lau na asi na halahe a kerukeru hahemaoro gabuna ai na helai na gwau isi hari tau bae hakaua mai. ¹⁸A ihabadelaina taudia e ginitore negana ai lau banava kara dikadia bae habadelaia nato to asie gwaurai. ¹⁹Edia tomadiho karadia mo e herevalai bona tau ta ladana Iesu herevana danu ia na vada e mase, a Paulo ese e herevalaia goadagoadava eto, vada eme mauri. ²⁰Bena ini hereva itahudia dalana na daradara laia dainai, na nanadaia Ierusalem baina unuseni ai baine hahemaoro henia. ²¹A Paulo ese e noigu, eto, iahemaoro henina baine mia ela bona Augusto ese baine karaia una dainai na hahedua ba gimaia ela bona Kaisara dekena baina siaia lao. ²²Bena Agripa ese Festo e hamaoroa eto, Lau danu na uramu hari tau ena hereva baina kamoni. Festo eto kerukeru do ba kamoni. ²³Kerukeru Agripa bona Berenike na mai hairaidia ida ela hahemaoro rumana ai e raka vareai tuari biagudia bona hanua tau-badadia ida, Bena Festo e gwau isi Paulo bae hakaua vareai. ²⁴Bena Festo eto, Pavapava Agripa e, bona dekemai ai vada ome hebou taumui iboumui ai ina tau oi taianu. Iuda taudia iboudiai Ierusalem ai bona iniseni ai danu e noigu e lolo baine mauri na dia namo eto. ²⁵To mase karana ta ienai asi na davaria. Bena ia ese Augusto ladana vada e hatoa ia vairana ai baine hahemaoro e tomu. Una dainai na tomamu baina siaia lao. ²⁶A ia herevana biagugu baina tore henia na asi na diba goeva una dainai vada name hakaua mai umui vairamui ai bona oi vairamu ai danu Pavapava Agripa e, baita nanadaia goevagoeva bena ia herevana ta baina davaria baina torea. ²⁷Badina be lau na tomamu dia maoro mai iguina tauna baina siaia lao, a ihahebadelaina herevadia na basine tore hedinarai.

26

¹Unu hetomana Agripa ese Paulo e hamaoroa, eto, "mani sibomu daimu ai ba hereva." Bena Paulo na imana e toi roro bena ena helaoahu e karaia. ²Ini gau iboudiai daidiai lau na Iuda taudia ese e habadelaigumu. Pavapava Agripa e, lau na laloamu, lau sibogu na hegeregere gaudia iboudiai na oi vairamu ai hari dina ai baina herevalai. ³Badina be Iuda taumai emai kara bona hepapa-ahuahu danu iboudiai vada o diba bada, una dainai na noimumu mani a kamoni henigu mai haheaukamu ida. ⁴Bena etomamu, tauhaugu negana maurina na maurilaia dalana e hematama na egu bese taudia bogaragidiai bona Ierusalem ai danu, Iuda taudia iboudiai vada dibadia. ⁵Matamana amo idia na dibadia lau bona bema ura bema gwaurai lau na Farisea taugu, tomadiho orena bunai, ena kara metaudia iboudiai na badinava. ⁶Harihari ina hahemaoro gabuna ai name gini, badina be Dirava ena gwauhamata na laroamu senemai e henidia gwauhamatana. ⁷Iduhu gwauta-ruaosi ese una gwauhamata na e laroamu dainai idia ese Dirava e toma diho henia boimu e toma diho henia ranimu mai goadadia ida. Pavapava Agripa e, una helaro dainai Iuda taudia ese e hahebadelaigumu. ⁸Badina be dahaka umui na o tomamu Dirava ese e mase taudia e hatoredia isi herevana na basita abiadae diba? ⁹Lau danu lalogu na hadaia, nato, Iesu tau Nasareta ladana ihadikana momo boma kara bema namo. ¹⁰Unu na kara toma Ierusalem. Bena helaga taudia hutuma dibura rumana ai na koudia ahu, e revadia mase negadai lau danu nato bae mase. ¹¹Dubu iboudiai lalodai danu lau ese na hahisihisidia loulouva, na ura dikava bae ere dika. Na badu henidia dikadika dainai, na dagedage henidia ela bona hanua idaudia. ¹²Una gaukara dainai Damaseko nala siahu bona maoro hahelaga taudia ese vada e henigu, ¹³bena dala ai, dinatubua neganai, Pavapava, diari ta guba amo na itaia dina hururu-hururuna e hereaia bona e diari diari lau ida a laolao hebouva taudia e gegemai ahu. ¹⁴Ai iboumai ai tano ai moru neganai, bena gado ta na kamoni Heberu gadodia ai e hereva henigu, 'Saulo e, Saulo e,' dahaka dainai o dagedage henigumu? Emu ai e aukamu dainai ikodo o lahamu. ¹⁵Lau nato, 'Lohiabada e, Oi be daika? Lohiabada e haere, 'Lau na Iesu o dagedage henigumu. ¹⁶Harihari a tore isi bona a gini; badina be emui ai vada name hedinarai, badina binai egu hesiai tauna ai baina halaomu bona vada o ita gaudia bona do baina hahedinarai henimu gaudia danu ba gwaurai hedinarai, ¹⁷bona baina hamaurimu taunimanimu edia amo bona idau bese taudia edia amo idia dekedai baina saianu lao, ¹⁸matadia bae papa bona dibura amo bae diari bona Satani ena siahu bae rakatania Dirava ena bae hagerea, unu amo edia dika bae hegwaitao bona ahudia do bae abi lau iabiabiraigu ese vada e hahelagadia taudia bogaragidia ai. ¹⁹Una dainai, Pavapava Agripa e, guba amo e hahedinarai henigu gauna na asi na gwau ede-edo henia, ²⁰a, Damaseko taudia na haroro hendia guna, gabeamo Ierusalem taudia bona Iudea kahana taudia iboudiai bona bese idau-ida taudia danu na haroro henidia, bae helalo kerehai bona Dirava bae lou henia, bona helalo karadia danu bae kara. ²¹Badina binai Iuda taudia ese e dabaigu tao dubu lalonai bae alagu mase eto. ²²Una dainai heduru na davaria Dirava ena amo una nega amo ema harihari, vada na gini tutuka-tutuka kikina badana vada na haroro henidia, gau idauna ta asina gwaurai dia peroveta taudia bona Mose ese gwaurai guna gaudia mo na gwaurai bae vara - ²³Keriso na hisi baine eani guna bena mase amo baine tore isi baine hadiaridia ena taunimanimu bona idau bese taudia ediai. ²⁴v 24 Paulo na ini hereva e gwaurai murinai, Festo e lolo eto, "Paulo e, oi na o kavamu, emu

aonega badana ese lalomu vada e hakavaia." ²⁵A Paulo eto, "Lau na dia kava, namo-herea taumu Festo e, a lau na momokani bona lalo-parara herevadia na gwaauraimu. ²⁶Badina be pavapava danu ini gau na dibana, dainai mai goadagu ida na herevalai heniamu, vada name diba ini gau ta ienai na dia hehuni; badina be ina gau na dia daiguni ai asie karaia. ²⁷Peroveta taudia o abidia daemu, Pavapava Agripa a? ²⁸Bena Agripa ese Paulo e hamaoroa eto, "Hora kwadoginai lalogu o aniamu Ekalesia (Keriso ibadinana) tauna ai bainala a? ²⁹A Paulo eto, "Dirava na noiambu, bema dala ta ai, enabe hora kwadoginai eiava hora latanai, dia oi mo, to hari dina ai e hakala henigumu taudia iboudiai, lau ihagoigu ai boma lao, a dia igui ai." ³⁰Bena pavapava e tore isi, bona gavana danu, bona Berenike, bona idia ida e helaiva taudia iboudiai, ³¹e tore isi, e raka lasi, sibodia e hereva heheni eto, "Ina tau na mase karana ta eiava iguina karana ta se karaia. ³²Bena Agripa ese Festo e hamaoroa eto, "Ina tau na baitama ruhaia nege, bema Kaisara ladana basinema atoa. Translation done by Dkh. Moale Edward, on Tuesday (10/09/24), time: 10.00 am

27

¹Lalodia e hadai ai na Italy baia ala, bena idia ese Paulo bona e guidia taudia haida tuari biaguna tauna ladana Julius e henia Augustos ena ore a tauna ta. ²Bena a gui lagatoi ta Adramutio amo, ia na Asia konena hanua dia baine heau henidia gauna. Bena a heau. Makedonia tauna ta ladana Aristako, Tesalonika amo, ese e bamomai. ³Daba rerena, Sidono ai e heau kau. Unuseni ai Julio ese Paulo e kara namo henia e kahua nege turana dekedie bainela bena dekedie ai baine laga-ani. ⁴Una gabu a heautania Kupro enoenona kahana ai a hanai, badina be lai na vairamai amo e maiva. ⁵Kilikia bona Pamfulia daedia amo a heau hanai bena Muro ai, Lukia tanonai a heau kau. ⁶Unuseni ai, tuari biaguna ese Alexandra lagatoina ta e davaria Italy bainela, una dainai e hagu mai hanai una lagatoi ai. ⁷Dina hoho a heau metaira-metaira ela bona Kenido daenai a heau kau mai hekwarahimai ida. Unuseni ai lai ese e laomai ahu bena Krete enoenona ai a heau, Salmone idukana daenai. ⁸Bena badibadina amo a heau ela bona gabu ta ai a heau kau, ladana be Ao Namodia, una gabu bona Lasea hanuana padadia na dia daudau. ⁹Nega daudau vada ela bubuni, bona una nega heauna be mai garina, badina be anivaga negana vada e ore, una dainai, Paulo ese e sisiba henimai, ¹⁰eto, tatau e, vada name diba eda laolao na do baine dika, gau momo bae boio bona dia kohu mo a lagatoi danu, ita danu baita mase dahaka. ¹¹A tuari biaguna ese lagatoi itarina tauna bona lagatoi biaguna e kamoni henida, Paulo ena hereva se abiadae. ¹²Una hetu gabuna na dia namo Lahara neganai, una dainai hutuma na e tomava baia dihotania. Foenikia ai baia heau kau toho, unuseni ai baia noho Lahara negana ai. Foenikia na hanua ta Krete motumotuna. a mai matuna, ta be lasirai matuna, ta be laurabada matuna. ¹³Lahu diho e toa, bena idia banava eto nega namona vada e davaria. Una dainai idia ese dogo e veria bena Krete badibadina amo a heau. ¹⁴Asi vanahana, guba badahereana ta, ladana totodae, motumotu kahana amo e toa. ¹⁵Lagatoi guba ese e butuatao neganai bona asi a hegeregere lai lalonai baia heau, guba a lailaia bona a hagogo. ¹⁶Bena a heau motumotu ta metainai ladana Kauda, bona a hekwarahi una dingi baia ha-aukaia lagatoi ida. ¹⁷Idia ese dingi e veria dae neganai, idia ese kwanaudia na e abidia lagatoi gabena na kahanai e mataia bena e veria tao. Idia na e gari hari be Syrtis boe na kuiohona ai bae heau dae, bena idia ese lara (sea anchor) e tua-dobi bena a hagogo. ¹⁸Ida na e gari guba dikadika dainai, bena daba e rere kohu nege a matamaia. ¹⁹Dina ihatoina ai lagatoi memerodia sibodia ese imadia ai lagatoi kohu dia iboudiai e taho dia dobi. ²⁰Dina hoho dina eiava hisiu danu asie hedinaiva bona guba danu se dokova e odamaiva bena baiama mauri helarona e heabi oho vaitani. ²¹Idia na nega daudau asie anianiva bena Paulo na lagatoi memerodia bogaragidiai e gini tore bona eto, "Tatau e, boma kamoni henigu, bona Krete basitama dobitania, bena ina hahedika bona kohu iha-oredia na emui ai basiema vara. ²²A harihari na hamaoromuimu ba goada, badina be padamui ai emui mauri basine boio, a lagatoi mo sibona baine boio. ²³Badina be boi hanuaboi ai Dirava ena aneru ta lau na iena bona isiaina na lao henimu, na badibadigu ai e gini ²⁴eto, Paulo e, basio gari, Kaisara vairana ai do ba gini, oi ida o laolaomu taudia iboudiai edia mauri na Dirava ese vada e henimumu. ²⁵Una dainai lalamo taumu! badina be Dirava na abidadama heniamu natomamu gau iboudiai bae vara, vada e hamaorogu hegeregere. ²⁶A motumotu ta ai do baita hure kau. ²⁷Boi gwauta-hani vada ema neganai, Adira gadobadanai a hure eva-eva, bena malokihi ai lagatoi memerodia eto tano ta vada e kahira-kahira. ²⁸Idia ese davara ena dobu e hahetohoa roha ruahui eabia; asi vanahana ma e hahetohoa lou, roha gwauta-ima eabia. ²⁹Bena lagatoi na nadi ai baine tata negana ai, idia ese dogo au-hani lagatoi gabena na amo e nege dobi bona e guriguri daba e naria. ³⁰A lagatoi memerodia ese lagatoi bae pautania eto, bena dingi davara ai e tua dobi, e kara hedibagani, lagatoi idamana ai dogo haida inege-dobidia laona urana na heto. ³¹Bena Paulo ese tuari biaguna mai ena ore ida e hamaorodia, eto, idia na lagatoi ai basie noho, umui na basio mauri diba. ³²Bena tuari taudia ese dingi kwanaudia e rahu utu, bena dingi na davara ai vada e moru. ³³Daba e kinia, bena Paulo ese iboudiai e noidia, aniani taina bae ania. Ia eto dina iha-gwauta-hanina binai umui na vada o vagamu, aniani taidia asio animu; ³⁴una dainai, na noimuimu, aniani taidia mani avani, mauri helaoreana. Badina be kwaramui huidia autamona basine boio, lasi vaitani. ³⁵Unu e gwau toma, bena aniani eabia, Dirava e hanamoa idia iboudiai vairadiai bena e baki sisi, e ani. ³⁶Bena iboudiai lalodia vada e namo, e aniani danu. ³⁷Lagatoi ai a nohova taumai iboumai ai na sinahu-rua hituahui tauratoi. ³⁸E aniani vaitani, bena lagatoi iharagana totona uit na davara ai vada e nege dobi. ³⁹Daba e rere ai, idia na tano toana asi dibadia. A tabero ta hari e itaia, mai konena, bena lalodia e hadai, eto bema mai dalana lagatoi na una kone ai bae hatataia kau lao eto. ⁴⁰Una dainai idia ese dogo kwanau dia e rahu utu, dogo na davara ai e rakatanidia; tari iguidia kwanau dia e ruha, bona idama larana na lai hoho-hohona ai e kidaia, bena lagatoi e taria diho. ⁴¹A aru e toibolo gabuna ta ai e heau kau, bena lagatoi na moemoe ai e hatataia kau. Lagatoi idamana e tataia kunuka-kunuka a gabenana be hurehure ese vada e hamakohia matama. ⁴²Tuari taudia edia lalohadai be mai iguidia taudia bae aladia mase eto, haida bae nahu vareai kone

ai bena vada bae heau na garina.⁴³ A tuari biaguna ena ura be Paulo baine hamauria, una dainai ia ese e e gwaudia tao. A nahu mai dibadia taudia be e haduadia, bae pau dobi guna, tano ai bae nahu vareai;⁴⁴ muridiai taunimanima oredia bae diho, haida reirei latadiai, ma haida lagatoi gaudia latadiai. Unu e kara toma, bena iboudiai tano ai e kau mai mauridia ida. Translation done by Dk. Tara Edward on Monday 28/10/24, time: 10.00 pm.

28

¹Ai na vada a roho mauri, bena vada a diba una motumotu ladana na Melita. ²Una motumotu taudia edia kara namona e karaia, idia ese lahi eha-araia bona eabimai dae, badina be medu bona paraka dainai. ³To Paulo ese au haida e gogo bena lahi ai e atokau ai, gaigai e vero lasi badina siahu dainai, bena imana ai e hetau dae. ⁴Bena una motumotu taudia ese hari gaigai imanai e hetau dae na e itaia, bena e hereva heheni eto, "Momokani ina tau na ala-ala tauna, gadobada amo e roho-mauri to kara maoromaoro na se uramu baine mauri. ⁵A ia ese gaigai e davea dobi lahi lalonai bona dika ta se davarua. ⁶Idia ese e itaiatao tauna baine gudu eiava baine hekida dobi baine mase taku. A nega taina e daudau idia ese e itaia ienai gauta se vara, lalodia e ha-idau eto ia na dirava ta. ⁷Una gabu tamona lalonai, be motumotu Lohiana ta ladana Pabilio mai ena tano. Ia ese e abimai dae mai gaiho-namona ida dina toi ena vadivadi ai e halaomai. ⁸Unu e vara toma hari Pabilio tamana na hekure gorere taina ese eabia bona rara e kukuva ela bena e guriguri, imana latana ai e atokau bona e hanamoa. ⁹Una kara e vara murinai, motumotu ai e nohova gorere taudia iboudiai danu ema bona namo e davarua. ¹⁰Unu taunimanima ese hahenamo bada herea e henimai. A hegaegaeva baia heau oho lalonai, idia ese emai lakwa (aniani) e henimai. ¹¹Hua toi ela murinai, bena Alexander kadana ai a guikau una kada toana be Hekapa diravadia. Ia be lahara negana ai una motumotu ai e nohova. ¹²Surakuse ai a heau kau, dina toi unuseni ai a noho. ¹³Unu amo a heau Regio ai a kau. Dina ta murinai diho lai na e toa, bena dina iharuana ai Puteola ai a kau. ¹⁴Unuseni ai tadikaka mai haida a davaridia bena idia ese e boirimai dina hitu idia ida a noho. Ina dala amo Roma ai a kau. ¹⁵Unuseni ai tadikaka haida ese harimai e kamoni, bena vada ema e hedavari heni mai hanua maragidia Appius bona Tarven toiosi ai. Paulo ese tadikaka mai e itadia neganai, Dirava e hanamoa bona goada e abia. ¹⁶Roma ai a kau neganai, Paulo na e kahua nege sibona baine noho e gimaiava tauna ida. ¹⁷Dina toi vada ela ia ese Iuda ikwaradia taudia e boiridia ia ida bae hedavari. Idia na e hebou, bena ia ese e hereva henidia eto, Tatau, Tadikakagu e, ena be taunimanima asina hadikadia bona seneda edia kara danu asina hadika, to Ierusema ai e guigu Roma taudia imadia ai e atogu kau. ¹⁸Idia ese e nanadaigu murinai, e urava bae ruhage nege, badina be mase badina ta egu ai asie davarua. ¹⁹A Iuda taudia e gwau-gwau, lau na e hagugu-guva Kaisara dekena bainala, gau tamona launa asi egu hahebade ta egu bese taudia basina habadelaidia. ²⁰Una dainai, badina binai, na boirimui baina itamui bona baina hereva henimui, badina doini ini e guigu tomamu badina be Isaraela ena helaro dainai. ²¹Idia ese e haere henia eto, oi herevamu Iudea amo ta asia davarua, eiava tadikaka ta danu sema emu kara dika eiava sivaraimu dikana ta se gwauria. ²²A ai na auramu emu lalo-hadai baia kamoni, badina be a kamoni ina orea na gabu idoidiai e gwautubu. ²³Idia ese dina ta e gwauria hidi bena una dina ai hutuma bada na ema ruma ai e hebou. Ia ese Dirava ena basileia e harorolaia. Iesu herevana, Mose ena taravatu bona peroveta taudia edia buka amo e gwauria hedinarai, daba amo ela bona adorahi. ²⁴Haida ese ena hereva e herevalai gaudia e abidae. A haida ese asie abidae. ²⁵Lalodia na dia tamona, bena e karohe murinai Paulo ese ina hereva tamona ma e hamaorolaidia eto, Hereva momonai na Lauma Helaga ese Isaia peroveta tauna ena amo seneda e gwaurai henidia, ²⁶eto, "aola ina bese taudia dekedua bena baoto, "Kamoni be ba kamoni, to lalomui basie parara; bona ita be ba ita to basio diba. ²⁷Badina be ina bese taudia lalodia na duduhu, bona taiadia na kukudima, bona matadia vada e hakapu. Matadia amo bae ita na garina, bona taiadia amo bae kamoni na garina, bona lalodia bae parara na garina bae hegiro, bena baina hamauridia na garina. ²⁸Una dainai, do ba diba Dirava ena hahemaui na bese idau-idau dekedua vada e siaia lao, idia na do bae kamoni. ²⁹Ia na unu e gwau toma, bena Iuda taudia na dauha ela, ena hereva e helalolai badava. ³⁰Paulo na lagani rua sibona davana e heniva rumana ai e nohova, bena ia dekena ela taudia iboudiai e abidiadae. ³¹Ia ese Dirava ena basileia herevana e harorolai henidiava bona Lohiabada Iesu Keriso sivaraina e hadibalaiddia mai goadana ida. Bona ta ese se gwaua-tao. Translation done by: Mrs. Ori Claude Kohu on Friday (06/10/23), time: 7.10 am, ready for quality checking.

Romans

1

¹Paulo, Keriso Iesu ena hesiai tauna ta, vada e boirigu ena apostolo tauhu ai nala, bona e hahelagagu Dirava ena sivarai namona iharorolaina dainai, ²ia ese peroveta taudia edia amo vada e gwauhamata laia ena Buka Helaga lalonai, ³ia natuna herevana danu daika be Davida garana amo tauanina ai e vara. ⁴Helaga Laumana ena amo e gwauria mai siahuna Dirava Natuna, e toreisi lou mase amo, Iesu Keriso ita eda Lohiabada. ⁵Ia ena amo ita na hariharibada tame abia bona hesiai dagina danu badina kamoni abidadamana na bese idauidau ese bae abia ia ladana dainai. ⁶Ini bese idauidau lalodiamu umui danu e boirimui Iesu Keriso ena taunimanima. ⁷Ina revareva na umui Roma ai o nohomu taumui emui, Dirava ese e ura henimuimu, e boirimui ba helaga taumui. Ena hariharibada na latamui ai, bona maino Tamada Dirava ena amo bona Lohiabada Iesu Keriso ena amo. ⁸Ginigunana, egu Dirava na hanamoamu, Iesu Keriso ena amo umui iboumui daimui ai, badina emui kamoni harina na tanobada hegegemaadi e herevalaiamu. ⁹Badina Dirava na lau igwauria hedinarai, lau ese isiaina na lao henimu laumagu, ai ia Natuna sivaraina namona lalonai, ia na dibana egu guriguri umui daimui ai asine dokomu. ¹⁰Nega iboudiai egu guriguri ai na noinoimu Dirava ena ura ai baina vasi

dekemui.¹¹Na ura dikamu baina vasi itamui, unu amo lauma ena harihari haida baina henimui, unu amo umui na ba goada? ¹²Una na nauramu umui bona lau eda kamoni tamona tama hahealo heheni. ¹³Hari lau na asina uramu basina hamaoromui, tadikakagu, nega momo na ura dikava dekemui baina vasi, (to e laogu ahuva ema bona hari) umui lalomui ai huahuamui baina davari, lau ese Helene taudia lalodia na davari hegeregere. ¹⁴Launa na abitorehai Greek taudia, idau taudia, aonega taudia bona kavakava taudia ediai. ¹⁵Una dainai, lau egu ai, launa na hegaegaemu sivarai namo baina harorolaia bona umui Roma taumui emui ai danu. ¹⁶Badina sivarai namo na asina hemarailaiamu badina ia na Dirava ena siahu e hamomokaniamu taudia iboudiai ihamaurilaidia, guna Iuda taudia ediai bona Helene taudia ediai. ¹⁷Badina ia lalonai Dirava ena kara maoromaoro na e hahehdinaraiamu kamoni ta amo kamoni ta, bona vada e torea hegeregere, "momokani, kara maoromaoro tauna do baine mauri ena kamoni dainai." ¹⁸Badina be Dirava ena (badu/ lalo garagara na guba amo asie helagamu bona asie kara maoromaoromu taudia ediai, edia kara kereredia amo hereva momokani na e dogoa taumu. ¹⁹Madi be Dirava na e dibaia hedinarai ediai. Badina Dirava ese e hahedinarai henidia lalodiai. ²⁰Badina be ena hehuai gaudia, ena siahu hanaihanai bona ena helaga karadia na e itadia hedinarai tanobada e karaia matamana amo. Una dainai asi edia hahekora ta. ²¹Ena be Dirava na e dibaia, idia ese na asie heatolaiava ia na Dirava, eiava asie hanamoava. A kahanai, edia lalohadai na vada e kavakava, bona lalodia danu vada e hadiburadia. ²²Sibodia e tomava mai aonegadia, a gau be kavakava taudia ai ela. ²³Idia ese Dirava noho hanaihanai hairaina ena amo e raka ohova, a e masemu tauna iha-hegaegaena laulaudia, bona manu, bona aedia hani manudia, bona e raumu gaudia e tomadiho henidava. ²⁴Una dainai Dirava ese e tudia nege, lalodia hegahusi uradia mirodia bae gava, bona sibodia tauanidia ihadikadia dainai. ²⁵Idia ese Dirava ena hereva momokani na koikoi gauna ai e halaoa, bona idia ese Ia ese e kara gaudia e tomadiho henidiamu bona isiaidia e lao henimu, a dia ikararana tauna, daika be bae hanamo a hanaihanai. Amen. ²⁶Una dainai, Dirava ese e tudia nege tauanidia asie matauraimu karadia mirodia lalodiai, badina edia hahine ese hahine ena kara korikorina eha-idauamu sibodia e hegahusi hehenimu. ²⁷Tatau danu, hahine ihenina karana korikori eha idauamu, tau sibodia ta ta e hegahusi hehenimu. Tatau na sibodia e hegahusi hehenimu bona asie hemaraimu kara readia na sibodia tauanidiai eabimu. ²⁸Badina Dirava ilalohadaina na asie uralaiamu, Dirava ese e tudia nege edia lalohadai uradia ba gava, namo karadia amo. ²⁹Idia na ini gau ese vada e hahonudia, kara gagevadia, kara dikadia, mata ganigani, bona vagege. Idia na mama, ala-ala, hepapa ahuhau, koikoi, bona ura dikadia ese e hahonudia. Idia na hevaseha koikoi, ³⁰habade koikoi, Dirava e inai heniamu, ere dagedage, hekokoroku, heagi-heagi, kara dika mo e uramu ba havara; sina bona tama asie kamoni henidiamu. ³¹Idia na asi daradia, asi edia kamoni, asi kudoudia, bona asi edia hebogahisi taudia. ³²Idia na mai dibadia Dirava ena gwauhamata maorona, daika ini e kara tomamu tauna na do baine mase. A dia ini kara ikaradia ai mo, a haida ini bae kara toma taudia danu e abidiadaemu.

2 ²To ta dibamu unu e kara tomamu taudia na Dirava ese davadia baine henidia mai maoromaorona ida.

3

¹Bena ena namo be dahaka Iuda tauna enai? Eiava ena namo be dahaka Peritome ai? ²Ia na bada herea dala iboudiai lalodiai. Badina be ginigunana, Dirava ese ena hereva Iuda taudia ediai eatoava. ³To dahaka dainai bema Iuda taudia haida ediai kamoni na lasi? Una be asi edia kamoni dainai Dirava ena hahemomokani danu lasi a? ⁴Dia unuheto. Dirava be momokani, hegeregere ena be taunimanima iboudiai na e koikoimu. Buka ai e torea hegeregere, "Unu amo emu hereva iboudiai bae momokani, bona bae hahemaoro henimu negani ba kwalimu." ⁵To bema eda kara dika ese Dirava ena kara maoromaoro baine hahedinarai negani ai, ede baita gwau toma? Dirava ese baine badu henida ia na baine kerere a? (Lau ese taunimanima edia hereva kava mo na gwauraimu.) ⁶Lasi dia unuheto! Unu bema heto Dirava ese tanobada ede bema hahemaoro henia toma? ⁷To bema egu koikoi ese Dirava ena momokani bona hairai bema habada, dahaka dainai egu kara dika davana bema henigu? ⁸Ai na asi ato, haida ese e habadelaimai koikoimu, e tomamu ai na unu agwau toma "dika baita kara, namo bainema"? edia hahemaoro na latadiai. ⁹O edeheto? ai be aha-hekoramu a? Lasi ona lasi vaitani. Badina ai na Iuda bona Helene taudia vada aha-hebadelaidia edia kara dika tamona lalonai. ¹⁰Buka Helaga ai e torea hegeregere, ta dia namo, ta lasi. ¹¹Laloparara tauna ta lasi. Dirava itahuna tauna ta lasi. ¹²Iboudiai vada e raka oho. Iboudiai asi edia gaukara. Kara namo tauna ta lasi - tamona danu lasi. ¹³Gadodia na gara ehekehomu na heto. Maladia danu e koikoimu. Mase muramurana na hekori gaigai ese bibinadia henudia eatoa. ¹⁴Ududia na heudugurai bona dagedage ai e honumu. ¹⁵Aedia e heaumu rara ihahebubuna totona. ¹⁶Hahebua bona hisihisi na edia dala ai mimia. ¹⁷Ina taunimanima na maino dalana na asi dibadia. ¹⁸Dirava gari asie garimu. ¹⁹Hari ta dibamu taravatu ai egwauraimu herevadia iboudiai ese taravatu henunai e nohomu taudia e gwaurai henidiamu, udu iboudiai bae hekou, bona tanobada idoinai Dirava ese baine hahemaoro henia. ²⁰Badina tau ta basine maoro taravatu ibadinana dainai. Badina taravatu ena amo kara dika e varamu. ²¹Harihari dia taravatu amo Dirava ena kara maoromaoro eme hedinarai. A taravatu bona peroveta ese vada e hamomokania dalani, ²²unu hetomana, Dirava ena ena kara maoromaoro na Iesu Keriso e abidadama heniamu taudia iboudiai ese bae davaria. Badina ta dia idau. ²³Badina be iboudiai vada e kara dika bona Dirava hairaina vada e reaia, ²⁴to ena hariharibada dainai maorodia e gwauraimu Keriso Iesu ena hahemaori bagunai. ²⁵Badina Dirava ese Keriso Iesu eabia hidi herohe-maino gaunai e halaoa rarana bae abidadama henia taudia edia. Unu amo ena kara maoromaoro, vada eme hedinarai badina be kara dika gunadia vada eme hegwaui tao. ²⁶Dirava ena haheauka dainai. Ena kara maoromaoro na ina negani ai vada eme hedinarai sibona vada eme maoromaoro bona Iesu e abidadama heniamu tauna maorona e gwauraimu. ²⁷Bena heagi na edesenai ai? vada eme hegwaui tao. Edena taravatu

bona edena kara ese egwaua tao? Lasi, abidadama ese egwaua taomu. ²⁸Ita ta tomamu tau ta maorona e gwauraimu be dia taravatu ibadinana dainai, abidadama dainai. ²⁹Eiava Dirava be Iuda taudia mo edia Dirava? Ia na dia bese idau dau edia Dirava a? Lasi, ia na idau bese taudia edia Dirava danu. ³⁰Benaini, Dirava na tamona, Ia ese e peritome dia bona asie peritome dia taudia edia abidadama dainai maorodia bae gwaurai. ³¹Ita be abidadama dainai taravatu ta negeamu a? Lasi ona lasi vaitani! ita ese taravatu ta dogoatao tarika-tarikamu.

4

¹Seneda Aberahamo na ede baita herevalaia toma, Ia ese dahaka gau e davari? ²Bema Aberahamo na ena kara dainai maorona bema gwaurai, ia na bema heagi, to dia Dirava vairanai. ³Badina buka helaga be dahaka e tomamu? "A Aberahamo ese Dirava e abidadama henia dainai maorona e gwaurai." ⁴Hari gaukara tauna ese davana eabiamu, dia harihari gauna, a davana korikori. ⁵A se gaukaramu to kara dika taudia na kara maoromaoro taudia ai e halaodiamu, Diravana e abidadama heniamu tauna, ia ena abidadama dainai maorona e gwauraiamu. ⁶Davida ese danu vada e hanamoa Dirava ese ena kara se duhaimu to maorona e gwauraimu tauna. ⁷Eto, "Edia kara rea e gwau taomu bona e lao ahumu taudia be nanamo. ⁸Lohiabada ese dikana se gwauraiamu tauna hari namo." ⁹Ina hahenamo be e peritome taudia sibodia ese mo bae abia, eiava se peritome dia taudia danu? Badina ta tomamu, "Abidadama dainai Aberahamo na maorona e gwaurai. ¹⁰To edena negai? Ina be Aberahamo e peritomea lalonai, eiava do se peritomea neganai? Dia peritome lalonai, a se peritomea lalonai. ¹¹Aberahamo ese peritome toana eabia. Do se peritomea neganai gabeamo e peritomea ena abidadama maoromaoro toana. Una dainai ia na asie peritomea to mai edia abidadama taudia tamadia maorodia e gwauraimu. ¹²Una anina Aberahamo na dia e peritomea taudia mo tamadia, to edia abidadama seneda Aberahamo ena abidadama do se peritomea negana ai e tohotohoamu taudia danu. ¹³Badina gwauhamata na Aberahamo e henia ia garana ida tanobada idoinai bae abia taravatu dainai se henia to ena abidadama amo e varava kara maoromaoro dia daidiai e henia. ¹⁴Badina be taravatu ibadinana taudia na dihina ai bema halaodia, abidadama bona asi anina, taravatu danu asi anina. ¹⁵Taravatu ese badu e havaraiaimu, badina be bema taravatu lasi, itata-utuna danu lasi. ¹⁶Benaini abidadama dainai e abiamu harihari gauna na heto dia taravatu ibadinana taudia mo a Aberahamo ena abidadama e toho-tohoamu taudia iboudiai danu. Ia na ita iboudai tamada, ¹⁷buka ai e torea hegeregerena, "Lau ese bese logora tamadia ai baina halaomu." Aberahamo ese e abidadama henia, Diravana, mase taudia e hamauridiamu bona do asi e vara gaudia e havaradiamu. ¹⁸Eda helaro na abidadama dainai e helarova, ia bese logora tamadia ai ela, e hamaoroa hegeregerena ai, "garamu na unu ba hoho toma." ¹⁹Ena abidadama na se manokava, ena be tauanina e haeroava mase tauna na heto (badina laganina na sinahu ta sisivana) - bona Sarah danu mase hahinena na heto. ²⁰To badina Dirava ena gwauhamata, Aberahamo ese laloa taova dainai ena abidadama ai e goada bona Dirava e heatolaia. ²¹Ia na diba goevagoeva Dirava ena gwauhamata baine hamomokania. ²²Una dainai maorona e gwaurai. ²³Dia ia mo sibona herevana unu se torea toma. ²⁴A ita danu, Iesu eda Lohiabada, mase amo e hatorea isi Diravana ta abidadama heniamu tauda, maoroda e gwaurai. ²⁵Ia taona e torea, iseda kara dika daidiai mase amo e tore isi, maoroda baine gwaurai helaoreana.

⁵¹Eda abidadama dainai, maoroda vada egwaurai Dirava ida ta maino Iesu Keriso iseda Lohiabada lalonai. ²Ia bagunai ita danu ta noholaiamu lalonai ta ginimu, bona mai moaleda ida Dirava hairaina ta laroamu. ³Dia una mo, to dounu ta moalemu eda hisihisi lalodia ai. Ta dibamu danu una hisihisi ese haheauka ehavaraiaimu. ⁴To haheauka ese namo/gaukara ehavaraiaimu bona namo/gaukara ese helaro ehavaraiaimu, ⁵bona una helaro na dia badu badina Dirava ena lalokau honuhonu daena Lauma Helaga ena amo vada ehenida. ⁶Badina be ita ta manokava, negana ai Keriso e mase e hihi-raiava taudia daidia ai. ⁷Ta baine mase kara maoro tauna dainai. Readia tata mo unu bae kara toma. ⁸A Dirava sibona ese ena lalokau ita edai ehahedinaraia, badina ita na dounu ta kara dikava dainai, Keriso na ita daidai e mase. ⁹Iesu rarana dainai ita na maoroda egwauraimu, Ia ese Dirava ena badu amo baine hamaurida. ¹⁰Gunàguna ta inai heniva negana ai, Dirava ida ta herohehaino Ia natuna bagunai, harihari vada ta herohehaino vaitani negana ai, mauri baita abia iena mauri bagunai. ¹¹A dia una mo, ta moalemu Dirava lalonai eda Lohiabada Iesu Keriso bagunai herohehaino vada tame abia. ¹²Una dainai tau ta dainai dika tanobada ai e vareai, bona dika ese mase evareailaia, bona mase ese taunimanima iboudiai e butudia tao, badina be iboudiai mai edia kara dika. ¹³Badina be kara dika vada e vara guna tanobada ai, taravatu be gabeamo; asi taravatu kara dika asie hahemaoro heniva. ¹⁴Mase vada e kwalimuva, Adam negana amo ema bona Mose negana ai, ena be haida ese Adamu ena kara dika asie tohotohoa, to e mase. Adamu ese bainema tauna ehahedinaraia guna. ¹⁵A kara dika na idau, hariharibada danu idau. Badina be tau ta ena kara dika dainai hutuma e mase; a harihari, Dirava ena hariharibada dainai, bona ena hariharibada ese ehavaraia herahiana, Iesu Keriso, dainai, hutuma eme mauri. ¹⁶Tau tamona ena kara dika be idau, hariharibada be idau; badina be tau tamona dainai hahemaoro ese hahedika egwaurai, a hariharibada ese kara dika taudia hutuma maorodia egwaurai. ¹⁷Tau tamona ena kara dika dainai mase vada e kwalimu; unu hetomana, hariharibada bona kara maoromaoro eabimu taudia na bae kwalimu bona bae mauri, tau tamona, Iesu Keriso dainai. ¹⁸Bona tau tamona ena kara dika dainai hahemaoro ese iboudiai e hadikadia; unu hetomana, tau tamona ena kara maoro-maoro dainai taunimani a iboudiai maorodia egwauraimu, vada bae mauri. ¹⁹Bona tau tamona ena gwau ede-ede dainai hutuma na dika taudia ai e halaodiava; unu hetomana, tau tamona ena kamoni dainai hutuma na kara maoro-maoro taudia ai halaodiamu. ²⁰Taravatu e gini, bona hekwarahi vada e vara badabada. A kara dika e badamu gabudia ai, hariharibada na e honuhonu daemu. ²¹Kara dika e kwalimuva, mase e

havaraiava; unu hetomana kara maoromaoro dainai hariharibada e kwalimumu, Mauri hanaihanai ehavaraiamu, Iesu Keriso iseda Lohiabada bagunai.

6

¹Dahaka baita tomamu? Kara dika dia ma baita kara loulou hariharibada ihavarana helaoreana a? ²Lasi vaitani. Ita ese kara dika vada ta mase-tania, dahaka dainai lalonai dounu baita noho? ³Asi dibamui Keriso Iesu lalonai e bapatisoda tauda na ena mase ai vada e bapatisoda? ⁴Bapatiso ai Ia ida ta mase bona Ia ida e gurida. Ini e vara toma badina Keriso na tamana hairaina ai e toreisi lou hegeregerena, ita danu mauri matamatana lalonai baita raka. ⁵Badina be Ia ida ta mase hebou, Ia ida danu ta toreisi lou. ⁶Dibada, ita tauanida gunadia na Ia ida satauro ai e mase kara dika iha-orena. Unu e vara toma dainai ita na kara dika isiaina ma basita lao heni lou. ⁷Mase tauna na kara dika ena amo vada e roho mauri. ⁸To bema ita na Keriso ida ta mase hebou, ta dibadamu Ia ida danu ta mauri hebou. ⁹Dibada Keriso na mase amo vada e toreisi dainai, Ia na basine mase lou; mase na asi siahuna Ia enai. ¹⁰Badina be e mase neganai Ia na kara dika enai e mase vaitani, e maurimu be Dirava enai e maurimu. ¹¹Unu hetomana, umui danu sibomui unu na bahelalolai kara dika enai vada omase, Dirava enai vada omauri, Keriso Iesu eda Lohiabada lalonai. ¹²Kara dika ese tauanimui basine lohiadia; ena hekise-hekise basio kamoni henia. ¹³Tauanimui regedia na kara dika basio henia, isiaina basio lao heni. A tauanimui na Dirava bahenia, kara maoromaoro ikarana gaudia ai baela. ¹⁴Kara dika ese basine lohiamui. badina be taravatu henunai asio nohomu, a hariharibada henunai enohomu. ¹⁵Ede heto? Ita be baita kara dika badina taravatu henunai asita nohomu, to hariharibada henunai a? Lasi ona lasi vaitani. ¹⁶Asi dibamui erena o kamonaimu tauna ena hesiai ai baola, o kamoni heniamu dainai? Kara dika isiaina balao heni, mase bavabia, eiava kamoni korikori isiaina balao heni, kara maoromaoro bavabia. ¹⁷Dirava baita hanamoa! badina be gunaguna kara dika isiaina o lao heniva, a harihari ahadibamuiva herevana vada o kamoni mai daramui ida. ¹⁸Kara dika amo vada e ruhamui nege, kara maoromaoro enai vada e guimui kau. ¹⁹Na herevamu taunimanima edia hereva kava hegeregeregia ai na gwauraimu, tauanimui edia manoka-manoka dainai. Badina gunaguna tauanimui regedia ese kara dika bona lebulebu isiadia e lao heniva hegeregeregia, harihari tauanimui regedia ba heni, kara maoro-maoro isiaina ilao henina ai bae helaga. ²⁰Kara dika isiaina o lao heniva negana ai, umui na kara maoro-maoro enai o heruha negeva. ²¹Una negana ai, harihari o hemarailaimu karadia o karava negadiai anidia be dahaka emui ai? Unu gau dokodia na mase. ²²A harihari kara dika amo vada o heruha nege Dirava ena hesiai ai vada ola, anina emui ai be vada o helaga, bona dokona be mauri hanaihanai. ²³Badina be kara dika davana be mase; a Dirava ena harihari gauna na mauri hanaihanai, Keriso Iesu eda Lohiabada bagunai.

7

¹Tadikakagu e, (taravatu mai dibamui taumui na hereva henimuimu), taravatu ese taunimanima e lohiamui edia mauri iboudiai lalodiai ani? ²Badina headava hahinena na taravatu dainai adavana enai baine tao, to bema adavana baine mase neganai, ia na asi taravatuna. ³Unuhetomana, adavana maurinai, tau ta ma baine abia, ia na heuda-hanai hahinena. To bema adavana baine mase, ia na asi taravatuna tau ta ma baine adavaia, una na dia heuda-hanai. ⁴Una dainai, tadikakagu e, umui danu Keriso tau-anina bagunai taravatu enai vada o mase. Unuhetomana tadikakagu e, mase amo e toreisi tauna ese baine abimui, huahudadia Dirava enai bae dobi helaoreana. ⁵Badina be ita ese tau-anina ta badinaiva neganai, kara dika ena laloani taravatuna ena amo e varava bona tauda regedia lalodiai e vareaiva, bona huahuada mase enai e dobiva. ⁶A harihari taravatu ese vada e kahuda nege. E dogoda taova gauna enai vada ta mase na heto. Unuhetomana harihari eda hesiai ilao-henina na lauma dainai, dia nega gunadia ai e tore herevadialadiai. ⁷Dahaka ma baita gwaurai? Taravatu be dika a? Lasi vaitani. Ede heto, taravatu basinema hadibagu, lalogu basinema parara kara dika be dahaka. Bona lalogu na basinema parara hekise hekise be dahaka taravatu basinema haduagu, "Basio hekise-hekise." ⁸A taravatu ena hahedua dainai dika ese hekise-hekise idau-idau lalogu ai e havara. Badina be taravatu bema lasi, dika bema mase. ⁹A gunaguna lau na taravatu murimurinai na mauriva, a dika egu ai e kau neganai, dika e vara lou, ¹⁰bona na mase. Taravatu na mauri gauna e tomamu lau egu ai na mase gauna ai ela. ¹¹Badina be dika ese e haganigu amo e koigu. Hahegani ena amo e alagu mase. ¹²Una dainai taravatu na helaga, bona hahegani danu helaga, bona maoromaoro bona namo. ¹³Matona gau namona na mase gauna egu ai e laomu a? Lasi vaitani. A dika, ena dika baine hedinarai totona gau namona, na mase gaunai egu ai e halaoa. Ina na hahegani ena amo, kara dika toana baine hedinarai ia na dika vaitani. ¹⁴Dibada taravatu na lauma ena, a lau be tau-anina ena. Kara dika ese vada e hoigu ena hesiai ai vada e halaogu. ¹⁵Lau na karamu, karadia na asi dibagu. Badina be na ura henimu karadia na asina karamu, bona na inai henimu karadia na karamu. ¹⁶A asina ura heniamu karana na karaianu negana ai, lau ese taravatu na maorona na gwauraiamu. ¹⁷A harihari ikarana na dia lau, a dika lau lalogu ai e nohomu. ¹⁸Lau dibagu, lau na asi egu namo, tau-anigu ai. Badina be lalogu ese kara namo e ura heniamu, to ikarana asina hegergere. ¹⁹Na ura heniamu karana namona na asina karaianu, a asina ura heniamu karana dikana be na karaianu. ²⁰Hari asina na ura heniamu karana na karaianu, to ikarana na dia lau, a dika lalogu ai e nohomu hari. ²¹Ta davaria, vada na lalo kara namo baina karaia na tomu, to dika na egu ai e miamu. ²²Badina be lalogu ese Dirava ena taravatu e moalelaiamu. ²³A tau-anigu ai taravatu idauna na itaiamu. ia be lalogu ena taravatu e tuari heniamu. Bona e guigumu kara dika taravatuna ena tau-anigu lalonai e nohomu. ²⁴Lau madi ihabaigu! Daika ese ina tau-anigu masena amo baine hamaurigu? ²⁵A Dirava na hanamoamu Iesu Keriso eda Lohiabada lalonai! Benaini, lalogu ese Dirava ena taravatu e badinaiamu. Ede heto, tau-anigu ese kara dika taravatuna e badinaiamu.

¹Una dainai, harihari Keriso Iesu e badinaiamu taudia na dikadia basie gwaurai. ²Badina be mauri Laumana taravatuna Keriso Iesu lalonai ese vada e ruhamui nege, kara dika bona mase taravatuna amo. ³Badina be tauani ena manoka dainai, taravatu na asi siahuna ikarana, Dirava ese vada e karaia, Ia ese sibona Natuna vada e siaia, dika tauanina eabia, dika kwaranai ela, bona Ia ese tauani dikana vada e hadarerea. ⁴Ia ini e kara toma badina be taravatu ena kara maoromaoro ita edai na baine guguru, ita dia tauani ena kara ta karamu, to Lauma ena kara ta karamu tauda edai. ⁵Badina be tauani ena kara ekaramu taudia na Lauma gaudia mo elalomu. ⁶Badina tauani ilalona be mase; to Lauma ilalona be mauri bona maino. ⁷Una dainai, tauani ilalona na Dirava e inai heniamu, badina ina na Dirava ena taravatu se badinaiamu bona se dibaiaimu dainai. ⁸To tauani ai e maurimu taudia ese Dirava na basie hamoalea dibamu. ⁹Vadaeni, umui na dia tauani lalonai to Laumai lalonai, bema momokani Dirava Laumana na lalomui ai enohomu. To bema ta ese Keriso Laumana seabia daemu, ia na dia Keriso ena. ¹⁰To bema Keriso na lalomui ai, tauani na mase kara dika dainai, to Lauma na mauri kara maoromaoro dainai. ¹¹Bema momokani Dirava Laumana ese Iesu mase amo e hatorea isi na lalomui ai enohomu, Keriso Iesu mase amo e hatorea isi Diravana ese danu tauanimui baine hamauridia, Laumana lalomui ai enohomu dainai. ¹²Una dainai, varavaragu, eda imadoa na dia tauani enai, a tauani ena kara ikaranai. ¹³Badina bema tauani ena kara ba karaia, oi na vada bamase, to bema Lauma ena amo, tauani karadia vada o hamasedia, oi na ba mauri. ¹⁴Badina be Dirava Laumana ese e hakauidiamu taudia iboudiai na Dirava natudia. ¹⁵Badina be umui ese vada oabia laumana na dia ihametaumui bena umui na gari ai ba mauri lou, to heabidae Laumana vada oabia, unu amo ta taimu, "Abba e! Tamamai e!" ¹⁶Lauma sibona ese ita laumada ida e gwau boumu, ita na Dirava natuna. ¹⁷Bona bema ita na Ia natuna neganai, ita na Ia dihina danu, Dirava dihina. Bona ita na Dirava dihina Keriso ida, bema ita na momokani ai Ia ida baita hisihisi hebou bena unu amo ita danu Ia ida hairaida baita abia hebou. ¹⁸Lau na gwaumu, ina nega hisihisi dia na dia hegeregere, una vairai edai be hedinaraimu hairaina enai. ¹⁹Badina be e kara gaudia iboudiai edia helaro be Dirava natuna bae hedinarai mo e nariamui. ²⁰E kara gaudia iboudiai na mase henunai e atodia, dia edia ura dainai, a eatodia tauna ese ekaraia, helaro ta dainai. ²¹Ekara gaudia sibodia danu mase iguina amo bae ruhada nege, bona bae mailaidia Dirava natudia edia heruha nege hairaina lalonai. ²²Vada mai dibada, ekaradia gaudia iboudiai na e ganaganamu bona e hisihisi boumu, mara hisihisi na heto, ema bona ina nega. ²³Dia una mo sibona, to enabe ita ese Lauma natuna roboana vada ta abia, ita siboda danu doini lalodai ta ganganamu, iabidaeda bona tauanida ihamaurina narina ta nariamui. ²⁴Ina helaro ta lalonai ita vada e hamaurida. Ta laroamu gauna ta itaiamu, ina na dia helaro. Daika ese e itaiamu gauna baine laroa? ²⁵To bema ita na mai eda helaro ta asi taitaiamu gauna enai, ita na baita nari mai haheaukada ida. ²⁶To unu hetomana danu, Lauma ese eda manoka-manoka danu e durudamu. Badina be ita na guriguri maorodia asi dibada, to Lauma sibona ese ita daidai e gurigurimu mai ganagana badana ida. ²⁷To taunimanima lalodia etahudiamu Diravana na Lauma ena ura na dibada, badina be Lauma na helaga taudia daidiai e gurigurimu Dirava ena ura dalanai. ²⁸Badina dibada, Dirava ese gau iboudiai e gaukaralai heboumu, e lalokau heniamu taudia bona ena abihidi taudia ihanamodia. ²⁹Badina be e dibadia guna taudia, Ia ese danu eabidia hidi guna Natuna oromanai baela, unu amo Ia na vara roboana bagwaurai tadikakana momo padadai. ³⁰Bona Ia ese eabidia hidi guna taudia, Ia ese danu e boiridia. Bona e boiridia taudia, Iese danu maorodia e gwaurai. Bona maorodia e gwaurai taudia, Ia ese danu hairaidia e gwaurai. ³¹Ita be dahaka baita herevalai ini gau daidiai? Bema Dirava na ita ida, daika ese ita baine halo he ida? ³²Ia ese natuna vara edeana serua, to ita iboudai daidai e kahua nege, dahaka dainai ia ese danu gau iboudiai basine henida kava a? ³³Daika ese Dirava ena abihidi taudia baine hahebade laidia? Dirava sibona ese ahemaoro ekaraiamu. ³⁴Daika ese ita dikada baine gwaurai? Keriso Iesu na e mase tauna - to una latanai, ma e toreisi lou - bona Ia na Dirava idibanai kahanai enohomu, bona ita daidai e noinoimu danu. ³⁵Daika ese Keriso ena lalokau amo baine bibida-oho? Nega aukadia, eiava lalo hisihisi, eiava dagedage, eiava doe, eiava ogogami, eiava mase, eiava dare ese a? ³⁶Vada e torea hegeregere, "Oi daimuai, ai na dina ibounai e alamaimu. Ai na vada egwauraimai e aladiamu mamoe dia na heto." ³⁷To ini gau iboudiai lalodiai, ita na vada ta kwalimu vaitani, e lalokau henidamu tauna bagunai. ³⁸Badina be lau vada na diba vaitani, dia mase eiava mauri, eiava aneru, eiava tanobada lohiadia, eiava ini nega gaudia, eiava do sevara gaudia, eiava siahua gaudia, ³⁹eiava atai gaudia, eiava dobu gaudia, eiava e kara gauna ta ese Dirava ena lalokau, Keriso Iesu eda Lohiabada lalona, amo baine bibida oho diba.

¹Lau na Keriso lalonai, na hereva momokanimu. Lau na asina koikoimu bona Lauma Helaga danu dibana lalogu aheaukana na e tomamu, ²ena be egu lalohisi na bada herea bona seoremu hisihisina na kudougu ai. ³Badina lau nauramu sibogu dikagu bema gwaurai bona Keriso ena amo bema bibigu oho tadikakagu, daidiai unu lau egu tauanina besena taudia. ⁴Idia na Isaraela. Idia na heubu, bona hairai, bona herohemaino, bona taravatu hariharina, bona Dirava itomadiho henina, bona gwauhamata. ⁵Tubu tama danu idia mo edia idia bogaragidiai Keriso na tauanina ai e vara-ia daika be Dirava gau iboudiai daediai. Ia bae hanamoa hanaihanai. Amen. ⁶A basitato Dirava ena gwauhamata na vada e moru. Badina taunimanima iboudiai na dia Isaraela daika na Isaraela korikori. ⁷Eiava Aberahamo ena amo evara taudia iboudiai na momokani ia natuna. A "maoromaoro Isaako ena amo oi garamu do bae boiridia." ⁸Una dainai, tauanina ena amo evara maragidia na dia Dirava natuna. A gwauhamata maragidia mo ia garana baine halaodia. ⁹Badina ina na gwauhamata herevana. "Lagani vairai lau na baina vasi, bona mero ta na Sara baina henia." ¹⁰Dia una mo, A gabeai Rebeka danu tau tamona, ese e harogorogoa ai tamamai Isaac - ¹¹A maragidia do sevara ai bona gau namona eiava dikana

ta do se karaia ini heto Dirava ena ura na ena heabihidi helagana ai vada egini, ¹²dia una kara daidiai, A badina ia be daika e boiria - ia ese e hamaoroa, "tau roboana ese tau muritai isiaina baine lao heni." ¹³E torea hegeregerena! "Iakobo na lalokau henimumu, A Esau inai henimumu." ¹⁴Dahaka baita gwaurai? Dirava asi ena kara maoromaoro a? Lasi vaitani. ¹⁵Badina ia ese Mose e hamaoroa eto "lau na bogalaidiamu taudia na bogalaidiamu, bona Lau na bogadia hisimu taudia na bogadia hisimu." ¹⁶Una dainai tau ta ena ura, na hereva, eiava tau ta ena heau na herevana. Badina Dirava, ena hebogahisi e hahedinarai. ¹⁷Badina be revareva helagana ai Parao e hamaoroa eto, "Ina mo dainai Lau ese na hatubumu, una dainai egu siahui oi lalomu ai, baina hahedinarai, bona tanobada idoinai lau ladagu harina bae haripua." ¹⁸Una dainai, Dirava ena ura hegeregerena haida e bogadia hisi, A ma haida lalodia e ha-aukadia. ¹⁹Oi ese ma ba hamaorogu, "Dahaka dainai ia doini kerere e davarimu? Badina ena ura na asine lalo-pararalaimu. ²⁰Latanai ihamomokanina, tau, oi be daika Dirava ena hereva ogwaua tubumu? E karaia gauna ese ikarana tauna baine nanadaia, baineto "Dahaka dainai ini o karagu toma?" ²¹Uro ikarana tauna asi ena maoro raro amo tabe hegeregerena baine karaia gau namodia igaukaralaidia bona haida na daba ai ba gaukaralai?" ²²A dahaka bema Dirava, na euramu ena badu bona siahui baine hahedinarai, hisihisi mai haheauka badana ida badu gaudia na hegaegae baine ha-oredia? ²³Dahaka bema ena hahegai ai baine kara ena goada ena taga mai hairai badana baine hahedinarai hebogahisi gaudia ediai, ia ese guna hegaegaea hairaina? ²⁴bona dahaka bema ia ese ita daidai baine karaia, daidia ia ese eboiridia, dia Iudea taudia mo bogaragi amo, A bese idaidau taumui danu?" ²⁵Ia danu Peroveta tauna Hosea ena toretore lalonai eto. "Lau ese egu bese baina boiridia daika be dia lau egu bese, bona davana e lalokau henia daika be dia ia ena lalokau. ²⁶Egwau henidia eto umui na dia lau egu bese taumui, "gabuna ai mauri Diravana," natuna bae gwauraidia. ²⁷A Isaia danu eto "Ena be Isaraela garana ba hutuma kone mirina na heto, to kwabu-kwabudia mo bae mauri. ²⁸Badina be Lohiabada ese ena hereva tanobada ai, baine hagugurua bona basie halahe." ²⁹Isaia ese e herevalaia guna, eto "Bema Iehova Sabaota ese bese kwabu-kwabudia basinema hanohodia, ita na Sodoma bona ita na Gomora" hegeregeredia ai tama lao. ³⁰Dahaka baitato? bese idaidau taudia daidia bae kara maoromaoro, asie gavaiamu to kara maoromaoro eabimu, A kara maoromaoro na abidadama dainai. ³¹A Isaraela, daidia be kara maoromaoro, taravatuna e tahua. A taravatu lalonai na asie davarai? ³²Dahaka dainai? Badina idia ese abidadama, anina se tahua. A gaukarana ikarana mo, idia na ehkwakwanai nadina ai e hekhwakwanai, ³³Buka helaga ai e torea hegeregerena eto, "Aitaia, lau na Siona lalonai na hetutuhi bona na hekhwakwanai. Nadina na atoamu mai ena abidadama tauna na basine hemarai."

10

¹Varavaragu e, lalogu ena ura bona egu noinoi Dirava enai idia na bae mauri. ²Badina lau dibagu idia ese Dirava e ura heniamu, to lalodia asie pararamu. ³Badina be Dirava ena kara maoromaoro asi dibadia, sibodia edia kara maoromaoro e goadalaiamu. A Dirava ena kara maoromaoro asie badinaiamu. ⁴Badina Keriso na taravatu ihaguguruna bae abidadama henia taudiai iboudiai maorodia bae gwaurai ia bagunai. ⁵Badina Mose ese e torea kara maoromaoro na taravatu ena amo ema. E karamu taudia na unu gau daidiai do bae mauri. ⁶A kara maoromaoro ena heabidadama na ini e gwau tomamu, "Lalomu ai basioto, "Daika baine dae gubai?" (bena Keriso baine diholai); ⁷bona basioto, daika guba do bunai baine diho)" (bena Keriso mase taudia edia amo baine mailaia). ⁸To dahaka e tomu?. "Hereva na dekemui ai, udumui ai bona lalomui ai." Una na abidadama herevana ai ese a harorolaiamu. ⁹A udumui ai Iesu Lohiabada ba gwaurai, bona lalomui ai bavabia dae Dirava ese mase amo e hatorea isi, umui ba mauri. ¹⁰Badina be lalo ena heabidadama amo kara maoromaoro e varamu, bona udu ena hegaurai amo mauri e varamu. ¹¹Badina be buka ai e tomamu, "Ia bae abidadama henia taudia iboudiai na basie hemarai. ¹²Badina be Iudea tauna bona Helene tauna na asi edia idau. Badina iboudiai edia Lohiabada na tamona bona e hahaneamu taudia iboudiai na e harihari henidiamu. ¹³Bona Lohiabada e hahaneamu taudia iboudiai na bae mauri. ¹⁴Ede heto se hahaneamu taudia ese bae abiabiraia? bona ede bae abiabiraia toma asie kamonaumu. ¹⁵bona ede bae haroro toma, bema bae siaidia? - Buka ai e torea hegeregerena e tomamu, "Sivarai namo e harorolaiamu taudia aedia dahaka namo! ¹⁶A haida ese sivarai namo asie abiadaemu! Badina Isaia eto, "Lohiabada e, daika ese emai hereva vada e abiadae?" ¹⁷Heabidadama badina be kamonaui, bona kamonaui badina be Iesu Keriso ena hereva. ¹⁸A lau tomamu idia na asie kamonaui a? Lasi, e kamonaui. Eredia na tanobada hegegemaai ai e hapiua, bona edia hereva na tanobada dokodia ela. ¹⁹Ma na tomamu, Isaraela asi dibadia a? Matamana ai Mose eto, "Lau ese asi besedia taudia edia emu vagege baina havaraia bona lalo duhu besena enai emu badu baina havaraia. ²⁰Bona Isaia e hereva goadagoada eto, "Asie tahugu taudia ese e davarigu, bona asie nanadaigu taudia ediai na hedinarai." ²¹A ia ese Isaraela e herevalaia eto, dina idoinai gwau ede-edu bona gwau tubu besena imagu na pala henidia."

11

¹Ma na gwaumu, Dirava ese ena taunimanimu e negedia a? Lasi vaitani. Badina lau danu Isaraela taugu, Aberahamo garana, Beniamena ena iduhu taugu. ²Dirava ese ena taunimanimu na se negedia, e dibadia guna dainai. Eiava umui be asi dibamui buka helaga ai Elia be ede e herevalaia toma, ia ese Isaraela taudia e habadelaidia Dirava enai? eto. ³"Lohiabada e, idia ese emu peroveta taudia vada e aladia, emu pata helagadia vada e gigi rohoroho. Lau mo sibogu noho, bona lau danu e tahugumu." ⁴To Dirava ena haere be dahaka eto? "Lau egu taunimanimu na daha hitu Baal asie toma henia dihomu." ⁵Benaini, ina harihari danu taunimanimu kwabu-kwabu dia mo nonoho badina hariharibada ese vada eabidia hidi. ⁶A bema hariharibada dainai, gaukara na lasi. Bema lasi hariharibada na asi anina. ⁷Ma dahaka? Isaraela ese e tahuava gauna, do asie davarai, a abi hidi taudia ese vada e davarai. Oredia be lalodia e ha-auka. ⁸Vada e torea: "Dirava

ese mahuta laumana e henidia, matadia ai basie eita, bona taiadia ai basie kamoni, ema bona ina harihari.⁹Bena Davida eto, "Edia pata na idoa bona rikiriki, hekwakwahanai gauna bona ahudia.¹⁰Matadia bae vabura bona basie roharoha bona dorudia bae kwaidu hanaihanai."¹¹Ma na tomamu, "Idia na e hekwakwanai bona vada e keto vaitani a?" Lasi ona lasi vaitani. To, edia keto dainai idau bese ese mauri vada e davaria, bona edia vagege vada e vara.¹²Gau tamona idia edia keto dainai tanobada bema taga, bona idia edia dabu dainai bese idau idau bema boga kunu, o edia honuhonu dae amo dahaka namona bema vara?¹³A harihari idau bese taumui, na hereva henimuimu badina be lau na apostolo taugu idau bese taumui, emui ai egu daga danu na heagilaia.¹⁴Readia baina badu mai vagegegu ida egu bese latadiai. Bena haida baita hamauridia.¹⁵A bema edia hedadarai anina ese herohemano bema havoraia ina tanobada ai, iabidaena ese be dahaka bema havoraia to mase amo mauri baine vara?¹⁶A bema anina roboana na helaga, taba danu. Bona bema ramu bema helaga, rigi danu.¹⁷A bema rigi haida bema kwaidu, bona oi, na vara kava olive na, bema hirimu kau idia lalodiai, bona idia ida olive ramuna bona todona boma abia hebou,¹⁸basio heagi rigi korikori daediai. To bema basio heagi, dia oi daimu ai ramu oduruamu, a ramu ese oi e durumu mu.¹⁹Bena baoto, "rigi e kwaidu oho lau bae hirigu kau helaorean."²⁰Una na momokani. Badina asi edia abidadama dainai e kwaidu oho, a oi hari o ginimu emu abidadama dainai. Sibomu ata ai basio heato, a ba gari.²¹Bema Dirava ese rigi korikori basine bogadia hisi, oi danu basine bogamu hisi.²²Ba itaia, danu, Dirava ena kara namodia bona lalo-auka idau taudia e keto ediai lalona e aukamu, to Dirava na oi e bogamu hisi, ena hebogahisi o badinai dainai. Bema lasi oi danu baine e utumu oho.²³Bona idia danu bema edia hedadarai bae rakatani, bae hiri kau lou. Badina Dirava na mai siahuna baine hiridia kau lou.²⁴Benaini oi na vara kava olivena ena amo e utumu oho, uma olivena enai e hirimu kau, idau bese be rigi korikori, edia olive korikorina ai basie hiri kau, vada bae hiri kau ani?²⁵Tadikakgu e, Lau na uramu ina hereva hehunina ba diba, sibomui emui aonega ba heagilaia na garina. Isaraela taudia haida lalodia do bae duhu, ela bona bese idau-idau taudia bae didi vareai guna.²⁶Bena Isararela taudia iboudiai do bae mauri, Buka ai e torea hegeregere: "Siona ena lalona amo hahemaui tauna baine vara. Ia ese Dirava idadaraina karadia Iakobo ena amo baine atodia tabe,"²⁷bona ina na egu gwauhamata ediai, "edia dika baina abi oho negana ai."²⁸Umui daimui ai idia ese sivarai namo e inai heniamu, a Dirava ese senedia e abidia hidi dainai e ura henidiamu.²⁹Badina be Dirava ena hariharibada bona ena abi-hidi na se idau.³⁰Gunaguna umui ese Dirava o gwau ede-edeheniava, to harihari hebogahisi vada o davaria idia edia gwau ede-edeheniava, bona ina dala tamona ai idau taudia na harihari e gwau ede-edemu. Umui emui hebogahisi dainai idia danu harihari hebogahisi do bae davaria.³²Badina be ita iboudai Dirava ese gwau ede-edeheniava amo vada e kouda ahu, baine bogadia hisi helaoreana.³³Dirava ena taga hereadaena amo ena aonega bona ena lalo-parara dahaka do! Ena hahemaoro na daika ese baine tahua diba, bona ena dala na daika ese baine davaria!³⁴Bona daika ese Lohiabada lalona baine dibaia bona baine sisiba heni?³⁵Eiava daika ese gau ta Dirava vada e heni, bona Dirava ese davana ma baine heni?³⁶Badina be gau iboudiai ihavaradia bona gau iboudiai badidia bona dokodia na ia mo. Ia mo baita imodaia hanaihanai. Amen.

12

¹Una dainai na noimuimu, varavaragu, Dirava ena hebogahisi amo, tauanimui ba heni boubou gaudia mauridia, helagadia, Dirava ese baine moalelai (abidiadae). Ina na emui hesiai gaukarana korikorina.²Ina tanobada oromana basio tohotohoa, a ba idau (hegiro) vaitani lalomui edia matamata amo. Ini ba kara toma amo, umui ese Dirava ena ura namona, bona hairaina (iabidaena), bona hereadaena ida vada ba dibaia momokani.³Badina be vada e henigu hariharibadana dainai, na hamaoromuimu, iboumui ai padamui ai haida basie lalohadaia sibodia hereadia bae gwaurai. Unu amo (instead), idia na bae lalohadaia namonamo, Dirava ese abidadama ahudia ta ta e henidia hegeregere.⁴Hegeregere ita regeda na momo tauani tamona ai, to dia rege iboudiai na gaukara tamona e karaiamu,⁵unu hetomana danu, enabe ita na momo ita na tauani tamona Keriso lalonai; bona ita ta ta na rege idau idau.⁶A ita na mai eda herahia idau idau dia vada e henida harihari-badana hegeregere.⁷Bema ta ena herahia na peroveta herevadia, vada baine karaia ena abidadama hegeregere.⁸Bema ta ena herahia na hesiai ilaohenina, vada hesiai baine laoheni. Bema ta na mai ena hahediba herahiana, vada baine hahediba.⁹Bona ta ena herahia na hahegoada (hahealo), ia na baine hahegoada (hahealo). Bema ta ena herahia na e henihenimu vada baine karaia mai ura badana ida. Bema ta ena herahia na heregu (hegunalai), vada baine karaia mai lalona ibounai ida. Bema ta ena herahia na hebogahisi, vada baine karaia mai moalena ida.¹⁰Lalokau ai basita koikoi, dika baita laloa nege; namo gaudia baita dogodia tao.¹¹Hetadikaka lalokauna dainai, ta ta ba heura heheni. Hemataurai dainai, ta ta ba hemataurai heheni.¹²Gaukara namonamo dainai, basio lahedo Lauma dainai ba urabada, Lohiabada dainai, ia isiaina ba lao heni;¹³Ba moale helaro momokani lalonai, hisihisi ai ba haheauka, guriguri ba goadalaia.¹⁴Helaga taudia edia dabu ai ba durudia (herahia henidia). Heabidae daladia momo ba karadia.¹⁵E dagedage henimuimu taudia ba hanamodia; ba hahenamo bona basio heudugurai.¹⁶E moalemu taudia ida ba moale.¹⁷Lalomui bae tamona dekemu taudia ediai. Heagi daladia ai basio lalohadaia. A manau taudia bavabidia dae. Sibomui aonegamui basio gwaurai.¹⁸Ta ena kara dika davana basio karaia. Kara namodia ba kara taunimanima iboudiai vairadiai.¹⁹Bema mai dalana, umui sibomui mo daimui ai, maino ai ba noho taunimanima iboudiai ida.²⁰Lalokau taumui, sibomui ese kara basio hadavaia, A Dirava ena badu dalana ba lailaia. Badina vada e torea eto, "Dava ihalouna na lau egu, lau ese davana baina heni," Lohiabada e gwaumu.²¹Bema inaimu na hitolo, ana ba heni. Bema ia na ranu e masea, ranu ba heni. Badina bema ini na kara toma, umui ese lahi gidadia na kwaranai ba gigikau."²²Dika ese basine hadareremu, a namo amo dika ba hadarerea.

13 ¹Taunimanimia iboudiai bae matauraidia, badina be siahu idoinai na Dirava ena amo e maimu. Unu lohia iboudia ai Dirava ese vada ehagini dia. ²Una dainai lohia e laoa-ahumu tauna ese Dirava ena hahegani egwaua tubumu; bona egwaua tubumu taudia ese davadia do bae ani. ³Badina be kara namo tauna na lohia garina se garimu, a kara dika tauna hari. Oi ouramu lohia garina basio gari a? ⁴Badina ia na Dirava ena hesiai tauna oi baine hanamomu. A kara dika boma kara, bima gari; badina ia ese dare seabia kavamu. Badina ia na Dirava ena hesiai tauna, kara dika tauna davana baine heni. ⁵Una dainai, ba matauraia, badina badu garina, a lalona dainai. ⁶Emui dainai, umui ese tax monidia ohenimu. Badina be idia na Dirava ena hesiai taudia, ina gaukara e karaiaimu. ⁷Iboudiai edia gau davadia baheni. Tax gogo tauna tax bahenia, heni tao tauna, heni tao bahenia; garina e garimu tauna ba henia, e matauriamu tauna bamatauraia. ⁸Tau ta enai basio ima doa, ba heura heheni. Badina be bamona e ura heniamu tauna ese taravatu idoinai vada e badinaiaimu. ⁹Taravatu ai etomu, "basio hueda hanai, basio ala-ala, basio hena, basio hekise-hekise, "bona taravatu oredia iboudiai na ina hahegani tamona lalona vada ehebou: "Dekemu tauna ba lalokau henia, sibomu ohelalokaumu na heto." ¹⁰Lalokau ese dekemu tauna se hadikaiaimu; una dainai lalokau na taravatu ihaguguruna ¹¹Ini ba kara toma badina nega vada dibamui, hora vada be kaumu mahuta amo ba noga. Badina be harihari ahemaui na vada eme kahikahi matamana ai ta hamomokania negana ai. ¹²Hanuaboi vada eore, bona dina vada eme kahikahi. Una dainai dibura karadia baita nege, diari karadia baita kara, eda kesi ai baita haloa. ¹³Eda raka nahuadia baita toho, dina ai, dia lebu-lebu eiava kekero ai, bona basita heuda hanai eiava basita mata bodaga, bona basita vagege, basita mama. ¹⁴A Lohiabada Iesu Keriso baita hahedokilaia, bona tauanimui edia ura dikadia basio abi dae.

14

¹A, abidadama ai e manokamu tauna na bavabia dae, basio hahemaoro henia emui hepapa-ahuahu lalodiai. ²Tau ta na mai ena abidadama gau iboudiai baine ani dainai, a e manokamu tauna na uma anidia mo eanimu. ³Gau iboudiai e animu tauna ese asine animu tauna na vbasine dadaraia; bona asine animu tauna ese gau iboudiai e animu tauna na basinema hahemaoro henia. Badina Dirava ese ia na vada eabiadae. ⁴Oi be daika, tau ta ena hesiai tauna ta o hahemaoro heniamu? Ina na ia sibona biaguna vairanai do baine gini eiava baine keto. To ia do bae haginia, badina Lohiabada ese baine haginia. ⁵Tau ta ese e haeroamu dina ta na dina ta ma daenai. To tau ta ese ma e haeroamu dina iboudiai na hegeregere. Ta ta emui lalohadai ai ba haerodia. ⁶Dina e hagereamu tauna ese e hagereamu Lohiabada ena dainai; bona ea nianimu tauna na e anianimu Lohiabada dainai, badina ia ese Dirava e hanamoamu. Asine anianimu tauna na asine animu Lohiabada dainai, ia danu Dirava e hanamoamu. ⁷Badina ta ta na dia sibona dainai e maurimu, bona ta na basine mase sibona dainai. ⁸Badina bema ita na ta maurimu, ita na Lohiabada dainai, ta maurimu, bona bema baita mase, ita na Lohiabada dainai ta masemu. Una dainai baita mauri eiava baita mase, ita na Lohiabada ena. ⁹Badina ina dainai Keriso na e mase bona ma e mauri lou, unu amo ia na e mase taudia bona e maurimu taudia edia Lohiabada. ¹⁰To oi, dahaka dainai varavaramu o hahemaoro heniamu? Bona oi, dahaka dainai varavaramu o dadaraiaimu? Badina ita iboudai na Dirava ena hahemaoro vairanai do baita ginimu. ¹¹Buka Helaga ai vada etorea, "Lau na maurimu" Lohiabada na e gwaumu, "lau vairagu ai tui iboudiai do bae hadai, bona mala iboudiai ese bae gwau hedinarai Dirava enai." ¹²Una daina, ita ta ta eda kara eda kara do baita gwauraidia hedinarai Dirava enai. ¹³Una dainai basita hahemaoro heheni, a lalodia ini tama hadaia toma, varavaradia na basita hekwakwanaidia bona basita idoa henida. ¹⁴Lau na dibagu bona Lohiabada Iesu ena laloani lalonai, gau ta na sibona basine miro diba. Ia sibona ese baine laoa una gau na mi mirona, badina ia enai una gau na mai mirona. ¹⁵Badina bema aniani gauna dainai oi varavaramu oha-hisihisiamu, oi na lalokau lalonai asio rakamu. O aniamu gauna dainai bona varavaramu oha dikaiamu a Keriso na ia danu dainai e mase. ¹⁶Umui ese o lalodiamu namo gaudia na basio gwaurai hedinarai bona idia ese emu namo na dikadia basie gwaurai. ¹⁷Badina be Dirava ena basileia dia aniani bona inuina gauna, a kara maoromaoro, bona maino, bona moale gauna Lauma Helaga lalonai. ¹⁸Badina ina dalai na Keriso isiaina e lao henimu tauna na Dirava ese ea biadaemu bona taunimanimia ese e hamomokaniamu. ¹⁹Una dainai, maino ihavarana gaudia baita gavadia, bona ta ta baita hahegoada heheni. ²⁰Aniani dainai Dirava ena gaukara na basio gigia rohoroho. Gau iboudiai na momokani gogoeva, to e aniamu tauna ese dikana e gwauraimu neganai ia sibona e hahekwakwanaimu. ²¹Ina na namo vamu basio ani, eiva vine basio inu, eiava gauta basio karaia varavaramu iha-hekwakwanaina dalanai, eiava kara dika ai basio hakaua vareai, eiava iha manokana. ²²Emu heabidadama na baine mia oi bona Dirava padamui ai. Sibona dikana se gwauraimu ena kara dainai, una tau na namo. ²³A e daradaramu tauna sibona e hahedikamu, bema ia ese e aniamu, badina ia na dia ena abidadama amo. Bona dahaka gau dia abidadama amo na kara dika.

15 ¹Hari ita ta goadamu tauda ese e manokamu taudia edia manoka baita huahai dia, bona dia ita siboda mo baita moale. ²Iboudai ta ta dekeda taudia baita hamoaledia, edia namo bona goada ihavaradiai. Badina be Keriso danu sibona se hahemoale. ³Badna buka helaga ai e torea eto, Gwau-gwau herevadia oi e gwau henilaimu na lau latagu ai vada eme kau. ⁴Badina e tore guna gaudia na ita ihadibalaida totona e tore, unu amo buka helaga ese haheauka bona tauhalo bae havara ela bona helaro baita davaria. ⁵Bona haheauka bona tauhalo Diravana ese lalomui baine hatamonadia Keriso Iesu bagunai. ⁶Bona mai lalomui tamona bona udumui tamona ida Dirava iseda Lohiabada Iesu Keriso Tamana ba imodaia. ⁷Una dainai bae heabidae heheni, Keriso ese umui e abimuidae hegeregere Dirava ihanamonai. ⁸Bona lau na gwaumu Keriso na hesiai tauna ai e halaoa Dirava ena hereva momokani dainai, tamada e gwauhamata henidia herevadia ihamomokanidia, ⁹. bona bese idauidau ese danu Dirava bae imodaia, ena hebogahisi dainai. Buka Helaga ai e

torea hegeregere, "Una dainai baina hanamomui bese idau dau bogaragidai o ladamu na egu ane ai baina hanamoa."¹⁰Ma eto, "Ba moale, idau bese taumui, ia ena besena ida." ¹¹Ma eto, "Dirava ba imodaia idau bese taumui iboumui ai; bona taunimanimu iboudiai ia ba hanamoa." ¹²Ma Isaia eto, Iese ramuna amo ta baine kau, bese idau dau lohiaida ai bainela; ia lalonai bese idau dau taudia helaro bae abia."

¹⁷Keriso Iesu lalonai! ena gaukara na karaiamu bona na heagilaia. ¹⁸Badina lau na gau idaudia haida basina herevalai to Keriso ena gaukara lau daigu ai idau bese taudia vada e kamoni ina gau na hereva bona kara ai e hekaramu (varamu). ¹⁹Toa bona hoa karadia danu vada eme hedinarai Dirava Laumana ena siahu dainai. Ierusalemamo ela bona Iluriko, lau ese Keriso sivaraina na harorolaia guguru. ²⁰Ini amo, egu lalohadai na sivarai namo baina harorolaia, to dia Keriso ladana e dibaia gabudiai, asi na uramu ta ena du (foundation) latadiai egu ruma baina hadaia. ²¹A buka helaga ai e tore eto: "Asie hadibalaidia taudia na ba itaia, bona bae kamoni bena bae diba." ²²Una dainai name helao-ahu amo asi na vasi dekemu. ²³To harihari lau na asi egu gabu ini kahai, bona lagani momo na urava dekemu baina vasi. ²⁴Na uramu egu laolao ai baina itamui bena Spain bainala, bona ba durugu nega taina baina noho ene seniai. ²⁵A harihari lau na Ierusalem na laomu, helaga taudia ikahadia totona. ²⁶Badina be Makedonia bona Akaia taudia ese edia harihari gaudia vada e habou ogogami taudia Ierusalem ai ekalesia na edia. ²⁷Idia na mai moale dia ida unu e kara toma, e haeroa idia na ima-doa taudia na heheto. Badina be lauma gaudia vada e abi, bena tauani gaudia ma bae heni lao eto. ²⁸Una dainai, ina gaukara baina hagugurua bona baina diba huahua na vada eabia, bona baina vasi itamui ma Spain bainala. ²⁹To lau dibamu danu baina vasi negana aikeriso ena hahenamo idoinai baina vasilai. ³⁰Na noimuimu, tadikakagu e, eda Lohiabada Iesu Keriso, bona Lauma ena heuraheni bagunai, Dirava ba guria goadagooda lau daigu ai. ³¹Ba guriguri gwau ede-edo taudia Iudea ai imadia amo baine hamaurigu, bona egu gaukara Ierusalem ai helaga taudia ese bae abia dae mai lalonamo dia ida. ³²Ba guriguri baina vasi mai moalegu ida Dirava ena ura hegeregere, bona baita laga'ani hebou. ³³Maino Dirava na ese iboumui aine hamomui. Amen

16

¹Lau ese taihugu Foiibe na hagamui, Ia na Kenkerea Dubu na hesiaina baine lao henia. ²Ia na Lohiabada bagunai bavabia dae. Ini ba kara toma Helaga taudia na heto, bona ba gini hebou ia ida emui ura ai, bena ia na sibona umui iboumui ai idurumui ai bona lau danu idurugu. ³Ba hahenamo Priskila bona Akula, Keriso Iesu lalonai a gaukara hebouva taumai. ⁴Daidia be lau daiguai mokona bema mase, lau na idia na hanamodiamu, bona dia lau mo to Gentiles Dubuna ibounai danu. ⁵Ekalesia na edia ruma ai ba hanamodia, Epaineto egu lalokau ba hanamoa, daika be aniani roboana Keriso enai asiaia. ⁶Maria danu ba hanamoa, Ia na umui daimui ai vada e hekwarahi bada. ⁷Andronika bona Lydia danu ba hanamodia idia be lau ida dibura ruma ai anoho. ⁸Ampilia, egu lalokau Lohiabada lalonai. ⁹Bona Urebano, lau ida agaukara hebouva tauna. ¹⁰Apele e hanamoa, Keriso lalonai e hamomokania Aristobulo ena ruma taudia e hanamodia. ¹¹Heroda bahanamoa, egu pava-pava, Narakiso ena ruma taudia ahanamodia, daika be Lohiabada lalonai. ¹²Trufena bona Trufosa, daika be e gaukara goada Lohiabada lalonai, Peresi lalokau ahanamoa, daika na e gaukara auka Lohiabada lalonai. ¹³Rufu ahanamoa, Lohiabada lalonai eabiahidi, bona ia sinana bona lau. ¹⁴Asunukrito, Flego, Heieme, Patroba, Herema, bona hamona daidia be idia ida ba hanamoa. ¹⁵Pilogo bona Iulia, Nerea bona mai taihuna ida, bona Olumupa, bona eabidadamamu taudia iboudiai daidiai be idia ida ba hanamodia. ¹⁶Ba hahenamo heheni ena helaga hahehahunai Keriso ena ekalesia iboudiai ese bae hanamomui. ¹⁷Harihari lau umui na ura henimuimu, varavaragu, ba lalohadai daidia ese kara bona helao-ahu ehavaramu, kavakava herevadia umui e hadibamui ba raka oho edia amo. ¹⁸Taunimanimu unu hetomadia ese na Lohiabada iseda Keriso na isiaina asie lao henimu, a to bogadia korikori edia mo, edia manada bona ahenamo hedibagani herevadia amo asi edia dika taudia lalodia e koidia. ¹⁹A emui haheauka na taunimanimu iboudia ai ese eabi lau na moalemu, badina binai, oi daimu ai, launa na uramu umui na aonega ai ba namo, to dia dika ai ba kavakava. ²⁰Maino Diravana ese asi vanahana Satani baine moia patapata umui aemui henunai, iseda Lohiabada Iesu Keriso ena hariharibada na latamui ai baine mia. ²¹Timoteo, lau ida na gaukara hebou, na hanamoamu, bona Luka Iason, bona Sosipatro, ²²lau, Teretio, daika ini revareva name torea oi na hanamomu Lohiabada lalonai. ²³Giao, lau egu hegaegae bona dubu idoinai, na hanamomuimu, Erato, moni inarina tauna hanuai, na hanamoamu, tadikakagu Koato ida. ²⁴Eda Lohiabada Iesu Keriso ena hariharibada na iboumui ai emui ai baine mia. Amen. ²⁵Harihari ia daika be e hagoadaiamu oi baine hamomu egu sivarai namona bona Iesu Keriso iharorolaina ai, hegeregere hereva hehunidia nega gunadia ai. ²⁶To harihari vada eme hedinarai bona eme hamomokani dia peroveta taudia edia toretore ai bese ena hahegani, abidadama kamoni baine mailaia. ²⁷Una aonega na Dirava sibona, Iesu Keriso enai mo, hairaina baine mia hanaihanai. Amen.

1 Corinthians

1

¹Lau Paulo, Keriso Iesu ese vada e boirigu ia ena apostolo ai vada e halaogu Dirava ena ura dainai, bona tadikakada Sostene ida, ²Dirava ena dubu Korinto ai, Keriso Iesu ladana ai e hahelagadia taudia, e boiridia bae helaga taudia bona gabu iboudiai Lohiabada Iesu Keriso ladana e hahaneamu taudia, edia Lohiabada bona ita eda. ³Hariharibada bona maino na emui ai Dirava ita tamada bona Lohiabada Iesu Keriso ena amo. ⁴Lau na nega iboudiai egu Dirava na hanamoamu umui daimui ai badina be ena hariharibada ehenimui Keriso Iesu lalonai. ⁵Badina gau iboudiai lalodiai

umui na e hatagamui ia lalonai, hereva ai bona aonega ai,⁶ Keriso igwaurai hedinaraina na oabia daemu bona oha momokaniamu umui bogaragimui ai.⁷ Una dainai umui na Lauma ena herahia idauida lalodia amo na so dabumu eda Lohiabada Iesu Keriso ena hedinarai o naria tarika-tarikamu.⁸ Ia ese danu goada baine henimui ela bona dokona, una dainai umui na asi emui kerere bae gwauraimui Lohiabada Iesu Keriso ena dina ai.⁹ Dirava na momokani, daika be umui e boirimui ia natuna ida bae hebamo, Iesu Keriso ita eda Lohiabada.¹⁰ Ina harihari na noimuimu tadikakagu e, ita eda Lohiabada Iesu Keriso ladanai, iboumui ai bagwau hebou, bona padamui ai heiri-heiri basie vara, to baita ahekubou lalo tamonai bona ura tamonai.¹¹ Badina be vada eme hahedinarai henigu umui daimui ai, tadikakagu e, Kloe ena taunimanima ese umui padamui ai na heiriheiri e varamu.¹² Hari lau na dibamu, umui haida na ogwaumu, "lau na Paulo ida," eiava "lau na Apolo ida," eiava "lau na Kefa ida," eiava "lau na Keriso ida."¹³ Be Keriso e hapararaia a? Paulo na dia umui daimui ai e hasatauroa, una ia? eiava umui be Paulo ladanai e habapatiso mui a?¹⁴ Dirava na hanamoamu lau ese umui ta asi na habapatisomui, Krispo bona Gaio hari,¹⁵ una dainai ta basieto, umui na lau ladagu ai na bapatisomui.¹⁶ (Lau ese hari Stefana ena ruma taudia na habapatiso dia. Una latanai, lau na asi dibagu lau be haida na bapatisodia eiava.)¹⁷ Badina Keriso ese e siaigu na basina hahebapatsio, to sivarai namo baina harorolaia - dia aonega herevadia amo, una dainai Keriso ena satauro siahuna na basine ore.¹⁸ Badina be satauro herevana na kavakava mase dalanai e rakamu taudia edia ai, a mauri dalanai tarakamu tauda edai, ia na Dirava ena siahu.¹⁹ Vada e torea, "lau ese aonega taudia edia diba baina hadikadia, bona lau ese diba momo taudia edia laloparara baina hahegonudia."²⁰ Aonega tauna be edeseni ai? diba momo tauna be edeseni ai? Ina tanobada e herevalaiamu tauna be edeseni ai? Dirava ese ina tanobada aonegana na vada e giroa kavakava aonegana ai vada ela?²¹ Una negana amo Dirava ena aonega lalonai taunimanima na asi dibana Dirava, badina Dirava na e moale taunimanima na edia kamoni amo e hamauridia haroro kavakava dia lalodia amo.²² Bona momokani Iudea taudia ese toa e henanadailaiamu bona Helene taudia ese aonega e tahuamu.²³ To aina Keriso vada e hasatauroa aharorolaia, a Iudea taudia edia ai na hegonu bona Helene taudia ediai na kavakava.²⁴ To e boiridia taudia, Iudea taudia bona Helene taudia, Keriso na Dirava ena siahu bona Dirava ena aonega.²⁵ Badina be Dirava ena kavakava ese taunimanima edia aonega e hereaiamu, bona Dirava ena manoka-manoka ese taunimanima edia goada e hereaiamu.²⁶ A Tadikakagu, emui boiboina a laloa, umui momo na asi aonegamui tauani kahanai, momo asi siahumui, bona momo na dia lohia taudia edia amo ovara.²⁷ To Dirava ese ina tanobada amo kavakava gaudia eabidia hidimu ia ese aonega taudia baine hahemaraidia, bona Dirava ese manoka gaudia e hididiamu goada taudia baine hahemaraidia.²⁸ Dirava ese henu gaudia bona asie duhaidiamu gaudia ina tanobada eabidia hidi, bona lasi gaudia, unu amo e mailaidiamu bona gau haidai ai ehalaodiamu,²⁹ una amo ta basine heagi Dirava vairanai.³⁰ To badina ia dainai, oi na Keriso Iesu lalonai, daika be ita daidai ehedinarai Dirava ena aonega amo, kara maoromaoro, hahelaga bona hahemaui.³¹ Una dainai, ini e torea toma, "daika e heagimu na, Lohiabada dainai baine heagi,"

2¹ Varavaragu e, lau navasi dekemui neganai, lau na dia hereva namo-hereadia eiava aonega herevadi ai a Dirava ena hehuni gaudia na harorolai henimuiva.² Badina be lalogu vada name hadaia waitani Lau na gauta asi dibagu umui padamui ai, to Iesu Keriso, bona ena mase satauro ai mo.³ Lau umui ida neganai na manoka-manoka lalonai, bona gari lalonai, bona heude-heude bada lalonai.⁴ Lau egu hereva bona harorona dia lalo-ani bona aonega herevadi ai, a Lauma bona siahu ihahedinaraina amo,⁵ unu amo emui abidadama na dia taunimanima ena aonega lalonai, to Dirava ena siahu lalonai.⁶ Harihari taunimanima badadia bogaragidiai aonegai ta herevamu, to dia ina nega uruna aonegana amo, eiava ini nega lohia dia edia aonega amo, ini na vada e boiomu.⁷ Unu amo, ita na Dirava ena aonegai gau hehunidia baita herevalaidia, badina Dirava ese nega gunadi ai vada eha hegaegaeda Ia hairaina baita davarai.⁸ Ina nega lohia dia ta ese ina nega asie lalopararalaia, to idia ese bema lalopararalaia neganai, hairai Lohiana na basiema hasatauroa.⁹ Buka Helaga ai vada e torea, "dahaka mata ese do asie ita, bona taia ese do asie kamoni, bona do asine toreisi taunimanima kudounai, Dirava ese ini gau iboudiai vada e hahegaegae dia Ia e lalokau heniamu taudia ediai."¹⁰ Badina be Dirava ese vada ehahedinarai henida Lauma ena amo. Badina Lauma na gau iboudiai e tahudiamu, Dirava ena dobu herea gaudia danu.¹¹ Badina be daika taunimanima bogaragidiai mai dibana tauta lalona gaudia to ia laumana sibona mo mai dibana Ia lalonai be dahaka? Unu hetomana danu, ta asi dibana Dirava lalona gaudia to Dirava Laumana sibona mo¹² To ita na dia tanobada laumana asita abia, to Dirava ena amo ema Laumana, bona ita danu Dirava ese e henidamu gaudia na baita dibadia guguru.¹³ Bona ai ese ini gau na a herevalaimu, dia taunimanima edia aonegai ehahedibalai hereva dia amo, to Lauma ese e hahedibalai hereva dia amo, Ia ese Lauma gaudia na baine hahanai dia Lauma lalonai e nohomu taudia ediai.¹⁴ To tauani kahanai Dirava ena Lauma, ena amo gauta basie abia badina idia ediai na kavakava. Ia ese basine dibadia badina unu na Lauma ai ba dibadia.¹⁵ To bema Ia na Laumai neganai unu gau iboudiai baine dibadia, a Ia sibona na ta ese basine hadibaia.¹⁶ Badina daika Lohiabada lalona mai dibana-daika ese Ia baine hadibadibaia?" To ita na Keriso lalona vada tabia.

3

¹ Varavara mai e, lau na umui basina hereva henimui dia lauma kahanai e nohomu taudia hegeregere dia, to tauani kahanai e nohomu taudia hegeregere dia, a rata inu karukaru dia na heheto Keriso lalonai.² Rata na henimuiva, dia aniani aukadia, badina umui na do asio goadamu.³ Badina umui na doini tauanina kahanai. Badina padamui ai na doini oheriheimu bona o dagedagemu, umui na dia tauani ikamoni-henina a, bona doini tauani kahanai ai o rakamu taunimanima dia hegeregere dia a? Badina be ta na baineto, "Lau na Paulo ena," ma ta na baineto, "Lau na Apolo ena,"

umui na dia tauanina ena kaha ai a? ⁵Apolo be daika? Bona Paulo be daika? Ai na hesiai taumai mo ikamonai-henina ai, ta ta ena gaukara Lohiabada ese e henidia hegeregeregai. ⁶Lau ese na hadoa, Apolo ese e dairia, a Dirava ese anina e havaraiaimu. ⁷Una dainai, e hadoamu tauna eiava e hapariamu tauna na tamona, a Dirava ese anina e havaraiaimu hari. ⁸Ihadona tauna bona idairina tauna be hegeregere, ta ta davadia bae abi, edia hekwarahi hegeregeregai. ⁹Badina be ai na Dirava ida a gaukara heboumu, umui na Dirava ena uma bona Dirava ena ruma. ¹⁰Dirava ese e henigu ena hariharibada hegeregeregai, ruma ikarana dibana tauna badana na heto, lau ese badina na hadaia ma ta ese latanai ma e haginiamu. To ta ta nahuadia bae toho ede bae haginia toma. ¹¹Badina be ruma e hadaia badina na ta ese ma basine hadaia diba, una na, Iesu Keriso. ¹²Una ruma badina latanai tau ta ese gold eiava silver eiava nadi namo hereadia eiava au eiava kurukuru eiava biri baine hadai, ¹³ta ta edia gaukara na bae momokani, badina una dina diarina ese do baine hahedinaraia, badina be ina lahi lalonai do baitaia. Una lahi sibona ese baine tohoa ta ta edia gaukara anidia be dahaka. ¹⁴Bema ta ena gaukara ai e haginia na mia, ia na davana do baine abia; ¹⁵A bema ta ena gaukara na lahi ese baine araia ore neganai, ia na do baine dabu, to ia sibona baine mauri, una lahi lalona amo. ¹⁶Umui asi dibamu umui na Dirava ena dubu, bona Dirava Laumana na umui lalomu ai a? ¹⁷Bema ta ese Dirava ena dubu baine hadikaia, Dirava ese ia danu do baine hadikaia. Badina be Dirava ena dubu na helaga, umui danu unu bamona. ¹⁸Tau ta na sibona basine hekoi. Bema umui padamui ai ta na e laloamu ina uru ai ia na mai aonegana, Ia na "kavakava" ai do bainela bena unu amo ia na do baine he-aonega. ¹⁹Badina be ina tanobada aonegana na kavakava Dirava enai. Buka Helaga ai vada e torea, Ia ese aonega taudia e dabaidia taomu edia dibaka karadia amo. ²⁰Bona ma eto, "Lohiabada na mai dibana aonega taudia edia lalohadai, idia na asi anidia. ²¹Una dainai ta ese taunimanima basine heagilaidia badina be gau iboudiai na umui emui. ²²Ena be Paulo, eiava Apolo, eiava Kepa, tanobada, eiava mauri, eiava mase, eiava ini nega gaudia, eiava do bae vara gaudia, iboudiai na umui emui. ²³Bona umui danu Keriso ena, Keriso danu Dirava ena.

4

¹Ina na taunimanima ta ese ede bahaeromai toma, ai na Keriso ena hesiai taumai bona Dirava ena hereva hehunidia iregudia taumai. ²Hari heregu taudia ediai ba davarua urana badana gauna na ikamonai henina. ³To lau egu ai ina na gau maragina una na bema umui ese bahemaoro henigu, eiava taunimanima edia hahemaoro gabunai. A lau sibogu ese danu basina hahemaoro diba. ⁴Badina lau sibogu egu ai kerere ta asina davaraiamu, to ini gau ese lau na maorogu basie gwaurai. To Lohiabada sibona ese lau baine hahemaoro henigu. ⁵Una dainai gauta basio hahemaoro henia una negana dounu, Lohiabada ena mai na dounu. Ia ese ena diari amo hehuni gaudia dibura amo do baine veridia lasi bona taunimanima lalodia uradia do baine hahedinaraia. Unu amo hahenamo Dirava ena amo tata edia bainema. ⁶Harihari, varavaragu e, ini gau na lau bona Apolo latamai ai umui daimui ai, unu amo umui na ini gau na badibadia: "Buka Helaga ai e torea hereva dia na basio matadia rea," unu amo ta ese be abiadae mu ta ese be e dadaraiaimu. ⁷Daika ese umui na e karamui idau-hereva? Umui emui ai be dahaka umui ese so davarua gau na amo? bona bema momokani umui ese o davarua, dahaka dainai umui o heagimu hegeregeregai bona umui ese so davarua neganai? ⁸Umui na vada ome davana! umui na vada ome taga! umui na vada o lohia dia ai ida, bona launa na uramu umui na momokani vada ba lohia bena unu amo ai danu umui ida ta ma lohia hebou. ⁹Badina na laloamu Dirava ese eme hahedinaraia mai ai apostolo na umui murimui taudia, mase ai egwaurai mai kau taudia. Badina ai na tanobada ese bae raraimai tao taudia ai eme halomai- aneru ediai bona taunimanima ediai. ¹⁰Ai na kavakava Keriso dainai, to umui na mai aonegamui Keriso lalonai, Ai na mamonoka a umui na gogoada, umui na e matauraimuiva, a ai be asi e matauraimuiva. ¹¹Ema bona ina hari nega aina a hitolomu bona a ranu masemu, bona asi emai karakara dabuadia namo dia, bona edagedage henimaimu, bona asi emai noho gabuna. ¹²Ai na gaukara goadamu, sibomai imamai amo a gaukaramu. E hadikamaiva negadai, a hanamodiava. E dagedage henimaiva negadai, to aheaukava. ¹³Hereva ai e hadikamaiva, ai ese manau ai ahereva henidiava. Ai na ina tanobada mirona ai e halaomaiva bona momoru dia ai e halaomaiva, ema bona ina hari. ¹⁴Ini gau na tore henimuimu na dia umui basina hemaraimui, to iha dibadibamui natugu lalokau dia heto. ¹⁵Badina bema umui inarimui taudia na daha gwauta Keriso lalonai, dounu tamamui na dia momo. Badina Keriso Iesu lalonai lau na umui tamamui ai vada nala sivarai namo ena amo. ¹⁶Una dainai na noimuimu umui na lau itoho-tohogu taumui ai baola. ¹⁷Badina bunai, Timoteo na siaia vasi dekemui, Ia na lau natugu lalokauna bona momokanina Lohiabada lalonai. Ia ese baine hahelalomui-tao lau egu dala iboudiai Keriso Iesu lalonai, lau ese gabu iboudiai dubu iboudiai na hahadibalaidia hegeregeregai. ¹⁸Ina hari haida na eme hedadarai, e laloava lau na umui dekemui na basina vasi. ¹⁹A lau na hora sisina dekemui ba vasimu, bema Lohiabada baine ura neganai. Bena lau ese baina itadia dia edia hedadarai hereva dia hehunidia daidiai to edia siahu dainai. ²⁰Badina Dirava ena basileia na dia hereva ai mo siahu ai. ²¹Umui be ma dahaka ouramu? Lau baina vasi mai hekwadi auna eiva lalokau ai bona manau laumana ida a?

5

¹Sivarai momokani vada e hariipiulaia bogaragimui ai na lebulebu bona hegahusi karadia dikadia na evaramu, bona ini kara dikadia na Helene taudia bogaragidiai na asie varamu-tau ta tamana adavana ida e heuda hanaimu. ²A umui na o hekokorokumu! bema namo boma lalo-hisihisi bena una kara e karaia tauna na bogaragimui amo boma atoa tabe. ³Ena be lau na tauani ai na dia umu ida, lau na lauma ai umui ida. Lau ese hahemaoro vada na heni vaitani una kara e karaia tauna enai, e kara lau na umui ida. ⁴Bema umui na eda Lohiabada Iesu Keriso ladanai o hegogomu, bona lau na laumai umui ida, eda Lohiabada Iesu siahunai, ⁵ina tau na ba heni hanai Satani enai tauanina ihamasena dainai, bena Ia laumana na Lohiabada ena dinai do baine mauri. ⁶Emui heagi na dia namo. Umui asi dibamui una hatubua gauna sisina

ese parao idoinai e hatubuamu a? ⁷Hatubua gauna gunana ba negea oi na parao matamatana ai baola, bena oi na asi ihatubuna paraona ai baola. Badina be Keriso, ita eda Lagauhanai ariana mamoe na, boubou gauna ai e halaoa. ⁸Una dainai ina aria baita moalelaia, dia hatubua gauna gunana, eiava dia hatubua gauna haheitalai dikadia bona kara dika amo, to parao asi ihatubuna gauna, maoromaoro bona momokani ai. ⁹Egu revareva na tore henimui lalonai lebulebu hegahusi taudia ida na basio gaukara hebou. ¹⁰Asi dalana ta ai lau asi nato dika taunimanima dia iboudiai ina tanobada ai, eiava mata ganigani, eiava dadidadi, eiava kaivakuku e tomadiho henidiamu taudia, hari be umui danu tanobada ena amo bo raka ohomu. ¹¹To ina harihari na tore henimuimu bema ta e tomamu ia na tadikaka to bema ia na lebulebu hegahusi, eiava mata ganigani, eiava kaivakuku e tomadiho henidiamu, eiava hereva dika dia e gwauraimu, eiava inu kekero, eiava daidadi taudia. Idia ida na basio gaukara hebou. Taunimanima unu hetomadia ida na basio aniani hebou. ¹²Badina Lau be dahaka baine kara murimuri taudia baina hahemaoro henidia a? A umui be ina laloma taudia be basio hahemaoro henidia a? ¹³To Dirava ese murimuri taudia ehahemaoro henidiamu. "Kara dika tauna na bogaragimui amo na bavatoa tabe."

6

¹Bema umui ta ese bamomui obadu heniamu neganai, ia mai goadana bainela kara kerere taudia vairadiai baine hahemaoro henidia, bona dia hahelaga taudia vairadiai a? ²Eiava umui asi dibamui unu helaga taudia ese tanobada na do baine hahemaoro henia a? Bona bema umui ese ina tanobada na bo hahemaoro heniamu, umui vada dia hegeregere ini kara maragidia bahahemaoro henidia a? ³Umui asi dibamui ita ese aneru danu baita hahemaoro henidiamu a? Momokani, ini mauri gaudia danu ani? ⁴Benaini bema umui na ini mauri gaudia iboudiai ohabadelaidiamu, dahaka dainai umui ese unu tatau oabidia hahemaoro taudia na heto asi haridia ina dubu lalonai? ⁵Lau na tomu ina na emui hemarai. Bogaragimui ai aonega tauna ta lasi ia ese tadikakana padadiai ina badu do baine hanamoa diba a? ⁶To tadikakana bainela tadikakana ta ma baine hahemaoro henia, bona ini na asie hamomokaniamu taudia vairadiai? ⁷Ini daidiai, umui na momokani vada odarere vaitani, doini umui na sibomui padamui ai ohahebade hehenimu. Dahaka dainai kerere hisihisina boma abia? Bona dahaka dainai bae koimu? ⁸To umui na okara kereremu bona umui na o okoikoimu tadikakamui ediai! ⁹Eiava umui asi dibamui ina asi edia kara maoromaoro taudia na Dirava ena basileia ai asi ahudia ani? basie koimui, eiava hegahusi bona lebulebu karadia, kaivakuku itomadiho henidia karadia, bona heudahanai taudia bona hahine ai elaomu taudia, sibodia tauanidia ai ehahedikamu taudia, ¹⁰eiava henaohenao, eiava mata ganigani, eiava kekero, eiava hahebade koikoi, eiava dadidadi taudia, ini iboudiai ese Dirava ena basileia ai na asie ahudia. ¹¹Bona umui haida danu guna unu heheto. To umui na vada gogoeva, umui na ehahelagamui, umui na maoromui egwaurai Lohiabada Iesu Keriso ladanai, bona eda Dirava Laumana amo. ¹²"Gau iboudiai na taravatu lau egu ai," to dia gau iboudiai na nanamo. "Gau iboudiai na taravatu lau egu ai," to gau haida ese lau na basine lohiagu. ¹³"Aniani na boga ena, bona boga na aniani ena," to Dirava ese ruaosi baine haoredia. Tauani na dia lebulebu bona hegahusi karadia ena, to Lohiabada ena, bona Lohiabada na tauani ena. ¹⁴Harihari momokani Dirava ese Lohiabada e hatorea isi, bona ia ese ita danu ena siahu amo baine hatoreda isi. ¹⁵Umui asi dibamui umui tauanimui na Keriso regena a? Bena lau ese ina Keriso regena baina abidia oho bena ariara hahinena regena ai baina halaoadia a? Basine vara diba! ¹⁶Eiava umui asi dibamui tamona ariara hahinena ida eheboumu tauanidia e tamonamu a? Badina Buka Helaga ai etorea, "raruosi tauanidia na bae tamona." ¹⁷A ta Lohiabada ida eheboumu na Lauma tamona ia ida. ¹⁸Lebulebu bona hegahusi karadia amo ba raka siri! Kara dika haida iboudiai tauani ese e karamu na tauani murimurina ai, a daika lebulebu bona hegahusi kara dikadia na sibona tauanina eha dikaianu. ¹⁹Eiava umui asi dibamui umui tauanimui na Lauma Helaga ena dubu, ia na umui lalomu ai, Dirava ena amo oabia ani? Umui na dia sibomu emui, ²⁰badina be umui na vada ehoimu mai davamui. Una dainai tauanimui ai Dirava ba imodaia.

7

¹Hari otore henigu herevadia badadia bini: "Una na namo tau ta ese hahine ta basine dau-atoho." ²A badina lebulebu garina, tau na hahine tamona mo baine adavaia, bona hahine na tau tamona mo baine adavaia. ³Headava tauna ese adavana ena headava karadia maorona baine henia, bona unuhetomana danu headava hahinena danu adavana unu baine kara henia toma. ⁴Headava hahinena ese sibona tauanina basine biagua, to adavana ese. Bona unuhetomana danu, headava tauna ese sibona tauanina basine biagua, to adavana ese. ⁵Basio hedadarai heheni, to raruosi bagwaubou amo nega sisina mo, unuhetomana danu sibomui bahelaga emui guriguri gaukaradia bagoadalaidia. Bena ma ba hebou lou, unuhetomana danu Satani ese na basine dibaganimuimu badina asi emui boga-auka. ⁶A Ini hereva na gwauraimu na hahealo, dia hahedua. ⁷Lau na laloava umui na vada ohegeregere lau hegeregeregu. To ta ta na sibona mai ena herahia Dirava ena amo, momokani ta be ina dala ai, bona ta be una dala ai. ⁸Hari asi adavadia bona vabu ai na hahealo henidia, na tomu una na namo bema unu bae noho toma lau hegeregeregu. ⁹To bema asi edia boga-auka, idia na bae headava. Badina ina na namo bae headava a lalodia lahi ese e aradiamu be dika. ¹⁰Hari eheadava taudia ina hahigani na henimu-dia lau, to Lohiabada-headava hahinena adavana ena amo na basine noho pada ¹¹(to ena be bema ia na mai padana, ia na dounu basine eheadava, eiava adavana ida bae heroheamaino), bona headava tauna ese adavana na basine dihotania. ¹²To haida daidiai ai nato-lau, dia Lohiabada-bema tadikaka ta adavana na murimuri hahinena, bona una hahine ese eabiadaemu ia ida baine noho, ia ese adavana na basine dihotania. ¹³Bona bema hahine ta adavana na murimuri tauna, bona una tau ese eabiadaemu ia ida baine noho, ia ese adavana na basine dihotania. ¹⁴Badina una murimuri tauna na

vada e helaga hahinena dainai, bona una murimuri hahinena na vada e helaga tauna dainai. Bema lasi umui natumui na mai mirodia, to harihari idia na hehelaga.¹⁵ A bema ina murimuri tauna vada e raka oho, vada bainela. Kara ini bamodia na tadikaka tauna eiava hahinena na asie guidia, to Dirava ese e boirida maino ai baita noho.¹⁶ Badina hahine e, oi be ede bodiba tomamu, adavamu bahamauria? Eiava tau e, oi be ede bodiba tomamu adavamu bahamauria?¹⁷ Lohiabada sibona ese ta ta gabumui ai vada e atomui, badina Dirava ese ta ta vada e boirimui, una dainai Ia enai baraka, lau na ini na hahegani tomamu dubu iboudiai lalodiai.¹⁸ Daika e peritomea neganai e boiria? Ia na se peritomea tauna dainai bainela. Daika be se peritomea e boiria? Ia na basie peritomea.¹⁹ Peritome na asi anina, bona basio peritome danu asi anina, to gau badana na Dirava ena taravatu ba badinadia.²⁰ Umui tata na e boirimui neganai o nohova hegeregere na da banoho.²¹ Oi be e boirimui hesiai tauna a? Ina ese basine hahekwakwanaimu. To bema momokani oi na vada oherua nege, bavabia dae.²² Badina be e boiria tauna Lohiabada lalonai na hesiai tauna ia na Lohiabada enai vada e heruha nege. Unu hetomana, e heruha nege tauna e boiria na Keriso ena hesiai tauna.²³ Umui na vada e hoimui mai davamui; taunimanimania edia hesiai taudia ai basiola.²⁴ Tadikaka mai e, ededia dala ai ta ta e borimui hegeregere na ba noho Dirava ida.²⁵ Hari ini rami-hebou ulatodia daidiai, lau na Lohiabada ena amo hahegani ta asina abia. To, Lohiabada ena hebogahisi vada na davaria dainai, lau ese lalo-hadai ta na henimu e kara kamoni bada tauna hegeregere na.²⁶ Una dainai, lau egu lalohadai ai ina na namo, badina ini nega dikadia e maimu daidiai, una namo badina tau ta baine noho na e nohomu dalanai.²⁷ Umui mai adavamui a? Basio hadihoa. Adavamui vada e diho a? Ta ma basio tahua.²⁸ To bema momokani oi na oheadava, oi na dia kerere; bona bema haneulato rami-hebou ta na baine headava ia na dia kerere. To headava taudia na do bae hisihisi tauanidia ai, bona lau na uramu basina hametaumui.²⁹ A ini na gwau tomamu, tadikakagu e; nega na kwadogi, una dainai hari amo ela, bona oheadava taumui na banoho e kara asi adavamui na heto; ³⁰bona daidia bae tai, e kara asie taitaimu na heto; bona daidia bae moale, e kara asie moalemu na heto; bona daidia bae hoihoi, e kara asi edia kohu na heto; ³¹bona tanobada kohudia e gaukaralaimu taudia danu e kara se gaukaralaimu ai bae noho. Badina tanobada itaitana na vada e boiomu.³² To na uramu lalomui na basio hahekwarahidia. Do se headava tauna ese Lohiabada ena kohu e lalodia badamu, Lohiabada be ede baine hamoalea toma.³³ A mai adavana tauna na tanobada kohudia e lalo badamu, adavana ihamoalea ai, bona lalona na rua. Asi adavana hahinena eiava haneulato rami-hebouna ³⁴ese Lohiabada ena kohu e lalodia badamu, unu amo ia na baine helaga tauaninai bona laumanai. To e headava hahinena ese tanobada kohudia e lalo badamu, adavana ede baine hamoalea toma.³⁵ Ini na gwau tomamu na umui sibomui emui namo ihavarana dainai, dia umui ilaoahumui dalanai, to na uramu hemataurai karadia bakara bona Lohiabada isiaina balaoheni, asi dara-daramui.³⁶ Bema tau ta na e lalohadai kereremu ia maohenina enai-bema maohenina na headava gabana bona una na momokani-ia ede be kara tomamu na ia sibona. Ia na se keremu, bae headava hari.³⁷ Bema ta ese sibona lalona vada e hadaia, dia haheduai, to lalona ibounai vada e atoa, bona vada e tomu mai kudouna ida-basine headava-ia na e kara namomu.³⁸ Una dainai, maohenina baine adavaia tauna na baine kara namo, bona ta basine headava ia na baine kara namo herea.³⁹ Hahine ese adavana baine badinaia, tau ena mauri idoinai. To bema adavana baine mase, ia na lailai baine headava ia e uraheniamu tauna ida to Lohiabada lalonai baine headava.⁴⁰ A lau egu haero ai una na baine moale herea bema e nohomu dalanai baine noho. Bona na laloamu lau danu Dirava Laumana na abia.

8¹ Hari ini Kaivakuku edia ihaboulaina vamudia daidiai, ita na mai dibada, iboudai na mai eda lalo-parara. Lalo-parara na e badamu, to lalokau danu e tubu daemu.² Bema tau ta ese e lalomu ia na gau ta mai dibana, a gau tabe ia na asi dibana. Unuhetomana ia na dounu baine diba.³ A bema tau ta ese Dirava e lalokau heniamu, una tau na ia ese na e dibaia.⁴ Una dainai, kaivakuku ihaboulaina vamudia ianina dainai; Ita ta dibadamu ina tanobada ai kaivakuku na asi anidia bona Dirava ta lasi a tamona mo.⁵ Momokani enabe bema egwauraidiamu Dirava dia, guba ai eiava Tanobada ai, unu hetomana danu "dirava-dirava" na momo bona "lohia-lohia" na momo, ⁶to ai emai ai ita tamada Dirava na tamona, Ia ena amo gau iboudiai e maimu bona ia dainai ita danu ta maurimu, bona Lohiabada tamona Iesu Keriso, ena amo gau iboudiai e hedinarai, bona ita danu ia ena amo ta hedinarai.⁷ Unu hetomana ina lalo-parara na dia taunimanimania iboudiai lalodia ai badina haida na guna kaivakuku gaukaradia lalodiai vada e manada ema bona ina negai; e abimu bona e animu dainai e hamanokadiamu bona e hadikadiamu.⁸ To aninai ese Dirava vairana basine laohaida. Ita na basita dika bema basita ania neganai, eiava baita namo bema baita ania neganai.⁹ A nahuamui ba toho badina emui heruha nege maurina namona ese manoka taudia basie e hamanoka dia.¹⁰ Badina bema tau ta ese lalo-parara tauna ta baine itaia, e anianimu kaivakuku edia dubu ai, ia lalona, ena manoka amo basine hatubua una kaivakuku edia vamu eanimu a?¹¹ Bena manoka tauna, tadikakada ta Keriso ia dainai e mase, na oi emu lalo-parara amo na vada ohadikaia.¹² Ini heto, oi tadikakamu okara dika heniamu bona ena lalo-manoka na oha-beroamunegani oina Keriso o kara dika heniamu.¹³ Una dainai, bema aniani ese lau tadikakagu ta ena moru e havaraiaumu, lau ese ina vamu basina ani ela hanaihanai, badina tadikakana baine hahekwakwanaia na garina.

9

¹Lau be dia ura kwalimu taugu a? Lau be dia apostolo a? Eda Lohiabada Iesu be asi na itaia a? Umui be dia lau egu gaukara anidia Lohiabada lalonai a? ²Bema lau na dia apostolo idau taudia ediai, daba lao lau na umui emui ai hari. Badina be egu Apostolo dagina na umui ese o hamomokania Lohiabada lalonai.³ Ina na lau egu haere, e tahugumu taudia ediai.⁴ Ai be asi emai maoro baia aniani bona baia inuina a? ⁵Ai be asi emai maoro kamoni hahinena ta baia hakaua, hegeregere na Apostolo oreadia, bona Lohiabada tadikakana bona Kefa a? ⁶Eiava Banaba bona lau hari asi emai maoro

baia gaukara a?⁷Daika be hesiai e lao henimu tuari tauna na heto ena ura negadai sibona davana e henimu? Daika be vine imeana e hadomu bona huahua na se animu? eiava, daika be mamoe seridia e naridiamu, bona rata na se inumu, unu mamoe serina edia amo?⁸Ini hereva na gwauraimu be dia taunimanima edia siahu hegeregediai a? Eiava taravatu ai danu unu se gwau toma a?⁹Badina vada e torea, Mose ena taravatu bukana ai. "Boromakau uduna na basio koua bema uit e moimoiailamu neganai." Dirava ese una boromakau na se laloa badamu ani?¹⁰Eiava, ita daidai unu egwau tomamu a? Badina ita daidai vada e torea, "badina be tano e hamakohiamu tauna na, ta baine hamakohia mai helarona ida, bona uit e kwadiamu tauna na baine hekwadi mai helarona ida, ahudia bae abi edia geigei ai." ¹¹Bema ai ese Lauma gaudia ahadodia lalomui ai, ini na momo herea bema ai ese tanobada gaudia emui amo baiama geidia a?¹²Bema haida ese na unu ekaramui tomava, ai ese be basiana kara badabada a? to ai ese na asi abiagumui. A gau iboudiai lalodia amo na a haheaukava, badina asi aurava Keriso ena sivarai namo ilao-ahuna karadia bae evara. ¹³Umui asi dibamui dubu ai e gaukaramu taudia dubu gaudia eanimu; ihaboulaina patanai e gaukaramu taudia ihaboulaina patana amo ahudia eabimu ani? ¹⁴Unu hetomana danu, Lohiabada na vada ehahegani, Sivarai namo e harorolaiamu taudia na sivarai namo amo adia bae abi. ¹⁵To lau ese ini gau maorodia ta asina biagudia. Badina lau ese ini gau asi na tore na dia umui ese unu ba kara henigu toma, unana bema bama mase hari namo, a tau ta ese egu heagi badina bema abia-oho hari dia namo. ¹⁶To bema sivarai namo na harorolaiamu na asi badinai baina heagi, badina vada ehaganigu baina karaia, to madi ihabaigu bema sivarai namo basinama harorolaia neganai!¹⁷To bema lau na egu ura badai baina karaia, lau na mai ahugu. A bema dia egu ura ai, lau na heregu tauna ai vada e halaogu. ¹⁸Benaini ahugu be dahaka? Bema lau na sivarai namo na harorolaiamu asi davana ai, sivarai namo na bama heni, to egu maoro idoinai na basina gaukaralaia sivarai namo lalonai. ¹⁹Ena be lau na ura kwalimu taugu taunimanima iboudiai vairadia ai, iboudia ai vairadia ai lau na hesiai tauna ai nala, unu amo hutuma momo ma baina davaridia. ²⁰Iuda taudia edia ai, lau na Iuda tauna ai vada nala, unu amo Iuda taudia baina veridia mauri helaoreana. Taravatu henuna ai e nohomu taudia edia ai, lau na taravatu henuna tauna ai vada nala, unu amo taravatu henuna ai enohomu taudia baina veridia mauri helaoreana, ena be lau na dia taravatu henunai. ²¹Taravatu murimurina ai e nohomu taudia edia ai, lau na taravatu murimurina ai e nohomu tauna ai vada nala (Ena be lau na dia Dirava ena taravatu murimurina ai, to Keriso ena taravatu henunai) unu amo lau ese taravatu murimurina ai e nohomu taudia baina veridia mauri helaoreana. ²²Manoka taudia edia ai, manoka tauna ta ai vada nala, unu amo manoka taudia baina veridia mauri helaoreana. Lau na gau iboudia ai nala taunimanima iboudia ai edia ai, dala idauidau iboudia ai lalodia amo haida baina hamauridia. ²³Gau iboudia ai na karamu na sivarai namo dainai, unu amo ina gaukara baita abia hebou taunai nala. ²⁴Asi dibamui heau helulu ai heau helulu taudia iboudia ai e heaumui, to tau tamona ese davanbavabia. ²⁵Gadara helulu taudia na e boga auka e abiamu ani? Unu ba heau toma bena davana amu gau iboudiai lalodia ai. Ini e kara tomamu na korona e masemu gauna iabina helaoreana, a ita be, mia hanaihanai gauna iabina helaoreana. ²⁶Una dainai unu na heau tomamu, dia asi aninai; na heatumu, dia hoda-hoda asi na tutuamu. ²⁷A sibogu tauanigu na alaiamu bona na guiamu, badina haida baina haroro henidia murinai, lau sibogu danu mauri basina reaia.sibogu tauanigu na alaiamu bona na guiamu, badina haida baina haroro henidia murinai, lau sibogu danu mauri basina reaia.

10

¹Tadikaka mai e, asina uramu baoto umui na asi dibamui, eda sene taudia be ori ta henunai e laolaova bona davara padadia amo danu e raka hanai. ²Idia na iboudia ai vada e baptisodia Mose lalonai, ori lalonai bona davara lalonai, ³bona iboudia ai ese lauma anianina tamona eaniava. ⁴Idia na iboudiai lauma ranuna tamona e inuava, badina idia na lauma nadina tamona ranuna e inuava bona una lauma nadina ese e gavadiava, bona una nadi na Keriso. ⁵To Dirava ese idia momo na se lalonamo henidiava, bena e haoredia tano gagaena ai. ⁶Harihari ini gau na ita ihaheitalaida gaudia ai vada eme lao, unu amo ita ese gau dikadia basita uraheni, idia ese e ura henidiava hegeregereana. ⁷Kaivakuku itomadiho henidia taudia ai basiola, idia haida hegeregedia; Buka Helaga ai e torea hegeregereana, "Taunimanima na e hahelaidia dihovaa bae aniani bona bae inuinu, bona e toreisiva bae gadara." ⁸Tauani lebulebu dia basio kara, idia momo e lebulebuva hegeregereana, bona taunimanima iboudia ai daha ruahui-toi na eha-moru dia dina tamona ai. ⁹Umui ese Keriso basio tohoa, idia momo ese e tohoa hegeregereana, bena gaigai ese eha-mase dia. ¹⁰Basio maumau, idia momo e maumau hegeregereana, bena hahedika tauna ese eha-mase dia. ¹¹Hari ini kara e vara idia ediai na haheitalai gaudia. Badina be ini na e toredia ita isisibalai henida, uru dokona edai vada e kau tauda ihadibalaia. ¹²Una dainai ta e lalomui ia na e ginimu, nahuana baine tohoa ia na basine moru. ¹³E butumui taomu hedibaganidia na taunimanima iboudia ai ediai e kaumu hedibaganidia hegeregedia. To Dirava na momokani. Ia ese una hedibagani amo ba roho mauri dalana baine havaraia, bena umui ese do ba haheaukalaia diba. ¹⁴Una dainai, egu lokau taumui, kaivakuku itomadiho henidia bae heautania. ¹⁵Lau na herevamu na umui lalo-parara taudia bama hereva henimui na heto. Sibomui ese na herevalaimu herevadia ba haerodia. ¹⁶Hahenamo keherena ta hahenamo laiamu, gauna be dia herahia gauna Keriso rarana lalonai a? Ta bituamu paraona, be dia herahia gauna Keriso tauanina lalonai a? ¹⁷Badina be parao idoina na tamona, ita na hutuma tauani tamona lalonai. Badina be ita iboudai una parao-idoina tamona ita ese ta heubulaia heboumu. ¹⁸Mani tauanina roharohana amo Isaraela aitaia. Unu boubou gaudia e animu taudia be dia ihaboulaina patana gaukaradia ai e helaoreava a? ¹⁹Lau be vada dahaka na gwauraimu? Una kaivakuku ta ena ihaboulaina anianina be gauta a? Eiava una Kaivakuku be gauta?²⁰To lasi, lau natomamu idau besena ese e bouboulaiamu gauna, idia na lauma dikadia e bouboulai henidiamu bona dia Dirava e bouboulai heniamu. To lau na asi na uramu lauma dikadia ida bae hebou! ²¹Umui ese

Lohiabada ena kehere bona lauma dikadia edia kehere basio inua diba. Umui ese Lohiabada ena ihaboulaina patana bona lauma dikadia edia ihaboulaina patana gaukarana ai basio hebou. ²²Eiava ita be Lohiabada ta habaduamu baine mama a? Ita eda goada be Ia ena goada ta hereaiamu a? ²³"Gau iboudia ai na mai taravatudia," to dia gau iboudia ai na mai edia hahenamo. "Gau iboudia ai na mai taravatudia," to dia gau iboudia ai ese taunimanima e hatubua dae kaumu. ²⁴Taunimanima ta ese sibona ena namo basine tahua, to haida edia namo danu. ²⁵Hoihoi gabunai e hoihoilaimu anianidia iboudiai na bavani diba, asi henanadaimui ida emui lalohadai ia heato maorona dainai. ²⁶Badina be "tanobada na Lohiabada ena, bona anina idoinai danu." ²⁷Bema Dirava asine abidadama heniamu tauna ta ese evavemumu ia ida bavani hebou, bona ouramu baola neganai, vairamu ai e dabara anianidia na bavani asi henanadaimui ida emui lalohadai ena heato maoro dainai. ²⁸A bema taunimanima ta ese baine hamaoromu, "ina aniani na vada e henilao bouhou gaudia," neganai basio ania, una e hereva henimu taunimanima na dainai, bona emu lalohadai ia heato maorona dainai - ²⁹dia oi emu lalohadai ena heato maoro dainai, to unu e hereva henimu toma tauna ena lalohadai iha heato maorona dainai. Benaini, dahaka dainai lau egu ura kwalimu na taunimanima ta ena lalohadai e heato dalanai ese baine hahemaorolaia? ³⁰Bema lau na mai hahenamogu ida na anianimu neganai, dahaka dainai egwau henigumu na hanamolaimu gaudia daidiai? ³¹Una dainai, bavani eia ba inuini, eia ba dahaka-dahaka ba kara, iboudiai ba karadia Dirava hairaina dainai. ³²Iuda taudia, eia ba Helene taudia, eia ba Dirava ena dubu basio hahekwakwanai dia, ³³launa na hededegwamu danu gau iboudiai lalodai taunimanima na hamoalediamu. Lau sibogu egu namo asi na tahuamu, to taunimanima momo edia namo daidiai, badina be ihamauridia helaoreana.

11

¹Lau ba tohotohogu, lau ese Keriso na tohotohoamu hegeregere. ²Harihari na hanamomuimu badina be gau iboudiai olalolaigumu, bona hahediba herevadia, na abi bena na henimu gaudia o badinadia tarika-tarikamu. ³Harihari na uramu badiba, tatau iboudiai kwaradia na Keriso, hahine kwarana na tau, Keriso kwarana be Dirava. ⁴Tatau e gurigurimu eia ba e perovetamu, negadia ai kwaradia e koumu, una na kwarana se matauraimu. ⁵A hahine e gurigurimu eia ba e perovetamu kwaradia asie koumu neganai, ia danu kwarana se matauraimu. Badina ina na tamona bona hegeregere kwarana e nauamu. ⁶A bema hahine ta ese kwarana basine koua neganai, huina danu ba-utua oho. A bema ina na mai hemarainai hahine ta enai huina baine utua eia ba kwarana baine naua neganai, hahine ese kwarana na baine kumia. ⁷A tau ese kwarana baine mukoa na dia namo, badina be Ia na Dirava ihagoina tauna bona Dirava hairaina. A hahine be tau hairaina. ⁸Badina be tau na hahine ena amo sevara, a hahine hari, tau ena amo e vara, ⁹Badina tau na sekaraia hahine ena, to hahine be tau ena. ¹⁰Una dainai hahine ena siahu toana kwarana ai baine mia, badina be aneru daidiai. ¹¹Gau tamona, Lohiabada lalonai, hahine na dia sibona tau ena amo, eia ba tau danu dia sibona hahine ena amo. ¹²Badina hahine na tau ena amo, unu hetomana danu tau na hahine ena amo evara. Badina be hahine na tau dainai vada e vara, a tau be hahine ena amo e varamu. A gau iboudiai na Dirava dainai e varamu. ¹³Sibomui ba haeroa. Hahine be kwarana asi ikumilaina Dirava baine guria namo eia ba? ¹⁴Lalomui asie pararamu a, tau huina baine lata na hemarai gauna ienai. ¹⁵A hahine huina baine lata na hairai gauna iena? badina be huina latana amo kwarana baine kumia. ¹⁶A ta ese ina hereva baine gwaua tubu, egu haere binai: ai na kara idauna ta asi dibamai, bona Dirava ena ekalesia oreadia danu asi dibadia. ¹⁷A egu hahedua binai na henimuimu, asina hanamomuimu, badina be emui hebou amo namo ta sevaramu, a dika mo evaramu. ¹⁸Badina matamanai, vada na name kamoni emui hegogo tamona dubu lalonai, haheparara evaramu bogaragimui ai, bona una kahana na abia daemu. ¹⁹Badina be una na momokani bogaragimui ai na ore-a-ore e varamu, unu amo e hamomokaniamu taudia ese bae hahedinarai emui bogaragimui amo. ²⁰Emui hebou negadia ai, Lohiabada ena anibou asio ania momokanimu. ²¹Badina be tau-ana, tau-ana oanimu, una dainai haida e hitolomu, ma haida e kekeromu. ²²Be! Asi emui ruma a? unuseni ai boma aniani bona boma inuini. Dirava ena ekalesia ihi-ihiraina bona ogogami taudia ihahemaraiaida ouramu a? Ede baina hereva henimu toma a? Baina hanamomui a? Lasi vaitani. ²³Badina be Lohiabada ena amo na abia umui na hamaorolaimui dalana binai; taona e torea hanuaboina ai, Lohiabada Iesu ese Flaoa atagana ta eabia, ²⁴e hanamoa, bena e bitua, eto "Lau taugu binai, umui daimui ai baine makohi, ini bakara toma, lau ba lalogu." ²⁵Unu hetomana danu, e aniani vaitani murinai ia ese kehere eabia, bena ma eto, "Ina kereher na herohe-maino matamatana lau raragu ai, ba inua negadia ai ini bakara toma, lau ba lalogu." ²⁶Una dainai, ina Flaoa atagana bavania bona ina kehere ba inua negadiai iboudiai na umui ese Lohiabada ena mase ba hahedinarai, ela bona Ia do bainema. ²⁷Benaini, tauta ese ina Flaoa atagana baine ania bona ina kehere baine inua kerere, Ia ese Lohiabada tau-anina bona rarana baine hadika. ²⁸Tauta lalona baine tahua guna, bena ataga baine ania bona kehere baine inua. ²⁹Badina be eania kavamu bona einua kavamu, se laloamu una na Lohiabada tau-anina, tauna ese Ia sibona ihahemaoro henina e aniamu bona e inuamu. ³⁰Badina bunai hutuma umui bogaragimui ai e manoka-manokamu bona e gorerediamu, haida danu e masemu. ³¹A ita siboda laloda baitama tahu, hahemaoro na edai basinema kau. ³²Gau tamona Lohiabada ese e hahemaoro henidamu, matada ihakanidia, ita bona tanobada baita dika bou na garina. ³³Una dainai, varavaragu e, anibou dainai ba hebou negadia ai, ba henari heheni. ³⁴Ta bema hitolo, Ia na ena ruma ai bema aniani, hahemaoro ai ba dika bou na garina. Hereva ore dia do bae mia ela bona baina vasi, bena bain hamaoromaoroa.

12

¹Harihari Lauma ena herahia, varavaragu, lau na asi nauramu ba kavakava, ²umui dibamui dibura ai o nohova negana ai, e hakaumui negadia iboudiai kaivakuku, asie herevamu diravadia, ese dala ede bamodia ai e hakaumui. ³Badina bina na

hadibamuimu, ta dia Dirava Laumana ai e herevamu, tauna ese "Iesu basine uduguiria," bona tau ta basine eto, "Iesu na Lohiabada." Lauma Helaga ai e herevamu tauna mo sibona.⁴ Harihari unuseni ai herahia be idauida, a Lauma be tamona.⁵ Bona unuseni ai hesiai daladia na idauida, a Lauma be tamona.⁶ Bona unuseni ai gaukara danu idauida, a Dirava be tamona Ia ese gau idoidiai taunimanima iboudiai lalodiai e karamu.⁷ Harihari Ia ese taunimanima vada ehahedinarai henidia hagauhagau iboudiai bae namo.⁸ Badina be Lauma tamona ena amo ta aonega herevana, ehieniamu bona ma ta lalo-parara herevana ehieniamu bamona,⁹ ma ta abidadama e heniamu Lauma tamona ese, bona ma ta gorere ihanamolaidia siahuna e heniamu,¹⁰ bona ma ta hoa karadia ikaradia siahuna e heniamu, ma ta peroveta siahuna e heniamu, ma ta Lauma idibadia e heniamu, ma ta gado idauida e heniamu, ma ta gado anidia ihahedinaraidia e heniamu,¹¹ a unu gau iboudiai na Lauma tamona ese taunimanima e henidia hagauhagaumu, ena ura hegeregerenai.¹² Badina be tauanina be tamona to regena na momo, bona rege ena be momo, to iboudiai tauanina tamona regena Iesu danu unu heto.¹³ Badina be Lauma tamona lalonai ita iboudai e bapatisoda tauanina tamona, ai e halaoda ena be Iuda tauda eiava Helene tauda, ena be hesiai tauda eiava ura kwalimu tauda, bona ita iboudai danu Lauma tamona, e hainulaida.¹⁴ Badina be tauanina na dia rege tamona, a rege momo.¹⁵ Bema ae palapala baineto, "lau na dia ima palapala, dainai lau na dia tauanina ena," una dainai, ia na dia tauanina ena.¹⁶ Bona bema taia baineto, "lau na dia mata, dainai lau na dia tauanina ena." Asi badina, tauanina regena ta ai.¹⁷ Bema tauanina idoinai na mata mo, kamoni vada edena?¹⁸ A Dirava ese rege ta ta tauanina lalonai, vada eato, ena ura hegeregerena.¹⁹ A bema iboudiai rege tamona, tauanina na tamona.²⁰ A rege be momo, tauanina na tamona.²¹ Benaini, mata ese ima palapala, na basine hereva henia baineto "asi emu gaukara egu ai." eiava kwara danu ae palapala dia, baine hereva henia baineto, "asi emu gaukara egu ai."²² Lasi, manoka-manoka ta gwauraimu regedia na mai edia gaukara bada hereadia,²³ bona regedia tauanida ai ta laloamu imatauraidia na mamaragi, ita ese na ta matauraidia badamu bona asi hairaidia regedia ta hanamo badamu,²⁴ a tauanina regedia mai hairaidia na gau ta ai asie dabumu, a Dirava ese rege iboudiai vada eme habou, tauanina tamona ai baela, e dabu regena danu hemataurai bada vada eme henia,²⁵ a tauanina basie karoaia, a rege iboudiai bae hedaro boubou bona bae henari heheni.²⁶ A bema rege ta baine hisihisi, rege iboudiai na bae hisihisi hebou, bona bema rege ta bae matauraia, rege iboudia na bae moale hebou.²⁷ Harihari umui na Keriso tauanina bona umui ta ta be ia regena,²⁸ bona Dirava ese haida ekalesia lalonai vada eato dia, giniguna dia be Aposetolo, iharuadia be peroveta taudia, ihatoidia be hahediba taudia, idia muridiai hoa karadia ikaradia taudia, ma idia muridiai gorere ihamauridia, hekaha taudia bona gado idauida taudia.²⁹ Iboudiai be apostolo, a? Iboudiai be peroveta taudia a? Iboudiai na hahediba taudia, a? Iboudiai na hoa karadia e karamu, a?³⁰ Dia herahia iboudiai na gorere ihamauridia, ani? Dia iboudiai na gado idaudia ai bae hereva, ani? Dia iboudiai hereva anidia e hahedinaraimu, ani?³¹ A ura momokanina herahia hereadia. Bona harihari, lau ese dala hereadaena aina hahedinarai henimui.

13 ¹Bema lau baina hereva taunimanima bona aneru gadodiai, to asi egu lalokau, lau na ekara gaba eiava auri e kwadiamu na heto.² Bona bema lau na peroveta herahia na bona idibana aonegana idoinai bama abia, bona bema egu kamoni bada amo ororo bama kokidia, to asi egu lalokau, launa gauta lasi.³ Bona bema lau na egu kohu iboudiai baina heni, bona bema lau tauanigu baina heni una amo bama heagi, to launa asi egu lalokau, launa gauta basina abia.⁴ Lalokau na haheauka bona boga-auka, lalokau na asi ena hesiku, lalokau na seheagimu, asine hekokorokumu.⁵ Asine kara havaramu, sibona sehetahumu, asine badu haragamu, kerere ta se laloa taomu.⁶ Gabu kereredia ai asine moalemu, ta gabu maorodia ai e moalemu.⁷ Gau iboudiai e hua taomu, gau iboudiai eabidaemu, helaro ai gau iboudiai e haheaukalaimu.⁸ Lalokau na basine doko. To bema peroveta herevadia, idia na bae ore; bema gado idau-idau idia na bae doko; bema aonega, idia danu bae ore.⁹ Badina be taidia-taidia ta dibamu bona taidia-taidia ta peroveta laimu.¹⁰ To goevadaena be maimu neganai, taidia ta dibamu gaudia na be oremu.¹¹ Marakigu neganai, egu hereva bona lalohadai na mamaraki, badina launa maraki dainai.¹² Ina harihari ta heita valahu-valahu mu hevarivari ai, ta heita hehenimu. Harihari taina name diba, to una neganai baina diba guguru odibagu guguru hegeregerena.¹³ Harihari ini gau toiosi mo mimia: Abidadama, helaro bona lalokau, to hereadaena na lalokau.

14

¹Lalokau na ba gavaia balaheni, bona lauma herahiadia na ba ura henidia, to hereadaena be boma peroveta.² Badina gado idau-idau ai ehervamu tauna na dia taunimanima ehervamu henidiamu to Dirava ehervamu heniamu; badina ta na sedibamu anidia, to ina na hehuni herevadia e gwauraimu Lauma ena amo.³ A peroveta herevadia e gwauraimu tauna ese taunimanima ehervamu henidiamu badina idia iha-tubudia, ihagoadadia bona tauhalo e henidiamu.⁴ Gado idau-idau ai e herevamu tauna na sibona e hahegoadamu, a peroveta herevadia egwaurai hedinaraimu tauna ese dubu ehagoadaiamu.⁵ Ina harihari, lau na ura dikamu umui na gado idau-idau ai boma hereva, to ma nauramu bema lasi neganai peroveta herevadia boma gwaurai hedinarai. Ina hari, peroveta herevadia e gwaurai hedinaraimu tauna na gao idau-idau ai e herevamu tauna daenai. (ela bona bema unu gado herevadia anidia baine gwaurai hedinarai neganai, bema unu amo dubu baine goada ihatubuna ai).⁶ To harihari, bamogu e, bema lau na baina vasi bema gado idau-idau ai baina hereva henimui neganai, dahaka gau namona ta do baina havara henimui, ela bona lau ese baina hereva henimui mata hanai herevadia amo, eiava laloparara amo, eiava peroveta amo, eiava hahediba-diba amo?⁷ Iha hegeregerena asie maurimu kohudia danu mai regedia - biugili eiava gitara - bema idia regedia na basie ha-idau, ede boma diba toma una be biugili regena eiava gitara regena? Bema biugili regena na dia tuari boiboina regena, daika na bema diba bema una

tuari boiboinai bema hegaegae? ⁹Unu hetomana danu, unu gadi idau-idaulalopararadia na emui gado amo basio heni neganai, ede boma dibadia toma bona unu be dahaka egwaurai? Badina una na hoda-hoda eheneva heniamu. ¹⁰Asia daradaramu ina tanobadai gado idau-idaulalopararadia na momo herea, bona gado ta basio davaria asi anidia. ¹¹Bema lau na gado ta anina asina dibamu, lau na idau tauna ia enai, bona una ehenevamu tauna na lau egu ai. ¹²Umui danu unu heheto, ema bona ina negai umui na o ura badamu ini lauma herahiadia, ba tahudia bema baine habadalaimui dubu iha-tubuna dainai. ¹³Bena gado idau ai ehenevamu tauna na baine guriguri una gado anidia baine hanaidia noinoina. ¹⁴Bema lau na gado idau ta ai na gurigurimu, laumagu danu e gurigurimu, to daragu na sevaramu. ¹⁵Una dainai, lau be ede bama kara toma? Lau na laumagu ai baina guriguri, a mai daragu ida danu baina guriguri laumagu ida ane baina abi bona mai daragu ida danu ane baina abi. ¹⁶Ma kahanai, bema lauma ai Dirava o hanamoamu o edena dalai ta na una asie harihari henidia gabuna amo baine gwa "Amen", oi emu hahenamo ai, badina ia na asi dibana oi be dahaka ogwauraimu? ¹⁷Badina be hahenamo korikori ohenimu na hegeregere, to haida be asio hagogadadiamu. ¹⁸Dirava na hanamoamu lau na gado idau-idaulalopararadia na momo ai na herevamu una ese umui na name hanaimui. ¹⁹A dubu lalonai, lalogu herevadialalopararadia ima hona mo nama herevalai bona nama hadibalaidia danu, a dia gado daha-ta herevadialalopararadia amo. ²⁰Varavaragu e, memero maragidia hegeregere ai na basio lalohadai. A kara dika enai boma garugaru, to emui lalohadai hari bema lo. ²¹Taravatu bukanai na etorea "gado idaudia taudia edia amo bona idau taudia bibinadia amo, lau ese ini taunimanima baina hereva henidia, to dia ina dalai idia ese lau ba-kamonai henigu", Lohiabada na ini egwau tomamu. ²²Bena ini heto, gado idau-idaulalopararadia badina na toa ta, dia eha-momokaniamu ediai, to asie hamomokaniamu taudia ediai, a peroveta herevadialalopararadia be dia asie hamomokaniamu taudia edia to eha-momokaniamu taudia ediai. ²³Una dainai, bema, dubu idoinai na gabu tamonai bame hebou bona iboudiai na gado idau-idaulalopararadia amo ba hereva, to lalona amo herahia asie abi taudia bona asie-hamomokaniamu taudia danu bae vareai, idia basiema gwau umui na kakava? ²⁴To bema iboumui ai na peroveta ai boma hereva, a asie hamomokaniamu eiava asie herahia henia tauna ta bema raka vareai, ia na baudaia roha iboimui ese bona ba tahua umui iboumui ese, ²⁵ia lalonai hehuni gaudia iboudiai bae hedinarai, unu amo ia na baine goru diho bona Dirava baine tomadiho henia, baine gwau hedinarai, "Dirava na momokani ita ida." ²⁶Bena ma dahaka, varavaragu e? Emui hahebou tamona negadialalopararadia, ta ta mai emui ane, mai emui hahedibadiba, mai emui ihahedinaraina herevadialalopararadia, mai emu gado, eiava gado ihahanaidia. Ini gau iboudiai na dubu iha-tubuna dainai. ²⁷Bema tau ta na gado idauna ai baine hereva neganai, rarua eiava tatoi hona, ta ta ba hereva, bona ta be gado anidia baine gwaurai hedinarai. ²⁸A, bema gado anidia iha-hedinaraina tauna ta na lasi neganai, ia na asi regeregena baine noho dubu lalonai. Ina gabunai, sibona baine hereva bona Dirava baine hereva henia. ²⁹Peroveta taudia rarua eiava tatoi ese hereva ba gwauraidia, bona haida be unu hereva anidia ba gwaurai hedinarai, ³⁰a, bema iha-hedinaraina herevana ta na e helai tauna ta na henia, hari e hereva guna tauna na hereva baine hadokoa. ³¹Badina be iboudiai na peroveta herevadialalopararadia bae gwaurai bona ta ta bae diba bona iboudiai bae goada. ³²Momokani, peroveta laumadia na peroveta taudia e kamonalalopararadia henidiamu. ³³Badina Dirava na dia hegonu Diravana, a Dirava na maino. Helaga taudia iboudiai edia dubu lalonai, ³⁴hahine na dubu lalodialalopararadia basie hereva. Badina be egwaudia taomu basie hereva a bae kamonalalopararadia heheni, taravatu egwaumu hegeregere ai. ³⁵Bema idia na e uramu gau haida badiba negadialalopararadia, idia na rumai adavadialalopararadia bae nanadailaidia, badina una na dia namo hahine na baine herea dubu lalonai. ³⁶Eiava Dirava ena hereva umui emui amo eiava a? Eiava umui sibomui emui ai mo eme kau, a? ³⁷Bema ta na sibona e laloamu, ia na baine peroveta eiava lauma ai eheudaroha neganai, ini na tore henmuimu herevadialalopararadia na baine abidiadae badina ini na Lohiabada ena haheganu umui emui. ³⁸A bema ta ese e dadaraiamu neganai ia danu do ba dadaraia. ³⁹Una dainai, bamogu e, peroveta herevadialalopararadia igwauraidia ba ura henia bada, bona gado idau-idaulalopararadia na basio dadaraidia. ⁴⁰A gau iboudiai ba kara namonamo mai maoromaoro dia ida.

15

¹Ma na hadibalaimuimu, tadikakagu e, sivarai namona na harorolai henimuiva, oabi daeva, lalonai o gini tutuka-tutukamu, ²Unu amo danu mauri vada oabia, bema ba dogoa tao tarika-tarika sivarai namo na harorolai henimuiva, boma laloa tao basioma abia dae kava. ³Badina be na henimuimu gunava hereva badadia lau ese danu na davaria herevana - Keriso e mase na eda kara dika dainai Buka Helaga ai e torea hegeregere, ⁴bona vada e guria, bona dina iha-toinai e hatorea isi Buka Helaga ai e torea hegeregere, ⁵bona Kefa enai danu e hedinarai, bona gwauta ruaosi ediai danu. ⁶Gabe amo e hedinarai tadikakada sinahu-ima mai dikoana ida ediai nega tamona ai. Hutuma na doini e maurimu, a haida na vada e mahuta. ⁷Iakobo enai danu e hedinarai, bona apostolo iboudiai edia ai danu. ⁸Iboudiai muridiai, egu ai e hedinarai, e kara maragina ta bema vara hora kererena ai na heto. ⁹Badina be apostolo iboudiai ese lau e hereagumu, lau na dia namo apostolo ai bae gwaurai, badina be Dirava ena ekalesia oreana na dagedage henia. ¹⁰To Dirava ena hariharibada amo lau ini name heto, bona ena hariharibada danu se henigu kava. Badina, be egu gaukara iboudiai na hekwarahi idia na vada na hereadia, a dia lau mo, a Dirava ena hariharibada na lau ida. ¹¹Una dainai lau eiava idia, ai ese a harorolaiamu bona umui ese oabiadaemu. ¹²Harihari bema Keriso na mase amo e hatorea isi e harorolaiamu, ede heto umui haida na otomamu mase taudia na basie toreisi lou? ¹³To bema mase taudia na basie toreisi lou, Keriso danu basinema tore isi lou; ¹⁴bona bema Keriso na se toreisi, emai haroro na asi anina, bona emui abidadama danu asi anina. ¹⁵Oibe, ai danu vada bema gwauraimai Dirava idiba-koikoina taumai, badine be Dirava ese Keriso e hatorea isi sivaraina a harorolaiava; a gau be mase na asie hatore dia isi. ¹⁶Bema mase basiema hatore dia isi, Keriso danu basinema hatore isi; ¹⁷bona bema Keriso na basinema hatore isi, emui abidadama na asi anina; umui na doini emui kara dika lalodialalopararadia boma noho. ¹⁸Bona bema Keriso lalonai vada e mase taudia danu bema boio. ¹⁹Bema ina mauri ai eda helaro Keriso lalonai,

taunimanima iboudia ai padadiai ita madi mai bogahisida.²⁰ To harihari Keriso na mase amo vada e tore isi, mahuta taudia edia tore isi lou roboana.²¹ Badina be tau ta ena amo mase vada evara, ma tau ta ena amo mase taudia ihatoreisi lou dia vada evara.²² Badina be iboudiai Adamu lalonai vada e mase, Keriso lalonai iboudiai do bae mauri.²³ A ta ta ena nega ai: Keriso toreisi lou roboana, bena ia ena mai ai, Keriso ibadinana taudia.²⁴ Bena dokona baine kau ai, Keriso ese basileia na tamana Dirava baine e henia hanai, una neganai ia ese gaubada iboudiai bona lohia iboundiai bona siahu danu baine hadareredia.²⁵ Badina be ia na do baine lohia ela bona inai na iboudiai na aena henudiai do baine atodia.²⁶ Ena inai orena be mase baine hadarerea.²⁷ Badina be "ia ese gau iboudiai aena henunai vada eatodia." A hereva e tomu "ia ese gau iboudiai vada eato," dibada anina be dia gau iboudiai ia henunai vada eatodia ia, ita tamada na unu seheato toma.²⁸ Hari gau iboudiai ia henunai vada eatodia, natuna danu sibona ia henunai vada eheato, unu amo Dirava na gau iboudiai lalodiai.²⁹ Unu basinema heto, mase daidiai vada e bapatisodia taudia vada ede bema heto? Bema mase taudia basiema hatoredia isi, badina be dahaka idia daidiai e bapatisodiamu?³⁰ Dahaka dainai, ita na nega idoidiai hahedika lalonai ta nohomu?³¹ Lau na dina iboudiai na masemu! na heagilaimuimu dainai na gwau hedinaraimu, Tadikakagu, Keriso Iesu ita eda Lohiabada ena amo na abia.³² Dahaka gau namona egu ai, taunimanima edia lalohadai hegeregere, uda boromadia ida na heatuva Epeso ai? Bema mase na asie toreisimu, "Aita aniani bona aita inuini, badina kerukeruna baita masemu.³³ Basio hekoi: "hebamo dika taudia ese kara namo taudia e hahekwakwanai dia mu.³⁴ Ba noga! kara namo enai! basio kara dika. Badina be umui haida na asi dibamui Dirava - na herevamu umui ihahemaraimu totona.³⁵ To ta baine eto, " Ede bamona ai mase e tore isimu, bona tauanidia ede hetomadia ai ma baema? ³⁶Kavakava taumu! dahaka o hadoa gauna na basine mauri ela bona baine mase.³⁷ Bona dahaka o hadoamu, gauna na gabe ai baine vara anina, to uhe mo - readia wit eiava uhe idau na ta.³⁸ A Dirava ese anina ehenimu ena ura hegeregere, uhe ta ta anidia korikori e henidiamu.³⁹ Hidiho iboudiai danu dia hegeregere. ta be taunimanima hidihodia, ma ta be animal hidihodia, bona ta manu hidihodia, bona ta ma gwarume hidihodia.⁴⁰ Guba gaudia bona tanobada gaudia danu mimia. A guba hairaina be ta, bona tanobada hairaina be ma ta.⁴¹ Dina hairaina be ta, bona hua hairaina ma ta, bona hisiu hairaina ma ta. Badina hisiu ta ta hairaidia danu idau-idau.⁴² Mase taudia edia toreisi lou na unuheto. Mase ai e hadoamu gauna na, toreisi lou ai e maurimu.⁴³ Hemarai ai e hadoamu; hairai ai e hatorea isimu. Manoka-manoka ai e hadoamu; goada ai e hatorea isimu.⁴⁴ Tauanina ai e hadoamu; lauma ai e hatorea isimu. Badina be tauanina e maurimu, lauma tauanina danu e maurimu.⁴⁵ Buka Helaga ai danu e torea, "tau gini gunana Adamu na lauma maurina ai e halaoa." Adamu gini gabena be hahemaui laumana ai vada e halaoa.⁴⁶ A lauma anina na se guna to tauanina, gabe amo lauma anina.⁴⁷ Tau gini gunana na tano amo ema, kahu ai e karaia. Tau iharuana na guba amo ema.⁴⁸ Tanobada taudia be tano amo ema tauna hegeregere, guba taudia be guba amo ema tauna hegeregere.⁴⁹ Tano amo ema tauna oromana vada tabia na heto, guba amo ema tauna oromana do baita abia.⁵⁰ Hari varavargu e, lau na tomamu, hidiho bona rara ese Dirava ena basileia basine abia diba. E masemu gauna ese se masemu gauna basine abia diba.⁵¹ Aitaia! hereva hehunina aina hamaorolaimui: ita iboudai na basita mahuta, to iboudai do baine ha-idauda.⁵² asi kaimana, mata hekunumai tamona ai, kibi gabena ai. Badina be kibi regena ai, mase taudia baine hatoredia isi, basie mase lou, bona ita danu do baine ha-idauda.⁵³ Badina be ina baine pata gauna ese basine pata gauna baine hahedokilaia, bona ina baine mase gauna ese basine mase gauna baine hahedokilaia.⁵⁴ Una dainai baine pata gauna na basine pata gauna baine hadokilaia, bona baine mase gauna na basine mase gauna baine hadokilaia negana ai, e torea gauna baine momokani eto, "kwalimu ese mase vada e hadonoa." ⁵⁵Mase e, emu kwalimu be edeseni ai? Mase e, emu hekori be edeseni ai?⁵⁶ To mase ena hekori na kara dika, bona kara dika ena siahu na taravatu.⁵⁷ A Dirava baita hanamoa, ia ese e hakwalimuda eda Lohiabada Iesu Keriso bagunai!⁵⁸ Una dainai, tadikakagu egu lalokau e, ba gini tutuka, basio marere, Lohiabada ena gaukara lalonai bagoada balaheni nega idoinai, badina be dibamui emui hekwarahi Lohiabada lalonai na asio hekwarahi kavamu.

16

¹Ihaboulaina helaga taudia daidiai, lau ese Galatia dubu dia na tore henidia hegeregere umui danu unu ba kara toma.
²Pura dina ginigunana ai, ta ta ese ohaboumu gaudia haida na bahaboudia, bena lau baina vasi, neganai ihaboulaina gaukara na basio karaia.³ Lau baina ginidae neganai, umui ese oabidia hidi taudia, na mai revareva dia ida baina siaidia bena emui harihari gaudia na balaohai Ierusalem.⁴ Bona bema ina na maoro lau danu baiala neganai, Ida na lau ida baiala.⁵ A launa Makedonia baina hanai murinai dekemui baina vasi. Badina lau na Makedonia do bainala.⁶ To readia launa umui idia baina noho, eiava ina paraka neganai danu, bena umui ese do ba durugu egu laolao dalanai.⁷ Badina launa asi egu ura ta ina hari baina itamui ina egu hanai ai, badina na helaromu umui ida hora taina tama noho, bema Lohiabada ena ura hegeregere.⁸ A lau na Efeso ai baina noho ela bona Pentecose,⁹ badina be iduara badana bona gagaena ta eme hekeho egu ai, bona inaigu danu hutuma.¹⁰ Hari bema Timoteo bainema, neganai baitaia umui na basine gari henimui, badina be ia na Lohiabada ena gaukara e karaiamu, lau hegeregere.¹¹ Una dainai, ta ese basine dadaraia. A ba durua maino dalanai, bena ina lau dekegu bainema, badina be lau ese ia bona mai bamona ida na naridiamu.¹² Hari bamoda Apolo dainai, lau na ura dikamu ia mai bamona ida na umui dekemui bae vasi. A ina na dia ia ena ura ia hari bainema. Ede hetomana, ia na bainema ena ura hegeregere.¹³ Bagima, abidadama ai ba gini auka, eregabe taudia hegeregere dia goada.¹⁴ Emui gaukara iboudia ai na lalokau ai ba kara.¹⁵ A umui na mai dibamui, varavargu e Sefani ena ruma taudia ida be Achaia ena roboa anidia bona sibodia helaga taudia isiaidia ilao henidia na goadamuimu.¹⁶ Umui na idia isiaidia ilao henidia ba tamona bae hekwarahi ina gaukara lalonai.¹⁷ Lau na Sefani ena mai na moale laiamu, bona Fortunetus, bona Achaicus danu, badina idia ese emui duu gaudia iboudiai ehavara henimui.¹⁸ Badina be idia ese lau

laumagu eme akerua, bona umui danu una dainai taunimanima ini bamodia na bavabidia dae.¹⁹ Asia ekalesia oreana na edia hahenamo e siaia emui. Aquila bona Priscilla danu edia hahenamo ehenimuimu Lohiabada lalonai, edia ekalesia oreana edia hanua.²⁰ Tadikaka veridia ese edia hahenamo henimui. Haherahu amo ta ta bahanamolaidia.²¹ Ina hahenamo na lau sibogu imagu amo na tore henimuimu-Paulo.²² Bema taunimanima ta ese Lohiabada se lalokau heniamu, neganai, ia na bema gwau tubu henia eda Lohiabada na e maimu!²³ Eda Lohiabada ena harihari bada ai baine mia.²⁴ Egu lalokau na iboumui ai baine mia Iesu Keriso lalonai baine mia. Amen.

2 Corinthians

1

¹Lau Paulo, Dirava ena ura dainai, Iesu Keriso ena aposetolo taugu ai nala, bona Timoteo, ita tadikakada, ese Dirava ena dubu Korinto ai, bona helaga taumui Akaia tanona idoinai a tore henimuimu. ²Dirava ita Tamada bona ita eda Lohiabada Iesu Keriso ena amo harihari bada bona maino avabia.³Dirava aita imodaia, bona iseda Lohiabada Iesu Keriso Tamana, ita danu Tamada, hebogahisi bona tauhalo Diravana, ⁴ia ese tauhalo e henidamu eda hisihisi iboudiai lalodiai, una dainai ita danu haida ma tauhalo baita henidia edia hisihisi lalodiai, Dirava ese tauhalo e henidamu hegeregere.⁵Badina be Iesu Keriso na ita daidai e hisihisi, una dainai ita eda tauhalo danu Keriso dainai baine vara. ⁶To bema ita na vada ta hisihisi, una na ita eda tauhalo bona hahemaui; bema ita na tauhalo vada ehenida, una na umui emui tauhalo e hahedinaraiamu eda hisihisi iboudiai lalodiai baita haheauka badina ai danu unu a hisihisi toma. ⁷Bona ai emai helaro emui ai na tutuka, dibamai umui danu ai daimai ai ohisihisimu bona tauhalo odavarimu.⁸Tadikakamai, ai na asi auramu umui na basia hadibamui dahaka kerere ai emai ai evara Asia ai. Eha manoka-manoka mai bona emai goada danu eore bona emai mauri danu ato diho. ⁹Momokani vaitani, ai na baia mase, sibomai emai ai asi aheabadadama, to mase taudia eha toredia isimu Diravana enai aheabadadama. ¹⁰Ia ese ehamaui mai una mase dikana amo, bona ma baine hamaui mai. Emai helaro na ia enai atomu dounu ma baine ruhaimai nege, ¹¹ai daimai ai o guriguri heboumu, hahenamo danu taunimanima momo ese Dirava bae henia ai daimai ai, ena hariharibada danu haida edia amo ai eme henimai.¹²Asi a daradaramu dainai aheagimu, badina agwau hedinaraimu Dirava ena ura ai arakamu, ai ese helaga ai gau iboudiai a karadiamu bona Dirava euramu daladiai dia tauani ena aonega ai to Dirava ena hariharibada amo, emui evasimu.

¹³Badina gau haida asi atorediamu emui, to umui ese baduahidia bona ba laloparara lai gaudia. Egu helaro na umui ese boma lalopararalai gugurumu, ¹⁴badina umui ese danu kaha ta ai mo vada olalopararalai maiva, una dainai ai be umui emui heagi badina iseda Lohiabada Iesu, ena lou mai dinana ai bena aina umui emui heagi badina.¹⁵Bona asi emai daradara dainai, lau naurava baina vasi, dekemui gabe ai hahenamo iharuana bavabia, ¹⁶bona ene amo bahanaimu Makedonia, bona ma baina loumai Makedonia amo, bena bo siaigumu Iudea ba laomu.¹⁷Una dainai, vanega na laloava ini bainama neganai, lau na asina takutaku, ani? Eiava lau ese na haeroa gaudia na tauani kahanai, una dainai dekegu ai "Oibe, oibe" bona Lasi, "lasi" hora tamonai, a? ¹⁸To Dirava na abidadama, una dainai ai emai hereva emui ai na dia "Oibe" bona "Lasi."¹⁹Dirava natuna, Iesu Keriso sivaraina a hanamolaia, lau bona Silvanus bona Timoteo ese na dia "Oibe" bona "Lasi" to nega iboudiai "Oibe," Keriso lalonai, ²⁰Dirava ena gwauhamata iboudiai na "Oibe" ia lalonai. Bena ia dainai, "Amen" baita gwauraia Dirava ena hairai dainai.²¹Harihari Dirava ese ita e haginida Keriso lalonai bona ia ese e horoda, ²²ia ese e nevarida bona Lauma Helaga na egwauraia ita kudouda ai baine taruha.²³Dirava hari lalogu dibana, lau na Korinto asi na vasi badina korikori be na bogamui hisi dainai. ²⁴Ai na umui emui abidadama na asi alaoa-ahumu, badina ita na gaukara hebou tauda aita moale bona eda abidadama ai baita gini tutuka.

2 ¹Badina be sibogu lalogu vada name hadaia, lalogu mai hisihisina dainai ma basina lou mai. (ina hereva do baitaia namonamo) ²Bema lau ese lalomui na hahisihisi, daika ese lau be hamoalegu mu, to na hisihisia tauna a?³Bona ina hereva tamona na tore henimuimu, baina vasi neganai, reana unu e moalemu taudia padadiai lalo hisihisi ta basina abia, asina daradaramu, egu moale na umui iboumui ai emui. ⁴Vada na tore henimuiva mai lalo hisihisi bona kudou metau ida bona mai taigu ida, na tore henimui, dia iha hisihisimui to egu iuraheni emui ai badibaia dainai. ⁵A hisihisi e havaraia tauna ese dia lau mo e hahisigu, to dala haida ai umui danu o hisihisi. ⁶Una tau ena dika davana umui ese ogwauraia vada e hegeregere. ⁷Oi ese ena dika ba gwaudia tao bona ba ura henia. Bema lasi, tamona na ba lalo namo henia, ena hisihisi baine bada herea na garina. ⁸Bena na hahegoadamu, oi emu lalokau ia enai ba hahedinaraiamu. ⁹Momokani lau ese na tore henimuiva umui itoho laimui, ini iboudiai na o badinadiamu eiava lasi. ¹⁰Umui ese tau ta ena dika ba gwau tao, lau danu ena dika baina gwau tao. Badina be tau ta ena dika bama gwau tao una na umui daimui ai bona Keriso vairanai bama gwau tao. ¹¹Satani ese basine abida ia ena badina, ai na dibamai ia ena koikoi karadia.¹²Lau nala Troas neganai Keriso sivaraina namona iduarana ta vada e hekeho egu. ¹³Lau na laumagu ai asina laga-ani, badina lau tadikakagu Tito, na asina davaria, unuseni ai, na rakatanidia bena Makedonia nala. ¹⁴Dirava na tanikiu heniamu Keriso lalonai nega iboudiai eguna lai maimu bona eha kwalimumaimu, ia sivaraina bonana namona, gabu idoinai e hedinaraimu. ¹⁵Ita Keriso bonana namona Dirava ena, vada ehamaurida bona e boio taudia padadia amo. ¹⁶Momokani vaitani, ini idia ediai mase bonana ta amo mase e varamu, to kahanai mauri bonana namona ese mauri ehavaraiaimu. Daika be hereadae ini gau ai? ¹⁷Badina ai na dia taunimanima haida hegeregere be Dirava ena hereva na ahoihoilaiaimu mai davana gauna, to mai momokani mai ida, Dirava ese Keriso lalonai ehenimai mu hegeregere Dirava vairanai ahervamu Keriso lalonai.

3

¹Ita be tauramu siboda ma baita ahenamo lou a? Ai na umui emui amo eiava ai emai amo gwaumaoro revarevadia na asi aura henimu, taunimanimu haida ekaramu hegeregere dia, ai be unu heheto a? ²Umui na ai emai revareva, ai kudoumai lalonai vada e torea, taunimanimu ese e duahiamu bona e dibaiaimu; ³unu ese ehahedinaraiaimu umui na Keriso ena revareva ai ese a reguamu, dia ink ai e torea, to mauri Diravana Laumana lalomui ai enohomu ena amo, dia nadi latana etorea, to taunimanimu kudouna lalonai e torea. ⁴Ai emai gini auka Dirava enai na Keriso ena amo e varamu. ⁵Dia basioto ai na diba heherea bona gau iboudiai ai emai amo e emaimu, to ai emai diba na Dirava ena amo, ⁶momokani ia ese diba ehenimai ina herohemaino matamatana igaukaralaina taumai ehalaomai, dia revareva amo to Laumana ena amo. Revareva be ehahemasemu, to Lauma be mauri ehenimu. ⁷Bema hari ina hesiai gaukarana ese mase ehavaraia - nadi ai e torea revarevana - mai hairaina ida ema una dainai Isaraela memero dia na basie roha mamoromaoro Mose vairana, badina be ia vairana hairaina amo danu vada e valahu-valahumu, ⁸benaini ina Lauma gaukarana basinema hururu a? ⁹Badina bema ina hahedika gaukarana na e hururuva, o una kara maoromaoro hairaina be ma ede bema hururu-hururu toma! ¹⁰Momokani vaitani, ina hairai gunana na asine hururumu, badina be ina hairai matamatana ese eme hereaia vaitani. ¹¹Bema ina eveve ohomu hairaina na vada ema, ina hairai mia na be ede baine hururu toma. ¹²Ina helaro emai ai dainai mai goada mai ida gaukara akara gugurumu, ¹³bona dia Mose hegeregere na vairana na muko ai ekoua una dainai Isaraela taudia ese una hururu e veve ohova gauna na asie itaiava. ¹⁴To idia lalodia na eha aukadia. Ema bona ina hari, una muko na donu e miamu gwauhamata gunana iduhainai. Una na do se hekoki badina Iesu Keriso sibona ena amo baine veve oho. ¹⁵Ema bona ina hari, ena be Mose ena buka e duahiamu, donu kudoudia na muko ese ekoudia ahumu. ¹⁶Lohiabada e lou heniamu tauna ena amo una muko na ehe koki ohomu. ¹⁷Lohiabada na Lauma, bona Lohiabada Laumana e nohomu gabuna ai, heruha nege na e miamu. ¹⁸Hari ita iboudai vairada asi muko na Lohiabada hairaina, ta hedinaraiamu bona eha idauda ia heidaidana hairai ta amo hairai ta ita eda Lohiabada Laumana ena amo.

4 ¹Una dainai, ina hesiai lasi gaukarana, bona ina hebogahisi ame abia, kudoumai na asi e hetahamu. ²Ai na hemarai karadia hehundia vada a nege; dibaka karadia asia loalaumu; Dirava ena hereva asia hagegevaiaimu. A hereva momokanidia a gwaurai hedinaraiamu Dirava vairanai; unu amo taunimanimu lalodia a hanamodiamu emai ai. ³Bema ai emai sivarai namona na hehuni, e masemu taudia ediai danu hehuni, ⁴ina nega diravana ese asi ehamomokania mu taudia lalodia na vada ehadiburadia, bona Keriso, hairaina daika be Dirava heida-idana, ena sivarai namo diarina na idia ediai na basine hedinarai. ⁵Badina be aina sibomai asi agwau hedinaraiamu; to Keriso Iesu na Lohiabada, bona ai na ia ena hesiai taumai mo Iesu dainai. ⁶Badina be Dirava na eto, "Diari na dibura amo baine tara," unu amo ai kudou mai e diarimu, bona ina diari amo Dirava hairaina Keriso ena amo e hedinaraiamu. ⁷Ina kohu namona na hodu lalona amo abimu, ina siahu hereadaena na dia ai emai amo to Dirava ena amo. ⁸Emai hisihisi na dala idauidau amo e maimu, to asi adareremu. Ai na adaradaramu to daramai na asie dokomu. ⁹Ai na ehahisihisi maiva to asi a manokava. Ai na ehamoru maiva to asi a darereva. ¹⁰Ai na nega iboudiai Iesu ena mase tauani mai ai ahuaia mu, unu amo Iesu ena mauri na ai ese tauani mai amo ahahedinaraiaimu. ¹¹Badina be dina idoidiai, ai mauri taumai taomai e tore Iesu dainai, Iesu ena mauri ai hidihomai ai baine hedinarai helaoreana. ¹²Una dainai ai lalomai ai mase e gaukaramu, to mauri na umui lalomui ai. ¹³To abidadama laumana vada ta abia hebou, vada e torea hegeregere na ahamomokania una dainai vada na herevalaia. "Ai ese danu ahamomokania mu, una dainai ai ese danu a herevalaiaimu, ¹⁴ta dibamu danu Iesu eha torea isi tauna ese oi bona lau baine hatoreda isi bona umui bona ai Iesu varanai baita ginimu. ¹⁵Ini gau iboudiai na umui daimu ai, una amo Dirava ena harihari badana e habadaiaimu hutuma edia ai unu amo ihanamona baine bada Dirava hairaina danu baine bada herea. ¹⁶Una dainai basita manoka. Ena be, bema ita tauanida na e dika elaomu to ita laumada na dina iboudiai e matamata loulou mu. ¹⁷Ina nega sisina mo, hisihisi taidia ese e butuda taomu una mia hanaihanai hairaina maduna na ese baine govadia ahu. ¹⁸Ai na dia e itamu gaudia aitamu, to seheitamu gaudia aitamu. Badina aitamu gaudia na dia mia hanaihanai gaudia, to asi ta itamu gaudia be mia hanaihanai gaudia.

5

¹Badina ita mai dibada bema ita eda noho gabuna tanobada ai - ta noholaiamu kalaga na - vada e rohoa, Dirava ena amo, mia hanaihanai rumana ta Basileia ai, dia taunimanimu imadia amo e karaia. ²Ina kalaga lalonai ta ganaganamu, ede tama kara toma Basileia dabua na tama karaia, eda ruma ta Dirava ese ehenida kalagana ai, badina aina bae davarimai, mai dabuamai ida. ³Badina be momokani bema ita ese ta hedokilaia, ita na basie davarida gagaeda mo. ⁴Badina momokani ita na do unu una kalaga lalonai, ta ganaganamu, eha maduna damu, badina ita na asi ta uramu basie hadabuada, to bae hadabuada, mauri ese e dikamu tauanina baine hadonoa. ⁵Hari ita ehahegaegaeda tauna na Dirava, ia ese ia Laumana vada e heni. ⁶Una dainai ita na nega iboudiai gogoda bona ta dibamu ita na tauanida ai ta nohomu, ita na Lohiabada ena amo ta raka oho - ⁷Badina ita na abidadama ai ta rakamu, dia roharoha ai - ⁸Ai na asia daradara mu, auramu tauanina ena amo baia raka oho, bona Lohiabada ida baia noho. ⁹Una dainai ai emai, lalohadai badana bina, ini seniai eiava unu seniai ia ihamoalena dainai. ¹⁰Ita iboudai na Keriso ena hahemaoro terona na vairanai baita hedinarai, tata tauanida ai ta kara gaudia baita abidia lou, namo eiava dika. ¹¹Lohiabada imatauraina na badibaia una dainai taunimanimu baita hadibadia ita danu idia lalodia na helaoreamu umui lalomui ai ia badibaia goevagoeva. ¹²Ai na dia sibomai a hegaurai loumu, to ina nega na a henimu ai daimai ai bae heagi, una na umui mai emui haere murimuri kahanai e heagimu taudia ediai, to dia kudoudia ai. ¹³Badina bema ai lalomai na dahuai, una na Dirava mo dainai; bema ai

lalomai na mamaoro una na umui daimui. ¹⁴Badina Keriso ena lalokau ese ehaganimai mu, Oreana bina: ita daidai tau tamona e mase! una dainai iboudiai vada ta mase. ¹⁵Bona ia na ita iboudiai daidai e mase, una dainai e maurimu taudia na dia sibodia ediai e maurimu ai, e mase bona ma e toreisi lou tauna dainai. ¹⁶Una dainai, ina hari amo ela ita ese ta basita haeroa tauani kahanai. Ena be Keriso na tauanai ena dala ai, ta haeroava, a harihari unu dalai na asita haeroamu. ¹⁷Una dainai, bema taunimanima ta na Keriso lalonai ia na tau matamatana. Gau gunadia vada e boio vaitani, aitaia gau iboudiai eme matamata. ¹⁸Gau iboudiai danu Dirava ena amo; ia ese Keriso bagunai ia ida vada e haheroheha maino; bona herohehaino isiaina ilao-henina taumai ai vada e halomai. ¹⁹Herevana binai: Dirava be Keriso lalonai, tanobada taudia ia ida e haheroheha maino, eda kara dika asine lalo tao. Herohehaino herevana binai ai e henimai. ²⁰Ai na Keriso ena hesiai taumai: una dainai a noimuimu, e kara Dirava na ai emai amo egwau lasi mu. Ai na Keriso dainai umui a noimuimu, "Dirava ida bae herohehaino! ²¹Kara dika asi dibana tauna, ita daidai dika ai ehalaoa, unu amo ita na Dirava enai maoromaoro baita abia helaoreana Ia lalonai.

6 ¹Ia ida a gaukara heboumu, taumai ese a haganimuimu Dirava ena hariharibada basio abia kava. ²Ia na etomu, "nega namonai na kamoni henimui, ahemaui negana ai na durumui." Aitaia, hari na nega namona. Hari dina na ahemaui dinana. ³Taunimanima ta asi a hahekwakwanaia, badina emai hesiai gaukarana ihakoikoina garina. ⁴A, emai kara iboudiai lalodiai taunimanima bae diba na Dirava ena hesiai taumai, haheauka lalodiai, hisihisi lalodiai, lalo hisihisi lalodiai, ogogami lalodiai, ⁵hedadaba lalodiai, dibura rumana noho lalodiai, heiri-heiri lalodiai, hekwarahi lalodiai, hegima lalodiai, hitolo lalodiai. ⁶Lalo goevagoeva lalodiai, aonega lalodiai, hebogahisi lalodiai, Lauma Helaga lalonai, lalokau korikori na lalonai, ⁷hereva momokani lalonai, Dirava ena sialu lalonai, kara maoromaoro ena tuari gaudia imamai idibadia ai bona lauridia ai. ⁸E heatolaimai bona e hahemaraimai. Namomai e gwaurai, bona dikamai e gwaurai. Koikoimai e gwaurai gau tamona, ai na momokani. ⁹Asi harimai eto, gau tamona mai harimai. Mase taumai etomu, aitaia gau tamona a maurimu. E dadabamaiva to asi e alamai maseva. ¹⁰Daramai e dokomu, to nega idoinai a moalemu. Ogogami taumai, to hutuma ahatagadiamu. Asi emai gau ta to gau iboudiai na ai emai. ¹¹Korinto taumui e, hereva iboudiai vada ahamaorolaimui, lalomai anidia eme hedinarai emui ai. ¹²Umui na dia ai ese agwaumui taomu, to sibomui ohegwau taomu emui kara daidiai. ¹³Iha hegeregere na dalana na hereva henimuimu natugu na heto, sibomui lalomui ba hahedinarai. ¹⁴Asi e kamonaimu taudia ida basio hebamo. Badina kara maoromaoro bona kara havara ede bae hetura toma? Eiava diari bona dibura ede bae hetura toma? ¹⁵Keriso bona Beliar be ede bae herohehaino toma? Kamoni tauna ahuna be dahaka asi ena kamoni tauna enai. ¹⁶Dirava ena dubu bona kaivakuku be ede bae hatamona dia toma? Badina be ita na Mauri Diravana ena dubu; bona Dirava ehereva eto, "lau na bogaragidiai baina noho bona baina loa eva-eva; lau na edia Dirava ai bainala, bona idia na egu bese ai baela." ¹⁷Una dainai "edia amo bae raka oho, dauhai bae noho," Lohiabada na eherevamu, "miro gauna enai basio daukau, bona baina abimu dae." ¹⁸"Lau na Tamamui ai bainala, bona umui na natugu mamaruanemui bona hahinemui ai baina halaomui," Lohiabada sialu hereadaena eherevamu.

7 ¹Egu lalokau taumui e, ini gwauhamata tame abi dainai, tauanina bona lauma iha dikadia karadia iboudiai lalodia amo na baita hahegoeva, helaga karadia na baita haguguru Dirava igari heninai. ²Bavabimai dae! Ai ese ta asia hadikaiava. Ai ese ta asia hahisiava, ta ena kohu asi abi kavava. ³Lau ese asi na gwau dika henimuimu; badina na hereva guna hegeregere na umui na ai lalomai ai, badina baita mase hebou bona baita mauri hebou. ⁴Egu heabi dadama emui ai na bada herea; na heagilaimui mu. Unu amo ehagoadagu mu. Emi hisihisi lalodia amo egu moale na bada herea. ⁵Badina Makedonia ai akau neganai, tauanimai na asie laga'ani. Dounu, dala idauidau amo eha hegonumaiva - murimurimai be heai, lalomai be gari. ⁶To tauhalo e havaraia mu Diravana ese, Tito ena gini dae ai tauhalo ehenimai, ⁷bona dia Ia ena gini dae mo dainai, a umui ese Ia tauhalo ohenia sivaraina danu. Badina be emui helalo, emui taitai, bona emui gosi lau egu ai, dounu na moale bada. ⁸Egu revareva dainai lalomui na hisihisiva, asi na helalo loumu (to dounu na helalo lou, badina badiba una revareva ese hora sisina mo lalomui eha hisihisiva). ⁹Hari lau na moale mu, dia lalomui e hisihisiva dainai, to emui hisihisi amo helalo kerehai ehavaraia. Badina be emui lalo hisihisi na Dirava ena amo, una dainai dika ta ena amo asie davaria. ¹⁰Badina ina lalo hisihisi na Dirava ena ura unu amo helalo kerehai e havaraia mu bona unu amo hahemaui na evara mu. A tanobada ena lalo hisihisi amo mase e havaraia mu. ¹¹A itaia, badina be ini ehavara henimuiva gaudia, Dirava ena ura dalana amo eha hisihisimuiva negadia: Iurahenina dainai, sibomui nahuamui ba toho ura dikana amo, emui lalo hekwarahi amo, emui gari amo, emui helalo amo, emui gosi amo, emui kerere ihadavadia amo, ini gau iboudiai daidiai umui na sibomui o hahemomokanimu. ¹²Ena be na tore henimui guna, una na dia kerere e karaia tauna dainai, eiava una kerere dainai e hisihisi tauna dainai; to emui iurahenina ai daimai ai, Dirava vairanai baine hedinarai. ¹³Una dainai ai eme hagoada mai. Hari sibomai emi tauhalo latana ma amoale badamu Tito dainai, badina be Ia laumana na umui ese o hamatamataia. ¹⁴A bema gau haida daidiai bama heagilaia umui daimui ai, lau na asina hemarai. Ma kahanai, hereva iboudiai momokani ai aherevalai hegeregere na, Tito iheagilainai vada eme momokani. ¹⁵Bona Ia ena hemami namodia na eme bada herea emui ai, emui kamoni karadia na e lalo taomu, Ia ede oabiadae toma, mai garimui ida bona mai magigi mui ida oabiadae. ¹⁶Na moalemu badina be gau iboudiai daidiai egu hahemomokani umui emui ai.

8

¹Varavara mai e, Dirava ena hariharibada Makedonia dubu dia ahenidia herevana auramu umui danu baia hadibalaimui, ²edia hisihisi ahethona lalonai, edia moale na babada bona edia ogogami amo edia heniheni na babada heherea. ³Badina

be na gwau hedinaraimu edia goada hegeregere ai eheniva, ma edia goada danu e hereaia, mai ura kwalimu dia ida, ⁴mai hahealodia ida, idia ida a noinoi hebouva helaga taudia ihanamodia edia hesiai gaukarana lalonai. ⁵Bona dia ai ese a laloa dalanai ekaiaia, a idia na guna sibodia tauanidia Lohiabada ehenia; bona ai emai ai, Dirava ena ura dainai. ⁶Bena ai ese Tito na ahagodaia, una dainai Ia ese hariharibada karana e matamaia, bona umui emui danu baine hagugurua. ⁷Gau iboudiai umui na so dabu - abidadamai, herevai, aonegai, bona gau iboudiai ikaradai, bona emai iuraheni umui emui ai, una dainai ina hariharibada karana ai bahunuhonu dae, ⁸lau na herevamu na dia hahegani, to latanai umui emui lalokau korikori itohona haida edia goada amo. ⁹Badina be Lohiabada Iesu Keriso ena hariharibada vada o dibaia, bena Ia na ogogami tauna ai ela, ena be Ia na taga, to Ia ena ogogami amo umui na vada ome taga. ¹⁰Una dainai egu lalohadai na ini na hedinarai tomamu, badina be ina na namo emui ai dia una lagani gunanai omatamaia mo, to oura dikava bakaraia. ¹¹A ina gaukara danu ba hagugurua, emui ura okaraia gauna, na baine guguru, emui amo. ¹²Una dainai bema tau ta lalona ehegaegae, harihari gauna iabidaena na ia enai emiamu gauna, dia e dabumu gauna amo. ¹³Ina na dia haida bae laga'ani, a umui be bahisihisi, to iboumui ai na bahegeregere. ¹⁴Hari ina negai, emui ai na momo a idia be lasi dainai heduru euramu, unu hetomana danu idia ediai danu bae momo neganai umui danu ma bae durulaimui, una amo umui na iboumui ai bahegeregere, ¹⁵vada e torea: "Ana mana momo egogo tauna na enai bahu semia, a egogo gadoi tauna ana be vada e davana." ¹⁶To Dirava ta hanamoamu, Ia ese umui daimui ai Tito lalonai iurahenina vada e havaraia. ¹⁷Dia ai emai noinoi mo se abiadae, to mai iurahenina ida sibona ena urai umui dekemui vada evasi. ¹⁸Tadikaka ta ida asiaia vasi dubu iboudiai ese e hanamoava sivarai namo dainai. ¹⁹Dia ina mo, ia danu ta dubu ese e duanaia ai ibamomai ina laolao ai, ina hariharibada karana ai ese aitaia taomu Lohiabada hairaina, bona ai emai hegaegae ihahedinaraina. ²⁰Ai na nahuamai atoho, ta ese basie habadelaimai kerere ina herahia gaukarana ai. ²¹Badina be vairai bae vara gaudia alalodia maorodia be ede dia, dia Lohiabada vairanai mo, to taunimanima vairadai danu ²²Tadikaka ta danu asiaia idia ida, dala momo ai atohoa bona lalona adavaria e ura dikadikamu. To harihari e ura dikadikamu badina be ena hahemomokani umui emui ai dainai. ²³A Tito enai, ia na lau bamogu bona umui emui gaukara hebou tauna ta. Ai tadikaka mai haida, idia na dubu ese e siaidia bona Keriso e matauraimu. ²⁴Una dainai Ekalesia Oreana ese baheitaidia emui iuraheni toana ihamomokanina bona emui heagilai ihahedinaraina.

9 ¹Ina hari, helaga taudia edia gaukara dainai na asi badina baina tore henidia. ²Badina be emui hegaegae na dibagu, Makedonia taudia vairadai na heagilaimui, nato Akaia na lagani gunana ai ehegaegae, bona emui gosi na idia haida danu eha goadalaia. ³A varavarada na siaidia vasi, a heagilaimuimu, hari be gau asi aninai bae halaoa, una dainai umui na bahegaegae, na herevalaimui hegeregere ai. ⁴Hegeregere, bema Makedonia taudia haida ida baia vasi to umui na do sohegaegae neganai, ai na baia hemarai - umui na ma basia hereva laimui lou - unu bamona. ⁵Bena na laloa varavarada baina noidia idia na bae vasi guna, emui hari-hari gauna ogwaurai hamata gauna bae haboua hegaegae. Ina dala ai, una na baita hahegaegae hahenamo gauna, to dia hahegugu dalanai. ⁶Hari ini na gwau tomamu, baine hado gadoi tauna ese baine gei gadoi, bona mai hahenamona ida e hadomu tauna danu, hahenamo lalonai ma baine geigei. ⁷Ta ta ena heni heni na kudouna amo baine heni, dia hahedua ai eiava dia haheganai, badina Dirava na mai lalonamona ida ehenimu tauna na eura heniamu. ⁸Bona Dirava ena hariharibada oi latamu ai na baine bada, unu amo, gau iboudiai lalodiai, emu dabu gabudiai, emu gaukara namodia iboudiai do baine ha bada laimu. ⁹Badina be vada etorea: "Ia na e gigi momo, ogogami taudia ehenidia ena maoro-maoro na ehesiri hanai-hanaimu." ¹⁰Uhe bona aniani e henimu Dirava ese uhe baine henimui bona baine hatubu; emui kara maoromaoro huahuadia danu baine hahoho. ¹¹Ia ese baine harihari henimui, bena umui danu ba harihari; bena ai daimai ai Dirava ihanamolaina baine bada. ¹²Badina be ina heni-heni gaukarana na dia helaga taudia ihenidiai mo dainai, a Dirava ihanamolaina danu baine bada herea. ¹³Badina be ini gaukarana ihamomokanidia, idia ese Dirava e hanamoamu badina umui emui kamoni ihahedinarainai Keriso sivaraina namona o herahia laimu idia ediai bona taunimanima idoidiai ediai. ¹⁴Bona idia na umui daimui ai e guri-gurimu, bona e lalomuimu badina be Dirava ena hariharibada hereadaena na umui latamui ai. ¹⁵Dirava ta hanamoamu badina ena herahia na asi ihahegeregere!

10 ¹Lau, Paulo, sibogu umui na noimuimu, Keriso ena manau bona manada daidiai. Lau na manau dekemui ai na nohomu, to bema dauhai nama noho lau na mai goadagu! ²Na noimuimu, bema lau na umui ida negadia ai, lau na gau ta garina basina gari, lau na baina goada ena be haida ese egwauraimu ai na tauani ena dala ai arakamu. ³Ena be tau-anina ena dala ai a rakamu, to emai tuari na dia tau-anina ena amo, ⁴badina be emai tuari gaudia na dia tau-anina ena, a Dirava ena amo emaimu siahuna, kohoro irohodia bona helogo dika dia alaodia ahumu, ⁵bona Dirava idibanai e laoa ahumu gaudia iboudiai e haketodiamu, lalohadai iboudiai e guidiamu Keriso ikamonai henina ai. ⁶Bona aina hegaegae ini gwau ede-edu, iboudiai davadia baia heni ela bona emui kamoni na baine guguru. ⁷Ini evaramu gaudia na vada oitadiamu. Bema ta baine eto ia na Keriso ena, ia sibona ese ma baine haeroa lou, ia hegeregere ita danu Keriso ena. ⁸Bema lau na emai siahu baiama heagi laia, unu na Lohiabada ese ilarebamui helaoreana, a dia iha dikamui, lau na basinama hemarai, ⁹egu revareva na basi oto ihagarimui dainai na tore henimuimu. ¹⁰Momokani, haida etomu, "ena revareva na mai metaudia bona mai siahudia, a tau-anina na manoka, bona ena hereva danu asi anidia." ¹¹Mani ta ese baine haeroa, ena be ai na dia umui ida, to emai hereva na revareva ai dekemui evasimu, bona bema dekemui ai danu unu baiama kara toma. ¹²Ai na asi a tomamu sibodia ehahenamomu taudia hegeregere, to sibodia e hahetohomu, sibodia e hahegeregere, bona asi edia laloparara. ¹³Ai na, ede heto, basia heagi kava a Dirava ese ehenimai hahetohona benai emui ai vada ekau. ¹⁴Emai hahetoho na asi aha-lataia, ena be asi abimui dae to sivarai namona na avasi laia. ¹⁵Emai

gaukara hetoana basia heagilaia, aheromu, emui abidadama na lalomui baine tubu hetoana do baine daudau. ¹⁶Bena unu kahadia tanodia ai sivarai namo do baia harorolaia, a idauna ta ena gaukara basia heagilaia. ¹⁷A ta baine heagi, ia ese Lohiabada lalonai baine heagi. ¹⁸Badina be sibona ehahenamomu tauna na sibona namona basine gwaurai a Lohiabada ese ehanamoamu tauna hari.

11

¹Launa na ura mu egu kavakava sina taina ba haheauka laia, to oi na momokani lau o haheauka henigumu. ²Badina launa na maduna, Dirava ena badu hegeregere ai na badumu. Badina, launa na gwauhamata oina tau tamona adavana, Keriso baina henia, hane ulato do serami hebou. ³To launa na garimu, gaigai ese Eva e koia hegeregere ai, helalo idauidau ese bae koimu, bena emui lalokau momokanina bona goevadaena, Keriso enai ba rakatania, ⁴bema ta ese Iesu idauna bema gwaurai, dia ia ese egwauraiava hegeregere ai eia lauma idauna ta boma abia dae, dia sivarai namo oabiadae, lau na ta asi na abidia dae umui na o kara maoro. ⁵Na laloamu lau na dia unu Apostolo badadia ida hegeregere. ⁶Ena be lau na hereva igwauraidia, lau na dia hegeregere, to lalogu ena diari na dia unu heto, dala iboudiai lalodiai, na hahedinarai. ⁷Lau be na karadika, sibogu na hahemanau, umui bae imodaimui dainai, Dirava sivaraina namona na harorolai henimuiva, asi davagu. Na kerere a? badina be lau ese ura kwalimu ai Dirava ena sivarai namona, na harorolaiamu umui emui. ⁸E kara launa Dubu haida na henao dia edia amo davagu na abi badina ina hesiai gaukarana umui daimui ai. ⁹Dekemui ai na nohova negana ai, gau na urava negadai na ta asi na ha metaua. Badina varavarada Makedonia amo ema taudia ese egu ura gaudia iboudiai e haguguru dia. Ini gau iboudiai lalodiai, lau na sibogu na hedogotaova asi na urava umui baina hametaumui, bona lau na dounu unu baina kara toma. ¹⁰Keriso ena hereva momokanina lalogu ai, una dainai egu heagi regena na basine ore Akaia tanona idoinai lalonai. ¹¹Dahaka dainai? badina asina lalokau henimuimu a? Dirava na dibana, na lalokau henimuimu! ¹²Bona dahaka na karamu karadia dounu baina kara, una dainai lau ese ini nega namodia e uramu taudia edia amo baina abidia oho unu amo idia na baita gwauraidia, ita hegeregere dahaka e heagilaimu lalodia amo. ¹³Badina be idia na Apostolo koikoidia, gaukara koikoi taudia, sibodia Keriso ena Apostolo ai e hahelaomu. ¹⁴Bona basita hoalaidia, badina be Satani danu sibona diari aneruna ta ai e hahelao. ¹⁵Una dainai, edia hesiai taudia danu sibodia kara maoromaoro taudia ai e hahelaomu, dokonai edia kara hegeregere diai ahudia bae abi. ¹⁶Na gwau loumu: ta ese basine laloa lau na kavakava. A bema unu bakara toma, boma abigudae danu, kavakava tauna na heto bena unu amo lau danu taina bama heagi. ¹⁷Dahaka na herevalaiamu na, lau na herevamu na dia Lohiabada bema hereva dalana, to ina kavakava lalona amo, na heagi momokanimu. ¹⁸Badina hutuma na tauani kahanai e heagimu, lau danu dounu baina heagi. ¹⁹Badina umui, mai aonegamui, na mai moalemui ida kavakava taudia ida bagini hebou. ²⁰Una dainai umui na bagini hebou, bema haida ese hesiai taumui bae halaomui, bema haida ese bae gaukaralaimui, bema haida ese bae biagumui, bema ta na sibona e hahebadamu, eia bema ta ese vairamu baine pataia. ²¹Egu hemarai amo, na gwaumu aina mamanoka-mamanoka unu daidiai! Ede-heto, edena dala ai ta bema heagi - na hereva kavamu - lau danu baina heagi. ²²Idia na Heberu taudia a? Lau danu. Idia na Isaraela taudia a? Lau danu. Idia na Abrahamo garana a? Lau danu. ²³Idia na Keriso ena hesiai taudia a? (Lau na herevamu na e kara kava ta na heto.) Na hekwarahi bada, dibura ruma ai e kougu loulouva, e dadabagu dikadikava, nega momo masegu danu e kahira kahirava. ²⁴Nega ima Iuda taudia ese hekwadi "toi-ahui taurahani ta" amo e kwadigu. ²⁵Nega toi auri amo e kwadigu. Nega ta nadi amo e hodogu. Nega toi nagui lagatoidia na e dika. hanuaboi ta dina ta gadobada ai na hure. ²⁶Nega momo na laolao, sinavai dikadika dia amo, henao-henao taudia edia hahedika amo, dadi-dadi taudia edia hahedika amo, idau bese taudia edia hahedika amo, hanua lalodia dikadika dia amo, tano gagaedia dikadika dia amo, gadobada dikadika dia amo, varavara koikoi dia edia hahedika amo. ²⁷Na hekwarahimu, taugu e boeramu, na noga rani lou-loumu, e hitologumu bona na ranu masemu, na anivagamu, keru ese eha masegumu, dabua ai na dabumu. ²⁸Dia ini tau-anina gaudia mo, to lalogu danu dina iboudiai e hekwarahimu, Ekalesia oreadia iregudia ai. ²⁹Daika na manoka, bona lau na manokamu? Daika be e hekwarahimu, bona lau lalogu se siahumu? ³⁰Bema lau bama heagi, lau na egu manoka-manoka bama heagi laia. ³¹Dirava eda Lohiabada Iesu Keriso tamana, bae imodaia hanai-hanai Diravana, ia hari dibana lau na asi na koikoimu! ³²Damaseko ai Areta Pavapavana ena Gavana tauna ese Damaseko hanuana e gimaia, lau baine guigu eto. ³³To e tu'ugu dobi bosea lalonai e udagu magu gaba-mauruna, bena na heau mauri, ia imana lalona amo.

12

¹A bama heagi na hegeregere, to asi anina. A Lohiabada ena amo matahanai bona ihahedinaraina herevadia hari dounu baina gwauraidia hedinarai. ²Lau dibagu tau ta Keriso lalonai, ia na lagani gwauta-hani vada ela-ia be tauanina lalonai, lau na asi dibagu, eia tauanina murimurina, lau na asi dibagu, Dirava sibona hari mai dibana-una tau na e dae laia guba ihatoina. ³Bona lau mai dibagu una tau - tauanina lalonai eia tauanina murimurina, lau na asi dibagu, Dirava sibona mai dibana - ⁴ia na e dae laia paradaiso lalonai bona e kamoni herevadia na taunimanima ese basie hereva laidia diba. ⁵Una tau dainai lau na baina heagi. To lau sibogu daiguai na basina heagi, a egu manoka-manoka hari. ⁶Bema hegeregere lau baina ura heagi, lau na basina kavakava, badina launa hereva momokani na herevalaiamu. To launa na heveri taomu ini gau amo, bena ta ese lau basine lalohadai laigu bada a egu ai o itamu gaudia bona o kamonaimu gaudia hari. ⁷Una dainai, lau na basina hekokoroku egu matahanai dainai, ginigini ta e henigu tauanigu lalonai - una na satani ena hesiai tauna - lau baine ha hisihisigu, bena unu amo lau na basina hekokoroku. ⁸Nega hatoi Lohiabada na noia una gau na egu amo baine abia oho. ⁹To ia ese e hamaorogu, "Egu hariharibada na oi emu ai baine davana, badina be

manoka-manoka ai lau egu siahu na herea." Bena lau na mai moalegu ida egu manoka-manoka baina heagilaia, bena Keriso ena siahu na lau egu ai baine mia. ¹⁰Una dainai Keriso baina hamoalea egu manoka-manoka lalodiai, hegwau heni ai, kerere ai, hahedika negadiai bona dika iboudiai lalodiai, badina be na manoka-manokamu neganai, na goadamu. ¹¹Launa vada na kavakava! Emui hahegugu dainai, a umui ese na boma hanamogu. Lau na ene "Apostolo-hereadaedia" ese na sehereagumu, ena be lau na gau ta lasi. ¹²Momokani, Apostolo toadia, toa badadia umui lalomui ai a kara hesiriuva - toa bona hoa karadia. ¹³Edena dala ai umui na sehaeromui namonamo dubu haida padadiai, a lau ese umui na asi na hametaumui? Egu kerere na agwau dia tao! ¹⁴Aitaia! lau na hegaegae nega ihatoina ma baina vasi dekemu, bona basina ha metaumui. Badina lau na umui emui ai gauta asina tahuamu, to umui hari. Badina be natu ese tama bona sina edia basie habou. ¹⁵Hari-hari launa mai moalegu ida tau-anigu baina heni bona baina heni guguru umui laumamui daidiai. Bema lau ese baina lalokau henimui bada, umui ese lau be ba lalokau henigu maragi a? ¹⁶Bema unu baine heto neganai, dia lau ese umui asina ha metaumuimu, to, dibaka taugu dainai, koikoi ai name davarimui. ¹⁷Lau ese umui na asi na dibaganimui dekemui na siaidia vasi taudia daidiai, lau be unu na kara toma a? ¹⁸Tito na noia baine vasi dekemui, bona tadikaka ta danu ia ida na siaidia. Tito ese e dibaganimui a? ai be lauma tamona lalonai asi a rakamu a? ai be ae gabu tamona lalonai asi a rakamu a? ¹⁹Umui ese o laloamu ai raruosi na umui emui amo a helaoahumu a? Ai na Dirava vairanai bona Keriso lalonai a herevamu, ini gau iboudiai, emai lalokau taumui, umui ihagoada laimui. ²⁰Bona launa na garimu bema ba vasimu neganai baina vasi davarimui, dia lau egu ura hegeregerenai, bona lau danu umui ese bavasi davarigu dia umui emui ura hegeregerenai; reana padamui ai heai, mama, gwau tubu, badu, a heparara, hahebade koikoi, maumau, hekokoroku, bona hahebadu karadia. ²¹Sedira bema lau baina vasi lou neganai, egu Dirava ese baine ha maragi-maragigu vairamui ai, bona karadika taudia hutuma taidia baina tai, badina be edia mata bodaga, heuda hanai, edia lebu-lebu karadia amo, asie helalo-kerehaimu daidiai.

13 ¹Ina na nega ihatoina na vasimu dekemui, "emui hahebade herevadia iboudiai rarua eiava tatoi ese bae hamomokani dia." ²Vada na hereva guna e kara dikava taudia bona haida danu nega iharuana na vasi neganai, bona ma na gwau loumu: baina vasi lou neganai, basina matadia rea. ³Aina hamaoromui badina be toa otahumu Keriso be edena dala ai lau egu amo e herevamu. Ia na dia manoka emui ai. To, Ia na siahu herea umui lalomui ai. ⁴Badina be Ia na manoka-manoka dainai eha satauroa, to Dirava ena siahu dainai Ia na emaurimu. Badina ita danu manoka Ia lalonai, bona ita na baita mauri Ia ida Dirava ena siahu ai umui latamui ai. ⁵Sibomui a hetahu bona baheita umui na mai emui abidadama. Sibomui a hetoho. Umui so dibamu Keriso na lalomui ai a? - bema lasi, umui na o moru ina hahetoho ai. ⁶Bona na heabidadamamu umui na bodibamu aina asi a moru ina a hetoho ai. ⁷Harihari ai na Dirava a guriamu umui na basio kara kerere. Lau na asi na gurigurimu e kara ita una e hedinarai a hetohona amo na vada ta kwalimu. Unu hetomana Launa na gurigurimu kara maorona hari boma karaia, enabe ita na ehahedinariamui una hahetoamu na ta moru. ⁸Badina ita na gauta basita kara heniamu to hereva momokani sibona. ⁹A ita na ta moalemu eda manoka negadiai bona umui na gogoada. Aina ma a gurigurimu umui ba guguru dainai. ¹⁰Ini gau na torediamui badina lau na dia umui bogaragimui ai, bema lau na umui bogaragimui ai, lau na basina kara dage-dage, egu siahu igaukaralainai - Lohiabada ese e henigu dainai, una dainai baina haginimui tutuka bona basina ha ketomui. ¹¹Dokona binai, Tadikaka, ba moale! gau ihanamodia dainai ba gaukara, ba hahegoada heheni, lalomui ba hatamona, maino ai ba noho. Dirava ena lalokau bona maino na umui ida. ¹²Mai helagamui ida ba haherahu. ¹³E abi-dadamamu taudia iboudiai ese umui na e hanamomuimu. ¹⁴Lohiabada Iesu Keriso ena hariharibada, Dirava ena lalokau, bona Lauma Helaga ena hebamo na iboumui ai emui ai baine mia. 2Cor (Chpt 1 - 13)

General Checking completed, ready for editing.

Galatians

1

¹Lau Paulo na apostolo tauna ta, dia taunimanima edia amo eiava tau ta dainai apostolo dagina na abia, to Iesu Keriso bona Tamada, Iesu Keriso mase amo e hatoreaisi Diravana lalodia amo na abia, - ²bona e bamogu taudia iboudiai ese Galatia ekalesia oreadia taunimaniamui a tore henimuimu, atomamu, ³harihari-bada bona maino Tamada Dirava ena amo bona eda Lohiabada Iesu Keriso ena amo avabi. ⁴Iesu Keriso sibona ese tauanina e heni eda kara dika daidiai, ina hegeregerena, ⁵hairai idoinai na Ia ena nega hanaihanai. Amen. ⁶Lau na name hoa, badina be umui na o raka-oho haragamu, Keriso ena hariharibada dainai e boirimui Diravana ena amo. Lau na name hoa badina umui na sivarai-namo idauna ta ma o raka heniamu, ⁷dia sivarai-namo ta ma mia dainai, to tatau haida ese eha hekwakwanai muimu bona e uramu Keriso ena sivarai-namo na baha idaua. ⁸To ena be ai eiava guba anerudia ta ese ma sivarai-namo idauna ta, dia a harorolai henimui sivarai-namona, una taunimanima eiava aneru na heuduguirai enai aine kau. ⁹Ahamaoromui guna bona ma na hamaoromui loumu, "Bema ta ese sivari-namo idauna ta e harorolai henimuimu, dia umui ese o abia sivarai-namona, una taunimanima na heudugurai aine abi." ¹⁰Lau be taunimanima ena ahemomokani eiava Dirava ena ahemomokani na tahuamu? Lau be na uramu taunimanima baina hamoaledia? Bema lau na doini na uramu taunimanima baina hamoaledia neganai, lau na dia Keriso ena hesiai tauna. ¹¹Badina be, tadikakagu, na uramu ba diba lau ese na harorolaia sivarai-namona na dia taunimanima edia sivarai-namona. ¹²Ina sivarai-namo na dia taunimanima ta ena amo na abia bona dia taunimanima ta ese eha dibalaigu. ¹³Umui na vada o kamoni lau egu mauri gunana Iuda taudia edia abidadama lalonai; lau ese Dirava ena dubu naha hisihisiava bona na urava baina hadikaia rohoroho. ¹⁴Iuda taudia edia abidadama dalana ai lau na nala daudau herea egu bese padadiai bona lau egu uru taudia danu na hanaidia.

una be lau egu heuradai auka-auka toana senegu edia kara ibadinadai.¹⁵ A to, lau do sinagu bogana ai, vada e atogu-tabe hegaegae negana ai bona ena hariharibada lalonai vada e boirigu,¹⁶ Diravana ena lalo-namo Natuna vada e hahedinarai henigu, Ia baina harorolaia idau-bese padadai totona, lau ese na hidio bona rara (tauani) enai asi na badi haragaharaga.¹⁷ Lau na asi nala Ieruselema ai apostolo ginigunadia ediai asi naha badi. Lasi, lau na nala Arabia bema ma na lou Damaseko.¹⁸ Bena lagani toi murinai nala Ieruselema, Kepas (Petero) dekenai dina gwauta-ima na noho.¹⁹ To lau ese aposotolo haida na asi na itadia, a Iakobo, Lohiabada tadina mo na itaia.²⁰ Na tore henimui herevadia lalodia ai na hamaoromui hedinaraimu Dirava vairanai, lau na asina koikoimu.²¹ Bena ma nala Siria bona Silisia tanobadadia.²² Keriso ena dubu Iudea ai taudia ese lau be do asie dibagu.²³ Idia ese e kamonaia herevana na, "Guna eha hisihisidava tauna na ina harihari vada guna e urava baine hadikaia rohoroho abidadamana e haroro laiamu.²⁴ Bena idia ese Dirava hairaina e heato laia lau daigu ai.

2¹ Bena ma lagani gwauta-hani e ore murinai Banaba ida Ieruselema ala; Tito danu ai ida ala.² Egu ai e hedinarai gauna ta dainai nala bona bese-idauidau vairadai na harorolaia sivarai-namona baina atoa lasi idia vairadai dainai. Mai ladadia taudia na helavahu ai na hereva henidia, badina be asi na urava na heaulaiamu heauna - na asi anina ai bainela.³ To Tito Helene tauna, lau ida unusenai ai tauna, danu asie hagugua peritome baine abi.⁴ Hetadikaka-korikori taudia na hehuniai ai e itamaiva, ai emai heruha-nege Keriso lalonai na e hasinadoava."Idia edia ura na ai na igui-taudia ai bae halaomai;⁵ to ai na nega sisina danu asia manoka edia ura iabidaena dalanai, bema hereva momokani sivarai-namo lalonai na umui emui ai baine mia hesiriu.⁶ To egu haerohaero ai unu mai ladadia taudia (eiaiva idia na taunimanima ede hetoma dia na dia gau badana lau egu ai badina Dirava na taunimanima hetoadia se karamu); unu mai ladadia taudia ese gau ta ma egu ai asie atoa kau.⁷ To idia ese e itaia gauna na asie peritomeidia daidiai sivarai-namo na lau eha badilaigu; unu hetomana Petero na e peritomeidia taudia daidiai sivarai-namo eha badilaia.⁸ Badina be e peritomea taudia daidiai Petero lalonai e gaukara bona apostolo gaukarana eha badilaia hegeregere, bese-idauidau daidiai danu Dirava e gaukara lau lalogu ai.⁹ Iakobo, Kepas bona Ioane vada e abidiadae bona dubu e haginia taudia ese lau e henigu hariharibadana e lalo-pararalaia neganai, idia ese imadia idibana lau bona Banaba e henimai, edia hevaravara toana. Ini e kara toma badina na ai be bese-idauidau dekedie baiala bona idia be e peritomeidia taudia dekedie baela.¹⁰ E noinoi mo, ai ese ologami taudia baia lalodia tao; una na lau ese na uralaia dikadika baina karaia gaukarana.¹¹ To Kepas ema Antioka neganai lau ese asina abiadae badina ia na e gwaauraiava e kerere.¹² Tatau haida Iakobo dekena amo do asi ema ai, Kepas be bese-idauidau taudia haida ida e aninai hebouva. To ini tatau ema neganai, ia na unu kara eha doko bona bese-idauidau taudia dekedie amo e siriva. Ia na peritome e urahenia aukava taudia garidia e gariva.¹³ Unu Iuda taudia nohodia danu ina koikoi karana e karaiava. Matona Banaba danu idia edia koikoi karana ese e hakaua oho.¹⁴ To lau ese edia kara na itaia na dia sivarai-namo hereva-momokanina se badinaia neganai, idia iboudiai vairadai Kepas na hamaoroa nato, "Bema oi na Iuda tauna to bese-idauidau tauna bamona o maurimu bona dia Iuda tauna bamona, ede bamona oi ese bese-idauidau tauna o haduaiamu Iuda taudia edia mauri dalana ai baine mauri?"¹⁵ Ita danu Iuda varadia bona dia bese-idauidau edia karadika taudia,¹⁶ to dounu ita dibada na taunimanima ta maoro ai se atoamu Taravatu gaukaradia daidiai, to abidadama Keriso Iesu enai dainai. Ita danu Keriso Iesu enai ta heabidadama badina abidadama Keriso enai dainai maoro ai bae atoda bona dia Taravatu gaukaradia daidiai. Badina be Taravatu ibadinana gaukaradia amo na taunimanima ta maoro ai basie atoa.¹⁷ To bema ita na Keriso lalonai maoro ai bae atoda ta tahuamu badina ita danu e davarida karadika tauda, una anina be Keriso be karadika e hahegoadalaia? Lasi vaitani!¹⁸ Badina be bema guna na hadika-rohoroho gaudia ma baina haginidia lou neganai, lau sibogu na hahemomokanimu lau na Taravatu ihamakohina tauna.¹⁹ Badina be Taravatu dainai Taravatu enai vada na mase bona Dirava dainai do baina mauri.²⁰ Lau na Keriso ida vada eha sataurogu. Ina harihari na dia lau na maurimu to Keriso lau lalogu ai e maurimu. Ina harihari tauani ai na maurilaia maurina na, heabidadama Dirava Ntauna enai na maurilaia. Dirava Natuna ese e lalokau henigu bona lau daigu ai sibona tauanina e heni.²¹ Lau ese Dirava ena hariharibada asi na atoa tabemu, badina be bema kara maoromaoro na Taravatu lalona amo baine heabi neganai, Keriso na asi anina ai vada e mase.

3

¹ Galatia taumui na kakavakava! Daika ese e vadarimui Iesu Keriso na e hasatauroa na taunimanima iboudiai vairadai e hahutalaidia, umui mata dogadogamui ai.² Emui amo na uramu baina dibaia gauna tamona na ina: Umui ese Lauma be taravatu gaukaradia daidiai oabia eiava o kamonaia gauna o abiadae (abidadamalaia) dainai? ³ Umui be kavakava herea? Lauma enai o hematama, umui be tauani enai bo haguguruamu? Emui hisihisi gaudia momo be vada asi anidia - bema momokani, asi anidia neganai.⁴ Lauma e henimui tauna bona padamui ai hoa karadia e karava tauna be taravatu gaukaradia dainai eiava heabidadama ai o kamonaia dainai.⁵ Abraham ese Dirava e abidadama heniava bona "kara maoromaoro tauna e gwaurai" bamona,⁶ una hegeregere ai ba diba maoro heabidadama taudia na Abraham natuna.⁷ Revareva helagadia ese vada e roha vaira lao ai e itaia Dirava ese idau bese [dia Israel besedia] maorodia baine gwaurai abidadama dainai, ese guna sivarai namo na Abraham e harorolai henia, e gwauva, "Oi lalomu amo tanobada iboudiai hahenamo do bae abi."⁸ Una dainai, heabidadama taudia na Abraham heabidadama tauna ida vada e hanamodia.⁹ Taravatu gaukaradia ai e helalotaomu taudia iboudiai na heudugurai henunai, bona vada e hetore, :Taravatu bukana ai e tore herevadia asie badinamu bona asie karamu taudia iboudiai na vada e uduguiraidia." ¹¹ Ina harihari na vada hedinarai, taunimanima ta Dirava vairana ai dia maoro taravatu dainai, badina be kara maoromaoro taudia na

abidadama dainai do bae mauri. ¹²To taravatu na dia abidadama amo, to vaia, "Taravatu gaukaradia e karamu tauna na unu gauka daidiai baine mauri." ¹³Keriso ese taravatu ena heudugurirai amo e hoilaida dalana na Ia na heudugurai ai ela ita daidai ai - badina be vada e hetore, :Au ai ehetaudae taudia iboudiai na e heudugurai" - ¹⁴una dainai Abraham ena hahenamo na idau bese (dia Israel taudia) edia baine kau Keriso Iesu lalonai, una dainai Lauma gwauhamatana na abidadama dainai do baita abia. ¹⁵Tadikakagu taunimanima edia hereva dalanai aina hereva. Taunimanima ese e karamu una hebou gwauahuna ai na taunimanima ta ese ma basine atoa tabe [laia oho] eiava latanai na gau ta vasine atoa kau, bema taravatu ai vada e haginia vaitani neganai. ¹⁶Gwauhamata be Abraham mai vevena ta ida e hanamolai henidia. Ina na dia asine tomamu, "vevena momo e henidia", to tamona mo e gwauraiamu, "bona oi vevemu", tauna na Keriso. ¹⁷Egu hereva anina na ina: ina taravatu, lagani 430 murinai ema taravatunaese Dirava ese e haginia guna gwauahuna na asine atoa tabemu [laia ohomi]. ¹⁸Badina be bema henihanai (maorona) na taravatu dainai e maimu neganai, una anina na vada dia gwauhamata dainai e maimu. Gau tamona, Dirava ese na Abraham e henia gwauhamata ta ai. ¹⁹O vada taravatu ena gauka be dahaka? Taravatu na e atoa kau badina be kara havara dainai, bona ela bona Abraham vevena, e gwauhamatalaia tauna na do bainema. Taravatu na ihuanai-gini tauna ta ese gaukaralaiava aneru edia amo. ²⁰Ihuanai gini-tauna anina na dia taunimanima momo asine gwauraidiamu, to Dirava na tamona. ²¹Una anina be taravatu na Dirava ena gwauhamata e tataia ahumu? Lasi ona lasi vaitani! Badina be bema taravatu ta na e heni, mauri baine heni dainai, una anina na kara maoromaoro na mo momokani vaitani bema mai, taravatu dainai. ²²To hereva helagadia ese gau iboudiai kara dika henuna ai e magudia ahu. Dirava na ini e kara toma bona unu amo hahemauro Iesu Keriso enai heabidadamana amo gwauhamata na e heabidadama taudia do baine henidia. ²³Heabidadama do asinema ai, ita na e dabaida tao taravatu henunai, e maguda ahu ela bona abidadama ai baine hedinarai. ²⁴Bena taravatu ita e reguda ela ela bona Keriso ema, bena ita na abidadama dainai maoroda baine gwaurai. ²⁵To harihari heabidadama vada ema dainai ita na vada dia heregu taravatu henunai. ²⁶Badina be umui iboumu ai na Dirava natuna, Keriso Iesu enai o heabidadama bagunai. ²⁷Badina be Keriso lalonai e habapatisomui taumui iboumu ai ese Keriso vada o dabuaia bamona o hahedokilaia. ²⁸Harihari na Jew eiava Helene na vada lasi, eguia tauna eiava e heruha tauna danu vada lasi, maruane eiava hahine danu lasi, badina umui iboumu ai na hegeregere Keriso Iesu lalonai. ²⁹Una dainai bema oi na Keriso ena, oi na Abraham vevena, bona dihina gwauhamata dainai. Translation note: Descendant - vevena, Heir - dihina, slave - e guia, free - e ruhaia tauna.

4

¹Lau na tomamu, dihi ta dounu mero maragina neganai, ia na hesiai tauna ida hegeregere, ena be ia na tano mai kohudia iboudiai na ia biagu. ²To ia na dounu heregu taudia bona badi-taudia henudia ai ela bona tamana ese e abia hidi dinana. ³Unu hetomana, ita danu do maragida neganai, ita na tanobada e hadaia lalohadaina ai vada e guida. ⁴To nega badana vada e hori neganai, Dirava ese natuna e siaia, hahine ta ena amo e vara, taravatu henunai baine vara. ⁵Ia ini e kara toma na taravatu henuna ai e nohomu taudia baine henidia lou dainai, bena ita na Ia natuna ai baine halaoda. ⁶Bona umui na natu dainai, Dirava ese natuna ena Lauma na e siaia ita kudouda ai, e boimu e tomamu, "Aba, Tamagu." ⁷Una dainai oi na dia e guia tauna (hesiai tauna), to natu ta, bona bema natu ta neganai, oi na dihi to Dirava ena amo danu. ⁸To una nega ai, una Dirava do asie dibaia neganai; umui na unu asi edia siahua bona dia dirava taudia ese eguidia taudia ai e haboumuiva. ⁹To harihari umui ese Dirava vada ome dibaia, eiava vada Dirava ese e dibamui, ede bamona ai umui na ma unu lalohadai ese goadadia bona asi anidia na e lou henidiamu? Umui be o uramu ba hegui lou? ¹⁰Umui ese dina haida, bona hua matamatadia bona nega bona lagani haida o hahelagadiamu. ¹¹Umui daimui ai na garimu badina hari be egu gaukara umui ida na vada asi anina. ¹²Na noimuimu, tadikakagu, lau hegeregere ai aola, badina be lau danu umui hegeregere ai vada name lao. Umui ese lau asio kara kerere henigu. ¹³To umui mai dibamui lau ese sivarai namo na harorolai henimui matama badina be tauani hisihisina ta dainai. ¹⁴Ena be tauanigu oromana ese e hahekwakwanaimui, umui ese na asio gwautubu henigu bona asio dadaraigu. To umui ese o abigudae e kara lau na Dirava ena aneru ta na heto, e kara lau na Keriso Iesu na heto. ¹⁵Emui hahenamo ina nega ai be vada edeseniai. Badina be na hamaoromui hedinaraimu, bema mai dalana, matamui anidia boma gibolasi bena boma henigu. ¹⁶Bena launa vada inaimui ai nama lao badina be hereva momokani na hamaoromuimu dainai. ¹⁷Idia na e heuradaimu e uramu bae abimui hanai, to dia namo ta dainai. Idia na e uramu bae laomuiahu, bena umui na idia daidiai ba heuradai. ¹⁸Nega iboudiai ina na namo bema ba heuradai ura namona ta dainai, bona dia lau na umui padamui ai dainai. ¹⁹Natugu maragimui lau na mara hisina na aniamu umui daimui ai ela bona Keriso na umui lalomui ai baine hebou. ²⁰Na uramu umui padamui ai nama noho ina harihari bena eregu nama haidaua, badina lau na name lalo daradara umui daimui ai. ²¹A hamaorogu, umui o uramu taravatu henunai ba noho, umui taravatu so hakala heniamu. ²²Badina be vada e hetore; Abraham natuna memerodia na rarua, mero ta be e hegui kekenina enai e havaraia, a mero ta be e heruha nege hahinena enai e havaraia. ²³Mero ta be e hegui kekenina enai tauani dalanai, to mero ta be e heruha hahinena ena amo e vara heabidadama lalonai. ²⁴Ini gau na e kara sivarai hegeregere dalana ai ba ita; badina ini hahine raruosi na ura hebou gwauahudia rua na heto. Gwauahu ta be Sinai ororona amo bona ia ese e havaradiamu taudia na e hegui, ina hahine na Hagai. ²⁵Hagai na Sinai ororona dainai e badu, bona ia na Ierusalem dainai e badu, badina be ia na natuna ida hegui lalonai. ²⁶To Ierusalem atai ai guna na e heruha, bona ia na ita sinada. ²⁷Badina be vada e hetore, "A moale gabani hahinena, natuna asine havaraiamu hahinena, a tai lolo bona mai moalemui ida a boi, oi mara hisina asio aniamu hahinena; badina e sepua nege hahinena natuna na momo herea a mai adavana hahinena natuna be dia hoho. ²⁸To umui, tadikaka, Isako hegeregere, na gwauhamata

dainai e natumu.²⁹Una nega ai tauani dalana ai e vara merona ese Lauma dainai e vara merona e hahisihisiava. Ina harihari danu unu heto.³⁰To revareva helaga be dahaka e gwaumu? E hegui kekenina bona natuna na asiai dia oho. Badina e hegui kekenina natuna na e heruha hahinena natuna ida heni-diho ahunamo na basie herahia dibamu.³¹Una dainai, tadikaka, ita na dia e hegui kekenina natuna, to e heruha hahinena natuna. Translation note - Chapt. 4v17 - Zealous - heuradaiv18: Purpose - ura namona (better word-ura or badi)v19: Formed - hebou/hekarav20: Purplexed - lalo-daradarav21: Covenant - ura hebou, gwauhamata, gwauahuna.

5

¹Heruha-nege dainai Keriso ese e ruhada nege. Una dainai ba gini tutuka bona igui madunana henuna ai ma basio heato lou. ²A itaia, lau Paulo ese na hamaormuimu, bema emui ura ai beha peritome muimu negana ai, asi dalana ta Keriso ena namo ba davaria.³Na gwau hedinarai loumu, o uramu peritome bavabi taumui iboumuai latamui ai, umui na vada o heguimu taravatu idoidoinai ba badinaia. ⁴Umui na Keriso ena amo vada o hetu-oho, umui daidia na taravatu dainai o hegwaauraimu mamaoro taumui; hariharibada na vada asio dibaiaimu. ⁵Badina be Lauma lalonai, abidadama dainai, ita ese mai lalo-goadada ida kara-maoromaoro helaorona ta nariamu. ⁶Keriso Iesu lalonai, peritome eiava dia peritome na asi anidia to, abidadama lalokau lalonai e gaukaramu hari. ⁷Umui be o heau namonamova. Daika ese e laomui ahuva hereva momokani ibadinana ai? ⁸Ina ahegugu na dia e boirimumu tauna ena amo e maimui.⁹Ha-tubua muramurana sisina ese parao-ikuina idoinai eha tubuamu. ¹⁰Mai egu lalo-goad Lohiabada enai; umui ese na lalohadaida idana ta ma basio karaia. Daika umui e hahekokamuimu tauna ese kerere ahuna do baine abia. ¹¹Tadikakagu, bema lau ese peritome doini na harorolaiamu neganai, dahaka dainai lau doini eha hisihisigumu? Bema unu bamona neganai, satauro hekwakwanaina na vada e abia oho. ¹²A na uramu, hari umui emui noho eha dikamu taudia na sibodia bema utu oho. ¹³Badina be umui na e boirimui ba heruha-nege, tadikakagu. To emui heruha-nege na basio gaukaralaia karadika maurina dalana; lasi, to lalokau ai ba hekaha heheni. ¹⁴Badina be taravatu idoinai na hahegani tamona ai vada e hamomokania; "Dekemu tauna ba lalokau henia, sibomu o helalokau henimu hegeregere." ¹⁵To bema ba hekori heheni bona ba he-ani heheni neganai nahuamui ba toho ta ese ta basine haorea. ¹⁶To lau na tomamu, Lauma ena ahekau ai ba raka bema ura dikadia karadia basio kara. ¹⁷Karadika uradia ese Lauma e inai heniamu bona Lauma ena ura ese karadika uradia e inai henidiamu. Ini gau ruaosi ehe inai hehenimu dainai umui o uramu ba kara gaudia basio karamu. ¹⁸To bema umui na Lauma ese e gunalaimuimu neganai, umui na dia taravatu henunai. ¹⁹Karadika maurina karadia na hehedinarai, gaudia be ini: heudahanai, mahuta-hebou loaloa, kara bodagadia, mata bodaga, ²⁰kaivakuku itomadiho henidia, vada/meamea, heatu/tuari, hebadu heheni, mama, vagege, heiriheiri, hemaka, hedadarai heheni, ²¹hegahusi, inu-kekero, lebulebu moale heboudia bona kara unuhetodia. Henahuatoho dalana na hamaoromuiva bona harihari ma na hamaoromuimu, unu e kara tomamu taudia ese Dirava ena basileia na basie abia. ²²To Lauma huahuana na lalokau, moale, maino, haheauka, hebogahisi, kara-maoromaoro, heabidadama, ²³hahemanau bona boga-auka, ini kara e karadiamu taudia na taravatu ta ese asie guidiamu. ²⁴Keriso Iesu ese e biagudia taunimanima dia ese karadika maurina mai ena ura idauida idu vada eha sataurodia. ²⁵Bema Lauma ai baita mauri neganai, Lauma ai baita raka. ²⁶Ta ta siboda basita hekokoroku, basita hahebadu heheni bona basita mama heheni.

6

¹Tadikakagu, bema tau ta na e davaria e kara kerere, umui Lauma o badinaiamu taumui ese manau ai ba hagoadaia baine namo lou. Ba henahua toho, hari be oi danu hedibagani ese baine abimu garina. ²Ta ta emui maduna ba heduru-hehenilai bema unu amo Keriso ena hahegani ba badina. ³Badina be bema umui ta na baine lalo ia na herea a gau be lasi, ia na sibona ehe koimu. ⁴Ta ta emui gaukara mo ba haerodia bema emu gaukara mo dainai lalomu baine heabi isi, to dia ta ena gaukara o haeroamu dainai. ⁵Badina be umui ta ta ese sibomu emu gaukara madunana ba huaia. ⁶Dirava ena hereva ai e hadibaiamu tauna ese gau iboudiai baine herahialai e hadibaiamu tauna ida. ⁷Basie koimui. Dirava na basie gonagonalai, taunimanima ese e hadoamu gauna na huahuana do baine geia. ⁸Badina be ena karadika maurina ai e hadohadomu tauna ese dika huahuana baine geia. Lauma enai e hadohadomu tauna ese Lauma ena amo mauri hanaihanai baine geia. ⁹Kara namona ikarana ai na basita lahedo badina be nega korikori ai do anina baita geia bema ita na basita hebalarea neganai. ¹⁰Ita eda ai nega e namomu lalonai, taunimanima iboudiai mai heabidadama besedia danu, baita kara namo henidia. ¹¹A itaia, sibogu imagu ai revareva badadia ai na tore henimuimu. ¹²Tauanina dainai sibodia toadia e uramu bae hanamo taudia ese eha gugumuimu peritome bavabia. Ini e kara tomamu badina idia na asie uramu Keriso dainai bae hahisihisi dia. ¹³Badina be e peritomeidia taudia ese taravatu danu asie badinaiamu, to idia e uramu umui na peritome bavabi bema umui tauanimui daidiai idia bae hekokoroku. ¹⁴Nega iboudiai gau ta basina hekokoroku laia to eda Lohiabada Iesu Keriso ena satauro hari; Ia ena satauro dainai lau egu ai, tanobada na vada eha satauroa bona tanobada enai, lau na vada eha sataurogu. ¹⁵Una dainai, peritome eiava dia peritome na asi anidia, to mai anina gauna na mauri matamatana. ¹⁶Daidia ina dala e maurilaiamu taudia na maino bona hebogahisi na latadiai ai mia bona Dirava ena Isaraela latana. ¹⁷Ina hari amo ela, ta ese basine ha hekwakwanaigu badina be Iesu toana na lau tauanigu ai mimia. ¹⁸Tadikakagu, Lohiabada Iesu ena hariharibada na laumamui ai aine mia. Amen.

Epheians

1

¹Lau Paulo na, Keriso Iesu ena aposetolo taugu, Dirava ena ura dainai, Helaga taumui Efeso ai, bona Keriso Iesu oabidadama heniamu taumui, na tore henimuimu. ²Hariharibada bona maino, tamada Dirava ena amo bona eda Lohiabada Iesu Keriso ena amo; ³Dirava, eda Lohiabada Iesu Keriso Tamana, aita hanamoa ia ese lauma ena hahenamo iboudiai gubai emiamu gaudia na vada e hanamolaida. ⁴Tanobada do se karaia negana ai Dirava ese Keriso lalonai e abida hidi, helaga tauda bona asi bebeka-bebekada tauda ai baitala helaoreana, ena lalokau dainai. ⁵Ia na lalona e hadaia guna, ia natuna ai baine halaoda Iesu Keriso dainai, ina na ena ura namona hegeregereana. ⁶Ena hariharibada goeva daena ena lalokau tauna ai vada e ha-tagalaidia harihari na, dainai baita imodaia. ⁷Ia dainai hahemaui vada ta abiamu ia rarana ai eda dika vada eme hegwau tao. Bona ina na ena hariharibada goeva daena. ⁸[Vada e habada isedai/vada ehabadadia ita edai] ⁹Badina ena aonega bona ena lalohadai hehunidia vada e hadibada. Ena ura namona Keriso lalonai e henida hegeregereana. ¹⁰Negadia bae guguru ai gau iboudiai guba bona tanobada gaudia. Keriso enai baine haboudia helaoreana. ¹¹Badina be Dirava ese gau iboudiai na ena lalohadai hegeregereana ai e karamu. Bona matamana negana ai ia ese egwauraimai hidi, ena ura ihaguguruna. ¹²Una dainai ai keriso a homokania gunava, taumai ese ia hairaina baia helaorealaia. ¹³Ia dainai umui ese hereva momokanina, emui hahemaui sivaraina namona, oabia dae. Umui danu Keriso oabidadama henia bona Dirava toana e henimui, Lauma Helaga, e gwauraia hamata laumana. ¹⁴Toana bunai, ita ahuda baita abia Dirava ena gwau hamata hegeregereana bona ena taunimanima baine hamauridia bona ia hairaina baita heatolaia hebou. ¹⁵Badina, Lohiabada Iesu Keriso oabidadama heniamu bona helaga taudia o lalikau henidiava sivaraina na kamoni dainai. ¹⁶Egu Dirava ihanamona na asi dokona daimui ai, bona daimui ai danu na gurigurimu. ¹⁷Eda Lohiabada Iesu Keriso ena Dirava, Tamada hereana ese aonega bona lalo-parara laumana baine henimui, bona ia enai ba manada. ¹⁸Lalomui matadia danu baine hapapa bona ena boiboi helaoreana bona ahuna hereadaena davana bada gauna helaga taudia edia vada badiba. ¹⁹Iena siahua badaba bona goada hereana na ita kamoni tauda edai danu baita diba. ²⁰Siahuna bunai Keriso enai e hedinarai: bona mase amo e hatorea isi, bona gubai eabiadae ia idibana; e hahelaia. ²¹Keriso na gaubada iboudiai gavana iboudiai. Siahua taudia iboudiai bona lohia iboudiai daedia ai ia ladana danu lada iboudiai ina mauri aibona mauri gabena ai eherediamu. ²²Dirava ese gau iboudiai ia aena palapalana henunai eato bona gau iboudiai ikwaradia ai vada e halaoa ekalesia lalonai. ²³Ekalesia na Keriso tau-anina gau iboudiai e hagugurumu tauna ihaguguruna.

2

¹Bona umui ese kara havara bona kara dikadia lalodiai o maseva. ²Ina kara havara bona kara dikadia gunaguna o maurilaiva ina tanobada ena ura daladiai. Emui mauri lalonai guba padana siahua lohiana o badinaiaiva, laumana bunai gwau ede-ede memerodia lalodia ai e gaukaramu. ³Gunaguna ai iboumai ai idia ida a nohova, tauanina ena ura a karava, tauanimai edia ura bona lalomai edia ura a badinava, bona ahumai korikorina na badu, taunimanima oredia hegeregereana. ⁴To hebogahisi bada Diravana ese e ura henimai lalo-dika dainai. ⁵Kara havara ai a mase taumai na Keriso-ida e hamaurimai. Umui danu hariharibada ese e hamaurimuimu. ⁶Dirava ese Keriso ida e hatoreda isi hebou, bona ia (Dirava) ese danu e hahelaida guba ai Keriso Iesu lalonai, ⁷unu hetomana danu vairada negadia ai ena hariharibada bona ena gado namo ita edai baine hedinarai, Keriso Iesu lalonai. ⁸Badina hariharibada ese vada e hamaurimu abidadama dainai, bona dia sibomui emui amo ema, ina na Dirava ena herahia, ⁹dia gaukara amo, tau ta baine heagi garina. ¹⁰Badina be ita na ia imana ai e karada tauda, Keriso Iesu lalonai gaukara namodia ikaradia totona Dirava ese vada e hahegaegaelai, ita ese baita rakalai. ¹¹Una dainai balaloe guna umui na idau bese taumui. E gwauraimuiva "asie peritome taumui" e gwauradiamu "peritome" taudia na tauanidia vada imadiai eivadia dainai. ¹²Una negana umui bona Keriso na mai padamui, o noho-hedoava Isaraela besena ida, idau taudia asi dibamui herohehaino gwauhamatana, asi emui helaro bona asi emui Dirava tanobada ai. ¹³A harihari Keriso Iesu lalonai dauhai o nohova taumui vada o kahikahimu Keriso rarana ese vada e harakamui kahi. ¹⁴Badina ia na eda maino. Ia ese rua e hatamonaia. Ia tauanina ai e hapararada maguna vada e ragaia (e kokia). ¹⁵Ia tauanina ia ese taravatu ena hahedua iboudiai vada e haore bese ruaosi amo matamatana ta baine havaraia bona maino baine haginai. ¹⁶Keriso ena herohehaino dainai ruaosi baine hatamonada eda heinai-heheni satauro ai e haorea. ¹⁷Keriso ema bona maino e harorolaia umui dauhai o nohomu taumui emui bona maino gabu kahikahi ai e nohomu taudia edia. ¹⁸Badina Keriso lalonai umui bona ai na baita vareai diba tamada dekenai Lauma tamona lalonai. ¹⁹Una dainai umui na harihari dia idau bese bona dia noho hedoa taumui. Umui na helaga taudia ida hanua tamona taumui Dirava ena ruma taudia. ²⁰Umui na vada e hadaimui apostolo bona peroveta taudia latadia ai, bona Keriso Iesu sibona mo daiguni nadina. ²¹Ia lalonai ruma idoinai e larebaia daemu dubu helagana ai bainela, Lohibada lalonai. ²²Ia lalonai danu umui e larebamui heboumu Dirava ena ruma ai baola Lauma lalonai.

3

¹Badina ina dainai lau, Paulo, na Keriso Iesu ese eguigu idau bese taumui daimui ai. ²Launa na diba umui na okamoni Dirava ena hariharibada gaukarana e henigu umui daimui ai. ³Lau na ehadibagu dalana korikori ai na tore. Ina hereva hehunina na torea kwadogi umui daimui ai. ⁴Bema umui ese ina baduhaia, umui na bodibamu bolalopararamu lau Keriso ena hereva hehunina na mai dibagu. ⁵Ura haida lalodiai ina hereva momokani ediai na sehedinari. A harihari Lauma Helaga ese vada e hahedinaraia ena apostolo bona peroveta taudia ediai, daidai e atodia idauhai ina gaukara helaganai. ⁶Ina hereva hehunina binai idau bese taudia dihinai bamodia, bona ekalesia oreadia tauanina, bona idia-Keriso Iesu lalonai gwauhamata ahuna danu eabia hebou sivarai namo dainai. ⁷A Dirava ena hariharibada ehenu ena siahua ai

vada e gaukara lau na sivarai namo isiaina ilaohenina tangu ai vada ehalaogu.⁸To lau egu ai-ena be hahelaga taudia iboudiai ediai lau na maragimaragi herea to ia ese e harihari henigu, bese idauidau taudia edia Keriso ena taga, ta asi dibana tagana baina harorolaia.⁹Unu amo lau na diari baina mailai taunimanimu iboudiai edia ura-hehunina herevana laganidia Dirava lalonai daika be gau iboudiai e karadia.¹⁰Ina ura na ekalesia ena amo evara unu amo lohia hereadia bona siahu taudia guba ai e nohomu ese Dirava ena aonega idauidau na bae dibaia.¹¹Ina mia hanaihanai eheato dalana momokanina evara ia ese Keriso Iesu eda Lohiabada lalonai ehagugurua.¹²To Keriso lalonai ita na mai boga aukada bona mai goadada momokanina ida badina ta abidadama heniamu dainai.¹³Una dainai na noimuimu daramui basie doko badina dahaka umui daimui ai na hisihisilaiaimu, una na umui emui harai.¹⁴Badina lau na tamada vairanai na hetuituimu,¹⁵unu amo bese iboudiai guba ai bona tanobada ai be ia nemaina.¹⁶Na noiamu ia ese baine henimui momokani, ia hairaina tagadia, laumana ena amo goada siahuna baine henimui daika be umui lalomui ai.¹⁷Na noiamu abidadama ai Keriso umui lalomui ai baine noho, ramumui bahadai bona lalokau ai ba gini tutuka.¹⁸Bona umui na bagoada unu amo balaloparara, helaga taudia iboudiai, ida, ena lababa be dahaka, bona rohana, bona harana latana bona dobuna,¹⁹bona Keriso ena lalokau umui ese badibaia, vada ela daudau lalopararana daenai, bona unu amo umui na Dirava ena honuhonu dae ese baine hahonumui.²⁰Harihari ia enai daika mai dibana ela daudau gaukaradia iboudiai baia hamaoroa baine karaia eiava alaloe, ita laloda ai ena siahu ida e gaukaramu,²¹to ia hairaina be ekalesia lalonai bona Keriso Iesu lalonai ela uru iboudia ai ela bona hanaihanai. Amen.

4

¹Una dainai, lau Lohiabada ese e guigu tangu umui na noimuimu ba raka e boirimui rakana hegeregereana.²Lau na umui na noimuimu lalo manau bona manada bona haheauka, ai ba noho ta ta lalokau lalonai ba tubu dae.³Ba helaorea goada laumana ena lalo tamona lalonai ba kahu tao, maino ena igui ai.⁴Unuseni ai tauanina tamona bona lauma tamona, umui e boirimui dalana boiboi helaoreana na tamona.⁵Bona Lohiabada na tamona, abidadama tamona,⁶bona Dirava tamona taunimanimu iboudiai Tamadia, daika be gau iboudiai daediai bona iboudiai lalodiai iboudiai e hereadia.⁷A ita ta ta hariharibada vada eme henida Keriso ese ena herahia e hahetohoamu hegeregereana.⁸Buka Helaga ai e torea eto: "ia e dae atai ai neganai, ena abi mauri taudia mai iguidia ida e hakaudia lasi, ena herahia taunimanimu e henidia."⁹Ia edae anina be dahaka,' avabia dae ia na e diho ela bona tanobada henuna kahana ani? ¹⁰Ia daika e diho tauna tau tamona ma edae guba doriva-dorivana ela, gau iboudiai ia ese baine hahonudia.¹¹Keriso ese haida e henidia apostolo taudia, ma haida peroveta taudia, ma haida evanelia taudia, bona ma haida haroro taudia bona hahediba taudia.¹²Ia ese ini dagi taudia e henidia baine regudia, bena idia ese Keriso isiaina bae laoheni, bena Keriso tauanina bae larebaia dae.¹³Ia ese tauanina unu e larebaia dae hesiriu toma ela bona ita iboudai eda abidadama bona laloparara baine tamona Dirava natuna, bona tauda bae lo bona Keriso ena hahetoho honuhonu daena bae davaria.¹⁴Keriso ese ita e larebada dae una dainai ita na ma karukarudia hegeregereana ai na basitala daika be hurehure ese baine pua muri kahana bona vaira kahana baela, bona hahediba herevadialau ese eabidia ohomu bona taunimanimu edia koikoi karadia ese na basie hakaudia kerere.¹⁵Unu amo hereva momokani na lalokau ai baita gwaurai, ita na dala iboudiai lalodiai ia enai baita tubu dae. Daika be kwara, una na Keriso.¹⁶Keriso ese tauani ibounai e larebaia, bona, e hesiriu bona e hekamo boumu, bona rege ta ta e gaukara heboumu, ese tauanina e hatubuamu unu amo sibona lalokau ai e larebaia daemu.¹⁷Una dainai, Lohiabada lalonai na halomuimu, bona na tomu umui na dia daudau idau bese taudia e mauri hegeregereana bo maurimu edia lalohadai na asi anidia.¹⁸Edia laloparara na didibura, Dirava ena mauri amo na asi ahudia badina na kavakava na lalodia ai, badina kudoudia na auka herea.¹⁹Idia na asie hemaraimu bona sibodia eheni laomu tauani ena lebulebu daladia ai e rakamu bona idia na miro karadia iboudiai e karadia hesiriumu.²⁰To ina na dia unuheto umui ese Keriso odibaia dalana.²¹Lau na abiadaemu umui ia harina vada okamonai, bona umui ia lalonai vada e hadibamui, hereva momokani na Iesu lalonai.²²Umui na vada e hadibamui dahaka mauri gunana ena emui amo na bavatoa oho tau gunana ba kokia oho, ini na tau gunana ena dika badina ena koikoi ura dia.²³Umui na vada e hadibamui lauma lalonai daramui ba matamata dia,²⁴bona tau matamatana ba hadabualaia e karamu Dirava heida-idana - kara maoromaoro ai bona helaga ai.²⁵Una dainai hereva koikoidia ba negedia bona umui ta ta dekemui taudia ida hereva momokani ba herevalai, badina ita bona idia na tauani tamona,²⁶ba badu bona basio kara dika dina do basio hadihoa emu badu ai.²⁷Emu nega namona diabolobasio henia.²⁸A ta henaomu na ma basine hena lou. Ia na baine hekwarahi, imana amo gaukara namona ta baine karaia, unu amo gau ta baine abia bena e dabumu taudia baine herahialai henidia.²⁹Udumu amo hereva mirodia basio herevalai. A hereva namodia mo ba gwaurai haida ba durudia bae tubudae, edia dabu korikori gabudia amo, emui hereva bae kamoni taudia na baine durudia,³⁰bona Dirava ena Lauma Helaga na basio hataia, badina ia ena amo umui na e govamui ahu badina hahemaui dinana dainai.³¹Idita gaudia iboudia ai bavatodia oho, dagedage, badu, heai, bona hereva mirodia, hahebade iboudiai.³²Ba hebogahisi heheni, emui dika ba hegwaui tao heheni, Dirava ese emui dika Keriso lalonai e gwau tao na heto.

5

¹A umui, Dirava natuna, eiava lalokau, Keriso ba toho-tohoa.²Lalokau ai ba raka, Keriso ese e lalokau henida hegeregereana; Ia sibona eheni, ita daidai herahia gauna bona boubou gauna mai bonana namona, Dirava ena.³Heuda hanai, mata-dika bona mata-ganigani bogaragimui ai basio herevalai; helaga taudia edia dala bunai.⁴Lebulebu, kavakava, bona hevaseha herevadiala danu dia nanamo; a hahenamo herevadiala hari namo.⁵Umui be dibamui ani, heuda

hanai tauna, mata dika tauna, bona mata ganigani tauna na asi ahuna, Keriso bona Dirava edia basileia lalonai; idia na kaivakuku itoma diho henidia taudia na heheto. ⁶Tau ta ese hereva kavakavadia basine koilaimui; badina be Dirava ena badu na gwau ede-edē taudia latadia ai e kaumu. ⁷Badina bunai, idia ida basio hetura. ⁸Badina be gunaguna umui na didibura, a harihari umui vada ome diari, Lohiabada lalonai ba raka; diari memero dia hegeregedia. ⁹Badina be diari huahuadia na lalohadai namodia, kara maoromaoro dia, bona hereva momokanidia ai e hedinaraimu. ¹⁰Lohiabada iha-moalena karadia ba tahu. ¹¹Dibura karadia asi huahuadia na basio hetura henidia, a ba hahedinarai. ¹²Badina be edia kara hehunidia igwaurai hedinarai dia na mai hemaraidia. ¹³A ehedinaraimu karadia iboudiai na diari ese ehahedinaraimu. ¹⁴Badina be ehedinaraimu karadia iboudiai na didiari; una dainai hereva na e tomamu, mahuta taumu e, a noga mase taudia bogaradia amo ba toreisi; Keriso ese diari baine henimui. ¹⁵Emu raka nahuana ba tohoa; aonega taudia hegeregedia ai ba raka; dia kavakava taudia na heheto. ¹⁶E henimui negana ba gaukaralaia namo namo; badina be ina na nega dikana. ¹⁷Bena ini, basio kavakava; Lohiabada ena ura badiba goevagoeva. ¹⁸Vine ranuna basio inua momo, kekero garina; a Lauma Helaga ese baine hahonumui. ¹⁹Ba hereva heheni, salamo ai bona ane ai bona lauma anedia ai, ane bavabi Lohiabada ba hanamoa lalomui ai. ²⁰Nega idoidiai tamada Dirava ba hanamoa, gau iboudiai daidiai, eda Lohiabada Iesu Keriso ladana ai. ²¹Ba hemataurai heheni, Keriso o matauraaimu hegeregerea. ²²Hahine e, adavamui ba kamoni henidia, Lohiabada boma kamoni henia hegeregerea. ²³Badina be tau na adavana kwarana, Keriso na Ekalesia kwarana na heto, Ekalesia na ia tauanina, bona Keriso na ekalesia ihamaurina. ²⁴Ekalesia ese Keriso e kamoni heniamu hegeregerea, hahine ese gau iboudiai lalodiai; adavadia unu bae kamoni henidia toma. ²⁵Tatau e, adavamui ba lalokau henidia, Keriso ese ekalesia e lalokau henia dainai; ia sibona e heni. ²⁶Ena hereva amo, ranu ai e huria; baine hahelagaia. ²⁷Ma baine abia iena, ekalesia mai hairaina, asi toutouna, asi makukuna, asi berona, asi bebeke-bebekana; baine helaga asi ena kerere. ²⁸Unu hetomana tatau ese adavadia bae lalokau henidia, sibodia tauanidia e lalokau henidiamu hegeregerea; adavana e lalokau heniamu tauna ese sibona tauanina e lalokau heniamu. ²⁹Badina be tauta sibona tauanina se inai henaimu, to e ubuamu bona e reguamu; Keriso ese ekalesia e ubuamu bona e reguamu hegeregerea. ³⁰Badina be ita na ia tauanina regena. ³¹Badina binai tau ta ese tamana bona sinana baine rakatanidia adavana ida bae tamona; bena raruosi vada tauani tamona na heto. ³²Ina hereva hehunina anina na bada; to lau ese Keriso bona ekalesia na gwauraidiamu. ³³Bena ini umui tatau ta ta adavamui ba lalokau henidia, sibomu ohelalokaumu hegeregerea, hahine danu adavana baine matauraia.

6

¹Natu e, iahumui ba kamoni henidia Lohiabada lalonai, badina ina na maoro. ²"Tamamui bona Sinamui" ba matauraidia (ina na hahegani gini-gunana mai gwauhamatana ida), ³beni ba namo bona emui mauri tanobadai baine daudau. ⁴Tama e, natumui basio habadudia. A ba ubudia Lohiabada ena hahediba herevadia bona sisiba herevadia amo. ⁵Hesiai memeromui e, biagumui ba kamoni henidia mai hemataurai bona heude-heudemui mai momokanina ida. Ba kamoni henidia Keriso o kamoni heniamu hegeregerea. ⁶Ba kamoni henidia na dia vairadiai mo ba-hamoaledia urana. A Keriso ena hesiai taudia kamoniaidia ai baola, Dirava ena ura e karamu mai lalodia ida. ⁷Isiaina ba lao heni mai lalomui idoidiai ida, ekara Lohiabada isiaina o lao heniamu na heto to dia taunimania, ⁸badina mai dibada dahaka kara namodia ta ta ese baita karamu neganai, Lohiabada ese davada be henidiamu, ena be ia na hesiai eiava heruha nege tauna. ⁹Biagu e, kara hegeregedia ba kara henidia. Basio hagaridia. Umui dibamui umui bona idia biagumui be tamona guba ai, bona ia ese taunimania toadia se lalomu. ¹⁰Dokona binai, ba goada Lohiabada lalonai bona siahuna ai bagoada. ¹¹Dirava ena tuari dabuadia iboudiai ba hahedokilai, beni ba goada diabolio ena kara dibaka ba lao ahu. ¹²Badina be eda hededegwa na dia tauani bona rara ai, a lohia taudia ediai, dia gaubada hereadia, dia siahu taudia tanobada diburana lohia dia, lauma dikadia guba gabudia. ¹³Una dainai Dirava ena tuari dabuadia iboudia ai bahahedokilai, beni dika dinana ai ba laodia ahu diba, bona gau iboudiai ba kara guguru, ba gini tutuka. ¹⁴Ba gini, una dainai, koekoemui ai hereva momokani bona kememui ai kara maoromaoro ba gegedia. ¹⁵Bena aemui palapaladia ai sivarai namo mainona iseuna ba kumilaia. ¹⁶Nega idoinai abidadama kesina bavabia kau, unu amo tau dikana ena diba lahidia ba habodo diba. ¹⁷Bona hahemaui kwara-gauna bavabia kau bona Lauma ena dare, Dirava ena hereva bunai. ¹⁸Guriguri negadiai bona noinoi idoidiai, ba guriguri Lauma lalonai. Nega idoinai, ba gima malaka-malaka, helaga taudia daidiai ba noinoi. ¹⁹Bona ba guriguri lau daigu ai, sivarai namo udugu amo baina gwaurai. Ba noinoi baina haroro negadia ai sivarai namo ena hereva hehunidia baina hahedinarai goevagoeva. ²⁰Badina sivarai namo dainai lau na hesiai taugu mai iguigu ida na nohomu, baina hereva goadagoada, vada e haduagu hegeregerea. ²¹Tukiko, tadikakagu egu lalokau, bona hesiai tauna Lohiabada lalonai ehebidadamamu ese gau iboudiai baine hamaorolaimui, egu gaukara badiba totona. ²²Lau ese vada na siaia vasi dekemui, ai sivaramai baine hamaorolaimui totona, bona ia ese lalomui baine hagoadadia. ²³Maino na Tadikaka iboudiai ese bae abia, bona lalokau mai hebidadamana ida Dirava tamada ena amo bona Lohiabada Iesu Keriso ena amo. ²⁴Hariharibada be eda Lohiabada Iesu Keriso e lalokau henia hanaihanaimu taudia iboudiai ediai baine mia.

Philippians

¹¹Paulo bona Timoteo, Keriso Iesu, ena hesiai taumai, umui Keriso Iesu lalonai e atomui tabe taumui Filipi ai, mai emui heitatao bona diakono ida. ²Hariharibada bona maino Tamada Dirava bona Lohiabada Iesu Keriso ena amo avabia. ³Hora iboudiai na lalomui egu Dirava na hanamoamu, ⁴hanaihanai, egu guriguri iboudiai lalodiai umui daimui ai na

gurigurimu mai moalegu ida ⁵badina be eda hebamo sivarai namo gaukarana dina ginigunana amo ema bona hari. ⁶Launa dibagu lavadae ina gaukara namona emui amo e matamaia tauna ese baine hesirua ela bona Iesu Keriso ena dina. ⁷Lau egu ai na maoro unu baina henari toma badina umui na lau kudougu ai. ⁸Dirava na lau igwau hedinarai lau umui iboumui ai be ede na lalomui tomamu Iesu Keriso ena hebogahisi lalonai. ⁹Ina na lau egu guriguri umui emui lalokau na bae tubu daekau aonegai bona lalopararai. ¹⁰Unu amo gau namodia ihamomokanidia bona taunimanima namodia ai baola ela bona Keriso ena dina. ¹¹Kara maoromaoro huahuadia ai ba honuhonu dae Iesu Keriso ena amo hairai bona hahenamo na Dirava ena. ¹²Varavaragu harihari lau na uramu umui iboumui ai badiba egu ai e vara gaudia na sivarai namo ihtubuna. ¹³Huahuana be una Keriso lalonai e guigu iguidia na diari e vara hegvima taudia bona haida ediai. ¹⁴Varavara momo edia goada Lohiabada lalonai danu e bada herea badina lau iguigu iguidia daidiai, bona mai goadadia herevadia iherevalaina ¹⁵Haida na lalo dika bona badu ai Keriso e haripiulaia haida na e lalo namo bona moale ai,

¹⁷Guna taudia ese edia diba ai Keriso e haripiulaia e laloava lau iguigu lalonai bae hegonugu herea, ¹⁸bena dahaka? dala iboudiai lalodiai enabe dibaka eiava momokani Keriso na e haripiulaia una mo lau ese na moalelaumu, oibe, bona lau na baina moale, ¹⁹badina dibagu una na lau iruha negegu umui emui guriguri bona Iesu Keriso ena hereva heduru amo. ²⁰Ina na lau egu ura dikadika bona helaro dala ta ai basina hemarai, to mai goada gugurugu ida hari bona hanaihanai Keriso baina abia isi maurigu ai eiava masegu ai. ²¹Lau egu ai baina mauri na Keriso bona baina mase na baina abiabi. ²²To bema tauani ai baina mauri, una anina mai huahuagu. To edena baina abia? Lau na asi dibagu. ²³Ini ruaosi ese e gugubagu herea. Lau egu ura dikadika na baina heruha nege Keriso ida, una na hereadae. ²⁴Tauani lalonai baita noho anina tauani ena mo. ²⁵Una ese eme haraivagu, bona dibagu lau na umui ida bona doini umui idia emui moale ihatubuna abidadama na lalonai. ²⁶Bema lau egu amo emu heagi Keriso Iesu lalonai na bae bada herea baina lou henimui neganai. ²⁷Emui kara hari Keriso ena sivarai namo ida bae hetura. Lau bainama eiava lasi, sivaraimui baina kamoni, umu na Lauma tamoni o gini tutukamu bona lalo tamoni o raka heboumu sivarai namo abidadama na lalonai. ²⁸Basio gari inamui daidiai. Una na toa idia igigi rohorohodia, to umui emui ai na hahemaui. ²⁹Una e heni na asi davana Keriso dainai dia basio abiabiraia Ia dainai danu ba hisihisi. ³⁰Eda tuari hegeregerea egu ai danu oi ita bona harihari egu amo o kamonaumu.

2

¹Una dainai, bema unusenai ahealo haida Keriso lalonai, bema unusenai tau halo haida lalokau amo bavara bema unusenai hebamo heheni haida Lauma lalonai, bema unusenai hekaha bona hebogahisi haida. ²Bena umui ese egu moale lalogu ai bae hegeregere lalokau hegeregere, Lauma lalonai boma hatamona. ³Gau ta heiriheiri ai eiava hekoroku asi anina ai basio karaia. A hahemanau ai balaloa haida na oi hereamu. ⁴Bona ta ta sibomui emui namo basio tahudia, a haida edia namo ba tahudia ⁵Ina dara bavabia sibomu lalomui ai baine mia hegeregere Keriso lalonai, ⁶daika ena be ia na Dirava, oromana eabia ena be ia na Dirava ida na hegeregere to se laloa una baine dogoa tao gauna. ⁷A ia sibona e hekaruhi hebubu hesiai merona oromana eabia, bona taunimanima hegeregere ai e vara - e davarua e itaia tau ta na heto, ⁸ia sibona e hahemanau bona Dirava e kamoni henia ela bona mase, oibe satauro ena mase! ⁹Una dainai Dirava ese ia e imodaia atai ai bona Dirava ese lada e henia lada iboudiai e hereadia ladana. ¹⁰Ini e kara toma Iesu ladana dainai tui iboudia ai bae hadai, guba gaudia bona tanobada gaudia bona tanobada henuna, gaudia iboudiai tuidia bae hadai, ¹¹bona mala iboudiai bae gwau hedinarai Iesu Keriso na Lohiabada, Tamada Dirava iheatolaina. ¹²Una dainai egu lalokau taumu e, nega idoidiai ba kamoni dia lau vairagu ai mo a murigu ai, emui kamoni ba habadaia emu hahemaui ba tahua mai garimui bona mai heude-heude mui ida. ¹³Badina una na Dirava daika be umui lalomui ai e gaukaramu hegeregere ena ura namodia iurahenidia bona ikaradia na lalomui ai e havaramu. ¹⁴Gau iboudiai ba karadia asi emui maumu eiava hepapa-ahuahu ai, ¹⁵unu amo oi na basio kerere bona ba goevagoeva, Dirava natuna ai baola asi toutumu, idia bogaragidia ai oi na tanobada ba diari lamepa na heto, uru gagevageva na bona gwau ede-edena bogaragidiai. ¹⁶Mauri herevana ba dogoa tao bona Keriso ena dina ai lau na baina heagi lau na asina heau kava eiava asina hekwarahi kava. ¹⁷A ena be bema lau baina hekaruhi hebubu Boubou herahiana bona emu abidadama tomadihona, lau na baina moale bona umui ida baita moale hebou. ¹⁸Kara tamona lalonai umui danu do ba moale bona lau ida baita moale hebou. ¹⁹A lau na helaro Lohiabada Iesu lalonai nega dia daudau Timoteo dekemu baina siaia vasi una dainai lau danu bae halogu lau na gaudia emu ai na mai dibagu. ²⁰Badina be dekegu ai na ta lasi ia hegeregere daika be momokani mai ena helalo emui ai. ²¹Badina be iboudiai na sibodia edia gau e tahumu, a dia Iesu Keriso ena gau. ²²A umui be ia davana be dibamui, badina mero tamana ida, ia lau ida sivarai namo isiaina a lao henimu. ²³Una dainai egu helaro be nega dia daudau ia baina siaia vasi ede baina heto baina diba negana ai. ²⁴A lau na Lohiabada lalonai na abidadama nega basine daudau lau danu baina vasi. ²⁵A lau na laloa maoro Epafrodito bain siaia lou oi dekemu. Ia na lau tadigu bona bamogu gaukara ai bona tuari ai e bamogumu, bona emu gwaukau tauna bona hesiai tauna egu dubu ai. ²⁶Badina be e lalomui badamu ia na umui ida bona e lalo hekwarahi bada badina ena gorere harina o kamoni dainai. ²⁷Momokani e gorere, mokona e mase. To Dirava ese e bogaia hisi, bona dia ia mo, a lau danu e bogagu hisi, egu lalo hisihisi baine bada herea na garina. ²⁸Una dainai lau na ura badamu baina siaia vasi bona oi ese ma baitaia lou oi na ba moale, bona lau danu egu hisihisi baine maragi. ²⁹Una dainai Lohiabada lalonai bavabia dae mai moalemu ida bona taunimanima ia hegeregere danu ba mataurdaia. ³⁰Badina Keriso ena gaukara dainai mokona e mase ena mauri e dadaraia lau isiaigu e lao heni bona oi dahaka basio kara egu ai tomdiho lalonai. Translation done by: Ret/Dk. Lohia Kohu on 15/09/22, completed on 19/09/22, time: 2 am

3

¹Dokonai, varavaragu e, Lohiabada lalonai ba moale. Badina lau ese ini gau hegeregerea umui ma na tore henimu loumu umui ese lau na so hahekwaikwanaigumu, bona bavabidia umui ba mauri. ²Sisia nahuadia na ba toho, dika e karadiamu taudia nahudia na ba toho, tauani eivamu taudia nahuadia na ba toho. ³Badina ina na ita e peritomeda daidai. Dirava Lauma ai e tomadihomu, bona Keriso Iesu lalonai, heagi eabimu bona tauanina lalonai na asine heabidadama. ⁴Enabe lau sibogu tauanina lalonai na heabidadamamu. Bema ta ese baine laloa, tauanina lalonai ia na mai ena heabidadama, lau egu ai na momoherea. ⁵Lau na e peritomegu dina ihatauraninai Isaraela besena, Beniamena iduhuna tangu, a senegu na Heberu taudia, taravatu ibadinana ai, lau be Farisea tangu. ⁶Egu goada na badaherea, lau ese ekalesia oreana, na dagedage heniava kara maoromaoro taravatu henunai, lau na asina hahedika. ⁷Badina dahaka kohu eabilai gaudia iboudiai egu, lau ese Keriso dainai dikadia na gwauradiamu. ⁸A momokani, harihari gau iboudiai na dadaraimu, badina gau hereadaena Keriso Iesu egu Lohiabada baina dibaia goevagoeva helaoreana dainai. A ia dainai gau iboudiai vada na lalo boio-bona lau ese negenege gaudia dikadia vada na halaodia-una dainai Keriso baina abia tarikatarika ⁹bona ia lalonai bae davarigu, dia lau egu kara maoromaoro taravatu enai, a una na abidadama Keriso lalonai-kara maoromaoro Dirava ena amo abidadama amo. ¹⁰To ina harihari lau na uramu ia baina dibaia bona ena toreisi lou siahuna bona ena hisihisi e anidia hebou, ena mase dalana ai lau danu unu baina heto, ¹¹bema ede bamona lau na toreisi lou, mase ena amo baina dibaia. ¹²Lau na dia na tomamu gaudia, na vada na abidia eiava vada na goevadae, a launa doini na gavaiamu baina abia na tomu, Keriso Iesu ese lau eabigu na heto, ¹³varavaragu e, launa asina laloamu lau ese na vada na abia. A gau tamona na karaiaamu: dahaka murigu ai na lalodia boiomu bona vairagu gaudia na gavamu, ¹⁴vaira kahana na heau heniamu davana baina abi na tomu Keriso Iesu lalonai Dirava ese e boiridia dae. ¹⁵Una dainai mai darada tauda iboudai ina dala baita laloa, bona bema oi balalo idau gau haida ai, Dirava danu euramu emu ai baine hahedinarai. ¹⁶Ede heto dahaka gau ai tame kau, gaudia mo baita dogo tao. ¹⁷Varavaragu e, lau hegeregeregu ai baola. Ai e hagoimaimu taudia na ba haerodia. ¹⁸Badina hutuma e rakamu-na bae hamaoromui gunava, a harihari mai taigu ida na hamaoromui loumu-Keriso ena satauro e inai heniamu. ¹⁹Edia dokona na mase, badina edia Dirava na bogadia, bona edia heagi na edia hemarai. Idia na tanobada gaudia mo e lalomu. ²⁰A ita eda hanua korikori na guba ai, unu amo danu ta hrimu ihamaurida tuna, Lohiabada Iesu Keriso, ²¹ia ese ini tauanida manokadia baine haidaudia tauanida baine hamatamata ia tauanina goevagoevana hegeregereana ai baine haloa ena goada siahuna ai gau iboudiai baine hamanada

4

¹Una dainai, varavaragu e egu lalokau taumui bona na ura henimuimu, egu moale bona kwara e gegea gauna ina dala ai ba gini auka Lohiabada lalonai, bamogu lalokaumui. ²Euodia, bona Sunutuke na noidiamu, lalodia bae hatamona Lohiabada lalonai. ³Oibe, lau ese danu oi na hanamomu, lau bamogu momokanidia, unu hahine ba durudia daika be lau ida hahekwarahiva sivarai namo iharipiuna, lalonai Klemeto bona lau ida a gaukara hebouva taudia ore dia, daidia ladadia na mauri bukana lalonai. ⁴Nega idoidiai Lohiabada lalonai ba moale, ma na gwau loumu, ba moale. ⁵Emui lalo manada na taunimanima iboudiai na bae diba. Lohiabada na eme kahikahi. ⁶Gau ta basio lalo haguhiia. a, gau iboudiai guriguri ai bona noinoi mai hahenamona ida, emui ura Dirava ba hamaorolaia, ⁷bona Dirava ena maino, diba idoinai e heraiamu, ese lalomui bona daramui baine gima Keriso Iesu lalonai. ⁸Dokona, varavaragu e, dahaka gaudia na momokani, dahaka gaudia na hemataurai, dahaka gaudia na maoromaoro, dahaka gaudia na goevagoeva, dahaka gaudia na lalokau, dahaka gaudia na haripiu namodia, bema gau ta dia herea dae, bona bema gau ta dia bae imodaia, miadia gaudia ba haero. ⁹Oi odiba gaudia bona oabi bona o kamoni bona egu ai o ita, unu gaudia mo ba kara, bona maino Diravana na oi ida. ¹⁰A Lohiabada lalonai na moale badamu badinaharihari umu ese o lalolaigu loumu dainai. Guna umui ese o lalolaigu, to asi emui nega namona bae heduru. ¹¹Lau na dia ini na gwau tomamu badina launa na dabumu. A lau na lalo namo e hadibagu gau iboudiai egu ai e varamu ena. ¹²Lau na mai dibagu ologami be dahaka, bona lau danu mai dibagu taga be dahaka. Ini dala iboudiai lalodiai bona gau iboudiai lalodiai lau danu hehunina na diba ede bamona ai bae namo - ba ubua eiava bae hitolo, bona momo ede bavabi toma eiava dabu lalonai. ¹³Lau na gau iboudiai ia lalonai ikaradia ai na ia ese e hagogadagu. ¹⁴Ede heto o kara namo egu hisihisi lalonai o kahagu. ¹⁵A umui Filipi taumui danu dibamui sivarai namo matamana negana ai, Makedonia amo na raka lasi, ekalesia oreana ta ese ikahalaigu gaudia ihenidia bona iabidia herevadia se gwaurai a umui mo sibomui. ¹⁶Ena be lau Tesalonika ai, na nohova nega momo egu dabu ai emu heduru o siaiva. ¹⁷Ina na dia herehia gauna asina tahuamu. A, huahua e tubu na tahuamu umui ihanamolaimui gaudia ai baela huahuadia. ¹⁸A lau na gau iboudiai na abi honu bona momo egu ai na namo - Epafrodito ese emui amo e mailai gaudia vada na abi. Idia na gaiho - bonadia nanamo, boubou gaudia Dirava ese eabidaemu mai moalena ida. ¹⁹A egu Dirava ese o dabumu gaudia baine henimui guguru hegeregereana ena taga hairaina lalonai Keriso Iesu lalonai baine henimui, ²⁰harihari eda Dirava bona Tamada baita imodaia hanaihanai. Amen. ²¹Keriso Iesu lalonai helaga taudia iboudiai ba hanamodia. Varavarada dekegu ai e nohomu ese umui e hanamomuimu. ²²Hahelaga taudia iboudiai ini seniai ese e hanamomuimu, a Kaisara ena ruma ai e nohomu iboudiai ese hahenamo henimuimu. ²³Lohiabada Iesu Keriso ena hariharibada na laumamui ai baine mia. Amen. Translation done by: Ret/Dk. Lohia Kohu on Tuesday (20/09/22), completed on Friday (23/09/22), time: 12.17 am Filipians (Chpt 1 - 4) General checking yet to done.

Colossians

1

¹Paulo, Keriso Iesu ena apostolo ta Dirava ena ura dainai, bona Timoteo ita tadikakada, ²abidadama taudia bona kamonaia tadikakada Keriso lalonai Kolose ai o nohomu, emui e vasimu. Hariharibada na umui aine vasi henimui bona maino Diravana ita tamada bona Lohiabada Iesu Keriso edia amo. ³Dirava, Lohiabada Iesu Keriso Tamana a hanamoamu, bona nega iboudiai umui daimui ai a gurigurimu. ⁴Emui abidadama Keriso Iesu lalonai bona emui lalokau, Dirava dainai e hahelagadia taudia ediai, haridia na vada a kamonaia. ⁵Ina lalokau na emui ai badina be guba (guba basileia) ai vada e atoa balaheni helarona dainai. Umui ese ina baine vara momokani gauna na vada o kamonaia guna gabeamo hereva momokani, sivarai namo, vada o kamonaia, ⁶bona vada dekemui ema. Ina sivarai namo na huahuana e dobimu bona e tubumu tanobada idoinai lalonai hegeregere, umui emui danu unu e vara tomamu, sivarai namo o kamonaia matamana dinana amo ema bona Dirava ena hariharibada hereva momokani lalonai o dibaia. ⁷Epafras ena amo o dibaia sivarai namona gauna be ina, Epafras na ita (ai) bamoda (bamomai) lalokauna bona ia na ai daimai ai Keriso ena hesiai lalokau tauna. ⁸Epafras ese emui lalokau Lauma lalonai, e hadiba mai. ⁹Ia ena lalokau dainai, a kamonaia (kamonaia matama) dinana ema hari, ai na umui daimui ai emai guriguri na asia hadokoa. Ai na a noinoiva umui na Dirava ena ura aonegana bona lauma ai lalo-pararana ai ba honuhonudae. ¹⁰Ai na a guriguriva, umui na ba raka balaheni (maoromaoro) Lohiabada dainai, lalonamo daladia iboudiai lalodiai. Ai na a guriguriva umui na huahuamui bae dobi (emui) kara namodia iboudiai lalodiai bona Dirava-idibana (aonegana) ai bae tubu daekau. ¹¹A gurigurimu umui na ba goada emui dibaka (diba) iboudiai Dirava ena hairai siahuna dalana ai, haheauka bona boga-auka iboudiai lalodiai mai moalemui (lalo-moale) ida. ¹²A gurigurimu, umui ese tamada ba hanamoa (hahenamo ba henia) totona, ia ese umui danu ahumui bavabi hebou, diari lalonai e hahelagadia taudia (e hamauridia) taudia ida. ¹³Ia (Dirava) ese e hamaurida (abida-mauri) dibura basileiana amo bona e atodia hanai Natuna lalokauna ena basileia ai. ¹⁴Ia (Iesu) lalonai ita ne e hebodohilaida (ihamaurida dainai e hoida), eda karadika e gwautao. ¹⁵Ia (Iesu) na asita itaiamu Diravana heida-idana, e karadia gaudia iboudiai e riboadia (edia roba). ¹⁶Ia dainai (ena amo) gau iboudiai e karadia, guba lalona gaudia bona tanobada latana gaudia, e heitamu (ta itadiamu) gaudia bona asie heitamu (asita itadiamu) gaudia. Terona eiava basileia eiava gavamani (to translation note: this is not a Motu word but a corruption of the English word, governemnt. If a motu word is to be used then the closest can be lohia) eiava siah, gau iboudiai na e hekahu heboumu. ¹⁸Ia na tauanina eiava dubu kwarana. Ia na matamana bona roboa (toreisi roboana) mase padadia amo. ¹⁹Badina be ia anitarana idoinai ia lalonai baine mauri na e lalonamo (e moale) laia, ²⁰bona Natuna ena amo gau iboudiai baine haherohehmaino dia ia enai. Dirava ese ia ena satauro rarana ai maino e havaraia. ia ena amo, Dirava ese gau iboudiai, e haherohehmaino dia, tanobada latana eiava guba lalona gaudia. ²¹Nega ta gauna ai, umui danu Dirava ida asio dibaia taudia bona umui na ia ena inai emui lalohadai ai bona emui kara dikadia lalodiai. ²²To harihari ia ese umui na ia tauanina ai e haherohehmainomui ena mase bagunai. Ini e kara toma amo (bagunai) ia ese baine henimui lao hehelaga bona mamaoro-mamaoro (asi emui kerere) bona asi igwau-henimui, ia vairana ai, ²³bema umui na ba heabidadama hesiriu, ba gini-tutuka bona sivarai-namo o kamonaia helarona amo basio hebibi-oho negana ai. Sivarai-namo na be ina, guba henuna taunimanima dia iboudiai e harorolai henidia. Ina sivarai-namo dainai lau Paulo na hesiai-taugu ai vada nala. ²⁴Harihari lau na egu hisihisi lalodiai na moalemu, bona lau tauaniguna na hahonuamu Keriso dainai hisihisidia ai, ia tauanina, ena dubu dainai (the context of the word 'dubu' here is 'believers of Christ' hence it may be best to use in its place, 'ia eabidadama heniamu oreana dainai') ²⁵Lau na ina dubu ena hesiai tauna (hesiai-taunai), umui daimui ai Dirava ena amo madunana (maorona)? e henigu hegeregere ai, Dirava ena Hereva baine hekara (hekara guguru) dainai. ²⁶Ina na gau hehunina (lalohadaina hehunina) se heita uru momo vada e bubuni lalodiai. To harihari ia (Iesu) e abidadama heniamu taudia ediai vada eme hahedinarai. ²⁷Idia daidiai Dirava vada e ura ina hereva momokani hehunina ena hairai tagana na dia Isaraela besena ese bae dibaia, gauna na Keriso lalomui ai, hairai helarona. ²⁸Ia be una, ai ese a harorolaiaumu tauna. Ai ese taunimanima iboudiai aonega idoinai ai a hagogadadiamu, bona unu amo taunimanima iboudiai na idoi-idoidiai (heidoidiai) baita atodia lasi (duanaidia) Keriso lalonai. ²⁹Ina dainai na gaukaramu bona na hededegwamu ena goada e gaukaramu lalogu ai (tauanigu lalonai) hegeregere.

2

¹Badina be na uramu badiba lau egu hededegwa umui daimui, bona Laodikea taudia daidiai, bona tauanigu ai do asie rohakau taudia daidiai. ²Na gaukaramu badina be idia kudoudia ihagogadadia bae hedaro kuboukubou lalokau ai bona laloparara guguru tagana lalonai, Dirava idibana hereva-momokanidia hehunidia lalodiai, hereva momokanina bunai, Keriso. ³Diba bona laloparara tagadia iboudiai na Ia lalonai e hunidia (e hehuni). ⁴Ini hereva na gwauraimu be taunimanima ta ese basine koimu laloani herevadia amo. ⁵Ena be lau na tauaniai dia umui dekemui ai, to lau na lauma ai umui dekemui ai (umui ida). ⁶Una dainai, Lohiabada Iesu Keriso o abiadae dainai, Ia lalonai ba raka (ba mauri). ⁷Ia lalonai ramumui (emui mauri badidia) ba hahedai bona ba tubu daekau, bona emui abidadama ai ba tutukatutuka e hadibamui hegeregere, bona hahenamo ihenidia karadia na ba kara momo. ⁸Ba-heita, ta ese basine idoamui aonega herevadia ai bona koikoi herevadia asi anidia ai, taunimanima edia sene-karadia daladia ai, bona tanobada ena kara ba totohoa a Keriso be basio totohoa. ⁹Badina be Ia lalonai na Dirava anitarana idoinai tauani ai e maurimu. ¹⁰Umui na vada o idoi guguru Ia lalonai, Ia na lauma siahudia bona lohia iboudia e kwaradia (daedia ai). ¹¹Ia lalonai danu, umui na e peritome mui (kopimui e iva oho) dia taunimanima ese tauani kopina e ivaia ohomu, to Keriso ese vada e peritome mui. ¹²Ia ida

vada e gurimui bapatiso ai, bona ia lalonai vada e hatoremui isi Dirava ena siahui ai heabidadama bagunai (dainai), Dirava ese Ia mase amo vada e hatorea isi.¹³Emui kara dika lalodiai bona tauanimui e peritome dia lalodiai vada o mase, Ia ese e hamaurimui Ia ida bona eda kara dika iboudiai e gwautao.¹⁴E gwauda tubu bona e inai henida taravatu herevadia iboudiai Ia ese e hadikadia (e aladia). Ia ese eabi oho, satauro ai e kokodia kau dalanai.¹⁵Ia ese lauma edia siahui bona lohia iboudiai e hadareredia bona taunimanima iboudiai vairadiai danu e hahedinarai, e kwalimu taudia satauro dainai.¹⁶Una-dainai, taunimanima ta ese basine hahemaoro henimui aniani bona inuina daidiai, eiava aria dinadia eiava hua matamata dia daidiai, eiava dina helagadia daidiai.¹⁷Ini na gabeai bae vara gaudia laulaudia (vaburadia), to anidia na Keriso.¹⁸Taunimanima ta e uramu hahemanau bona aneru edia tomadiho, ese basine hahemaoro henimui bona ahumui do basio abia. Taunimanima unu bamona ese e ita gaudia ai e varaimu bona sibona lalonai e hekokorokumu badina ena tau-anina lalohadidia daidiai.¹⁹Ia na kwara enai se kahua taomu. To kwara amo elaomu tauani idoinai garugaru bona varavaro e hatamonadiamu, bona e badaho, badahomu Dirava ena heubu dainai.²⁰Bema umui na Keriso ida o mase hebou tanobada gaudia ediai, dahaka dainai o maurimu e kara tanobada enai o badimu.²¹"Basio dogoa tao bona basio mamia-toho bona basio daua-toho!"²²unu gau hegeregereenai? ²³Ini na taravatu, mai edia taunai ena sibo-hetomadiho bona sibo-hahemanau bona sibo-hahemetau aonegadia. To ini na asi anidia tauani ena sibo-hahemoale ituari henina ai.

3

¹Taunabunai ai Keriso ida atoreisi dainai, atai gaudia ba haero gabuna bunai Keriso na Dirava idibana kahana ai e helaimu. ²Atai gaudia ba haero, tanobada gaudia basio haero. ³Badina be vada o mase? Emui mauri na Keriso ida Dirava lalonai vada e henimui. ⁴Keriso, eda mauri badina, baine hedinarai negana ai, umui danu ia ida hairai ai ba hedinarai. ⁵Taunabunai tauanimui edia ura dikadia ba hamase, heuda hanai, karadika, mata dika, lalo-hegani, mata ganigani, ena na kaivakuku itomadiho henina na heto. ⁶Ini gau iboudiai Dirava ena badu e maimu. ⁷Ini gau oi ese o rakalaimu daladia ai o maurilaidiamu. ⁸A harihari ini gau iboudiai ba nege badu, dagedage, lalo-dika, ere dika, udumui herevadia dikadia. ⁹Basio hekoi heheni badina be tau gunana mai ena dika vada o dokia oho, ¹⁰tau matamatana vada o hahedokilaia ia na aonega ai e hamatamataia, ikarana Diravana heida-idana. ¹¹Tau matamata lalonai asi Helene, asi Iuda tauna, e peritomea tauna danu lasi, Skute tauna, asi hesiai tauna, bona asi ura kwaimu tauna. Keriso mo sibona taunimanima bona gau iboudiai lalodiai. ¹²Dirava ena abi hidi taumui, ena helaga taumui, ena lalokau taumui e, ini na ba hedokilai, gado namo, manau, manada, haheauka. ¹³Ba haheauka heheni ta ese bamona baine habadelaia negana ai, emui dika bae hegwaui tao heheni. Lohiabada ese emui dika vada e gwau tao umui danu unu ba kara toma. ¹⁴Ini gau iboudiai lalodiai lalokau ba hahedokilai, ia na ihatamoda gauna hereadaena. ¹⁵Keriso ena maino danu lalomui baine biagudia, e boirimui, tauanina tamona ai e haboumui. ¹⁶Keriso ena hereva be lalomui ai bae mia, nega idoinai bae hatagamui. Salamo ai, ane ai, lauma anedia, ba hahediba heheni bona ba hahealo heheni. Dirava ihanamolaina anedia bavabi mai lalomui ida. ¹⁷Emui hereva ai bona emui gaukara ai, gau iboudiai Lohiabada Iesu ladana ai bakara, bona Dirava ba hanamoa ia bagunai. ¹⁸Hahine e, adavamui ba kamona henidia, una na maoro, Lohiabada lalonai, ¹⁹tatau e, adavamui ba lalokau henidia, basio lalo dika henidia. ²⁰Memero kekeni e gau iboudiai lalodiai tamamui sinamui eredia ba kamona, bona Lohiabada ese baine lalo namo henimui. ²¹Tama e, natumui basio badu henidia lalodia bae hesiku na garina. ²²Hesiai memeromui e, gau iboudiai daidiai biagumui ina tanobada ai ba kamona henidia, dia vairadiai mo, taunimanima ihamoaledia karana a mai lalomui idoidiai, Lohiabada imatauraina karana. ²³Emui kara iboudiai na ba kara balaheni, Lohiabada vairanai, dia taunimanima vairadia ai mo. ²⁴Oi badiba ahumu na Lohiabada ena amo bavabi, badina be umui na Lohiabada Keriso ena hesiai taumui. ²⁵A kara dika tauna ena kara dika davana do baine abia, edia Lohiabada na taunimanima toadia se lalomu.

⁴¹Biagu e, baheni lao emu hesiai taudia ediai dahaka be maoromaoro bona namo idia ediai, oi na mai dibamu oi danu mai biagumu guba ai. ²Guriguri basio hadokoa, ba guriguri goada-goada. Ahenamo ihenidia ai ba guriguri hahheauka. ³Ba guriguri hebou ai danu daimai ai, Dirava ese iduara mai baine kehodia, Keriso ena hereva hehunidia baine herevalai. Ini gau daidiai igui ai na nohomu. ⁴Ba noinoi egu hereva baina gwaurai hedinarai, badina ini na lau egu gaukara. ⁵Aonega ai ba raka murimuri taudia ba raka henidia. ⁶Ba gado namo emu hereva iboudiai, damena ba hanamodia, bona badiba taunimanima ta ta be ede ba henidia toma. ⁷Lau sivaraiu be Tukiko ese baine hadibamui ia na lau tadikakagu lalokauna bona hesiai merona namona ta, bona Dirava isiana a lao heboumu merona ta. ⁸Ia na e siaia oi dekemu e vasi, badina be ia ese oi sivaraimu baine hamaoromu, kudoumu baine haheabia isi dainai. ⁹Ia na siaia Onesimo ida, tadikakaka namona bona lalokauna ta, ia na umui bamomui ta. Idia ese ai ini seniai e varamu karadia iboudiai baine hadibamui. ¹⁰Aristako, lau bamogu dibura ruma ai, ena ahenamo e henimu, Mareko danu, Banaba tadikakana oi emu dala baine hadibamu, bona e vasimu, bavabia dae. ¹¹Bona Iesu, ladana ta na Isuto, ese ena ahenamo e henimu danu. Idia na lau ida a gaukara heboumu Dirava ena guba basileia iharorolaina, idia ese lau lalogu e hanamoa. ¹²Epafra ese ena ahenamo ehenimu. Ia na umui bamomui ta bona Iesu nega idounai, umui daimui ai e gurigurimu, umui ba gini auka, bona Dirava ena ura ba dibaia guguru. ¹³Lau ese na ita karadia na hadibamuimu, ia na e gaukar goadamu umui daimuai, Laodikea taudia daidiai, bona Hieropa taudia daidiai. ¹⁴Lalokau tauna Luka muramura tauna, bona Dema ese ahenamo e henimuimu. ¹⁵Ahenamo ba henilao, tadikaka Laodikea ai bona Nimufa bona ekalesia ena ruma ai. ¹⁶Ina revareva na bogaragimui ai ba duhaia murinai, Laodikea ekalesia taudia danu ba duhai henidia, bona Laodikea taudia edia revareva danu ba duhaia. ¹⁷Akipo ba

hamaoroa :hesiai gaukarana Lohiabada ese e henimu ba itaia, Oi ese ba hagugurua."¹⁸Ina ahenamo na lau imagu amo na torea - Paulo. Lau egu igui ba laloe, ahenamo bavabia.

1 Tesalonika

1 ¹Paulo, Silvanus bona Timoti emai amo e vasimu, Tesalonika ekalesiamui emui ai, Tamada Dirava, bona Lohiabada Iesu lalonai. Hariharibada bona maino na avabidia.²Aina nega iboudiai Lohiabada a tanikiu heniamu (a hanamoamu) umui iboumui ai daimuai, emai guriguri lalodiai ladamui a hatodia louloumu. ³Eda Dirava bona Tamada vairana ai emui abidadama gaukaradia, lalokau ai o hekwarahiva, bona emui helaro gini-tutukana Keriso Iesu lalonai, a lalodiava.⁴Dirava ena. lalokau tadikakamai e, aina vada dibamai ia ese vada eabimui hidi, ⁵badina be emai sivarai namo vada emui ai e kau, a Lauma Helaga siahunai danu bo a vada e hamomoka ia vaitani. Unu hetomana ai, umui danu vada o diba ai umui lalomui ai (padamui ai) be dahaka taunimanima.⁶Umui vada ai bona Lohiabada ihagoimai ai ola, hereva oabia dae mai hisihisimui bada ida o moalemu Lauma Helaga dainai. ⁷Unu amo, umui vada hahegeregere taudia ai ola kamoni taudia Makedonia bona Akaia henuadia ai.⁸Badina emui amo Lohiabada ena hereva vada ehe-piu rohoroho, bona dia Makedonia bona Akaia ai mo, to emui abidadama Dirava enai vada gabu idoinai ese e dibaia. Una dainai ai na asi badinai ma baia hereva. ⁹Badina idia sibodia ese harimai e piudiava padamui ai be ede oabimaidae toma, bona ede bamona ai Dirava oabiadae kaivakuku edia amo bona Dirava mauri bona Dirava korikori isiaina o lao heniva, ¹⁰bona umui ese ia Natuna guba amo ede o naria tomamu, mase amo e hatoreaisi Iesu na bunai - Iesu, ese do bainema baduna amo baine ruhada-nege.

2

¹Tadikakamai e, umui sibomui na mai dibamui, emai mai dekemui na mai anina bada. ²Dibamui ai guna a ahisiahisiva bona filipi ai e kirkiri laimaiva. Ai na Dirava ladana ai a gini aukava Dirava enasivarai namo ahadiba lamuia mai hededegwa mai ida.³Badina emai hahealo herevadia na dia lalohadai kerere amo, eava dia lalohadai mirodia amo, eiava dia lalohadai koikoi amo. ⁴to, Dirava ese vada eabiamai-hidi sivarai namo ehenimai hegeregena ai agwauraimu, dia taunimanima ihamoaledia, to Dirava ihamoalena. Ia ese ita laloda edibadiamu.⁵Badina ai na nega ta vada asiama lalo-ani herevadia amo, umui mai dibamui, eiava koikoi ai mata ganigani ilaoahuna dainai. Dirava na mai dibana. ⁶Eiava heimodai asi atahuna taunimanima edia amo, eiava umui bona haida edia amo. Ai na keriso ena apostolo dainai emui amo hahenamo baiama gwaurai diba.⁷A, ai na bogaragimui ai a manauva hegeregere sina ta ese sibona natuna e ubudiamo na heto. ⁸Dala ini bamona amo ai ese aura henimuiva. Ai na amoaleva dainai dia Dirava ena sivarai namo ahenimuiva to emai mauri danu. Badina a lalokau henimui badava. ⁹Tadikakamai e, emai hekwarahi bona gaukara aukadia na olalodia taomu. Hanuaboi bona dina agaukarava badina asi auramu umui haida baia hametaumui unu amo Dirava ena sivarai namo vada aharorolai henimui.¹⁰Umui na mai dibamui bona Dirava danu dibana, umui kamoni taumui emui ai na mai helagamai, mai maoromaoromai bona asi bebegabebegamai ida a mauriva. ¹¹Dala ini bamona amo umui odibamu ai be ede bamona umui ta ta dekemui ai, hegeregere tama ta mai natuna logora idai. ¹²Ahahealomui bona ahagoadamu bona anoimuiva Dirava ena ura hegeregere ai baraka,ia ese eboirimui sibona ena basileia bona hairaina lalona ai ba vareai.¹³Una dainai ai danu Dirava ahanamo louloumu, badina Dirava ena hereva emai amo okamoni negana ai vada oabia dae dia taunimanima ena hereva, a una na hereva momkanina, Dirava ena hereva, umui okamonaimu taumui lalomui ai egaukaramu.¹⁴Tadikakamai e, umui vada ena akalesia oreadia ludea ai ihagoidia ai vada ola, Iesu Keriso lalona ai. Badina umui danu umui hanua taudia ese eha hisihisimuiva. ¹⁵idia ese Lohiabada Iesu bona peroveta taudia vada e aladia, ai danu vada elulumai lasi. Idia ese Dirava na se hamoalea. A taunimanima iboudiai hari e inai henidiamu. ¹⁶Idia ese e gwaumai tao, idau bese taudia basiahereva henidia badina idia do bae helalo kerehai dainai. unu amo edia karadika do bae guguru. A dokonai badu ese do baine habuadiatari. ¹⁷Tadikakamai e, a ina nega sina ai, ita vada mai padada, tauani ai dia lauma ai. Ai na emai ura bada hereana, vairamui baiama itadia. ¹⁸badina dekemui baiavasi atomava - momokani lau, paulo nega ta bona nega haida- to satani ese elaomai ahuva. ¹⁹Badina eda helaro, eiava moale heagi toana Lohiabada Iesu vairanai ena lou mai negana ai be dahaka,a? ²⁰Badina umui na emai hairai bona moale.

3 ¹Una dainai, una neganai emai hahekau e ore, ai ese a laloe una na namo ai na Atena ai ba rakatanimai. ²Ai ese tadimai Timoteo, bona Dirava ena hesiai tauna Keriso ena sivarai namo lalonai a siaia vasi emui abidadama ai lalomui baine hagogadadia bona taumui baine halodia. ³Unu amo ta ini hisihisi lalonai basine marere-marere helaoreana badina be dibamui ini na eha-ahulaidia.⁴Momokani ta noho hebouva negana ai nega badanai a hamaoromui hisi baita ani, bona vada e varamu, dibamui, ani. ⁵Badina binai, egu haheauka e ore negana ai na siaia vasimu emui abidadama sivaraina baina diba, hari be hedibagani tauna ese bema dibaganimu bona emai hekwarahi anina bema boio na garina.⁶A Timoteo emui amo vada dekemui ema bona emui abidadama bona emui lalokau haridia namodia emailai e tomu umui na nega idoinai o lalomaimu mai moalemui ida, bona o uramu baitamai. Una hegeregere ai danu a uramu umui baia itamui. ⁷Badina be ina dainai tadikakamai e, emui abidadama dainai taumai eme lo, emai hisihisi bona daradoko iboudiai lalodiai.⁸Badina be hari baia maurimu, bema umui Lohiabada lalonai bo gini tutuka-tutukamu ena.⁹Badina be dahaka hahenamodia umui daimui ai Dirava baia henia, badina be emai moale idoinai eda Dirava vairanai na umui a moalelaimuimu. ¹⁰Hanuaboi bona dina a guriguri goadagoadamu umui vairamui ai do baia ita a tomu bona abidadama ai

dahaka o dabumu gaudia baia henimui guguru.¹¹Benaini eda Dirava bona Tamada sibona, bona eda Lohiabada Iesu dekena basie hakaumai vasi.¹²Lohiabada ese emui heura-heni baine havaraia bona baine durumui ta ta ba helalokau heheni bona taunimanima iboudiai ba lalokau henidia ai ese umui a lalokau henimuimu hegeregereana.¹³Bona lalomui baine hagoadadia, unu amo umui na basio kerere Dirava bona Tamada vairana ai bae helaga, asi bebeka-bebekamui, eda Lohiabada Iesu Keriso mai ena helaga taudia baema neganai. Translation done by RDK. Lohia Kohu on Tuesday (15/01/25), time: 2.21 pm, Ready for quality checking.

4

¹Orena binai, tadikakagu e, Lohiabada Iesu lalonai a hagoadamuimu bona a haganimuimu. Emai amo o abia ba goadalaia bona Dirava ihamoalena, ina dala ai danu umui ese momo bo karamu.²Badina dibamui dakaha hahegani a henimui na Lohiabada Iesu ena amo.³Badina be ina na Dirava ena ura, ba helaga, matabodaga karadia basio kara,⁴bona iboumui ai ba diba adavamui bavabidia mai hematauraimui bona mai helagamui ida,⁵dia mata-dika ena ura bodagadiai basio abidia (Dirava asi dibadia besedia na heheto).⁶Ta ese varavara basine koia bona basine hurea hanai diba ina kara dainai. Badina be Lohiabada na ini kara iboudiai davadia ihenidia tauna, ai ese a hamaoromui gunava vada a gwaauraia hedinarai hegererenai.⁷Badina be Dirava ese vada e boirida dia mata-dika enai, to helaga enai.⁸Una dainai, e dadaraiaimu tauna ese dia taunimanima se dadaraiaimu, a ena Lauma Helaga e henimuimu Diravana e dadaraiaimu.⁹Varavara iurahenina herevadia na basina tore henimui, badina be Dirava ese vada e hadibamui umui ta ta ba heura heheni.¹⁰Momokani, umui ese varavara iboudiai Makedonia ai o lalokau henidiaimu, to varavara mai e, a noimuimu, una kara ba habadaia.¹¹Mai manaumui ida ba noho, sibomui emui gaukara ba kara, imamui amo ba gaukara, a haganimuiva hegeregereana.¹²Unu amo ba raka namonamo murimuri taudia vairadiai bona gau tai ai basio dabu.¹³Varavara mai e, asia uramu umui na ba daradara mase taudia daidiai, unu amo daramui basie doko, asi edia helaro taudia na heheto.¹⁴Badina bema ta abia daemu Iesu na e mase bona e toreisi lou, benaini Dirava ese Iesu enai e masemu taudia ia ese baine hakaudia vareai mauri ai.¹⁵Badina be Lohiabada ena hereva a henimuimu a tomu, Lohiabada ena mai dinanai tanobada ai ta nohomu tauda ese mase taudia basita laidia oho.¹⁶Badina be Lohiabada na guba amo baine diho. Mai lolona ida bainema, aneru badana danu mai gadona, bona mai kibi regena ida, bona una kibi na Dirava ena. Bena Iesu enai e mase taudia na bae tore isi guna.¹⁷Bena doini ta maurimu, e rakatanida taudia, baine abida isi, ori latadiai Lohiabada ida baita hedavari, guba padanai.¹⁸Bena ini hereva daidiai ba hahegoada. Translation done by RDkh. Ori. C. Kohu on Saturday (04/01/25), time: 10.34 am, ready for quality checking.

5

¹Varavara mai e, hora bona nega herevadia na basia torelai henimui.²Badina umui dibamui Lohiabada ena dina na bainema henao tauna hanuaboi ai e maimu na heto.³Idia baeto "Maino bona Namo," negana ai habuatari ese baine lasidia tao. Vara hisihisi na ese rogorogo hahinena e lasia taomu na heto. Idia na basie roho mauri diba.⁴To umui, varavaramai, na dia dibura taumui una dina ese basine lasimui tao henao tauna na heto.⁵Badina umui iboumui ai diari memeromui bona dina memeromui. Ita na dia hanuaboi ena, dia dibura ena.⁶Benaini, basita mahuta haida e mahutamu na heto. matada baita hapapa nega iboudiai baita haheauka.⁷Mahuta taudia be hanuaboi ai e mahutamu, bona kekero taudia be hanuaboi ai e kekeromu.⁸a ita dina tauda, baita haheauka bona kemedai abidadama bona lalokau baita atoa, bona hahemaui helarona kwarada gaunai baita halaoa.⁹Badina be Dirava ena ura ita edai na dia badu, to ena ura be hahemaui baita abia eda Lohiabada Iesu Keriso bagunai.¹⁰Ia na ita daidai e mase bona, nogada ai eiava mahutada ai, ia ida baita noho hebou.¹¹Una dainai ba hahealo heheni bona ta ta ba tubu dae, ina harihari o karamu hegeregereana.¹²Varavaramai e, a noimuimu, bogaragimui ai e gaukaramu bona Lohiabada ladana ai e regumuimu bona e sisiba henimuimu taudia na ba hakala henidia.¹³A noimuimu emui lalokau ai bavabidia dae edia gaukara dainai. Maino ai ba hedaro hebou.¹⁴Varavaramai: a haganimuimu, noho kava taudia ba sisiba henidia, lalo-hesiku taudia ba hagoadadia, manoka taudia ba durudia, taunimanima iboudiai ba haheauka henidia.¹⁵Ta ese dika na basine davalala. Gabunai, namo ba gavaia bamomui edia bona taunimanima iboudiai edia.¹⁶Nega idoinai ba moale.¹⁷Guriguri basio hadokoa.¹⁸Gau iboudiai daidiai Dirava ba hanamoa. Badina be una na Dirava ena ura emui Keriso Iesu bagunai.¹⁹Lauma na basio habodoa.²⁰Peroveta herevadia basio dadarai.²¹Gau iboudiai ba diba toho. Gau namona ba kahua tarika-tarika.²²Gau dikana ena amo ba raka oho.²³Maino Diravana ese iboumui ai baine hahelagamui guguru. Laumamui bona laumamui bona daramui bona taumui ia ese baine dogodia tao asi bebeka-bebekamui ba noho ela boba eda Lohiabada Iesu Keriso bainema.²⁴Heabidadama Tauna ese e boirumuimu na momokani, ia ese baine karaia.²⁵Varavaramai e, ai daimai ai ba guriguri.²⁶Varavara iboudiai na haherahu helagana ai ba hanamodia.²⁷Lohiabada ladana ai na haganimuimu ina revareva na varavara iboudiai vairadiai ba duhaia.²⁸Eda Lohiaba Iesu Keriso ena hariharibada na emui ai baine mia. Translation done by RDkh. Ori. C. Kohu on Saturday (04/01/25), time: 12.21 pm, ready for quality checking.

2 Thessalonians

¹¹Lau Paulo, Silvanu, bona Timoteo, ese umui Tesalonika dubuna a tore henimuimu. Dirava ita Tamada bona Lohiabada Iesu Keriso lalonai.²Hariharibada bona maino na avabia Dirava ita Tamada ena amo bona Lohiabada Iesu Keriso ena amo.³Varavara e, nega iboudiai Dirava ahanamoamu umui daimui ai. Ina na maoro badina emui kamoni bona ta ta

emui uraheni na e badamu bona e tubumu.⁴Una dainai ai sibomai ese umui na a herevalaimuimu Dirava ena ekalesia oreadia vairadiai. Ai ese emui haheauka bona emui kamoni na a herevaladiamu e dagedage henimuimu metaudia daidiai. Ai ese emui hisihisi lalodiai emui haheauka eha-hedinaraidiamu danu a herevalaidiamu.⁵Ini na Dirava ena maoro-maoro hahemaoro toana. Umui na do bagwauraimui mai ahumui Dirava ena basileia lalonai badina emui hisihisi dainai.⁶Badina korikori una na maoro Dirava enai bona ia ese davana baine haloua eha-hisimuimu taudia do baine hahisidia,⁷bona ai ida ta hisihisi heboumu tauda laga-ani do baine henida. Ia ese do baine havaraia Lohiabada Iesu do baine hedinarai guba basileia amo ena aneru ida baema mai siahuna ida dinanai.⁸Mai lahi hururu-hururuna ida davadia do baine heni Dirava asie dibaiaumu taudia latadiai bona Lohiabada Iesu ena sivarai namona asie abiadaemu taudia latadiai.⁹Idia ahudia na mase hanaihanai bae abia, idia na Lohiabada vairana amo bona siahuna amo do abidia oho.¹⁰Ia ese baine karaia bainema dinanai bena ia e kamoni heniamu taudia sibodia ese ia hairaina bae imodaia. Badina be ena haroro eabiadae.¹¹Una dainai ai na umui daimui ai nega iboudiai a gurigurimu. Ai na a gurigurimu ita eda Dirava ese namomui baine gwaurai vada e boirimui hegeregereenai. Ai na a gurigurimu ia ese emui namo bona emui kamoni karadia iboudiai baine havara henimui mai siahuna ida.¹²Ini gau daidiai a gurigurimu bena unu amo Lohiabada Iesu ladana bae heatolaia umui ese. A gurigurimu ia ese baine heatolaimui badina be eda Dirava bona Lohiabada Iesu Keriso ena hariharibada dainai.

2¹Hari ita eda Lohiabada Iesu Keriso ena mai negana bona ia ida do baita hebou tamona herevana dainai, varavaramai e, a noimuimu,²unu gau ese basie hahegonumui haraga-haraga eiava kudoumui basie hetaha, dia lauma ta ena amo, eiava hereva ta amo, eiava revareva ta ai emai amo e tomu Lohiabada ena mai dinana vada eme ginidae.³Ta ese dala haida ai basie koimu. Badina be una dina na do basine ginidae ela bona heabi-oho baine vara murinai, bena dika ihavarana tauna do baine hedinarai, ia na hahemase natuana.⁴Ia sibona ehe-gwauraimu hereadae bona Dirava itoma-diho henia daladia iboudiai ia ese e laodia ahumu, bona dubu helaga lalonai e helaimu, sibona e hegwaauramu ia na Dirava.⁵Umui asio helalo-taomu lau umui ida neganai, ini gau iboudiai na vada na hamaoro laimui, ani? ⁶Hari umui na mai dibamui ia ilao-ahuna tauna be daika bona ena nega korikori ai do baine hedinarai.⁷Badina be kara havara tauna na dala hehunia amo vada e gaokaramu bona ia ilao-ahuna tauna tamona na hari doini noho, ela bona ilao-ahuna tauna baine heabi oho⁸Bona kara havara tauna na baine hedinarai, ia na Lohiabada Iesu ese uduna amo baine ha-hoho henia bena baine alaia mase. Lohiabada ese gau ta ai basine halaomu, ia ena mai hedinaraidia amo.⁹Ina kara havara tauna ena mai hedinaraina na Satani ena gaokara mai siahuna ida, mai toa idau-idau ida, bona mai hoa karadia koikoidia ida,¹⁰bona mai dibaka karadia gagevagavedia ida. Ini gau na e boio taudia ediai, badina idia ese hereva momokani lalokauna asie abiadae idia ihamauridia totona.¹¹Badina binai, Dirava ese kerere karana ta e siai henidiamu, bena unu amo hereva koikoidia bae hamomokanidia totona.¹²Unu amo idia na bae hahemaoro henidia daika be hereva momokani asie abiadaemu a edia kara gageva-gagevadia e moale-laimu taudia latadia ai.¹³Varavara mai e, Lohiabada ena lalokau taumui, ai na nega iboudiai Dirava aha-namoamu umui daimui ai, badina Dirava ese vada eabimui hidi ena hahemaori anidia roboadia, Lauma Helaga lalonai bona hereva momokani iha-momkani dainai.¹⁴Ia ese e boirimui ai emai sivarai namona amo, bena umui na eda Lohiabada Iesu Keriso hairaina do bavabia.¹⁵Una dainai, varavara mai e, bagini auka ahadibalaimuiva herevadia udu mai amo eiava emai revareva amo na badogodia tao tarika tarika.¹⁶Ina hari ita eda Lohiabada Iesu Keriso sibona ese, bona Dirava ita Tamada ita e lalokau henida bona ena hariharibada amo noho hanaihanai tauhalona bona helaro goevadaena vada eme henida,¹⁷ese tauhalo bona lalomui ai kara namodia bona hereva namodia baine havara henimui.

3¹Varavara mai e, ai daimai ai ba guriguri bena Lohiabada ena hereva na baia lasi-laia haraga bona bae imodaia, emui ai danu hegeregereena.²Daimai ai ba guriguri bena ai na baia heruha-nege kara kereredia bona kara dikadia e karamu taudia edia amo, badina dia iboudiai na mai edia abidadama.³A Lohiabada ba abidadama, baine haginimui tutuka bona baine gimamui dika tauna ena amo.⁴Ai na asi emai lalo daradara Lohiabada lalonai umui daimui ai, ene emai hahegani herevadia na o karamu dounu bo-karamu dainai.⁵Lohiabada ese lalomui baine gunalaidia Dirava ena lalokau ai bona Keriso ena haheauka ai.⁶Varavara mai e, ahaganimuimu eda Lohiabada Iesu Keriso ladanai bamomu lahedo ai e nohomu mauridia taudia edia amo bona ai ese a sisiba henimuiva daladiai asie maurimu taudia edia amo ba raka oho.⁷Badina umui sibomui danu dibamui ina na maoro umui ese ai ba toho-tohomai.⁸Ai na ta ena amo aniani davana asi a henia bena ania kava. A ai na hanuaboi bona dina a gaokaramu bona a hekwarahimu unu amo ai na umui basia madunamui.⁹Ini a kara tomamu dia ai na asi emai maoro. A ini a kara tomamu na umui ihaheitalaimui, bena unu amo umui na ai ba toho-tohomai.¹⁰Badina umui ida ta nohova neganai, ai ese ahaganimui ato, "asine uramu baine gaokara tauna na basine aniani."¹¹Badina ai na ame kamoni umui haida na o raka havara-havaramu. Idia na asie gaokaramu unu na gado-dae gado-dae taudia.¹²Hari taunimanima unu hetomadia na ahaganimuimu bona ahagoadamuimu Lohiabada Iesu Keriso lalonai idia na bae gaokara asi maumaudia ida bona sibodia adia aniani bae ani.¹³A umui, varavara mai e, lalomui na basio hamanokadia ina kara maorona ikarana.¹⁴Bona bema ta ese emai revareva asine badinaiamu neganai, badibaia bona basio hebou tamona, bena baine hemarai.¹⁵Basio laloa ia na oi emu inai tauna, ba sisiba henia e kara oi bamomu.¹⁶Hari maino Lohiabada sibona ese maino baine henimui nega iboudiai bona dala iboudiai lalodiai. Lohiabada na umui ida nega iboudiai.¹⁷Ina lau egu hahenamo na henimu, lau Paulo, sibogu imagu ai ina revareva na toreamu, egu revareva toana. Ina na egu revareva na toreamu dalana.¹⁸Eda Lohiabada Iesu Keriso ena hariharibada na iboumui ai ese avabia. Amen.²Thess. (Chpt 1 - 3) General Checking yet to be done.

1 Timothy

1

¹Paulo, Keriso Iesu ena aposetolo taugu, ihamaurida Diravana bona Keriso Iesu eda Lohiabada edia helaro bona hahegani daidiai, ²natugu korikori abidadama ai Timoteo, na tore henimumu: Harihari-bada, hebogahisi bona maino, Tamada Dirava bona Keriso Iesu ena amo bavabi. ³Makedonia nala negana ai, na noimu Efeso ai ba boho taritari nato, bona taunimanima haida ba sisiba henidia, hahediba herevadia idaudia basie gwaurai. ⁴Gori bona seoremu uruna ihagauna danu basie kamoni helaoreana, unu na hepapa-ahuahu e havaramu, a Dirava ena gaukara, una na abidadama amo e varamu, na se duruamu. ⁵Harihari ina hahegani anina korikori be lalokau, kudou-goevagoeva amo, bona lalo hadai maoromaordia amo bona abidadama korikori amo e varamu. ⁶Taunimanima haida ese toa vada e reaia bona ini gau amo vada e hegiro kavakava herevadia ai. ⁷Sibodia taravatu ihadibalaidia taudia ai baela e tomu, a edia hereva anidia eiava e gwaurai goadagoadamu gaudia na asi dibadia. ⁸A dibadia danu taravatu be namo bema ta ese baine gaukaralaia maoromaoro negana ai. ⁹Ina na dibada, taravatu vada e haginia na dia kara maoromaoro tauna ena, a kara-havara bona gwau ede-edo taudia edia, Dirava garina asie garimu taudia edia bona kara dika taudia edia, Dirava ena ura asie karamu bona e hadikamu taudia, tamadia sinadia e aladiamu taudia, roroma taudia, ¹⁰heuda hanai taudia, mata-bodaga taudia edia, taunimanima e henaodiamu bona hesiai taudia ai e halaodiamu taudia edia, koikoi taudia edia, hahebade koikoi taudia edia bona hahediba herevadia momokanidia e inai henimu taudia edia. ¹¹Ini hahediba herevadia na hairai Diravana ena sivarai namo-hereana amo bona ireguna taugu ai vada e halaogu. ¹²Goda e henigumu tauna eda Lohiabada Keriso Iesu na tanikiu heniamu, badina be e haerogu vada na momokani, bona e abigu hidi ena hesiai taugu. ¹³Gunaguna ai, Dirava ladana vada na hadikaia bona dagedage taugu, bona na ere dikava, to hebogahisi na davari, badina be egu kara na kakavakava bona asi egu momokani dainai. ¹⁴To eda Lohiabada ena harihari-bada vada e bada herea mai abidadama bona lalokauna ida una be Keriso Iesu lalonai. ¹⁵Ina hereva na momokani bona iabi-daena danu namo, Iesu Keriso na kara dika taudia ihamauridia totona tanobada ema, a dika hereana be lau. ¹⁶Badina binai e bogaguhisi, Iesu Keriso ese haheauka idoinai lauegu amo baine hahedinaraia guna, gabeamo bae abidadama henia ela bona mauri hanaihanai bae abia taudia ese lau bae hagoigu. ¹⁷Harihari uru iboudiai edia pavapava, mase asi dibana, asine itamu, sibona mo Dirava, aita imodaia harihari ela bona hanaihanai. Amen. ¹⁸Natugu Timoteo e, ina hahegani na vairamu ai na atoamu, e gwauraimu gunava perovetadia hegeregereidia, unu amo tuari namona ba tuarilaia, ¹⁹abidadama bona lalo-hadai namodia ba kahu tao tarika-tarika, haida ese vada e kahu nege, e kara edia abidadama vada e tata kahi na heto. ²⁰Ta be Humenao, ma ta Alesana, ruaosi be Satana vada na henia, bae mata hakani, Dirava ladana basie hadikaia lou.

² ¹Una dainai, egu hahealo gini-gunana be noinoi, guriguri, Dirava igamena bona ihanamolaina ba kara taunmanima daidiai, ²bona hanua pavapavadia bona siahua taudia daidiai, bona unu amo Dirava ibadinana bona imatauraina lalodiai baita noho namonamo mai mainoda ida. ³Una be namo, ihamaurida Diravana ihanamolaina. ⁴Badina be Ia na e uramu taunimanima iboudiai bae mauri bona hereva momokani aonegana bae diba. ⁵Badina be Dirava na tamona, bona herohemano tauna danu tamona, Dirava bona taunimanima padadai, tauna be Keriso Iesu. ⁶Ia sibona ena mauri e heni taunimanima iboudiai idavalaidia, ihamomokanina na nega korikori ai e hedinarai. ⁷Una dainai haroro tauna bona aposetolo taugu ai vada nala. Keriso lalonai, na hereva momokanimu - asina koikoimu. Idau bese taudia edia hahediba tauna ai vada nala abidadama bona hereva momokani ai. ⁸Una dainai, lau na uramu gabu iboudiai tatau bae guriguri, ima helagadia bae dudui isi dia badu eiava hepapa-ahuahu ai. ⁹Una hegeregereia ai, lau na uramu hahine danu dabua maordia bae hahedokilai, mai manaudia bona hematauraidia ida. Huidia basie pani, gold, eiava ageva mai hairaidia basie heralai, dava bada dabuadia danu basie doki, ¹⁰a kara namo mo bae heralai, una na maoro, Dirava imatauraina e gwaurai hematamu hahinedia edia. ¹¹Hahine na lalo-parara baine tahua asi regeregena bona mai lalo-manauna ida. ¹²A lau na gwau tubumu hahine na basine hahediba eiava tau basine gunalaia, a asi regeregena baine noho. ¹³Badina be Adamu e karaia guna, Eva be gabeai. ¹⁴Adamu danu se koia, hahine hari e koia bona kara havara ese e butua tao. ¹⁵A natuna iabina ai mauri baine davaria, bema kamoni bona kara helaga baine badina hesirui mai lalo-pararana ida negana ai.

³ ¹Ina hereva na momokani: tau ta ese heitatao dagina baine ura henia, ia ese gaukara namona e ura heniamu. ²Una dainai, heitatao tauna na basie habadelaina baine namo, ia danu hahine tamona adavana, boga-auka tauna, aonega tauna, kara manada tauna, hahediba mai dibana tauna, ³vine ranuna basine inu momo, basine heatu, a baine gaukara mai manauna ida, maino ai baine honu, moni basine mata ganigani heni. ⁴Tena ruma baine regua namonamo, natuna danu baine regudia, bae kamoni henia bona bae matauraia. ⁵Badina be tau ta ese ena ruma korikori taudia basinema regudia diba, Dirava ena ekalesia oreana ede bema regua toma? ⁶Ekalesia tauna matamatana ese ina dagi basine abia, baine hekorokoro bona diablo ena hedibagani ese baine butua tao na garina. ⁷Ia harina danu baine namo murimuri taudia ediai, hemarai bona diablo ena idoa ai baine keto na garina. ⁸Diakono danu unu bae heto, bae matau, basie udu mauri, vine ranuna basie inu momo, basie mata ganigani, ⁹Iesu ibadinana herevadia bae badina mai lalodia goevadia ida. ¹⁰Bae dibadia guna, bema ta asi ihabadelaina, edia diakono gaukarana vada bae karaia. ¹¹Adavadia danu bae matau, basie ere dika, bae boga-auka gau iboudiai bae abidadama. ¹²Diakono na basie hodara, natudia bona edia ruma taudia bae regudia namonamo. ¹³Badina be diakono gaukarana e karaia namonamomu taudia na taunimanima ese bae matauraidia

bona Keriso Iesu ikamonaina ai bae goada balaheni.¹⁴Ini hereva na tore henimumu, na helaromu baina vasi haraga na tomu,¹⁵a bama halahe, ini amo boma diba taunimanima na ede bae kara toma Dirava ena ore a lalonai, mauri Diravana ena ekalesia bunai, hereva momokani du'na bona imudana.¹⁶Momokani eda Dirava ibadinana herevana hehunina na bada: "Tau anina ai e hedarai, Lauma ese maorona e gwauraia, Aneru ese e itaia, Bese idau-idau bogaragidiai e harorolaia, Tanobada ai e kamoni e kamoni henia bona Hairai ai e abiadae."

4¹Harihari Lauma ese vada e gwauraia hedinaraimu nega gabedia ai taunimanima haida ese abidadama bae rakatania, dibaka laumadia bae kamoni henidia bona lauma dikadia edia hahediba herevadia bae abi dae.²Hari hahediba koikoidia na dibaka taudia haida edia amo. Idia na e kara lalodia na auri siahuna amo e gabu na heto.³Idia ese taunimanima e gwaudia taomu basie headava e tomu, bona aniani haida basie ani. A unu aniani na Dirava ese e kara gaudia, kamoni taudia bona hereva momokani dibadia taudia ese Dirava bae hanamoa guna guriguri ai.⁴Badina be Dirava ese e kara gaudia iboudiai nanamo, bona asi taravatu dia danu, a Dirava bae hanamoa basie hedadarai.⁵Badina be Dirava ena hereva na guriguri ai vada eme hahelagadia.⁶Ini hereva oi ese varavarada ba hadibalaidia, bona Keriso Iesu ena hesiai tauna namona ai baola, Iesu ibadinana bona hahediba herevadia namoda vada o badina guna gaudia, ese do ba ubumu.⁷To tanobada ena kavakava goridia hahine uru badadia ese e lalokauva gaudia ba dadarai, A sibomu Dirava ba hagoia.⁸Badina be tau anina ihagoadana na taina namo, a Dirava ibadinana ese gau iboudiai e hanamodiamu, ia hari mai gwauhamatana, ina mauri ena bona mauri gabena ena.⁹Ina na hereva momokani, baita abia dae hari namo.¹⁰Badina bunai ta hekwarahimu bona ta hisihisimu, badina be mauri Diravana ta abidadama heniamu. Ia na taunimanima iboudiai ihamauria, to kamoni taudia ediai anina na bada.¹¹Ini hereva ba hahedualai bona ba hahedibalai.¹²Ta ese basine ihihiraimu oi eregabemu ai, A hereva ai, kara ai, lalokau ai, abidadama ai, lalo-goevagoeva ai, kamoni taudia edia ihagoina tauna ai baola.¹³Buka Helaga iduahina, haroro, hahediba, ba goadalai ela bona lau baina vasi.¹⁴E henimu herahiana igaukaralaina ai basio manoka, peroveta edia hereva hegeregedia ai e henimu, heitato taudia ese inaidia na oi tubuamu ai e ato kau negana ai.¹⁵Ini gau ba manadalai, lalomu idoinai ba henidia, bona emu goada na taunimanima iboudiai vairadiai baine hedinarai.¹⁶Sibomu nahuamu ba tohoa bona emu hahediba herevadia nahuadia ba toho, ba badina tarika-tarika unu ba kara toma bona sibomu ba hahemaui bona ba kamoni taudia ba hamauria.

5

¹Tau badana ta basio gwau henia, to ba hahealo henia tamamu na heto, eregabe tatau dia ba tadikakadia.²Hahine badadia ba sinadia, bona eregabe hahinedia ba taihudia mai lalo goevagoevamu ida.³Vau ba matauraidia, bema vabu korikori.⁴To vabu ta bema mai natuna eiava tubuna, idia na bae diba, Dirava ibadinana na edia ruma korikori ai bae hagugurua guna, natudia ese tamadia sinadia ba ubudia, badina una be kara namona Dirava vairanai.⁵A vabu korikori, asi varavarana ese Dirava e abidadama heniamu e noinoi hanaihanaimu, e guriguri boimu, e guriguri ranimu.⁶A tau-anina ena moale e tahuamu vabuna, e maurimu to vada e mase.⁷Unu ba hahedua toma danu bona asi bebeke-bebekadia bae noho.⁸A varavarana se naridaimu bona ena ruma taudia se ubudiamu tauna ese Iesu ibadinana e goreamu, ena dika ese murimuri tauna ena dika e hereaiamu.⁹Vabu ladana basio torea ela bona laganidia tauratoi-ahui bae ore. Tau tamona e adavaia hahinena.¹⁰Ena kara namo daidiai e imodaiamu hahinena, natuna e ubudiava hahinena, laolao taudia eabidia daeva hahinena, helaga taudia aedia e huriva hahinena, hisihisi taudia e durudiava bona kara namodia iboudiai e goadalaiva hahinena, ia hari ladana ba torea.¹¹To vabu eregabedia ladadia basio torea, badina be edia ura dikadia daidiai Keriso bae dadaraia, bae headava lou.¹²Badina hahemaoro bae abia, badina be edia gwauhama gunadia vada e negea.¹³To una hora tamona, idia ese lahedo karadia e manada laiva, idau ruma idau ruma e dae kau dae kauva, dia lahedo mo, a unu mauri danu e gado kau, gado kauva, ere dikava.¹⁴Una dainai, lau na uramu vabu eregabedia na bae headava, natudia bae havaradia, edia ruma taudia bae regudia, bona e inai henidiamu taudia na baine habadelaidia diba.¹⁵Badina be haida vada e raka oho vaitani, Satani vada e gavaia.¹⁶Bona Iesu ibadinana hahinena ta varavarana haida bema vabu, ia ese bema naridia ekalesia oreana basinema hametaua, unu amo ekalesia ese vabu korikori baine naridia diba.¹⁷Heitatao taudia ese taunimanima e hakaudia namonamomu na ba matauraidia bona heitatao taudia haroro bona hahediba e goadalaia na ba matauraidia bada.¹⁸Badina be Buka Helaga na e gwaumu, "Boromakau ese uit e moimolaiamu negana ai na uduna basio guia." Ma e gwaumu; gaukara tauna ese davana baine abia, una na baine namo.¹⁹Haida ese heitatao tauna bae habadelaia, edia hahebade basio abi dae, ela bona dibadia taudia rarua eiava tatoi ese bae gwauraidia hedinarai.²⁰Kara dika e manadalaia taudia ba gwau henidia, taunimanima iboudiai vairadiai, bona oredia vada bae gari.²¹Dirava bona Keriso Iesu bona e gwauraidia hidi anerudia vairadiai na hagamimumu, ini hahebade herevadia na ba badina, lalomu basio hadaia kava, bona emu haero maoro basio hagagevaia.²²Imamu na tau ta tubuana ai basio atoa kau haraga, haida edia kara dikadia basio durudia; sibomu nahuamu ba tohoa, ba goevagoeva.²³A ranu kavakava basio inua, a vine ranuna kuri tata mo ba inu, bogamu ihagoevana badina be o gorere louloumu.²⁴Taunimanima haida edia dika vada eme hedinarai, e kara e gunalaidiamu na heto, ela bona hahemaoro gabuna, a haida edia dika e kara e gavadiamu na heto.²⁵Unuhetomana danu kara namodia haida vada e hedinaraimu, a asie hedinaraimu gaudia na basie hehuni daudau.

6

¹Maduna henunai hesiai taudia iboudiai na lalodia bae hadai maoro, biagudia bae matauraidia, Dirava ladana bona iseda hahediba herevadia bae hadika na garina. ²Haida biagudia be Iesu ibadinana taudia, to imatauraidia basie hamaragia idia na varavara dainai. A isiaidia bae lao heni mai goadadia ida, badina be edia kara namo ese e hanamodiamu taudia na Iesu ibadinana taudia bona edia lalokau. Unu ba hadibadia toma bona unu ba hagogadadia toma. ³A tau ta baine hahediba kerere, eda Lohiabada Iesu Keriso ena hereva maoromaorodia bona Dirava ibadinana herevadia hegeregedia basine gwaurai, ⁴una tau na hekokoroku tauna. Ia na gau ta asi dibana, henanadai bona hepapa-ahuahu mo e ua heni kavamu. To unu amo e varamu gaudia bini: vagege, heai, ere-dika, lalo-hadai dikadia. ⁵Bona lalodia e kereremu bona hereva momokani vada e rakatanimu taudia edia hepapa-ahuahu asi anidia. Idia banava e tomu Dirava ibadinana na kohu idavarina dalana. ⁶To Dirava ibadinana mai lalo-namona be kohu badana ta. ⁷Badina be gau ta tanobada ai asita mailaia, gau ta danu basita laohaia. ⁸To malamala bona hahedoki baita davari, unu hari laloda ese bae moalelai na namo. ⁹A taga e ura heniamu taudia na hedibagani ese e butudia taomu, bona ura kavakavadia bona ura dikadia, idoa na heheto, ese e abidiamu. Taunimanima ihabua-taridia gaudia bunu, mase hanaihanai ai e hadonodia masemu. ¹⁰Badina be moni iura-henina na dika ramuna; bona e ura henia bada taudia haida ese Iesu ibadinana vada e rakatania, bona hisihisi momo amo sibodia vada e hedai uru. ¹¹A oi, Dirava ena hesiai taumu e, unu gau iboudiai ba heautani, kara maoromaoro, Dirava ibadinana, kamoni, lalokau, haheauka, lalo-manau, ba gava. ¹²Kamoni ena tuari namona ba tuarilaia. Mauri hanaihanai iabina totona vada e boirimu, bona mauri hanaihanai harina namona vada e gwaurai hedinarai, dibadia taudia hutuma vairadiai; benaini, vada bavabia tao. ¹³Gau iboudiai edia mauri e henidiamu Diravana vairanai, bona Keriso Iesu, hereva namona Pontio Pilato vairanai e gwaurai Tauna, vairanai na haduamumu: ¹⁴ini hahegani ba badinaia, asi toutouna bona asi ihabadelaina, ela bona eda Lohiabada Iesu Keriso baine hedinarai. ¹⁵Nega namona ai Gaubada namo-hereana ese baine hahedinarai; ia mo sibona Gaubada, pavapava edia Pavapava; lohia edia Lohia; ¹⁶ia sibona e noho hanaihanaimu asi iraka-kahikahina diarina ai e nohomu; ta ese asine itaia, bona ta ese basine itaia diba. Hemataurai bona siahua ienai bae mia hanaihanai. Amen. ¹⁷Taga taudia ina tanobada ai ba haduadia, basie hekokoroku, asie mia daudaumu kohudia na basie laro, a mauri Diravana mo bae laroa. Ia ese ihamoaleda gaudia iboudiai e henida dudukaumu. ¹⁸Ba haduadia danu, kara namodia bae kara, edia taga gaudia bunu. Edia kohu bae hariharilai, heabi-dae taudia ai baela. ¹⁹Unu amo edia badi namona bae abia hegaegae vairadia dinadia ena, bona mauri korikori bae abia tao. ²⁰Timoteo e, vada e henimu gauna ba gimaia; hereva dikadia bona kavakava herevadia bona aonega koikoidia hepapa-ahuahu amo ba rako oho. ²¹Una na haida ese vada e abi dae; bona Iesu ibadinana vada e reaia. Harihari-bada emu ai baine mia.

2 Timothy

¹¹Lau Paulo, Keriso Iesu ena aposetolo ta Dirava ena ura dainai, Keriso Iesu lalonai mauri gwauhamatana e miamu hegeregereana, ²natugu Timoteo, egu lalokau:hariharibada, hebogahisi, bona maino Tamada Dirava ena amo bona Keriso Iesu eda Lohiabada.abi.³Dirava na hanamoamu senegu ese isiaia e lao heniva hegeregereana ai lau ese danu na lao heniamu mai lalogu goevagoevana ida. Hanuaboi ai, dina ai, egu guriguri ai na hanamoamu bona oi ilalomu asina hadokoamu. ⁴Emu tai na helaloune laiamu bona na ura badamu baina itamu; baina moale bada helaoreana. ⁵Emu kamoni korikori danu na helaloune laiamu; una kamoni na gunaguna tubumu hahinena Loi bona sinamu Eunike lalodia ai e miava; lau na tomamu harihari oi lalomui ai e miamu danu. ⁶Una dainai na lalomumu Dirava ena herahia gauna be imagu tubuamu ai na ato kau negana ai o abia ba hahururu-hururua. ⁷Badina be Dirava ese gari laumana se henida a siahua bona lalokau bona boga-auka laumana e henida. ⁸Una dainai, eda Lohiabada igwauraina ai basio hemarai, bona lau e guigu hemaraina basio hemarai. Dika iboudiai lalodiai ba haheauka sivarai namo dainai Dirava ese goada baine henimu hegeregereana. ⁹Ia ese vada e hamaurida, bona boiboi helagana amo vada e boirida, dia ita eda kara hegeregedia, a ia sibona ena lalo-hadai bona lalokau hegeregedia. Una hariharibada be Keriso Iesu lalonai e henida, seneda do asie vara negana ai, ¹⁰a harihari vada eme hahedinarai, Keriso Iesu, iseda Hahemaui Tauna ihahedinaraina ai. Ia ese mase vada e ha-orea, ia ese sivarai namo amo ina mauri bona mauri hanaihanai vada e hadiaridia. ¹¹Una sivarai namo iharorolaina bona ilolaina bona ihahedibalaina tauna ai vada e halaogu. ¹²Una dainai lau ini na hisihisi tomamu; to asina hemaraimu. Badna be egu abidadama vada dibagu, bona lalogu na hadaiamu, na tomu ia na mai goadana egu vada e atoa gauna baina gimaia diba, ela bona una dina baine kau. ¹³Hereva momokanidia lau egu amo e kamonaiva ba badinadia tarika-tarika, Keriso Iesu iabidaena ai bona iurahenina ai. ¹⁴E henimu gauna ba gimaia, Lauma Helaga ita laloda e noho henimu Laumana dainai. ¹⁵Dibamu Asia ai e nohomu taudia iboudiai na egu amo e raka oho, Fugelo bona Heremogene danu. ¹⁶Onesiforo mai ena ruma taudia ida Lohiabada ese baine bogadia hisi; badina be nega momo ia ese lalogu vada e hamatamataia, bona egu gadea hemaraina se hemarai; ¹⁷a Roma ai e kau negana ai e tahugu goadagoda ema bona e davarigu. ¹⁸Lohiabada ena hebogahisi do baine davarai, una dina ai. Isiaigu vada e lao heni tomava Efeso ai vada dibamu. Completed by RDKH. Ori. C. Kohu on Thursday (01/08/24), time: 6.30 am

2

¹Una dainai natugu e, Keriso Iesu ena hariharibada lalonai ba goada. ²Dibadia taudia hutuma vairadiai vada na hamaorolaimu herevadia na kamoni taudia ba hamaorolaidia; bona idia ese haida ma bae hadibadia. ³Hisihihi lalodia ai ba haheauka, Keriso Iesu ena tuari tauna namona na heto. ⁴Tuari tauna ese ina mauri gaudia basine hatuarilai; unu amo tuari oreana lalonai e abia vareai tauna baine hamoalea. ⁵Tau ta danu gadara gabuna ai baine goada helulu, a gadara

taravatuna basine badinaia, ia ese kwalimu toana basine abia.⁶Biru tauna ena hekwarahi davana be uma anina baine abi guna.⁷Egu hereva anidia ba haero, badina be Lohiabada ese gau iboudiai lalodiai aonega baine henimu.⁸Iesu Keriso na ba laloa tao: ia na Davida garana; ia danu mase amo e tore isi. Egu sivarai namo bunai; ⁹bona ia dainai hisi na animu egu igui ai; kara dika tauna na heto gau tamona, Dirava ena hereva asie guia. ¹⁰Badina binai hisihisi iboudiai na haheauka laimu, vada e abidia hidi taudia daidiai; Keriso Iesu ena hahemaui bona mia hanaihanai hairaina bae abi helaoreana. ¹¹Ina hereva be momokani: ia ida tama mase, ia ida danu tama mauri; ¹²baita haheauka, ia ida lohia ai baitala; a baita gorea, ia ese baine goreda. ¹³Ena be ita ese basita badinaia, to ia ese ita baine badinada, nega iboudiai; badina be sibona basine hegore. ¹⁴Ina gau na ba helalolaidia; bona Lohiabada vairanai danu ma ba sisiba henidia, hereva iboudiai basie hepapa-ahuahu laidia, badina be una na asi anina, bona unu amo ikamonaina taudia lalodia bae hadai kerere. ¹⁵Ba goada, Dirava vairanai namona baine hedinarai, gaukara taumu asi emu hemarai, hereva momokani igwaurai goevana taumu ai baola. ¹⁶A hereva dikadia bona kavakava herevadia amo ba raka oho, badina be idia ese dika bae habadaia. ¹⁷Hereva unuhetomadia na e kara toho dikana e ara moru ara morumu na heto. Humenaio bona Fileto na unuheto; ¹⁸raruosi ese hereva momokani vada e reaia, e tomu tore-isi lou vada e ore vaitani, bena haida edia kamoni vada e huea hebubu. ¹⁹Gau tamona, Dirava ena badi aukana vada e ginimu, toana bini, Lohiabada na ena taunimanima iboudiai vada dibana, bona, Lohiabada ladana e hatoamu taudia iboudiai ese kara dika bae heautania. ²⁰Ruma badana lalonai kebere na dia gold bona silver gaudia mo, a au bona raro keberedia danu mimia; unu be e matauraimu, a ini be asie matauraimu. ²¹Tau ta na hari gau dikadia amo sibona baine hahegoeva, ia na e matauraimu keberena ai bainela, baine helaga, biaguna isiaina ilao henina baine hegeregere, gaukara namodia iboudia ai baine hegeregere. ²²Uhau edia lebulebu karadia bae heautani. Ini na ba gava: kara maoromaoro, abidadama, lalokau, maino. Lalodia goevadia ai Lohibada ladana e hahaneamu taudia ida bae hebamo heheni. ²³Henanadai kavakava dia bona mata-lahuidia ihedorilaidia ba dadarai; dibamu idia ese heai e havaramu. ²⁴Lohiabada ena hesiai tauna na basine heai, a taunimanima iboudia ai baine gado namo henidia, baine hadibadia goevagoeva, baine hakaudia. ²⁵E gwaua tubu taudia baine sisiba henidia mai manau na ida; readia Dirava ese baine hahelalodia kerehai, bena hereva momokani bae diba. ²⁶Bena, ena be diabolose vada e abidia mauri ena ura ikarana, to bae noga, ena ura amo bae raka oho. Completed by RDKH. Ori. C. Kohu on Thursday (01/08/24), time: 8.08 am.

3 ¹A ina na badibaia, dina oredia ai nega aukadia do bae vara. ²Taunimanima vada sibodia ba heura heni, moni bae ura henia bada, bae heagi, bae hekokoroku, bae ere dika, iahudia do bae gwau ede-edehenidia, basie hahenamo, basie helaga; ³asi edia lalokau, bae tudaga, bae hahebade koikoi, bae lebulebu, bae dagedage, kara namo basie karadia; ⁴Bae tao tore, bae kara kava, bae hereva kava, lebulebu karadia bae ura heni bada, Dirava bae ura henia maragi; ⁵Dirava ibadinana toana bae hahedinarai e tomu, a idia ese Dirava siahuna bae dadaraia. Una dainai, ini taunimanima edia amo ba raka oho. ⁶Badina bogaragidiai na taunimanima haida ruma lalodiai e vareaimu bona hahine kavakavadia edia kara dika ese eha-metaudia bona edia ura dikadia ese vada eha kaudia kereremu, na e guidiamu, ⁷nega iboudiai e uramu bae diba, a idia ese hereva momokani idibana ediai na se maimu. ⁸A hegeregere na bejannes bona jambres ese Mose e laoa ahuva na heto, una dainai ini taunimanima danu hereva momokani vada e laoa ahumu, taunimanima lalodia vada e hadikadia, bona edia abidadama rakana amo vada e morumu. ⁹A idia na basie raka daudaumu, badina edia kavakava na taunimanima iboudiai ediai baine hedinarai, unu taunimanima ruaosi hegeregere. ¹⁰A oi ese egu hahediba herevadia vada o dibadia vaitani, egu kara, egu ura, egu abidadama, egu boga-auka, egu lalokau, egu haheauka, ¹¹dagedage bona hisihisi ese danu e butugu taumu bona Antiock ai, iconium ai, bona Lystra ai; dagedage idau na hisihisi laiva, to dounu lalodia amo Lohiabada ese eha mauriguva unu gabu iboudiai amo. v 12 Badina unu daidiai iboudiai e uramu Dirava ibadinana maurina bae mauri laia Iesu Keriso lalonai na do bae dagedage henidia. ¹³A kara dika taudia bona koikoi taudia edia dika vada bae bada herea, taunimanima bae koidia bona idia danu be koidiamu. ¹⁴Oi hari, vada o diba gaudia bona o abidae gaudia na ba kahudia tao tarika-tarika, o dibamu oi be daika ese vada e hadiba laimu. v 15 bona maragimu negana ai oi ese toretore helagadia (buka helaga herevadia) vada o dibadia amo aonega e henimu hahemaui abidadamana na Keriso Iesu lalonai. ¹⁶Buka Helaga herevadia iboudiai na Dirava ena heuda roha amo e toredia bona idia na mai edia gaukara taunimanima ihadibadia ai bona ihahelalo kerehaidia ai, bona isisiba henidiai, bona kara maoromaoro ai ihakaudia ai. ¹⁷Unu amo, Dirava ena taunimanima na baine hegaegae, kara namo ibounai ikaradia vada dibana.

4

¹Vada na haduamuimu Dirava bona Keriso Iesu vairadiai, ia ese mauri bona mase taudia iboudiai do baine ahemaoro henidia, ena loumai bona ena basileia daidiai: ²Hereva ba harorolaia; ba hegaegae nega namodiai bona nega dikadiai; taunimanima do ba helalodia kerehai, ba sisiba henidia, ba halodia, ba hadibadia mai haheaukamui ida. ³Badina nega na e maimu, taunimanima ese hahediba herevadia momokanidia basie abi daemu. A sibodia edia ura kava daidiai hahediba taudia momo do bae abidia, edia kamoni taiadia do bae hemai-hemai dia, ⁴bona hereva momokani ihakalana vada basie uramu, bona idia vada be hegiromu sivarai koikoidia (gori) ihakaladia mo be uramu. ⁵A oi na gau iboudiai ba boga auka, ba haheauka hisihisi ai, evanelia tauna ena kara ba kara; emu gaukara ba hagugurua. ⁶Badina lau na vada name hebubu ore, inuina boubouna (drink offering) gauna hegeregere bona egu raka oho negana vada eme kau. ⁷Tuari namona vada na tuarilaia; egu heau-helulu vada e ore; egu abidadama vada na hagugurua. ⁸Harihari kara maoromaoro kororona vada

eatoa tabe lau egu, una na Lohiabada, ahemaoro tauna maoromaorona baine henigu una dina ai, bona dia lau mo, a ena mai e ura heniava (e helaro laiava) taudia iboudiai danu.⁹ Ba goada dekegu baoma haraga.¹⁰ Badina Demas ese vada e rakatanigu, ina nega maurina e ura heniava dainai, bona vada ela Thessalonica, Crescena ela Galatia, bona Titus vada ela Dalmatia.¹¹ Luka sibona mo dekegu ai, Mareko bavabia oi ida baoma, badina be ia ese egu gaukara ai na baine durugu diba.¹² A lau ese Tychicus vada na siaia ela Ephesus,¹³ Kota dubuna Troas ai vada na rakatania Carpus enai, na ba mailaia o maimu neganai, bona buka, kopi ai e toredia gaudia hari.¹⁴ Alexander, auri e gaukaralaiaimu tauna, ese eme hadikagu herea. Lohiabada ese ena kara ahudia do baine henia lou.¹⁵ Oi danu nahuamu ba tohoa ia enai, badina be ia ese eda hereva vada se abidae bada.¹⁶ Egu kota ginigunana ai, ta lau ida vada asi agini hebou, a iboudiai ese vada e rakatanigu. Edia kara davadia ai hari basiela.¹⁷ A Lohiabada vada lau ida a gini hebou bona e hagoadaguva, bona egu amo, sivarai namo ibounai baine lasi guguru, bona bese idau idau ese bae kamonaia helaoreana dainai. Lau vada leona uduna amo e hamaurigu.¹⁸ Lohiabada ese kara dika iboudiai amo baine laogu-ahu bona baine hamaurigu ena guba basileiana dainai. Heimodai iboudiai na ia ena ela hanaihanai. Amen.¹⁹ Priscilla bona Aquila, bona Onesiphorus ena ruma taudia ba hanamodia.²⁰ Eratus na Corinth ai dounu noho, a Trophimus be mai gorere na ida vada na rakatania Miletus ai.²¹ Ba goada paraka do se kau ai baoma. Eubulus ese eha namomuimu, bona Pudens, bona Linus, bona Claudia, bona tadikaka danu.²² Lohiabada na laumamu ida. Hariharibada na oi idia.

Titus

1 ¹ Lau Paulo, Dirava ena hesiai taugu ta bona Iesu Keriso ena aposetolo ta, Dirava ese eabidia hidi taudia edia abidadama dainai, bona hereva momokani idibalaidia bona helaga daladia ibadinadia eabidaemu dainai,² mai mauri hanaihanai helarona ida una asine koikoimu Diravana ese e gwauhamata-lai nega gunadia do asie hemata neganai.³ A nega korikori ai ena hereva vada eme hedinarai henigu lau ese baina harorolaia hedinarai hahemaui Diravana ena hahegani dainai.⁴ Tito ena, ia na natugu korikorina emai abidadama tamona lalonai. Hariharibada bona maino Diravana ita Tamada ena amo bona Keriso Iesu ita ihamaurida ena amo.⁵ Ina gaukara dainai lau ese Crete ai na rakatanimu, bona unu amo oi ese gaukara doene mimia ba heatodia lailai bona heita-tao taudia ba helagadia hanua ta ta lalodiai, lau ese na hamaorolaimu dalanaia.⁶ Heita-tao tauna na basie habadelaia, ia na hahine tamona mo adavana, natudia ese danu baine kamoni henia bona basie habadelaia bona idia na asi edia hemataurai eiava sisiba herevadia se kamonaimu.⁷ Heita-tao tauna danu hegeregere Dirava ena ruma ireguna biaguna, ia na basie habadelaia. Ia na basine ura dika, basine badu haraga-haraga, basine inu kekero, basine dagedage bona kohu basine mata ganigani heni.⁸ A ia na heabidae tauna, kara namo baine hetura henia, baine haero namonamo, baine kara maoro-maoro, baine helaga baine boga auka.⁹ Ia na eha-dibalaia hereva momokani dia baine dogodia-tao tarikatarika, bona unu amo haida baine hagoadalaidia hahediba namo daladiai bona e gwau tubu taudia baine hereva maoro henidia.¹⁰ Badina enesenai ai hutuma e heinai hehenimu, e hereva kava, hereva kavamu taudia, bona hereva dibaka taudia e peritome taudia momo ene hutuma lalodiai.¹¹ Unu na bae hadokodia. Idia ese bese na e hakaudia kereremu edia hahebade herevadia amo edia hemarai karadia anidia davana, unu na basiema kara toma.¹² Idia sibodia edia peroveta na eto, "Kretan taudia na nega iboudiai e lahedomu, boroma dikadia bona hitolo mase taudia."¹³ Ina hereva na momokani. Una dainai ba hadibada diabadiba dia auka herea bona unu amo edia kamoni amo do bae namo.¹⁴ Iuda taudia edia guriguri basie kamoni henidia, eiava taunimanima edia hahegani ese hereva momokani amo e haraka dia ohomu.¹⁵ Gau iboudiai na gogoeva-gogoeva lalodia goeva-goeva taudia ediai. A lalodia mai mirodia bona asie hamomokania taudia ediai gau ta segoevamu, a daradia bona lalodia na vada e hamirodia.¹⁶ Idia na etomu mai dibadia Dirava, a gau be edia kara ese e gorediamu. Idia na dika karadia ai e maurimu bona e gwau ede-edemu bona dia hegeregere kara namona ikaranaia.

2 ¹ A oi, ba hereva dahaka gau be hegeregere mai hahediba momokanimu ida.² Tatau badadia ba hadibalaidia idia na bae boga auka, bae hemataurai, lalodia bae aonega, kamoni ai, lalokau ai, bona haheauka ai bae goada.³ Hahine badadia danu unu hetomanai ba-hadibalaida idia danu edia karai bae hemataurai, basie habade koikoi, kekero muramurana ese basie hadareredia, a kara namodia bae hahedibalai.⁴ Ini dala amo idia ese eregabe hahinedia ba-hadibadiba dia namonamo bona idia na adavadia bona natudia bae lalokau henidia,⁵ idia na lalodiai bae aonega, basie mata dika, ruma gaukaradia bae kara namonamo, bona adavadia bae kamoni henidia, bona unu amo Dirava ena hereva na basie hadikaia.⁶ Unu hetomana danu eregabe tatau danu ba-hagoadadia edia aonega namodia bae gaukaralaidia.⁷ Dala iboudiai sibomu bahedinarai oi na kara namodia ihagoina taumu. Emu hahediba-diba lalodiai na momokani ai bona hemataurai ai bahahedinarai, bona ba hereva maoro-maoro igwauhenimu herevadia daediai, bona ilao-ahumu tauna na baine hemarai asi edia hereva dikadia ita bae hamaorolaida.⁸ Hesiai taudia bahadibadia biagudia na bae kamoni henidia gau iboudiai lalodiai, biagudia bae hamoaledia, bona basie heai henidia.⁹ Basie henao, a edia kamoni namona bae hahedinarai, bona unu amo eda dala iboudiai lalodia amo Ihamaurida Diravana hahediba-diba herevana na bae hairavaia.¹⁰ Badina be Dirava ena hariharibada vada eme hedinarai taunimanima ihamauridia dainai.¹¹ Ita na eha-dibadamu bona asita helagamu bona tanobada iurahenina maurdia amo baita hekoki, bona ita na boga auka, bona kara maoro-maoro ai, bona helaga daladiai baita noho ina nega ai.¹² Ita na vaira ta roha laomu eda helaro namona iabina dainai, gauna bunai, ita eda Dirava herea mikamika bona ihamauridia tauna Iesu Keriso ena hedinarai hairaina.¹³ Iesu na sibona ena mauri e heni ita daidai unu amo ita ihamaurida kara dika iboudiai lalodia amo bona baine hagoevadia ia ena, taunimanima idaudiai baitala kara namodia ikaradia ma baita uralai.¹⁴ Ini gau mo ba herevalai, bona taunimanima

bahagoadadia ini na bae maurilaidia bona maoro daladial ba sisiba henidia mai siahu idoinai e henimu ida. Ta ese oi basine dadaraimu.

3 ¹Ba hahelalodia une hahemaoro taudia bona mai edia siahu taudia na bae kamoni henidia, bae noho hegaegae kara namodia iboudiai ikaradial, ²tau ta iha-dikana basie karaia, basie dagedage, bona bae manada, bae manau taunimanima iboudiai vairadial.³Badina ita gunai danu asi lalodia bona ta kavakava, ta gwau ede-edo. Ita na ta raka boio ura dikadia bona moale idaudau isiaidia ta lao heniva. Dika karadia bona vagege ai ta nonova. Ta dagedageva bona ta e heinai heheniva.⁴A ihamauridia Diravana ena gado namo bona ena lalokau ita edai vada e hedinarai. ⁵Ina na dia ita eda kara maoro-maoro karadia amo, a ia ena hebogahisi amo bona ia ese e hamauridia, vara lou amo e hurida bona Lauma Helaga ena ha-hematamata lou amo,⁶Dirava ese ita latadai e seia-dobi ita-ihamaurida Iesu Keriso ena amo, ⁷unu amo maoro-maoroda bae gwaurai ena hariharibada amo bona ia dihina ai baine halaoda una mauri hanaihanai helaoreana ai.⁸Ina hereva na mai momokanina ida. Lau na uramu ini gau ai ba gini goada, bona unu amo Dirava e kamoni henia taudia, na nahuadia bae toho kara namodia ikaradia lalodial.⁹A henadai herevadia kavakavadia, bona sene urudia ihagaudia, bona heai bona taravatu hepapa-ahuahudia amo ba raka oho badina unu na asi anidia bona asi edia namo ta.¹⁰Heiri-heiri dainai nega ta eiava rua o sisiba henia to doini hemaka lalonai e nohomu tauna na ba dadaraia, ¹¹badina unu hetomana tauna na dala maorona amo vada e raka oho bona doini kara dika lalonai, ia na sibona eha-hedikamu.¹²Atema eiava Tychius baina siaidia vasi neganai ba kara haraga bona baoma dekegu Nicopolis ai, badina be na tomamu ina paraka negana na unusenai baina noho. ¹³Mai lalonamomu ida Zenas taravatu tauna bona Apollos ba siaidia, edia mai ai danu imadia anidia ba kara, gau ta ai basie dabu.¹⁴A eda taunimanima na gaukara namodia ikaradia ba hadibalaidia bona haida edia ura haraga noinoidia daidial, idia ese bae havara henidia, bona basie gwauraidia edia kara na asi huahudial garina.¹⁵Lau ida na nohomu taudia edia hahenamo na umui e henimuimu. Emai hahenamo danu baheni edia kamoni ai e lalokau henimaimu taudia. Hariharibada na iboumu emui ai baine mia.

Philemon

1 ¹Lau Paulo, Keriso Iesu ena igui tauna, bona Timoteo varavarada Philemona ena, ai turamai bona gaukara hebou tauna ta, ²bona Apphia ai taihumai, bona Archippus ai emai tuari tauna, bona ekalesia oreana emai ruma ai e heboumu taumu emai revareva be inai. ³Hariharibada bona maino na Dirava ita Tamada bona Lohiabada Iesu Keriso ena amo avabia.⁴Nega iboudiai Dirava na hanamoamu. Egu guriguri ai ladamui na hatodiamu. ⁵Vada na kamonaimu emui iuraheni bona abidadama Lohiabada enai bona ia e abiadaemu taudia ediai. ⁶Na gurigurimu emui abidadama hebou tamona na anina baine havaraia bona ita padadai gau namodia iboudiai na ba diba Keriso lalonai. ⁷Badina egu moale bona tauhalo name abia badina emui iuraheni dainai, badina helaga taudia lalodia eme hamatamatadia oi ese, varavaragu e.⁸Una dainai ena be lau na auka Keriso lalonai bona baina hagamui dahaka baina kara, ⁹ema bona ina hari badina be iuraheni dainai, ina gabunai na noi-hegame, henimuimu - lau, Paulo, egegabe tau badana, bona ina hari danu Keriso Iesu ena igui tau.

¹¹Badina be guna ia na hesiai - ilaoheninai na asi ena namo ta, a harihari hesiai ilaohenina na mai ena namo oi bona lau edai. ¹²Lau ese vada na siaia lou oi dekemu, ia na lau kudougu korikori. ¹³Na ura bama dogoatao dekegu ai, lau doini igui lalonai bona ia ese isiaigu bema lao heni sivarai namo dainai.¹⁴To asi na ura gau ta baine karaia badina oi emu amo gwau-maoro ta asio heni dainai. Asi na ura oi emu kara namodia na dia hahedua daidial a sibomu emu ura namodia amo.

¹⁵Readia, momokani ina dainai ia na oi emu amo e daudau nega sinaimo, bona unu amo oi ese ma bavabia lou hanaihanai. ¹⁶Dia hesiai merona ai baina, a hesiai merona e hereaiamu tauna na heto, ita bamoda lalokauna ta. Ia na lau ese na lalokau heniamu bona oi ese danu o lalokau henia badamu, tauaninai bona Lohiabada lalonai danu.¹⁷Bena bema oi ese o haerogumu lau na oi bamomu, ia na bavabia-dae lau oabigu daemu hegeregere. ¹⁸A bema ia ese eha-dikamumu eiava mai ena abitorehai neganai, ena abitorehai na lau egu ai bavatodia. ¹⁹Lau Paulo ese ina revareva na toreamu imagu ai. Davana na lau ese baina henimu lou - asina ura baina hamaorolaimu mai emu imadava, oi ese laumamu egu amo oabia doa. ²⁰Oibe, varavaragu, namo karana ta boma kara henigu Lohiabada lalonai; lalogu bema keru Keriso lalonai. ²¹Emu kamoni na asina daradara-laiamu, na tore henimumu. Lau na dibagu ina na noiamu gauna daenai momo bo karamu. ²²A ina nega tamoni, vadivadi rumana ta ba hegaegaea lau egu, badina na helaromu, emu guriguri amo lau na dekemu baina vasi lou.²³Epaphras, lau bamogu eguia tauna ta Keriso Iesu ladanai ena hahenamo e henimu. ²⁴Mareko danu ese, Aristarchus ese, Damas ese, bona Luka ese, lau ida a gaukara heboumu taudia. ²⁵Eda Lohiabada Iesu Keriso ena hariharibada na laumamu ida. Amen.

Hebrews

1 ¹Idau negai Dirava ese ita seneda eheneva henidia peroveta taudia edia amo nega momo bona dala idaudia amo. ²To ini dina hidaosi ai, ia ese ita eheneva henidamu natuna ena amo. Ia ena amo, ia ena amo danu tanobada eva. ³Ia na diardiari bona Dirava hairaina ehahedinaiamu. Ia na gau iboudiai eabi hebou ena hereva siahuna amo. Gabai ia ese dika ehagoevaia, ia na herea mikamika idibana kahanai ehelaimu.⁴Ia na aneru iboudiai daedial bona ia ese lada hereadaena eabia lada idia iboudiai ladadia e hereadia. ⁵Una be daika ese Aneru na Dirava ese e hereva henia eto, oina lau natugu, hari dina lau na oi tamamu? O na gwau loumu lau na ia tamana ai bainala, bona ia na natugu ai baina? ⁶To na gwau loumu, bona Dirava ese natuna roboana tanobada e mailaia, ia bema gwau, "Dirava ena Aneru iboudiai ese ba

tomadiho henia." ⁷Aneru ai e halaodiamu Ia e gwaumu, "Ia sibona ese ena Aneru, na Lauma ai e halaodiamu, bona Ia ena hesiai taudia lahi hururuna ai e halaodiamu." ⁸To ia natuna egwaumu, Dirava, oi emu terona, baine mia ela bona hanaihanai. Oi na Basileiai bahamaoroa badina oi na hahemaoro tauna. ⁹Oi na mai emu lalokau kara maoromaoro taudia ediai, to taravatu asi e badinaiamu taudia na asi oura henidiamu. Una dainai Dirava, oiemu Dirava ese ehahelagamu moale dehorona amo oi bamomu iboudiai daediai. ¹⁰"Matamana neganai, Lohiabada, oi ese tanobada o karaia? Guba oi imamuai o karaia. ¹¹Iboudiai bae ore, to oi na banoho hanaihanai. Idia na bae ore dabua ehedare maragi-maragimu na heto. ¹²Oi ese ba lokudia dabua aukana na heto, bona idia na ba idau dabu rimurimu dia na heheto, to oi na basio idau bona oi emu lagani na do basine eore." ¹³To edena Aneru Dirava ese e hereva henia edena negai, lau imagu idibana kahanai bahelai ela bona oi inaimu na aemu henunai baina atodia? ¹⁴Dia e gaukaramu Lauma Aneru dia bona basiai dia lao Laumai e ogogamimu taudia dekedua bona bahamauridia lao?

2 ¹Una dainai ta kamoni herevadia nahuadia baita toho, nega ta baita huretanania garina. ²Badina be aneru ese e gwaurai herevadia bema momokani, bona kara havara iboudiai bona gwau ede-edu iboudiai bema mai davadia korikoridia, ³ita na ede baita roho mauri toma, ahemaui unu badana baitama dadaraia negana ai? Hahemaui bunai Lohiabada ese e gwaurai guna; bena ia ena amo e kamoni taudia ese vada e hamomokania ita eda. ⁴Bona Dirava danu vada e hahedinarai, toa ai, hoa karadia ai, siahu karadia idauida ai, bona Lauma Helaga ena herahia ai, ena ura hegeregere. ⁵Badina be mauri gabena ai ia ese e herevalaiamu na dia aneru se henidia bae biagua. ⁶Buka itorena tauna ta vada e hereva eto, taunimanima be dahaka oi ese ia o laloamu? Taunimanima natuna be daika oi ese ia o dosiamu? ⁷Oi ese o karaia, aneru ese sisina mo e hereaiamu, hairai mai hematauraina idia oi ese kwarana o havavalaia. Oi imamu ai o kara gaudia iboudia ai vada o henia, baine biagudia. ⁸Gau iboudiai ia aena henuna ai vada o atodia, ia ese baine biagudia. Badina be gau idoidiai taunimanima henunai eato dia negana ai, gau ta se rakatania idauhai. To harihari ta itaiamu, gau idoidia ai na dia ia henunai. ⁹A nega sisina mo aneru ese e hereai tauna, Iesu, harihari ta itaiamu, mase hisihisina dainai hairai mai hematauraina ida kwarana vada e havavalaia. Dirava ena hariharbada ai mase mamina eabia, taunimanima iboudia ai daidiai. ¹⁰Ina na diagau namona, ena, bona ena amo gau iboudia ai e havaramu Dirava na, ia natuna logora hairaina ai bema hakaudia vareai totona ese, eda hahemaui tauna hisihisi amo bema hahairadae. ¹¹Badina be hahelaga tauna bona e hahelagadia taudia na iduhu tamona, una dainai ia na asi ena hemarai ia tadina baine gwauraidia. ¹²Eto, oi ladamu baina gwaurai, tadigu vairadia ai; hebou lalonai baina hanamo egu ane ai. ¹³Ma eto, Lau oina bona natugu, Dirava ese vada e henigu, bini. ¹⁴Benaini, natuna be mai hidihodia bona mai raradia dainai, ia ese danu tauanina eabia idia hegeregere, mase amo ia ese mase biaguna, una na diabol, baine hadarerea, ¹⁵bona edia mauri dinadia iboudia ai mase garina ese e guidiamu taudia baine ruhada nege helaoreana. ¹⁶Momokani, ia na dia aneru se kahadia, a Aberahamo garana hari. ¹⁷Una dainai ia na gau iboudiai lalodia ai tadina ida hegeregere, hahelaga tauna badana ai bainela, mai ena hebogahisi bona mai ena kara maoromaoro. Dirava ena gaukara lalonai, taunimanima edia dika iabi-ohona. ¹⁸Ia na hedibagani e mamiamu taudia idurudia mai dibana, badina be ia sibona ese hisihisi bona hedibagani mamidia eabi dainai.

3 ¹Una dainai varavaragu helagamui, Basileia boiboia vada e ahulaimui, Iesu balaloa, ahediba tauna bona hahelaga tauna ai vada ela dika igwau tauna. ²Ia na eabia hidi tauna enai e heabidadamava, bona Mose Dirava ena rumai e heabidadamava hegeregere. ³Badina be ia ese hairai namo hereana eabia Mose ena ehereaia, hegeregere ruma ikarana tauna e matauraia bada a ruma be sibona, ⁴ruma iboudiai ikaradia na mai taudia, to gau iboudiai na Dirava ese e kara dia. ⁵Mose eabidadamava, hesiai gaukaradia e karava Dirava ena ruma idoinai lalonai, badina bae gwaurai gaudia iboudiai bae herevalai dia vairai. ⁶A Keriso eabidadamava natuna enai daika be Dirava ena ruma ehabiagulaia, ita na ia ena ruma, bema ita baita haheauka momokani bona eda helaro ai baita heagi. ⁷Una dainai, ina na Lauma Helaga e tomu, "hari dina ai, bema oi na ia gadona ba kamoni ⁸kudoumui basio ha-auka, o dadaraia tano gagaenai o tohoa neganai. ⁹Unuseni ai umui tamamui ese lau e tohogu, bona lau egu gaukara e ita lagani haria-hui. ¹⁰Una dainai unu taudia ediai na badu. Lau nato, 'Idia nega iboudiai kudou dia e kahu, bona idia na egu dala asie diba.' ¹¹Ina na egu badu ai na hereva: "Idia na egu laga-ani ai na basie vareai diba." ¹²Nahuamui ba toho, varavaragu, badina be umui ta ese kudoumui dika dia daidiai, Dirava basio ura henia. ¹³A dina iboudia ai ba hahealo heheni, ela bona e boirimu, "hari dina," una ese umui ta bogaragimui ai kara dika ena koiko ese lalomui basine ha-auka. ¹⁴Badina be ita na Keriso ida ta hebamo, bema ita na eda heabidadama baita kahua tarikatarika amo bainela dokona. ¹⁵Ini daidiai vada e hereva, "hari dina, bema oi na ia gadona o kamonaia, kudoumui basio ha-auka, basio dadaraia," ¹⁶badina daika ia gadona o kamonaia bona o dadaraia? O idia iboudiai be dia Mose ese Aikupito amo sehakau dia lasi a? ¹⁷A daidia ia ese e badu henidia lagani-haria hui? asi e kara dika taudia, mase tauanidia, tano gagenai. ¹⁸Bona daidia ia ese egwau hamata henidia taudia na ia ena laga-ani ai basie raka vareai, a daidia egwau ede-edu taudia a? ¹⁹A itaia idia na asi edia kamoni dainai asi e raka vareai.

4 ¹Una dainai, baita gari una ia ena laga-ani ai baita raka vareai gwauhamatana negana na doini emiamu lalonai, a umui haida ese oitaiamu idavarinai vada ome dabu. ²Badina sivarai namo na e hamaorolaida ma haida danu unu heto. To una sivarai na e kamonaia a namo ta asie havara idia ediai, badina idia na abidadama e kamonaia taudia ida na asie tamonava. ³A, ahamomokania taumai ese ena laga-ani ai vada ame raka vareai, ena hereva hegeregere eto, "egu badu ai na gwauhamta, idia na egu laga-ani lalonai na basie raka vareai." Unu hetomana danu, ena gaukara na e guguru tanobada eha-daia neganai. ⁴Badina dina iha-hituna dainai na eherea: "Bona dina iha-hituna ai e laga-ani ena gaukara

amo." ⁵Ma ehereva eto, "idia na lau egu laga-ani ai basie raka vareai diba." ⁶Una dainai, ina nega doini mianai, ini haida danu ma raka vareai, bona matamanai haida ese sivarai namona eha-maorolai henidia na sie raka vareai, badina be dia gwau ede-ede daidiai. ⁷Dirava ese dina ta ma eabia hidi bona egwaurai "Hari dina." Dina momo muridiai ia na Davida ena amo ehereva eto, "Hari dinai, bema ia gadona o kamonaianu neganai, kudoumui na basio ha-aukadia." ⁸A bema Iosua ese laga-ani vada e henidiava neganai, Dirava ese dina tama basinema hereva ina nega murinai. ⁹Una dainai, doini Sabati laga-ani na e siaia Dirava ena taunimanima edia. ¹⁰Badina daika Dirava ena laga-ani ai evareaimu na sibona ena gaukara amo danu laga-animu, Dirava ese e karaia hegeregere. ¹¹Una dainai, baita heura-dai una laga-ani lalonai baita vareai, unu amo ta na basine moru ina gwau ede-ede lalonai. ¹²Badina Dirava ena hereva na e maurimu bona mai siahuna, bona mai ganona bona ganona rua darena e hereaiamu. Lauma bona dara na egwadadia urumu elaomu bona turia haradia bona garugaru danu ehapararadiamu, bona elaomu bona taunimanima lalona ena lalohadai bona ena ura danu eha-hemaoro henidiamu bona eha-hedinaraiamu. ¹³E kara gaudia iboudiai, ta na dia hehuni Dirava vairanai. A gau iboudiai eme ha-ulala bona ia matanai ta na dia hehuni bona do baine hahemaoro henida. ¹⁴Una dainai, ema bona hari ita na mai eda Hahelaga tauna badana Iesu Keriso Dirava natuna, guba padadia amo e hanai, ina eda kamoni ta hamomokaniamu gauna na baita dogoatao balaheni. ¹⁵Badina be ita na asi eda Helaga tauna ta daika be eda manoka-manoka dainai basine boga hisi, to tamona daika be dala momo amo e dibagania ita hegeregere, a taina danu asine kara dika. ¹⁶Una dainai mai goadada ida una hariharibada terona-na aita raka henia, bona unu amo hebogahisi do baita abia bona hariharibada baita davari bona eda dabu negadai do baine kahada.

5 ¹Hahelaga taudia badadia na iboudiai, eabi-hidi, taunimanima bogaragidia amo, ia na taunimanima edia ura Dirava baine hamaoroa, bona ia ese boubou gaudia baine hahelagadia bona edia dika iabi-ohodia baine kara. ²Ia na mai manauna ida lalo-duhu bona kerere taudia daidiai ia na e manoka-manokava. ³Unu daidiai, ia ese boubou gaudia baine karadia dika igwautao dia, ia ese taunimanima daidiai bona ia sibona dainai. ⁴Ia na dia ia sibona dainai to haida ese ina dagi danu eabimu, una dainai, ia na Dirava ese e boiria, Aaron e boiria hegeregere. ⁵Una dala tamoni, Keriso na dia sibona eheabihidi hahelaga tauna badana to, ia ehereva henia tauna eto, "oi na lau natugu, hari dinai lau na oi tamamu." ⁶Ini na ia ese eherevalai gabudia haida, "Oi na hahelaga tauna nega hanaihanai Mekisedek oreanai." ⁷Unu dinadia ia tanobada ai, Keriso na ia dainai e guriguriva bona eura, bona e tai lolo matana ranuna e diho, Dirava dainai badina ia ese mase amo baine hamaoria, bona ia e kamoni badina ia na Dirava ena mauri lalonai. ⁸Ena be ia na Dirava natuna, ia e kamoni ena hisihisi amo. ⁹Ia na namona egwaurai bona ema, taunimanima iboudiai daika ia kamoni henia, taudia edia mauri hanaihanai ihavarana tauna ai ela. ¹⁰Ia na egwaurai Dirava ese hahelaga tauna badana Mekisedek ena orea ai. ¹¹Emai hereva na momo baia gwaurai, to ini na auka baia herevalai henimui badina taiamui na kukudima. ¹²Ena be nega vada eme ginidae to oi na hahediba taumu ai baola, oi na dounu rata oura henia badamu dia aniani aukana! ¹³Badina be rata e inuamu tauna na mai ena diba hereva momokani, badina be ia na dounu karukaru. ¹⁴To aniani aukana na tauani dia vada e lo taudia adia, bona idia lalodia vada eme manada, namo bona dika toadia na mai dibadia.

6 ¹Badina bunai, Keriso ena hereva badidia baita rakatani, huahua dia baita gava. Basita hagini lou kara asi anidia ihelalo-kerehai dia Dirava ibadinana ai, ²bapatiso herevadia, ima ato kau ai, mase iha-toreisi dia ai, bona mia hanaihanai hahemaorona ai. ³Ita danu ini na baita kara bema Dirava baine ura. ⁴Badina lalodia e aukava taudia ediai e diariva, idia ese guba harihari na e mamiava, bona Lauma Helaga enai ahudia eabiva, ⁵bona Dirava ena hereva namona mauri gabena siahuna e mamiva. ⁶A taudia na bema keto - idia na basima helalokerehai lou diba. Badina be idia sibodia ese Dirava natuna vada e hasatauroa lou bona taunimanima vairadia ai vada e hahemaraia. ⁷Badina be e diho loulou medina e inuamu, bona aniani gaudia namo dia e havarai uma taudia edia, tanona ese Dirava ena hahenamo eabimu. ⁸A au ginigini bona ava ginigini e havaraiamu tanona ese hedadarai bona heuduguirai eabimu. Dokonai lahi ese baine karaia ore. ⁹A ena be ini ahereva tomamu, lalokau taumui, to lalomai e tomamu hahemaori badina gaudia namodia na lalomui ai vada mimia. ¹⁰Badina Dirava na asi ena kara gageva-gageva, emui gaukara bona emui lalokau ia ladana dainai vada o hahedinarai, helaga taudia o durudiava bona o durudiamu ia ese basine lalo boio. ¹¹Ai na a ura badamu umui iboumui ai ene ba goada toma, ela bona dokona ai emui helaro ba hagugurua. ¹²Basio hesiku, a edia abidadama bona edia haheauka daidiai ahudia vada eabi taudia ba hagoidia. ¹³Badina be Dirava ese Abraham egwau hamata henia negana ai, ta ese ia sehereaia dainai ia sibona ladanai e gwau hamata. ¹⁴Eto, "Lau ese oi baina hanamomu bona lau ese oi garamu baina hutuma dia. ¹⁵Unu hetomana, Abraham na e haheauka taritariva ela bona gwau hamata anina davaria. ¹⁶Dokonai edia hepapa-ahuahu herevadia gwauhamata na e hamomokania. ¹⁷Unu hetomana Dirava na e urava gwauhamata dihina taudia bae diba goevagoeva ia ena lalohadai basine idau, una negana ai ia ese hereva helaga na amo egwau hamata henidia. ¹⁸Unu e kara toma badina gau ruaosi na basie idau, bona unu gau ruaosi ai danu Dirava ese na basine koida diba. Ita na hahedika vada ta heautania, bona goada vada ta davaria, ita ese vairadai eme hure helarona baita kahua tao. ¹⁹Una helaro na laumada dogona na heto, se idaumu bona se mareremu, seseahu unu kahanai e vareaimu. ²⁰Unuseni ai Iesu vada e raka vareai ita daidai, hahelaga tauna badana Melkisedek ena orea ai vada e hahelao, ela bona hanaihanai.

¹Bona ina Melkisedek, Salem pavapavana, Dirava herea mikamika ena hahelaga tauna, Aberahamo ese pavapava e aladia mase murinai, ena lou ai ia ida e hedavari bena e hanamoa. ²Aberahamo ese danu gau iboudiai lalodia amo karoa ta e henia. Ia ladana matamatana be "Kara maoromaoro Lohiana," bona ia danu Salem pavapavana," una na "Maino Lohiana. ³Ia na asi tamana, asi sinana, asi garana, eiavana hematama dinadia bona mauri dokona. Gau tamona, itaitana oromana na Dirava natuna, ia na doini hahelga tauna ela hanaihanai. ⁴To mani ina tau ena badaho-badaho mani aitaia, daika be ina hegunalai tauna Aberahamo ese karoa ta e henia tuari ai ia ese eabi kohudia lalodia amo. ⁵Bona momokani unu Levi natudia hahelaga dagidia eabi na mai edia maoro taravatu ai taunimanima edia amo karoa bae abi, una na tadikakadia edia amo, ena be idia na Aberahamo tauanina amo ema. ⁶To Melkisedek, ia garana idia ediai na lasi, Aberahamo ena amo karoa eabi, bona gwauhamata na ia enai dainai e hanamoa. ⁷A gwau tora haida lasi dainai, tau maragina na tau badana ese baine hanamoa. ⁸Ina gabu ai, bae mase taudia karoa eabi, to unu hetomana vada e gwaurai ia na mauri hanaihanai. ⁹Bona ina hereva hegeregere, Levi, karoa eabiva tauna, Aberahamo ena amo dainai karoa e heniva. ¹⁰Badina Levi be dounu ia dihina tauanina lalonai, Melkisedek bona Aberahamo ehe-davari neganai. ¹¹Bema maoromaoro be Levi hahelaga taudia edia amo (badina idia edia amo taunimanima taravatu e dibaiava), dahaka ura haida daidiai hahelaga tauna tama baine toreisi Melkisedek ena orea hegeregere, bona basie gwaurai Aarona ena orea hegeregere a? ¹²Badina hahelaga tauna e sensiamu neganai, taravatu isensina danu unu e vara tomamu. ¹³Badina ini gau daidiai e herevalaiamu tauna ena Iduhu na idau, unu amo ta ese pata helagana gaukara do se karaia. ¹⁴Bona ina danu hedinarai ita eda Lohiabada garana na Iuda amo, Iduhu ta Mose ese se herevalai hahelaga taudia daidiai. ¹⁵Bona ina na eme hedinarai goevagoeva, bema hahelaga tauna tama baine toreisi Melkisedek heida-idana. ¹⁶Ia na hahelga tauna ai ela, dia tauani eha manokaiamu taravatuna dainai, to mauri hanaihanai siahuna dainai. ¹⁷Badina Buka Helaga ai e torea: "Oi na hahelaga tauna ena hanaihanai Melkisedek ena orea hegeregere." ¹⁸Badina taravatu gunana na eatoa tabe badina be manoka bona asi ena gaukara. ¹⁹(Badina be taravatu ese gauta se hanamoa), bona helaro namona eha hedinarai, unu amo ita ese Dirava baita hakahi-kahia. ²⁰Bona ina be se karaia asi gwau hamatana! badina haida be hahelga taudia ai ela asi gwua hamatamana. ²¹A Iesu na hahelga tauna ai ela mai gwau hamatamana, Dirava ena amo e hereva heniamu, "Lohiabada na e gwau hamata bona ia lalona na basine ha idua: Oi na hahelga tauna ela hanaihanai." ²²Ini hetomana danu, Iesu na maoro ai eme lao herohehaino matamatana. ²³Hahelaga taudia gunadia numerana be namo, to edia gaukara hesiriu lalodia amo mase ese e butudia taova. ²⁴To badina Iesu na baine mauri hesiriu ela hanaihanai dainai, ia na hahelga tauna baina hanaihanai. ²⁵Una dinai ia ese danu Dirava e hakhiamu taudia na baine hamauridia guguru ia bagunai, badina ia na negaiboudiai e maurimu ida daidiai e gurigurimu. ²⁶Badina hahelaga tauna unu hetomana na momokani ita ese ta ura heniamu. ²⁷Ia na helaga, asi ena kara dika, asi bebeke-bebekana, e haheparara kara dika taudia edia amo, bona guba atai doriva-dorivana ai. ²⁸Ia na asi ena ura, hahelaga taudia badadia hegeregere, boubou gaudia baine hahelagadia dina iboudiai, guna ia sibona ena dika, bona gabe ai taunimanima edia dika. Badina ina na ia ese nega tamona e karaia iboudiai daidiai, ia sibona boubou gauna ai e hahelao neganai. ²⁹Badina taravatu ai be hahelaga taudia badadia be mai edia manoka-manoka taudia eabidia hidi. To gwauhamata herevana, taravatu murinai ema, natuna eabia hidi, dika be maoro-maoro ai eme halaoa ela hanaihanai.

8 ¹Ai ese vada ame gwauarai herevadia bini: Ita na mai eda hahelaga tauna edia helai terona na idibana kahanai. Atai doriva-dorivana ai, Guba Basilei ai. ²Ia na helaga taudia edia helaga gabunai, ina korikori kalagana Lohiabada, ena dia tauta ena, Lohiabada ese e duanaidia. ³Herahia gaudia bona boubou gaudia, una hegeregere tauna ena herahia gauna baheni. ⁴Bema Kerios na ina tanobada ai ina helaga tauna ai basinema lao. Una danu taunimanima edia herahia gaudia ehenimu taravatu hegeregere. ⁵Idia edia gaukara na Guba Basileia ai e karamu gaukarana hegeregere bona laulai ai. Dirava ese Mose egwau sisiba henia na eto, guriguri kalagana baine karaia neganai Dirava eherva eto, aroha lao gau iboudiai o kara, ororo ai na haheitalaimu gaudia oromadia hegeregere. ⁶Harihari Keriso ese heregu dagina vada eabia, dagi gunadia e herediamu ina na iena herohehaino ese taravatu gauna ehervaiamu hegeregere, badina be gwauhamata herevadia latadiai ehadaia dainai. ⁷Badina be taravatu gini gunana bema asi kererena, taravatu iharuana na asi anina. ⁸A Dirava ese kerere taunimanima na e davarai, ia hereva eto, dina vada be maimu. Dirava Lohia herea eto. ⁹Una dia taravatu hegeregere, lau ese na karaia senedia unu dina, lau ese imadia na abi na gaudia lasi Aikupito tanona dinanai, egu taravatu asie badinanaiva lau ese na dadaraidiava, Dirava Lohiabada ehervamu. ¹⁰Dirava Lohiabada ehervamu ina taravatu lau ese baina kara na Isaraela edia rumai ai. Una dainai Dirava Lohiabada ehervamu, lau ese taravatu na lalodiai baina torea bona lau ese kudoudia ai baina torea, lau na edia Dirava bona edia taunimanima ai bainala. ¹¹Basie hahediba heheni danu ai varavaramai edia bona ia tadina tamona ediai hereva dibana, Dirava Lohiabada idia iboudiai. ¹²Badina be edia kavakava lalodia ai ese gini gunana taravatauna vada. ¹³Boiboi taravatu matamatana oi ese matamana ai okaraia taravatuna hereadaena bona dahaka be hereadae bona gunana na baine boio taku

9

¹Taravatu gunana na mai ena toma-diho haheganidia bona mai ena dubu tanobada ai. ²Badina be guriguri kalagana helagana e karaia, murimuri daiutuna ai be lamepa iato-kauna gauna bona pata bona Dirava vairanai e atoa flaoana; una na gabu helagana e gwaurai. ³Seseahu iharuana lalonai be Helaga Herea daiutuna ta e gwaurai hidi. ⁴Ia lalonai pata helagana ta gold ai e karaia, muramura mai bonana patana bunai; bona taravatu mauana ta danu gold ai e havavaia hegege; bona maua lalonai be gold kibona auta, anina be mana; bona Arona ena itotohi, e gara kau gauna; bona taravatu

nadidia danu una maua lalonai.⁵ Maua daenai hairai kerubidia ese hebogahisi teronana e hakerukeruava. To unu gau harihari basia herevalai hagau hagau diba.⁶ Unu gau be unu e seu toma; bena hahelaga taudia na murimuri daiutuna lalonai e raka vareai loulou, boubou gaudia e hahelagadia.⁷ A laloma daiutuna be hahelaga tauna badana mo sibona lagani ta lalonai nega tamona e raka vareai, rara e vareailaia, e hahelagaia, ia sibona dainai, bona bese taudia edia kara kerere-kerere daidiai.⁸ Ini amo Lauma Helaga ese e hadibadamu: Helaga Herea gabuna iraka-vareaina dalana do se hekeho, murimuri daiutuna dounu gini negana ai.⁹ Una na hereva hegeregereana, ina nega ena. Herahia gaudia bona boubou gaudia vada e hahelagamu, gau tamona idia na asi siahudia toma-diho tauna lalona ihagoevana.¹⁰ Badina be edia siahu badidia be ini mo; aniani gaudia, inuinu gaudia, digu karadia haida, tauanina taravatudia; e hagini, taunimanima ese bae badina ela bona hahematamata negana.¹¹ A Keriso ema, vada evara gaudia edia hahelaga tauna badana. Bena guriguri kalagana bada-hereana bona namo-hereana amo e raka hanai, dia taunimanima imadiai e karaia gauna bona dia ina tanobada gauna.¹² To dia nani bona boromakau, natudia raradia a ia sibona rarana e vareailaia Helaga Herea gabunai hahemaui hanaihanai e havaraia.¹³ Badina be nani raradia bona boromakau maruanedia raradia bona boromakau natudia lahi ese e gole oho kahudia amo na dika taudia bema gigidia tao, bona tauanidia bema goevagoeva;¹⁴ o Keriso rarana, Noho-hanaihanai Laumana dainai sibona Dirava e henia tauna rarana, asi bebeke-bebekana tauna rarana, siahuna basinema herea a, umui lalomui mase karadia amo bema hagoeva, bona Mauri Diravana ena hesiai taudia ai bema halaomui ani?¹⁵ Una dainai, ia na taravatu matamatana ena herohemaino tauna, taravatu gunana vada e tataia utu taudia na mase ta ai e hamauridiamu, bona e boiridia taudia na mia-hanaihanai ahudia e henidiamu, ena gwauhamata hegeregereana.¹⁶ Badina be tau ta dihina ese ahudia basie abi ela bona una tau baine mase momokani.¹⁷ Ena kohu iharidia herevadia na mai siahuna ena mase dainai, a ena mauri negana ai idia na asi siahudia.¹⁸ Unuhetomana taravatu gunana danu rara ese e hamomokania.¹⁹ Badina be Mose ena taravatu ena hahegani iboudiai na bese taudia iboudiai e herevalai henidiava, bona boromakau natudia raradia bona nani raradia bona ranu e abi, mamoe huina kakakakna bona husopo danu e abi bona buka bona bese taudia iboudiai e nevarilaidia,²⁰ eto "Ina na Dirava ese vada e haganilaimui taravatuna rarana."²¹ Unuhetomana danu ia ese guriguri kalagana bona helaga gaudia iboudiai rara ai nevarida.²² Oibe; taravatu henuna gaudia momo herea rara ese ehagoevadiamu; bona rara basinema hebubu, dika igwau-taodia bema lasi.²³ Benaini, guba gaudia ihahegeregereadia gaudia na ini helaga karadia amo e hagoeva, a guba gaudia korikori na boubou namodia amo bae hagoeva.²⁴ Badina be Keriso vada e raka vareai dubuna na dia taunimanima imadia amo e karaia gauna dubu korikorina ihahegeregereana, a guba ai vada e raka vareai, Dirava vairanai e hedinaraimu ita daidai.²⁵ Bona ia na se raka vareai sibona boubou gauna ai baina loulou, hahelaga tauna badana na heto, ia ese lagani ta ta amo Helaga Herea gabuna lalonai e raka vareai, rara e vareailaia, to dia ia rarana.²⁶ Unu bema heto, Keriso na nega diagau bema hisihisi, tanobada matamatana ema bona harihari. A ia be nega tamona, ina nega dokona ai, vada eme hedinarai, sibona boubou gauna ai vada ela dika iabi-ohona.²⁷ Una dainai edia mase na tamona, murinai hahemaoro bae abia;²⁸ unuhetomana Keriso danu nega tamona boubou gauna ai vada a halaoa, hutuma edia kara dika ihuadia. Ma baine hedinarai lou, dia kara dika ihamaoromaorona totona, a mai helarodia ida e nariamu taudia ihamauridia.

10

¹Badina be taravatu enai na gau namodia do baema laulaudia mo, dia unu gau sibodia hegeregereadia. Dirava e raka kahira heniamu taudia na basie namo guguru edia boubou gaukaradia na hahelaga taudia ese lagani-lagani e karamu amo.² Unu basiema heto ina boubou gaukarana basiema doko, a? Badina be tomadiho taudia na hahegoeva tamona amo bema abia bona edia kara dikadia basiema helalolai lou.³ A ini boubou gaukaradia ese eda kara dikadia e hahelalolaida-une mu lagani iboudiai.⁴ Badina be asi dalana ta boromakau maruanena bona nani raradia amo kara dikadia abi oho.⁵ Una dainai Keriso ema ina tanobadai, ia na eto, "Boubou gaudia bona herahia gaudia na asio uralai, a tauani ta umui ese o abia hegaegae lau egu; lahi ese e gole ohomu bouboudia, umui ese asio moalelaidia.⁶ Bena nato, "Aitala, lau be ina Buka Helaga ai vada e torea lau e gwauraigumu - oi emu ura baina karaia, o Dirava."⁷ Ena hereva ai na eto, "Boubou gaudia bona herahia gaudia, bona lahi ese e gole ohomu bouboudia, bona kara dika igwautatodia bouboudia umui ese asi o uralai. Umui ese danu asio moalelai." (Ini na taravatu hegeregereana vada e atodia)⁸ bena eto, "Aitala lau, oina, emu ura ikarana." Ia ese kara gunana e abia ohomu, kara iharuana baine hadaia dainai.⁹ Una ura amo, Ia ese vada e hahelagadia Iesu Kerisotauanina boubou gauna eheni nega tamona mo ita iboudai eda.¹⁰ Bona momokani, hahelaga taudia na dina iboudiai e ginimu Dirava ena gaukara e karamu. Ina boubou gaukarana e karaia louloumu - a kara dikadia na se heabi oho dibamu.¹¹ A Keriso na boubou gauna tamona mo e henit ita eda kara dika iboudiai daidiai, ia na Dirava imana idibana kahanai vada ehelai diho.¹² Una nega amo ema bona hari, ia na e narimu ela bona ia inaina taudia na aena e hadaiamu gauna ai baine halaodia.¹³ Badina be ina boubou gauna tamona ia ese e hahelagadia taudia na vada e hanamodia guguru ela bona hanaihanai.¹⁴ Bona Lauma Helaga danu e hadibalaidamu. Badina ia na guna eto,¹⁵ Ina na gwauhamata ta lau ese baina karaia idia edia, unu dina muridiai, Lohiabada na e hereva eto, Lau ese egu taravatu kudoudiai baina atodia bona lalodiai danu baina toredia.¹⁶ Bona unu amo edia kara dika bona kara havara danu lau ese baina lalodia boio vaitani.¹⁷ Harihari edia kara dika e hegwautatodu ediai kara dika boubouna na asi badina.¹⁸ Una dainai, varavaragu e, ita ese ta hamomokaniamu helaga gabunai baita raka vareai Iesu rarana amo,¹⁹ Ina na mauri dalana matamatana, ia ese vada e kehoa ita eda, una seseahu amo, bona una na ia tauanina ena amo.²⁰ Badina ita na mai eda Hahelaga tauna badana Dirava ena ruma ita taona,²¹ aita raka henia kahi mai kudouda ida, mai heabidadamada ida, laloda na mai goevadia

lalahadai dikadia amo, bona tauanida na ranu negarina amo eme huridia.²³Eda helaorea igwaurai hedinaraina ai baita dogoatao auka, basita manoka, badina Dirava vada e gwauhamata na mai momokanina ida.²⁴Bona tama helalo ede bamodiai ta ta tama hahealo heheni lalokau ai bona kara namodiai.²⁵Eda hegogo karadia basita nege, haida e karamu hegeregedia. Ini gabudiai, aita hahealo heheni, bona ma latanai ma o itaiamu dinana eme kahikahi.²⁶Badina be boma ita na dounu baita kara dika louloumu, ina hereva momokani vada ta dibaia murinai, kara dika boubou na tama lao.²⁷Una gabunai mai garina gauna tamonamo ta nariamu hahemaoro dinanai, bona lahi garagarana ese Dirava e inai heniamu taudia iboudiai do baine aradia orea.²⁸Daika ese Mose ena taravatu e dadaraia tauna na do baine mase asi ibogahisina. E diba taudia rarua eiava tatoi edia gwau hedinarai amo.²⁹Hisihisi dikana davana be ede heto oi ese olaloamu bema tauta ese Dirava natuna baine moia tao, bona baine laloa gwauhamata rarana na dia helaga - una rara na vada helagai - bona una hariharibada Laumana danu (insulted) ?³⁰Badina ita na mai dibada ta ini e gwau toma "Davana ikarana na lau egu; Lohiabada ese ena taunimanima baine hahemaoro henidia."³¹Ina na mai garina bada gauna e maurimu Diravana imanai baine butumai tao!³²A dina gunadia ba lalo, umui eha-diarimui muridiai, hisihisi bada herea ese e gugubamui to o haheaukava.³³Nega haida be haheitalai gaudia ai e halaomuiva e gonagonalaimuiva bona e inai henimuiva, bona ma nega haida idia bamodia ma e halaomuiva emui hisihisi lalodiai.³⁴Badina be umui ese e guidia taudia o bogadia hisiva bona emui kohu e dadiva danu mai moalemui ida oabidiadaeva. Umui sibomui odibava mai emui kohu namo hereadia bona mia hanaihanai kohudia.³⁵Una dainai emui (confidence) basio negea, mai davana bada ida.³⁶Badina be emu haheauka na mai badina, Dirava ena ura ba karaia guguru murinai ena gwauhamata gauna do bavabia.³⁷"Badina nega sisinai be maimu tauna na bainema bona basine halahe."³⁸A lau egu kara maoromaoro tauna, ena kamoni dainai baine mauri, bona bema basine kerehai lou, lau laumagu ese do basine lalonamo henia."³⁹A ta na dia namo una dika kerehai lou tauda. Una gabunai, ita na mai eda kamoai tauda bona Laumada na do bae mauri.

11

¹Abidadama na asi laromu gaudia ihamomokanida, bona asi taitamu gaudia ihamomokanidia.²Una dainai Dirava ese sene taudia eabidiadaeva.³Ena abidadama amo ta dibamu tanobada na Dirava e hereva amo ehekara, una dainai ta itamu gaudia be asita itamu gaudia amo ekaradia.⁴Abidadama dainai Abela ena boubou gauna namo hereana ese Kaino ena herahia ehareaia, una dainai Dirava ese kara maoromaoro tauna egwaurai bona hereva namodia latanai, e gwauraidia badina ena herahia dainai, ena be emase to doini e herevamu.⁵Abidadama dainai, Enoka na tanobada amo Dirava ese eabia dae, badina baine mase garina, Ia na e tahuava, badina Dirava ese eabia dae, Ia do seheabi oho neganai, Ia na egwauraiava Dirava e hamoaleava tauna.⁶A asi ena abidadama tauna na auka herea Dirava ihamoalenai. Badina Dirava iraka henina kahi euramu tauna ese eabiadaemu Dirava na emaurimu bona Ia e tahuamu dainai ahuna namodia baine henia.⁷Abidadama dainai Noa na Dirava ese do seita gaudia e sisibalai henia bona mai hematauraina ida Lagatoi ta e raia bona ena ruma taudia ehamauridia.⁸Abidadama dainai Aberahamo e boiria neganai na e kamoni vada ela bona ia baine ahua tanona ai. Ena hanua e rakatania asi dibana ede elaova.⁹Ena abidadama dainai gwauhamata tanona ai e noho hedoava, Isa'ako bona Iakobo danu ia ida kalaga ai e nohova, idia raruosi danu gwauhamata dihina.¹⁰Badina ia na e roha laova, Ia e taruha henia hanuana do baine gini tutuka-tutuka, iseuna bona ikarana na Dirava.¹¹Abidadama dainai Sera ena be vada e buruka herea to natuna ta e havaraia, Dirava ese egwauhamata henia hegeregereana.¹²Una dainai ina tau tamona ena amo - bona kahira-kahira bema mase tauna danu - bese hutuma herea e vara, edia numera na guba hisiu dia na heto eiava kone mirimiri dia asi iduhaidia.¹³Abidadama dainai ini iboudiai na vada emase, gwauhamata iboudiai danu sedavari, to gabunai e itadiamu bona eabidia daemu gabu daudau dia amo bona e gwau hedinaraimu, idia na noho hedoa-hedoa bona e luludia tauda.¹⁴Unu e hereva tomamu taudia na edia hereva anidia amo e hedinaraimu. Idia na edia tano korikorina ta e tahuamu.¹⁵Bema momokani idia ese e rakatania tanona bema laloa nega namona ta eabia neganai bema lou henia.¹⁶To hari hegeregereana idia na hanua hereadia bae biagu taudia, una na Dirava e nohova gabuna. Una dainai Dirava na sehemaiaiva, idia ese egwauraiamu edia Dirava, badina Ia ese hanua ta vada eabia hegaegae idia edia.¹⁷Abidadama dainai Aberahamo e tohoa neganai, ia ese Isa'ako boubou gauna ai e halaoa. Ena be gwauhamata baine abia tauna to ia ese natuna vara edeana na boubou gauna ai e halaoa.¹⁸Vada e herevalaia eto, "Isa'ako ena amo oi vevemu ladadia do bae gwauraidia."¹⁹Aberahamo ese na vada e haeroa Dirava ese Isa'ako na mase amo baine ha torea isi eto, una dainai ia ese eabia lou unu amo.²⁰Abidadama dainai danu Isa'ako ese Iakobo bona Esau e hanamodia.²¹Abidadama dainai, Iakobo baine mase eto neganai, ena itotohi kwarana ai e goru kau bona ia ese Iosepa natuna ta ta e hanamodia bona latadia ai e guriguri.²²Abidadama dainai, Iosepa ena mase vada e kahira-kahira neganai, ia ese Isaraela besena Aikupito amo bae raka lasi vada e herevalaia bona e haganidia ia turiana danu idia ese bae abi kau.²³Abidadama dainai Mose, e vara laganina hua toi neganai, sinana bona tamana ese e itaia mai hairaina dainai, pavapava ena hahegani garina se gari bona e hunia.²⁴Abidadama dainai Mose e badaho-badaho nenai, asi ena ura, Parao natuna hahinena ena bese ai bae gwauraiava.²⁵To ia ena ura na Dirava ena bese ida bae hisihisi hebou, bona kara dika moaledia be se ura heni badina unu na basie mia daudau gaudia,²⁶ia ena haero ai Keriso dainai baine lodu hari, taga bada hereana bunai una ese Aikupito tagana iboudiai e hereadiamu. Una dainai ia matana na ina dava ai mo e hagerea.²⁷Abidadama dainai, Mose ese Aikupito e rakatania dia hanua pavapavana ese e badu henia dainai to e haheauka badina e kara ia ese asita itaiamu Diravana vada e itaia.²⁸Abidadama dainai, ia ese lagau hanai karana e badinaia bona rara danu e nevari, unu ese ala-ala aneru na ese memero roboa dia basine daudia toho.²⁹Abidadama dainai, idia ese Davara kakana e rakaia hanai tano kaukauna amo e raka hanai na heto. Aikupito taudia eto unu bae raka toma, to neganai, davara ese e hadonodia.

³⁰Abidadama dainai, Ieriko maguna e keto, dina hitu e rakaia hegege murinai. ³¹Abidadama dainai, mata bodaga hahinena, ladana Rahaba na egwau ede-edu taudia ida se mase badina ia ese hasinadoa taudia maino ai eabidia dae dainai. ³²Ma dahaka baina gwauraia? Badina nega na lasi bema lau ese ini idia baina herevalaidia, Gideon, Barak, Samson, Jephthah, Davida, Samuel danu peroveta taudia, ³³Abidadama amo tanobada basileia dia e hadarere diava, kara maoromaoro e karava, bona gwauhamata eabiva. Idia ese Leona ududia ehakapudiava, ³⁴Iahi siahua dia e habodova, dare matadia amo e roho mauriva, edia gorere e hanamodiava, tuari ai goada heherea bona inai dia edia tuari oreadia e hadarerediava, ³⁵Hahine ese edia mase e louva badina be e toreisi louva dainai. To haida be e hahisihihi diava, bae ruhada danu seurava, badina toreisi namo hereana bae dibaia urana, ³⁶bona haida be e kirikiri lai diava bona e kwadidiava, auri ai e guidiava danu bona e hadiburadiava. ³⁷Nadi ai e hodo dia maseva, e hapararadiava iri amo, e tohodiava bona dare amo e aladiava e loava, mamoe kopidia bona nani kopidia e riova, ogogami, e hahisihihi diava bona se karadia namonamova. ³⁸Idia na dia hegeregere tanobada ai bae noho; e loava tano gagaedia ai bona ororo ai, koura ai bona guri ai e nohova. ³⁹Ini taunimanima na Dirava ese e hanamodia edia abidadama dainai to gwauhamata na seabia. ⁴⁰Dirava ese gau namo hereana ta e haeroa ita eda, una na idia bona ita na nega tamona baita maoromaoro

12

¹Una dainai, badina be hutuma ese eda hereva bona kara eitamu dainai, ita ese ehametauda haragamu karadikadia na baita atodia tabe. Mai aheaukada ida baita heau vairada ai e atoa heau heluluna lalonai. ²Eda lalohada na Iesu, ita eda abidadama e matamaia bona e hagoevagoevaia tauna, enai baita atoa. Iesu na gabeai baine vara moalena dainai, satauro hisihisina hemaraina e haheauka henia, bena gabeai Dirava ena terona idibana kahana ai e helai. ³Una dainai Iesu na ba lalohadailaia, Ia na kara dika taudia edia dagedage Ia enai e haheauka henidia, bena umui na basio manoka kudoumui ai bena ba hebalarea. ⁴Umui ese karadika idadaraina hededegwana ai raramui na do asine diho. ⁵Bona umui ese natu hegeregere dia e hagoadamui ahogadana na vada o laloaboio, eto. "Natugu e, Lohiabada ena matahakani emui ai na basio laloa maragi bona basio manoka bema emui kerere dainai e hahisihihimuimu. ⁶Badina be Lohiabada ese e lalokau henidiamu taudia iboudiai matahakani e henidiamu, bona e abidiadae natuna ai ela taudia iboudiai na Ia ese edia kerere ahudia hisihisina e henidiamu. ⁷Matahakani hisihisina na ba haheaukalaia. Dirava ese e kara henimuimu na tama ese natu e kara henidiamu bamona. Be edena natu na tamana ese matahakani asine heniamu? ⁸To bema matahakani basio abi taunimanima iboudiai eabi hegeregere, umui na dia natu korikori bona umui na dia Ia natuna. ⁹Ina latana danu, ita na tamada, tauanidia ai e havarada taudia, ese matahakani e henida bona ta matauraidia. Ita be vada lauma tamadia enai siboda basita heni lao badabada bena baita mauri? ¹⁰Badina be momokani vaitani ita tamada, tauanidia ai e havarada taudia ese nega sisina ai mo matahakani e henida, idia ese e laloava namo hegeregere. To Dirava ese matahakani e henidiamu na ita eda namo dainai, unu amo ita Ia ena helaga baita abia herahia. ¹¹Momokani vaitani matahakani iboudiai e henimu negadia ai, na e kara dia lalo-moale gauna a mai hisihisina hari. A - to gabeai matahakani ese kara maoromaoro huahuana mai mainona e havaraia, matahakani amo e haheaonegadia taudia eidia. ¹²Una dainai imamui e heveriveri imadia na ba hagoadadia bona tuimui e manoka tuidia danu. ¹³Aemui palapaladia edia raka daladia be ba hamaoromaordia bena e magigi ae-palapalana na basine heride to baine goada guguru. ¹⁴Taunimanima iboudiai ida maino ai ba noho maurina ba guna henia bona ba helaga, badina bema helaga maurina lasi neganai ta ese Lohiabada basine itaia. ¹⁵Ba heita ta ese Dirava ena hariharibada ai basine dabu, bona heiriheiri ramuna iditana na basine tubudae ihahekwaikwanaimui totona, bena ina ese taunimanima momo na do bae hadikamui. ¹⁶Ba heita, taunimanima ta basine matabodaga eiava dia Dirava se hagoiamu taunimanimana Esau hetomana, aniani dainai sibona ese ena vara roboana e hoihoilaia oho. ¹⁷Badina be mai dibamui, Esau na gabeai eheuradai ena maoro hahenamona baine abia neganai na e dadaraia, badina ia na helalokerehai se ura, ena be una hahenamo na mai tai dikadikana ida e uralaia. ¹⁸Badina be umui omai henia gauna na dia imamui ai ba dautoho diba gauna, dia lahina e hururumu, dia dibura-kobo, dibura bona dikadika, ¹⁹bona dia kibi regena ta, eiava dia ere ta, e herevamu herevadi ai e kamonaimu taudia ese e noiamu hereva ta ma basine gwauraia erena, ²⁰badina be idia na e hagnidia herevana eto; "Ena be bema manu ta ese ina ororo baine dauatoho, una manu na nadi ai bae hodoa," herevana na asie abia goada. ²¹Ina gabu oromana na mai garina bada dainai Mose eto, "Lau na gari dikadikamu bona na heudehudemu." ²²A to lasi, umui na oma Siona ororona bona oma e maurimu Diravana ena hanua, Ierusalem guba hanuana, bona aneru gerebu gerebu e moale heboumu gabuna oma, ²³bona vara-roboa, ladadia guba ai vada ehutore taudia, edia hegogo gabuna oma, bona taunimanima iboudiai edia Hahemaoro Diravana dekana oma, bona, bona ekara maoromaoro bona vada e hagoevagoevadia taudia laumadia dekedie oma, ²⁴bona Iesu taravatu matamatana ihahemaorolaina tauna dekena oma, bona vada ehenevarilaia rarana - gadona Abela rarana gadona ehenevarilaia rarana omai henia. ²⁵Ba heita, umui ese e herevamu tauna basio dadaraia. Bema ina tanobada ai ahagani eheneda tauna erena e dadaraia bena asie roho-mauri, ita be ma ede baita roho-mauri toma bema guba amo ahagani baine henida tauna baita rakaia-muri? ²⁶Bega ta ai na Ia gadona regena ese tanobada e ude-udea to harihari Ia ese vada e gwauhamata henida, etomamu, "Do nega tamona, lau ese dia tanobada mo baina ude-udea to guba danu." ²⁷To ini hereva, "Do ma nega tamona," anina na e ude-ude gaudia bae abidia oho, eiava anina na, e karadia ima-karakara gaudia bena asi e ude-ude dia gaudia na bae mia. ²⁸Una dainai badina ita na basie e ude-ude diba basileiana tabiadaemu dainai, aita lalo-namo bena lalo-namonai baita domadiho. Dirava e hamoaleamu dalana ai, mai hematauraia bona mai garida ida. ²⁹Badina be eda Dirava na hearra-ore lahina.

¹Heura-heni na bogaragimui ai baine hesiriu. ²Idau taudia iabidaedia basio lalo boio badina be una kara dainai, haida ese aneru vada eabidiadae, a asi dibadia unu be aneru. ³Dibura rumadia ai e hekoumu taudia ba lalodia umui danu idia ida bema koumui hebou na heto. E hahisidiamu taudia danu ba lalodia badina be umui danu mai taunamui. ⁴Taunimanima iboudia ai ese headava bae matauraia, mahuta gedana basie hadikaia, badina be Dirava ese herahe-dadi taudia bona heuda hanai taudia do baine hahemaoro henidia. ⁵Lalomui ai moni basio hekise hekise henia, a dekemui ai mimia gaudia na bavabi, badina be Dirava eto, "Lau na basina negemu, bona basina rakatanimu." lasi ona lasi vaitani. ⁶Una dainai mai goadada ida baita ato, "Lohiabada na egu hekaha; Lau na basina gari. Taunimanima ese ede bae hadikagu toma?" ⁷Ihakaumui taudia, Dirava ena hereva e hadibalaimui taudia, na ba lalodia. Edia abidadama ba haeroa. ⁸Iesu Keriso the varani, ina harihari dia idau, bona basine idau ela bona hanaihanai. ⁹Hahediba idau-idau dia ese basie hakaumui kerere. Badina be ina na namo hariharibada ese laloda baine ha-auka dia aniani gaudia ese, unu gau ese e badinava taudia asie hanamodiava. ¹⁰Ita na mai eda pata helagana guriguri kalagana ena hahelaga taudia na unu amo basie aniani diba. ¹¹Badina be mauri gaudia raradia na hahelaga tauna badana ese helaga herea gabuna ai e vareailaia, kara dika iabi-ohodia tau-anidia na taruha murimurinai e gole oho. ¹²Unuhetomana Iesu danu ikoukou murimurinai e mase, ia sibona rarana amo bese taudia baine hahelagadia helaoreana. ¹³Una dainai, ita na ia dekena baitala, taruha murimurinai, ia hemaraina danu baita huaia. ¹⁴Badina be iniseni ai ita na asi eda mia-hanaihanai hanuana, a mia-hanaihanai hanuana, gabeai baine hedinarai gauna, ta tahuamu. ¹⁵Ia lalonai, nega idoidiai Dirava baita iheatolaia eda boubou gauna ai baita halaoa; ududa bibinadia ese ia ladana bae imodaia. ¹⁶Kara namo bona koku ireguna na basio rea, badina be Dirava ese helaga karadia ene hetomadia e moalelaimu. ¹⁷Thakaumui taudia ba kamoni henidia bona ba matauraidia. Badina be idia ese umui laumamui e gimadiamu, edia kara anidia bae gwaaurai hedinarai taudia na heheto. Unu bae kara toma mai moaledia ida baine namo; a mai ganaganana ida bae karaia negana ai na emui ai anina taina basine vara. ¹⁸Ba guriguri daimai ai, badina ai a tomamu lalomai na gogoeva-gogoeva bona auramu gau idoidiai baia kara maoromaoro. ¹⁹Launa na noimuimu unu ba kara toma bena ma baina vasi haraga-haraga. ²⁰Maino Diravana, mamoe iregudia tauna badana, Iesu Keriso, mia hanaihanai herohemainona rarana dainai mase amo e hatorea isi lou Diravana, ese ²¹gau namodia idoidiai baine hanamolaimui guguru; bena umui ese iena ura ba kara, bona ia ese e moalelaimu gaudia na umui lalomui ai baine havara. ²²Lau na noimuimu, tadikakagu e, egu hahealo herevadia bavabi dae, badina be hereva dia hoho vada name tore henimui. ²³Ba diba tadikakada, Timoteo vada e ruhaia nege, ia bema mai haraga, raruosi baiama vasi itamui. ²⁴Ihakaumui taudia iboudiai bona helaga taudia iboudiai ba hanamodia. Italy taudia ese e hanamomuimu. ²⁵Hariharibada na iboumui ai emui ai baine mia.

Iakobo

1

¹Lau, Iakobo, eda Dirava Lohiabada bona Iesu Keriso ena hesiai tauna, egu hahenamo evasimu, eda iduhu gwaute-rarua emui. ²Varavaragu e, hedibagani idauiau ai owareaimu negadiai, lalomui na bae moale mo. ³Umui na mai dibamui, emui abidadama hetoa dia idauiau ese haheauka e havaraiaimu. ⁴Ina haheauka a ena gaukara baine hagugurua, bena oina ba goevadae bona ba namo guguru, gau tai basio dabu. ⁵Bema umui ta na laloparara bona aonega ouramu neganai, eda Dirava ena amo ba noia. Eda Lohiabada na mai moalena ida bona asi ena gwau ede-edo ida, e noinoimu tauna, baine henia. ⁶To abidadama ai baine noinoi, basine daradara. Badina mai dardarana ida e noinoi tauna na davara hurehurena na heto, lai ese e odaia gegeva-gegevamu. ⁷Una daradara tauna na basine lalo ia na gau ta Lohiabada ena amo baine davaria. ⁸Lalo rua tauna ini bamona na ena kara iboudiai segini tutuka-tutukamu. ⁹Ogogami Ekalesiana tauna baine heagi, Dirava ese baine abia isi neganai. ¹⁰Bona taga tauna danu, badina be mai huahuana na heto, ia na baine lao bubuni. ¹¹Badina be dina mai siahuna ida ena dae amo, rei eha-maseamu; bena huahuana e morumu, bona hairaina namona e oremu. Unu hetomana danu, taga tauna na unu baine lao bubuni toma ena laolao bogaraginai. ¹²Hedibagani ai e haheauka tauna be namo. Badina ena haheauka amo ela bona ena kwalimu neganai, ia ese mauri koronana baine abia, Dirava ese egwau hamatalaia gauna, ia e lalokau heniamu taudia ese bae abia e tomamu. ¹³Hedibagani lalodia amo ia basineto, "Lau na Dirava ese e dibaganigumu." Badina Dirava na dika ese na se dibaganiamu. ¹⁴A taunimanima tata na sibona ena ura kereredia bona dikadia ese e dibaganiamu, lalona e aniamu bona e koiamu. ¹⁵Bena ura dikadia na eha-rogorogomu amo, kara dikadia e havaramu, bona kara dikadia na e badamu amo, mase da e havaramu. ¹⁶Varavaragu e, egu lalokau, sibomui na basio hekoi. ¹⁷Harihari gaudia namodia iboudiai bona herahia gaudia goeva-daedia iboudiai na atai amo e maimu. Diari idoidiai ihavaradia Diravana ena amo e dihomu. Iena diari na se idaumu bona se kereremu. ¹⁸Dirava Lohiabada sibona ena ura dainai ia ese ena hereva momokani amo e havarada, iena ima karakara gaudia anidia roboadia na heheto. ¹⁹Varavaragu e, egu lalokau, ina na vada dibamui. Taunimanima na hereva ikamoina na, baine gavahenia. A hereva igwauraina baina halahe, bona badu ai danu baina halahe. ²⁰Badina be taunimanima edia badu ese Dirava ena kara maoromaoro na se havaraiaimu. ²¹Taunabunai, karadia idoidiai bona lalohadai dikadia lalomui ai e tubumu gaudia iboudiai ba nege daure. Mai manaumui ida, lalomui vada e hadoa herevana namona, laumamui baine hamauridia diba herevana, bavabiadae. ²²Hereva ikamonaina bona ibadinana taumui ai baola. Bema umui na hereva ibadinana mo dibamui neganai, umui na sibomui o hekoimu. ²³Badina bema tau ta na hereva e kamoniaimu to se badinaimu, iana hevarivari galasina sibona vairanai e itaiamu tauna na heto. ²⁴Sibona e heitamu, bena e raka ohomu

murinai, asi kaimana dehelalo boiomu ia be ede heto.²⁵ A bema tau ta taravatu goevadaena, una kwalimu taravatuna, baine e itaia tao bona henunai baine noho, basine kamoni mo a kara danu baine karaia neganai, una tau na ahenamo baine abia, ena gaukarai.²⁶ Bema tau ta na lalonai e tomamu ia na Dirava ibadinana tauna, to malana se dogoatomu, a sibona lalonai e hekoimu, una tau ena ekalesia maurina na asi anina.²⁷ Dirava ibadinana goevagoeva bona asi bebekabebekana, Tamada Dirava vairanai be ini heto: ihareha bona vabu baita igodia ita edia hisihisi ai bona siboda baita hegima, tanobada mirona ese na basine hamiroda. Translation done by Dk. Vani Taumaku on Tuesday 11/11/24, time: 5.30 pm.

2

¹Varavaragu, e eda Lohiabada Iesu Keriso, hairai Lohiana, o abiabiraianu na dia taunimanima oromadia basio maurilaia.
²Bema taga tauna ta na emui hegogo lalonai bema raka vareai, imana kwakikwakidia na golo ringidia eato bona e kara dabuadia danu namo herea, una hora tamonai, ogogami tauna ta danu mai ena dabua dikadia mai mirodia ida bema dae kau.
³Bena dabua namodia e karamu tauna boma abia dae, boma toma, "Ina gabu namonai a helai," a ogogami tauna boma hamaoroa, boma toma, "Oina unuseni ai a gini" eiava aegu badibadina ai a helai." ⁴Umui ese taunimanima basio ha-idaudia a? Basio hahemaoro kererea a? ⁵Varavaragu e, egu lalokau a kamoni, Dirava ese ogogami taudia vada eabidia hidimu ani? Edia taga na edia abidadama. Bona ahudia na vada e gwaurai hamata basileiana na e uraheniamu taudia baine henidia e tomamu ani? ⁶To umui ese ogogami tauna vada o hahemaraidia. Taga taudia ese e dagedage henimuimu ani? Hahemaoro gabudiai e dabuimui vareaimu ani? ⁷Ladamu namona na vada idia ese dala dikadiai ere dika henimuimu ani? ⁸Benaini, hahegani hereadaena ba badinaia, buka ai e torea hegeregeregai, eto, "Dekemu tauna ba lalokau henia, sibomu o helalokaumu hegeregeregai." Bema unu ba kara toma neganai, oina vada ba namo.
⁹A taunimanima oromadiai ba lalodia neganai, oina vada o kara dika, taravatu ese vada e guimu.
¹⁰Badina be taravatu iboudiai e badinamu tauna, to taravatu tamona e tataia utumu neganai, ia na taravatu iboudiai vada eha-makohidiamu.
¹¹Badina be "Basio heuda hanai" eto tauna na ma e hereva, eto "Basio ala-ala." Benaini, oi na basio heuda hanai, to tau ta boma alaia, oi na taravatu iboudiai vada o tatadia utu.
¹²Ba hereva bona ba kara, ura kwalimu taravatuna ese baine hahemaoro henidia taudia na heto.
¹³Badina be asi hebogahisi dibana tauna, enai hahemaoro baine kau na asi hebogahisina. A hebogahisi ese hahemaoro e hereaiamu.
¹⁴Varavaragu e, bema tau ta baineto ia na abidadama tauna, to asi ena kara, anina be dahaka? Una ena abidadama ese be baine hamauria diba? ¹⁵Tadikakada ta eiavana taihuda ta, bema asi ena dabua eiava bema hitoloa mase; ¹⁶ena umui ta ese boma hamaoroa "Mai mainomu ida aola, ba hegana, ba boga kunu." a bema tau-anidiai e dabumu gaudia na basio henidia, una anina namona be dahaka? ¹⁷Unuhetomana danu, bema abidadama na asi karana neganai, una abidadama na mase, badina be sibona dainai.
¹⁸A tau ta baineto "Oina mai emu abidadama, a lau be mai egu kara." Emu abidadama asi karana a heitalaigu, bema lau mai egu abidadama ida baina haheitalaimu.
¹⁹Oi na o hamomokaniamu Dirava korikori na tamona, oi na namo. Lauma dikadia danu unu eabiadae tomamu, bona e gari heudu-heudu mu danu.
²⁰Kavakava taumu e, ouramu badiba abidadama asi karana na asi anina a? ²¹Tamada Aberahamo ese natuna Isa'ako pata helaganai eatoa kau negana ai, ena kara daidiai, maorona e gwauraia ani? ²²Oitaiamu, ena abidadama bona ena kara e gaukara hebouva, bema ena kara ese ena abidadama e hatubua.
²³Bena buka ai e torea herevana e momokani; Aberahamo ese Dirava eabiabiraia, bema kara maoromaoro taunai e gwauraiava," bema ia na e gwauraia, Dirava turana.
²⁴Oitaiamu, taunimanima ta na ena karai, maorona bae gwauraia, dia ena abidadamai mo.
²⁵Unuhetomana danu, Rahaba, ariara hahinena, na ena kara dainai maorona e gwauraia ani? Badina be ia ese hesiai taudia eabidia dae, bona idau dala amo e siaidia lao.
²⁶Badina be tau-anina asi laumana na vada e mase; unuhetomana danu, abidadama asi karana danu vada e mase. Translation done by Dk. Vani Taumaku on Monday 11/11/24, time: 3.00pm.

3

¹Varavaragu e, umui na hutumai hahediba taudiai basiola, badina be dibamui, ai hahediba taumai ihahemaoro henimai na baine auka, ²badina be ita iboudai na ta moru louloumu. Bema tau ta ena hereva ai se daradaramu neganai, ia na goeva dae tauna, tau-anina ireguna danu mai dibana.
³Bema hosi ududia idogotaodia auridia tatomu, bae kamoni henida helaoreana, idia na taudia iboudiai danu ta hamanaudia mu.
⁴Kada badadia danu baitadia, idia na babada bona lai auka hereadia ese odaiamu, to idia na tari maragi-maragina ese e tariamu, kapena tauna ena ura gabuna e heau laomu.
⁵Unuhetomana danu, taunimanima malana, enabe gau maragina, to e heagi badamu. Lahi danu ba haeroa, lahi maragina ta amo uda badadia danu e aradiamu.
⁶Benaini, taunimanima malana danu lahi, ia na tanobada karadikana ese e hahonua. Tau-anida regena bogaraginai, tau-anida idoinai e hadikaianu. Ia na mauri idoinai iaralaina; ena lahi danu gehena amo eabiamu.
⁷Badina be mauri gaudia iboudiai, e rakamu gaudia, bona e rohomu gaudia, bona e raumu gaudia, bona davara gaudia, taunimanima ese iha manadadia na mai dibadia; bona vada e hamanadadia.
⁸A mata iha-manadana na tau ta asi dibana. E raivaraivamu mai dikana ida, bona mase muramurana ai e honu.
⁹Ia ena amo Lohiabada, ita Tamada, ta hanamoamu; iena amo danu Dirava heidaidana ai e karadia taudia ma ta hadikadiamu.
¹⁰Udu tamona amo hahenamo bona heuduguirai e lasimu. Varavaragu e, kara inihetomana na basine vara.
¹¹Ranuguri tamona amo ranu gaihona bona ranu iditana e lohiloimu daemu danu ani? ¹²Varavaragu e, suke auna ai olive huahuadia bae dobi diba a? Eiava vine aunai suke huahuadia bae dobi diba a? Tadi ranuna ese danu ranu gaihona na basine havaraianu.
¹³Daika be bogaragimui ai e heonegamu bona e lalopararamu? Ia ese ena mauri namona na ena karai baine hahedinaraia, aonega korikori manauai.
¹⁴Bema mama bona heiri-heiri lalomui ai mia neganai, basio heagi bona hereva momokani na basio

gorea.¹⁵Ina na dia atai amo e maimu aonegana, a tanobada gauna tau-anina ena, lauma dikadia edia.¹⁶Badina be mama bona heiri-heiri e maimu gabunai, na daradara bona karadika iboudiai e maimu.¹⁷A atai amo e maimu aonegana toana ginigunana be goeva-goeva, murinai maino, gado namo, lalomanada, ia ena hebogahisi bona huahua namodia e honumu. Ia na asi ena daradara bona asi ena dibaka.¹⁸Kara maoromaoro anina na maino ai e hadoamu, herohehaino taudia mo padadiai. Translation done by Dk. Vani Taumaku on Tuesday 12/11/24, time: 10.19 pm.

4¹Tuari bona heatu be ede amo e maimu? Dia emui ura dikadia amo sibomui padamui amo e maimu a? ²O uralaiamu, to asio abimu. O ala-alamu bona o hekise-hekise mu, to asio davarimu. O heatumu bona o tuarimu to asio davarimu, badina be asio noinoimu. ³Eiavana o noinoimu, to asio abimu, badina emui lalohadai kereredia ai o noinoimu dainai. Emui lalohadai na bavabi gaudia na emui ura dikadia ai ba petapeta lai. ⁴Heudahanai taunimaniamui e! Asi dibamui tanobada iurahenina na Dirava inai-henina a? Tanobada e hetura heniamu tauna eiava hahinena na Dirava inaina. ⁵Eiavana lalomui ai otomu ina revareva helagana, e torea e tomu, "Lalodai eha-nohoa laumana ese na e ura henida lalodikamu", herevana na e gwauraia kavamu a? ⁶A Dirava ese ena hariharibada na e heni louloumu. Una dainai ma e tomu, Dirava ese e hekokorokumu taudia e laodia ahumu, a manau taudia na e harihari henidiamu. ⁸Dirava ba raka henia kahi, bena ia danu, umui be raka henimui kahimu. Kara dika taumui e, imamui a huri, lalo rua taumui e, lalomui a hagogevadia. ⁹Ba dara doko, ba lalo hisihisi, ba taitai. Emui kiri na lalo-hisihisi ai bainela, emui moale na daradoko ai bainela. ¹⁰Lohiabada vairanai ba hahemanau, bena ia ese baine abimui isi. ¹¹Varavaragu e, basio eredika. Tau ta ese varavarana eredika heniamu eiava e hahemaoro heniamu negadai, ia ese taravatu danu eredika heniamu bona e hahemaoro heniamu. A bema oi ese taravatu ba hahemaoro henia neganai, oi na dia taravatu o badinaimu tauna, a o hahemaoro heniamu tauna. ¹²Taravatu iatona tauna bona hahemaoro tauna na tamona mo, a na mai siahuna baine hahemaui bona baine hahemase. A oibe daika? dekemu tauna o hahemaoro heniamu a? ¹³Umui haida o gwaumu "Hari dina eiavana kerukeru una hanua baitala, unusenai ai lagani ta baita noho, baita hoihoi, eda moni baita habou." ¹⁴Asi dibamui kerukeru dahaka baine vara. Badina be emui mauri be dahaka? Ranu varahuna mo, nega sisina mo e hedinaraimu, ma e boiomu. ¹⁵Ina hari boma toma, "Lohiabada ena ura, ita na baita mauri neganai, ini sivaraina unu baita kara toma." ¹⁶A harihari emui hekokoeoku o heagilaimu, heagi unuhetomana na dika. ¹⁷Una dainai, kara namo ikarana mai dibana to se karaiaimu tauna na kara dika tauna. Translation done by Dk. Vani Taumaku on Saturday (26/12/24), time: at 12 mid-day, ready for quality checking.

5

¹Taga taumui e, a taitai ganagana, a tai lolo badina daradoko emui ai be kaumu dainai. ²Emui kohu na vada e houka-houka, bona emui dabua danu pitopito ese vada e anidiamu. ³Emui golo bona emui silva vada e dikamu, asi anidia, bona edia hogohogo ese baine hahemaoro henimui. Hidiomui baine ani, lahi na heto. Emui kohu namodia vada o habou, dina gabedia gaudia. ⁴A kamoni, emui uma anidia e utu taudia davadia oabihaidia na e lolomu. Bona iutudia taudia edia taitai na Iehova Sabaota taiana ai vada e diho vaitani. ⁵Emui taga maurina ina tanobada ai na o mairilaiamu mai lebulebumui ida. kudoumui na vada o ubudia badaho-badaho ala-ala dinana ta gaudia. ⁶Kara maoromaoro tauna vada o hahebadelaia koikoi bona vada o alaia mase. Ia ese na se iaomui ahumu. ⁷Varavaragu e, ba haheauka, ela bona Lohiabada ena loumai. Mani aitaia, biru tauna ese ena biru anina e nariamui mai haheauka na ida, ela bona medu ginigunana bona medu gabena ese ena hadohado gaudia eha-papariparadiamu na heto. ⁸Umui danu 9ba haheauka. Lalomui na bae goada balaheni, Badina be Lohiabada ena loumai vada e kahira-kahira. ⁹Tadikakagu e, basio hemaumaurai heheni, hahemaoro tauna ese baine hahemaoro henimui na garina. Aitaia, ia na iduara badinai vada e gini. ¹⁰Hahegeregere ta, varavaragu e, peroveta taudia, Lohiabada ladanai e herevava taudia, edia hisihisi bona edia haheauka ba haerodia. ¹¹Vada ta itamu, haheauka taudia na nanamo. Iobu ena haheauka herevana vada o kamoni, bona Lohiabada ena kara vada mai dibamui, ena hebogahisi bona ena hariharibada na bada-herea. ¹²A varavaragu e, hereadaena binai, hereva metaudia amo basio. gwauhamata. Guba eiava tanobada eiava idau gauta latanai basio gwauhamata. A emui "oibe" baine "oibe", bona emui "lasi" baine "lasi", baine hahemaoro henimui na garina. ¹³Bogaragmui ai ta hisi e animu a? baine guriguri. Ta e moalemu a? Ahenamo anedia baine abi. ¹⁴Bogaragmui ai ta e gorerea a? Ekalesia ita-taona taudia baine boiridia, bena idia ese latanai bae guriguri. Dehoro ai bae horoa, Lohiabada ladanai. ¹⁵Ini abidadama taudia edia guriguri siahudia amo ina gorere tauna do baine mauri, Lohiabada ese baine hatorea isi. Bona ena kara dika danu baine gwautao. ¹⁶Emui kara dika ba gwaurai hedinarai, bona ta ta bamomui daidiai ba guriguri, bena ba mauri. Kara maoromaoro tauna ena guriguri ese anina e havaraiaimu mai siahuna ida. ¹⁷Elia na taunimanima mo, ita hetomada. To ia na e guriguri goadagoadava medu basine diho, bena medu na tanobada latànai se dihova, lagani toi hua tauratoi lalodiai. ¹⁸Bena ia na e guriguri lou, bena medu na guba amo e diho, bena tano ese anina e havaraia. ¹⁹Varavaragu e, bema ta umui bogaragmui ai hereva momokani dalana amo baine raka siri, bena ta ese ma baine hahelaloa-kerehai, ²⁰ba diba goevagoeva, kara dika tauna ena dala kerekerena amo baine giroa tauna ese laumana na mase amo baine harohoa mauri bona kara dika momo danu baine tahuni. Translation done by Dk. Vani Tau on Tuesday (07/01/25), time: 4.00 pm, Ready for quality checking.

1 Peter

1

¹Lau Petero Iesu Keriso ena aposetolo taugu ese eabimui hidi taumui, Pontio ai bona Galileia ai bona Kapadokia ai bona Asia ai bona Bitunia ai o noho hedoa-hedoamu na tore henimuimu. ²Ita Tamada Dirava ese eabimui hidi guna bona Lauma Helaga ese e hahelagamui Iesu Keriso ba kamonaia henia bena ia rarana ese baine nevarimui helaoreana. ³Dirava, iseda Lohiabada, Iesu Keriso, Tamana, aita imodaia. Iena hebogahisi na badaherea dainai ia ese vada e havarada lou mauri helaoreana ai. Iesu Keriso mase amo e toreisi lou dainai. ⁴Ahumui do bavabia, baine mia hanaihanai asi bebekabebekana basine marai, guba ai vada eatoa hegaegae umui emui. ⁵Abidadama dainai Dirava ena siahue ese baine gimamui, ela bona vada e seua hahemaurina, nega gabenai ai baine hedinarai gauna bavabia. ⁶Una dainai ena be ina nega sinai hedibagani momo daidiai daramui e dokomu, to ba moale. ⁷Emui abidadama e tohoamu, gold lahi ai e tohoamu na heto. Ena namo ese gold ena namo e hereaiamu, ia na ihanamolaimui bona iha-heatolaimui bona imatauraimui gauna ai bainela Iesu Keriso baine hedinarai negana ai. ⁸Ena be nega ta asi ai itaia, to o ura heniamu, bona o moaleaiamu, emui moalena asi igwauraina dalana, o moale hisidaemu. ⁹Emui abidadama huahua dia do bavabia, laumamui ihamauridia benai. ¹⁰Peroveta taudia, Dirava ena hariharibada emui ai baine kau o gwauraia guna taudia, ese hari hahemauri e henanadailaia bona e tahua malaka-malaka. ¹¹Keriso ena lauma lalodia ai e nohova; bona Keriso baine ani hisidia bona murina baine abi hairaidia e hadiba laidiava, bona idia ese negana bona toana e tahuava. ¹²E hadibadia danu unu gau e gaugaralaidia na dia idia edia, to umui emui; bona harihari sivarai-namo e harorolai henimui taudia ese vada e gwaurai, Lauma Helaga guba amo vada e siaia diho dainai. Unu gau aneru ese itana urana euramu e tomamu. ¹³Lalomui ba hagueva ba haheauka, Iesu Keriso baine hedinari negana ai emui ai baine kau harihari na balaroa mai lalomui idoidiai. ¹⁴Kamonai namonamo ai baola o diburava negadia ai o gahusiva gaudia na basio hagoidia, ¹⁵a e boirimui tauna vada e helaga hegeregereana umui danu ba helaga, emui kara idoidiai lalodia ai. ¹⁶Badina be vada e torea, ¹⁷Taunimanima e hahemaoro henidiamu na oromadia e lalomu, a ta ta ena gaugara ena gaugara daidiai e hahemaoro e henidiamu, Diravana o hahaneamu. Tamamu o gwauraiamu benaini, ina emui noho hedoa negana ai ba noho mai garimui ida. ¹⁸Bona ba diba, senemui edia kara asi anidia amo e hamaurimui davana na dia baine pata gauna ta dia silver dia gold, ¹⁹a rara hereadaena mamoe natuna asi bebekabebekana bona asi toutouna rarana na heto, Keriso rarana benai. ²⁰Tanobada do se havaraia negana ai eabia hegaegae, a ini dina gabedia ai vada eme hedinarai umui daimui ai. ²¹Ia bagunai Dirava o abidadama heniamu Dirava ese mase amo e hatorea isi bona hairaina e henia taunimanima emui abidadama bona emui helaro na Dirava enai mimia. ²²Hereva momokani vada o kamonaia dainai laumamui vada o haguevadia, bona varavarada o lalokau henidia momokanimu, benaini ba heura heheni mai lalomui idoidiai. ²³Vada o vara matamata, dia baine pata gauna ena amo a mauri bona noho hanaihanai Diravana ena hereva dainai. ²⁴Badina be: Taunimanima iboudiai na rei na heto, Idia hairaidia na ini huahua na heheto. Rei e maraimu bona huahua e hehunimu. ²⁵A Lohiabada ena hereva do baine hesiriu hanaihanai sivarai-namo vada e harorolai henimui herevana benai. COMPLETED BY RDKH. ORI KOHU ON MONDAY (29/07/24), TIME: 3:58 PM

2 Peter

1

¹Lau, Simona Petero e siaigu tauna bona Iesu Keriso ena aposetolo umui ai ida eda abidadama goevadaena na iseda Dirava bona hahemauri tauna Iesu Keriso ena kara maoromaoro enai e miamu taumui na tore henimuimu. ²Hariharibada bona maino emui ai bae bada emui lalo-parara danu Dirava enai bona eda Lohiabada Iesu Keriso enai baine bada. ³Dirava ena siahue ese eda mauri bona ia ibadinana gaudia iboudiai vada e henida, hairaina bona goevadaena amo vada e boirida Tauna tame diba dainai. ⁴Unu amo ena gwauhamata badadia bona hereadia vada e henida, unu gwauhamata ese tanobada ena hegahusi bodagadia amo bae harohomui mauri, bona Dirava lalona korikorina bavabia. ⁵Badina bunai, ba goada balaheni. Emui kamonaia enai, kara namo bavato kau; kara namo enai lalo-parara bavatoa kau; ⁶lalo-parara enai haheauka bavatoa kau; haheauka enai boga-auka enai boga-auka bavatoa kau; boga-auka enai Dirava ibadinana bavatoa kau; ⁷Dirava ibadinana enai tadikakamui iura-henidia bavatoa kau; bona tadikakamui iura-henidia enai lalokau bavatoa kau. ⁸Badina be bema ini gau lalomui ai bae mia bona bae bada, umui na lahedo taumui bona asi damumui ai basiola, Lohiabada Iesu Keriso mai dibamui dainai. ⁹A ini gau ai e dabumu tauna, ia na mata kepulu tauna; matana e tunamu dainai e helalo boiomu ena kara dika gunadia vada e huri oho vaitani. ¹⁰Una dainai, varavaragu e, ba goada balaheni, e boirimui bona e abimui hidi vada ba hamomokania, badina be unu ba kara toma negana ai umui na basio keto. ¹¹Bona unu amo emui dala baine lailai goevagoeva, eda Lohiabada bona eda Hahemauri Tauna Iesu Keriso ena mia hanaihanai basileiana ai ba raka vareai. ¹²Badina bunai lau na tomamu ini hereva baina hamaorolaimui loulou. Ena be mai dibamui bona hereva momokani ai o gini tutuka-tutukamu, ¹³to lau na tomamu, ina taruha doini na noho heniamu ai, baine haomui bona ini gau baina hahelalomui une. ¹⁴Badina be lau dibagu egu taruha iragana negana vada eme kahira-kahira; iseda Lohiabada Iesu Keriso unu vada e hadibagu toma. ¹⁵A baina goada toho, bona egu mase murinaia ina gau ba helalolai une, nega iboudiai. ¹⁶Badina be eda Lohiabada Iesu Keriso ena siahue bona ena mai herevada e hamaorolaimuiva negadia ai, ai na dia gori herevadia asia sivaraiava, a ia hairaina na matamai amo a itaia. ¹⁷Badina be Tamada Dirava ena amo hemataurai bona hairai e abi negana ai, ere ta Diari-diari Herea-daena lalona amo e kamonaia, eto, "Ina na Natugu, egu lalokau; lau ia na lalo namo heniamu". ¹⁸Ina ere ai ese a kamonaia, ia ida ororo helagana ai a nohova negana ai. ¹⁹Unu amo peroveta herevadia vada e momokani vaitani, ai emai ai. Umui danu ba badinadia baine namo; idia na lamepa gabu diburana ai e diarimu na heto, ela bona daba baine rere, bona hisiu bada na lalomui ai baine

dae.²⁰A ina na ba diba guna; ta ese sibona ena lalo-hadai hegeregere na ai peroveta bukadia anidia baine gwaurai.

²¹Badina be peroveta herevadia na taunimanima edia ura kava amo asie vara, a Lauma Helaga ese Dirava ena helaga taudia e haduadia hegeregere na e herevava. Translation done by Rev. Eiwana Zacharias on Moday (02/09/24), time: 7.05 am

2 ¹To koikoi PerovetaTaudia danu taunimanima ediai ema, hegeregere na hahediba koikoi taudia emui ai baema. Idia ese e hunia dika rohoroho be mai laidia bona Lohiabada basie gwaurai eme abidia kahi. Idia sibodia dika rohoroho latadiai e heato kaumui. ²Momo be edia koikoi herevadia muridiai bae raka, bona idia ese momokani dalana dikai be halaoamu. ³Edia ura dika dia namo ai be ha kereremu hereva koikoi ai. ⁴Dirava ese e kara havara anerudia na se bogadia hisi. To e negedia guba henunai, e seini dia dibura lalonai hahemaoro dinana e nariamu. ⁵Bona ia ese bese gunana danu se bogaia hisi, Noah mo, kara maoromaoro iharorolaina tauna, mai bamona hahitousi ida, e hamauridia. ⁶Bona Sodoma bona Gomora danu e habuadia tari, kahu ai e halaodia. Ina na matahakani daidia gabe ai Dirava garina basie gari taudia ediai. ⁷A ia ese Lota na kara maoromaoro dainai e hamauria, ia na lalona e hesikui kara dika taudia edia lebulebu karadia daidiai. ⁸Ia na kara maoromaoro tauna, idia padadiai e nohova dina iboudiai edia kara havara e itava e kamonaiva dainai ia lalona e hisihisiva. ⁹Benaini Lohiabada na mai dibana Dirava ena tau hedibagani lalona amo baine hamauria diba, a kara dika taudia baine guidia diba ela bona hahemaoro dinana. ¹⁰To ina na momokani daidia tauani ena ura dikadia e karamu bona gwau maoro taudia e dadaraidia taudia. E hekokorokumu, sibodia edia ura e karamu, atai taudia i'hiraidia asie garimu. ¹¹To aneru ena be mai goadadia bona siahui herea to unu atai taudia asie habadelaidia Lohiabada vairanai. ¹²To idia na boroma asi lalodia be dogodia bona be ha-mase diamu. Hegeregere na se laloparara lai gaudia ududia amo eha-dikadia. ¹³Ahu dia bae abi edia kara dika amo. E lalomu taga dinanai e moalemu. Edia na toutou eiava bero na heto. Umui ida o aniani heboumu negadiai danu e aniani lalo-dikamu. ¹⁴Matadia na heudahanai ai e honuhonu dae, bona kara dika ai asie hesikumu. lalo-manoka taudia e idoadiamu, mata-ganigani karadia ai vada e manada. Idia na dika natuna! ¹⁵Idia na dala maoromaoro vada e rakatania bona e boio Balaam Beor natuna, murinai e rakamu kara dika davana iabina urana e uramu. ¹⁶A ena kerere dainai e sisiba henia - doniki taunimanima gadodia ai una peroveta tauna e hereva henia ena kavakava e gwaua tubu. ¹⁷Ini taunimanima na ranu guridia korordia na heto bona kahu lai ese e odaia isi na heto. Dibura masemase gabuna vada e seua, idia edia. ¹⁸Badina e hereva kavamu. E heagi kavamu kara kerere taudia edia amo e roho maurimu taudia e idoadiamu tau-anina ena hegahusi bona ena mata dika amo. ¹⁹Ura kwalimu bae henidia e tomamu to idia sibodia na mase ena igui taudia badina be darere tauna na kwalimu tauna ena hesiai ai bainela. ²⁰Badina be Lohiabada bona Hahemaori Tauna Iesu Keriso dibadia murina tanobada ena miro gaudia amo vada e roho mauri taudia na unu miro gaudia ese ma bae idoadia lou bona bae hadareredia, madi edia dika gunana na maragi edia dika gabena na baine bada. ²¹Idia na dala maoromaoro basiema diba bema namo a dibadia bona e henidia haheganina helagana amo e raka oho na dika. ²²Hereva hegeregere na idia ediai vada eme momokani eto sisia be ena mumuta e lou heniamu bona boroma be bae huria to kopukpou ai baine hekui-hekui lou. Translation done by: Rev. Eiwana Zecharias on Thursday (06/07/23), time: 4.45 pm. Ready for quality checking.-

3 ¹Lalokau, ina hari na revareva iharuana name tore henimui. Raruosi Laodikea lalona amo emai laia. ²Oi ese guna herevadia helaga peroveta taudia eme heni lalona amo be hedinarai, eda Lohiabada bona Hahemaori Tauna ena helaga Aposetolo amo. ³Badiba guna, A hahedika taudia dina dokidia ai ema. Namu bae kirilaidia bona, kara havara bae ura dika laia. ⁴Idia be eto, "Eme gwauhamata ia be loumaimu be edekahna? Badina Sene Tama mai e mauta oho, gau iboudiai doini mimia Guba bona Tanobada ikaradia matmana neganai. ⁵Idia na ura dika ai eme lalao-boio, guba gaudia na idau negai mimia, bona tanobada ranu amo e karaia Dirava ena hereva ai. ⁶Bona ina gau amo, tanobada una neganai eme hadarerea abata ranuna amo. ⁷To hari guba bona tanobada be e nari lahi amo e hagiania. Hahemaoro dinana e naria bona kara havara taudia bae hadikadia rohoroho. ⁸Egu lalokau taumui e, ina hereva tamona basio lalao boio, Lohiabada enai dina tamona na lagani daha na heto, bona lagani daha na dina tamona na heto. ⁹Lohiabada na ena gwauhamata ihamomokanina ai se halahemu, haida e laloamu na heto to e haheauka henimuimu badina ia na seuramu ta baine mase e uramu iboumu ai ba helalokerehai. ¹⁰A Lohiabada ena dina baine kau henao tauna na heto una dina ai guba baine puki mai rege-badana ida gau iboudiai na siahui badana ese baine havevedia tanobada danu mai anina idoinai ida lahi ese baine araia ore. ¹¹Benaini ini gau iboudiai unu bema ore toma umui be ede boma kara toma? Emui kara iboudiai bema helaga Dirava boma badinaia. ¹²Dirava ena dina ena mai ba nari bona ba kahaia una dina ai lahi ese guba baine araia ore bona siahui-badana ese gau iboudiai baine havevedia. ¹³Ita na guba matamatana bona tanobada matamatana ena gwauhamata hegeregere na ta narimu; kara maoromaoro taudia ese bae noholoia. ¹⁴Una dainai, egu lalokau taumui e, ini gau o narimu dainai ba goada balaheni hedaro-bouboumu ai baine davarimu asi toutoumu bona asi kereremu ia vairanai. ¹⁵Lohiabada ena haheauka ba haeroa una na hahemaori gauna varavara-dosida Paulo ese e henia aonegana amo e tore henimui hegeregere na. ¹⁶Ena revareva iboudiai lalodia ini gau na unu e torelai toma. E tore herevadia haida anidia idavaridia na auka bona mata-lahui bona daradara tauna ese e hagegevamu revareva helagadia haida e hagegevamu hegeregere na sibodia ihadikadia gaudia ai e haloamu. ¹⁷Egu lalokau taumui e, vada o diba guna una dainai nahuamu ba toho kara havara taudia edia kerere ese baine hakaumu siri na garina emui gini tutuka-tutuka amo ba keto na garina. ¹⁸A eda Lohiabada bona eda Hahemaori Tauna Iesu Keriso ena harihari-bada bona ena lalo-diari ai ba tubu daga dae. Hairai na iena, hari ela hanaihanai. Amen. Translation done by: Rev. Eiwana Zecharias on Saturday (24/07/23), time: 9.00 pm. Ready for quality checking.

1 John

1 ¹Una na matamana amo - ta kamoni, matada amo ta-itaianu, ta raraianu bona imadai ta dogodia, una na Dirava ena mauri herevana. ²Una danu mauri na eha-hedinaraiamu. Bona ta itaianu bona ta hamomokaniamu aina a haripiumu umui emui ai ina na mauri hanaihanai una na tamada ida bona una na ita edai e hedinaraimu. ³Una na ita ese ta itaianu bona ta kamoni, ai ese aha-momokaniamu umui danu, bona umui danu, ina ekalesia hegogo na lalonaiumu danu. Una dainai ita eda hegogona Tamana, Natuna, Iesu Kerios. ⁴Ina danu ai na ini gau a toremu umui emui, una ai emai moale na baine guguru. ⁵Ina na sivarai ai ese a kamoni ia ena amo bona ai ese a haripiulaiamu, umui emui ai Dirava na diari, bona ia lalonai dibura ta lasi vaitani. ⁶Bema ita baita ato, ita na ia ida ekalesia hegogona lalonai bona dibura ai ta rakamu, ita na ta koikoimu bona hereva momokani na asi ta hetoholaiamu. ⁷To bema ita na diari ai baita raka, ia hegeregere, ia na diari ita ekalesia hegogona lalonai bona Iesu ia natuna rarana ese eda dika iboudiai baine hagevadia. ⁸Bema ita na baita ato ita na asi eda dika, ita na siboda ta hahedikamu bona hereva momokani na dia lalodai. ⁹To bema ita na eda dika baita gwaurai hedinarai, ia na momokani bona maoromaoro eda dika baine hagevadia eda kara gagevageva dia amo. ¹⁰To bema ita baita ato ita na asi ta kara dikamu, ita na ia na koikoi tauna ai ta halaoamu, bona ia ena hereva na dia ita lalodai. Translator: Mr. Kamea Andrew Tau. Completed on Monday (26/06/23), Time: 9.00 am, ready for quality checking.

2

¹Lau natugu, lau na ini gau na toremu umui emui, bona umui na basio dika. To bema umui ta baine dika, ita mai eda hereva tauna ta ita tamada ida, Iesu Keriso ia na kara maoromaoro tauna. ²Ia na ita eda dika kwaranai ela, dia ita edai mo, to tanobada idoinai. ³Una dainai ita ia ta dibaianu bona ia baita dibaia, bona ena hahegani baita badina. ⁴Ta baine eto, "Lau mai dibagu Dirava" to ena hahegani basine badina, ia na e koikoimu bona hereva momokani na dia lalonai. ⁵Bema ta ia ena hereva e badinamu, Dirava ena lalokau korikorina maoromaoro ia enai. Unu amo ita baita dibamu, ita na ia lalonai. ⁶Daika e gwaumu ia na Dirava lalonai e nohomu, ia ena raka hegeregere, baine raka. ⁷Lalokau taumu, lau na dia hahegani matamatana ta na toreamu, umui emui to hahegani gunana, umui ese hereva o kamonaia gauna matamatana neganai. ⁸Oibe lau ese hahegani matamatana na toreamu, umui emu. Una na momokani ia enai bona oi emu ai. Badina be dibura na vada e pukimu, bona diari momokani na vada e kiamakiamamu. ⁹Daika e gwaumu, ia na diari ai, bona tadikakana einai heniamu, ia na doini dibura. ¹⁰Daika tadikakana e lalokau heniamu, bona diari ai e nohomu, ia na asi ena hekwakwanai. ¹¹To bema ta tadikakana einai heniamu ia na diburai bona diburai e rakamu. Ia na asi dibana, ia be ede e laomu. Badina be dibura ese matana vada e koua. ¹²Lau na umui na tore henimuimu, natugu veridia, badina emui dika na vada ehe-gwautao, badina ia ladana dainai. ¹³Lau na umui na tore henimuimu, tatau badina umui dibamu, ia na matamana, lau na umui na tore henimui, eregabe tatau, badina umui ese dika gauna o hadarereamu. ¹⁴Lau ese na torea umui emui, maragidia umui na mai dibamui tamada. Lau ese na torea umui emui, tatau badina umui dibamui ia na matamana. Lau ese na torea umui emui, eregabe tatau badina umui na mai goadamui bona Dirava ena hereva na lalomui ai bona umui ese dika gaudia o hadareremu. ¹⁵Ina Tanobada na basio lalokau henia, Tanobada gaudia danu; bema ta ina tanobada e lalokau heniamu, Tamada ilalokau henina na dia ia lalonai. ¹⁶Gau iboudiai ina tanobadai, tauani ena hegahusi, mata ena hegahusi, heagi kava heagi kava mauri lalonai, ini na dia tamada ena amo e maimu. ¹⁷Tanobada bona ena ura na baine puki, to daika Dirava ena ura baine karaia baine noho hanaihanai. ¹⁸Maraki-maraki dia hora dokona binai, umui vada o kamoni keriso koikoidia bema maimu, ina hari keriso koikoidia hutuma vada ema. Unu amo baita diba hora dokona binai. ¹⁹Idia na ai emai amo e raka lasi, to idia na dia ai ida. To bema idia na ai ida, idia na bema noho ai ida. To idia na e lasi, una ese e hahedinaraiamu idia na ta dia ai ida. ²⁰A umui na Helaga tauna ese vada e horomui, hereva momokani vada o diba. ²¹Lau umui na tore henimuimu na, dia natomu umui na hereva momokani asi dibamui dainai, to badina umui na mai dibamui dainai. Bona badina koikoi ta lasi, hereva momokani amo. ²²Daika be koikoi tauna. Iesu na Keriso e goreamu tauna? Una tau na Keriso koikoina ia ese Tamana bona Natuna e gorediamu. ²³Iboudai natuna baita goreamu, tamana danu basita abiamu. Daika daika natuna baita gwaurai hedinarai, tamana danu baita abiamu. ²⁴Matamanai o kamoni herevana na lalomui ai baine mia. Dahaka o kamoni matamanai baine mia lalomui ai. Oi danu natuna bona tamana lalodiai ba noho. ²⁵Ina na gwau hamata ia ese e henidamu - mauri hanaihanai. ²⁶Ini na tore gaudia umui emui, bae hakaumu kerere taudia daidiai. ²⁷A oi na hehoro vada o abia ia ena amo, lalonai ba noho. Bona oi na ta ese basine hadibamu, to ia ena hahehoro oi e hadibamu gau iboudiai bona momokani dia koikoi bona maoro ia ese oi e hadibamu, ia lalonai ba noho. ²⁸Natugu e , ia lalonai ba noho bona ia baine hedinarai neganai, ita na basita daradara bona basita hemarai ia vairanai, ia ena mai ai. ²⁹Bema oi na o dibamu ia na maoromaoro, oi danu badiba iboudai daika kara maorona e karaianu ia na ia ena amo e vara. Translator: Mr. Kamea Andrew Taru. Completed on Monday (26/06/23), Time: 12.16pm. Ready for quality checking.

3

¹Mani aitaia Tamana ena lalokau, vada e henida ita na bae gwauraida, Dirava natuna bona ita be unai. Una dainai, tanobada na asi dibana ita, badina ita na asi dibana ia. ²Egu lalokau harihari ita na Dirava natuna bona ina na do se hedinarai dahaka ita eda uru lalonai. Ita mai dibada bema Keriso baine hedinarai ita na ia idaidana na heto. Ita ese basita itaia ia korikorina. ³Daika ini e helaro tomamu, ia enai ia sibona e hegoevamu, ia eme goeva goeva hegeregere. ⁴Daika e

kara dikamu, ia na e karamu taravatu e tataia utumu, kara dika na taravatu itata utuna gauna.⁵Umui dibamui Keriso e hedinaraimu na kara dika baine abia oho, bona ia lalonai na asi ena kara dika.⁶Daika ia lalonai e nohomu, ia na basine kara dika. Daika baine kara dika hesiriu, ia ese na basine itaia bona basine dibaia.⁷Natugu lalokau, ta ese basine gunalaimui ba kerere na garina, kara maormaor e karamu tauna na, maoromaoro Keriso hegeregere na, ia na maoromaoro.⁸A kara dika e karamu tauna na diabololo ena, diabololo na e kara dika, matamana neganai. Una dainai Dirava natuna e hedinarai ia ese diabololo ena gaukara baine ha dikaia (Baine gigia rohoroho).⁹Daika Dirava ena amo e vara, ia basine karadika lou. Badina Dirava ena uhe na ia lalonai, ia na basine kara dika lou, badina ia na Dirava ena amo.¹⁰Unu amo Dirava natuna bona diabololo natuna vada ba hedinarai, daika tau, bema kara maorodia basine kara, ia na dia Dirava ena amo. Eiava tadikakana basine lalokau henia.¹¹Ina hereva na matamana neganai vada o kamonaia, ita na baita helalokau heheni.¹²Ita na Kaino hegeregere nai basitala. Daika dika karana amo tadina e alaia mase, dahaka dainai e alaia? Badina ia ena gaukara na dika, tadina ena be maoro.¹³Basio hoa bema tanobada ese baine inai henimu.¹⁴Ita baita diba, ita na mase amo vada ta hanaimu mauri. Badina tadikakada ta lalokau henidiamu. Daika tau, asi ena lalokau, ia na mase lalonai.¹⁵Daika tau, tadikakana e inai heniamu ia na ala-ala tauna. Oi mai dibamu, ala-ala tauna na mauri hanaihanai gabunai ia lalonai na lasi.¹⁶Unu amo ita baita diba lalokau badina. Keriso ena mauri e atoa diho ita daidai. ita danu eda mauri baita ato diho tadikakada daidai.¹⁷Bema daika mai ena tanobada kohudia, tadikakana baine itaia mai ena ura, basinema bogaia hisi kudou na amo, Dirava ena lalokau ia lalonai be ede bema mia toma? ¹⁸Natugu e, eda lalokau na dia herevai mo, dia mala amo, a kara bona momokani ai baita hahedinarai.¹⁹Una amo baita diba ita na momokani bona ia vairanai kudouda baita hagoadaia.²⁰Bema ita na kudouda baita hadika, Dirava ese e hereadiamu bona ia na gau iboudiai mai dibana.²¹Egu lalokau, bema ita kudouda ese basine hadikada, ita na hegeregere asi eda gari Dirava baita mai henia.²²Dahaka baita noi gaudia baita davari, ia ena amo, badina ita ese ia ena hahegani ta badinamu. Bona ia ta ha-moaleamu, karadia ta karamu, ia vairanai.²³Ina na ia ena hahegani, ita na ia natuna, Iesu Keriso baita abiadae (baita hamomokania) bona siboda ta ta baita helalokau, heheni, ia ese ena hahegani e henida hegeregere nai.²⁴Daika ia ena hahegani e badinamu, ia na ia lalonai bona ia danu ia lalonai. Unu amo ita ta dibamu ia na ita lalodai ia ese lauma e henida gaunai. Translator: Mr. Kamea Andrew Taru. Completed on Monday (30/06/23), Time: 09.02am. Ready for quality checking.

4

¹Egu lalokau, lauma iboudiai basio abidiadae, to lauma ba tohodia, idia be Dirava ena amo, badina peroveta koikoi dia momo ina tanobada ai.²Unu amo bodibamu, Dirava laumana na lauma iboudiai Iesu Keriso e gwauraiamu ia na tauani amo ema, idia na Dirava ena amo ema.³Bona lauma iboudiai Iesu se gwauraiamu idia na dia Dirava ena amo ema, ina na Keriso koikoina laumana. Vada o kamonaia, ia na bainema bona ina harihari ia na vada tanobada ai.⁴Oi na Dirava ena amo, natugu, bona vada o hadareredia, badina oi lalomu ai e nohomu e nohomu gauna ese ina tanobada ai e nohomu gauna e hereaiamu.⁵Idia na tanobada ena, una dainai dahaka e gwauraimu, gaudia na tanobada ena bona tanobada ese e kamonaia henidiamu.⁶Daika Dirava e dibaia, e kamonaia heniamu. Daika dia Dirava ena amo, se kamonaia heniamu. Unu amo ita ta dibamu lauma momokania bona lauma koikoi na.⁷Egu lalokau, aita helalokau heheni, lalokau na Dirava ena amo bona ita iboudai, daika e helalokaumu ia na Dirava ena amo, bona Dirava mai dibana.⁸Taunimanima ta Dirava se lalokau heniamu, na asi dibana Dirava, Dirava na lalokau.⁹Badina be Dirava ena lalokau na e hedinarai ita bogaragidai, bona Dirava ese natuna vara edeana e siaia ina tanobada ai ita baita mauri badina ia dainai.¹⁰Ina na lalokau, dia ita ese Dirava ta lalokau henia, to ia ese ita e lalokau henida, bema ia natuna e siaia ita eda dika kwaranai ela.¹¹Egu lalokau bema Dirava na ita e lalokau henida badamu, ita danu baita helalokau heheni.¹²Ta ese, lasi vaitani, Dirava se itaia, bema ita baita helalokau heheni, Dirava na ita ida bona ena lalokau hereadaena na ita ida.¹³Unu amo ita baita dibamu, ia danu ita lalodai badina ia ese ena lauma haida e henida.¹⁴Una danu ita ese ta itaia bona ta momokania, Tamana ese Natuna e siaia na ita eda hahemaui tauna ina tanobada ai.¹⁵Daika baine gwau hedinarai Iesu Keriso na Dirava Natuna, Dirava na ia lalonai ia danu Dirava lalonai.¹⁶Una danu, ita ta dibamu bona ta abiadaemu, una lalokau Dirava ese ita e henida. Dirava na lalokau bona daika ia ena lalokau lalonai e nohomu, Dirava danu ia lalonai e nohomu.¹⁷Badina binai, ina lalokau hereadaena na ita bogaragidai, unu amo ita na baita goada hahemaoro dinanai, badina ia na, maoro ina tanobada ai ita danu.¹⁸Lalokau lalonai gari ta lasi. To lalokau hereadaena ese gari e kokiamu, badina gari na matahakani e mailaiamu. Badina e garimu tauna ese lalokau hereadaena se abiamu.¹⁹Ta helalokaumu badina Dirava ese e lalokau henida guna dainai.²⁰Bema ta baine eto, "Dirava na lalokau heniamu" to tadikakana e inai heniamu ia na koikoi tauna. To tadikakana e itaiamu tauna se lalokau heniamu, Dirava basine lalokau henia badina se itaiamu.²¹Ina danu, ina na hahegani ia ena amo ta abia: Dirava ta lalokau heniamu tadikakada danu baita lalokau henidia. Translator: Mr. Kamea Andrew Taru. Completed on Thursday (06/07/23), Time: 05.06pm. Ready for quality checking.

5

¹Ita iboudai ese ta abiadaemu Iesu na Keriso Dirava ena amo e vara bona ita iboudai ese Tamada ta lalokau heniamu bona natuna danu e lalokau heniamu ia ena amo e vara.²Badina unu amo ta dibamu ita ese Dirava natuna ta lalokau henidiamu bema ita Dirava ta lalokau heniamu ia ena hahegani ta karamu.³Ina na Dirava ena lalokau ita ese ia ena hahegani baita badinaia. Ia ena hahegani na asi hekwarahina.⁴Iboudai Dirava ena amo ta vara tauda ese tanobada ta hadareramu ina na kwalimu ese tanobada e hadarereamu eda abidadama danu.⁵Tanobada e hadarereamu tauna ba

daika? Iesu e abiadaemu, Dirava natuna e gwauraiamu tauna.⁶Ina ranu bona rara amo ema: Iesu Keriso. Ia ema na dia ranu mo, to ranu bona rara.⁷Gabu toi ai e hedinaraimu.⁸Lauma, bona ranu bona rara iboudiai ese eabiadaemu.⁹Bema ita ese taunimanima baita ha momokanidiamu to Dirava iha-momokanina hari hereadae. Dirava ena hereva be natuna igwauraina herevana.¹⁰Daika Dirava natuna e abiadaemu ia igwaurai hedinaraina tauna. Daika Dirava se abiadaemu ia na koikoi tauna ba gwaurai, badina be ia ese Dirava natuna se hamomokaniamu.¹¹Ina na iha momokanina: Dirava ese mauri hanaihanai eme henida, ina mauri na ia natuna enai.¹²Ta ia natuna e abiadaemu ia na mauri. Ta bema Dirava natuna se abiadaemu ia enai mauri na lasi.¹³Lau ese na tore henimuimu ini gau na badiba umui na mauri hanaihanai vada o abia umui ese Dirava natuna ladana o abiadaemu.¹⁴Ina danu ina na hegeregere ia vairanai gau ta baita noia ia ena ura hegeregere baine kamoni henida.¹⁵Ina danu, bema ita ta dibamu baine kamoni henida - dahaka-dahaka ia enai baita noi - ita baita diba dahaka dahaka ia ena ta noimu.¹⁶Bema ta ese tadikakana baine itaia kara dikana ta e karaiaumu to dia mase karana, to kara dika ta be mase karana lau na asi na tomamu ia na una gau dainai bae guriguri.¹⁷Kara gageva gagevadia iboudiai na dika to dika haida na dia mase e havaramu.¹⁸Ita iboudai mai dibada Dirava ena amo e varamu tauna na asi ena dika. Dirava ena amo e varamu tauna na e gimaiamu bona dika ta ese se abiamu.¹⁹Ita iboudai mai dibada ita na Dirava ena amo dibada danu ina tanobada idoinai na siahu dikana imanai.²⁰Ita mai dibada Dirava natuna ema ita laloparara eme henida unu amo ita na baita diba ia na momokani. Ita na ia lalonai bona natuna Iesu Keriso lalonai. Ia bunai Dirava natuna bona mauri hanaihanai.²¹Natugu, nahuamui ba toho kaivakuku edia amo.Translator: Mr. Kamea Andrew Taru. Completed on Friday (14/07/23), Time: 10.16pm. Ready for quality checking.

2 John

¹ ¹Heitatao tauna ena amo ela eabia hidi hane-lohiamu bona mai natumu ida, Launa hereva momokani ai na lalokau henimuimu - bona dia lau sibogu mo, a hereva momokani e dibaia taudia iboudiai danu - ²badina be hereva momokani na ita lalodai e miamu bona do baine mia ela hanaihanai. ³Hariharibada, hebogahisi, bona maino dekedai bae mia Tamada Dirava ena amo bona Iesu Keriso ena amo, Tamada Natuna, momokani ai bona lalokau ai.⁴Lau na moale badamu natumu haida na davaridia hereva momokani lalonai e rakamu, Tamada ese e henidia haheganina hegeregere. ⁵Ina hari na noimumu, Hane lohia e - dia hahegani matamatana ta asina tore henimuimu, a matamana amo ta abia gauna - ita na baita heura-heheni. ⁶Lalokauna binai, iena hahegani dalana ai baita raka. Ina hahegani na, matamana amo o kamoni, lalonai ba rakalaia.⁷Badina be koikoi taudia momo na tanobada ai e loamu, bona asie gwau hedinaraimu Iesu Keriso na tau-anina ai ema. Idia na koikoi taudia bona Keriso inaina taudia. ⁸Sibomui ba heita heheni, unu o kara gaudia ba negedia na garina, badina unu na ita iboudai ese ta kara gaudia, a bona ahumui do bavabi guguru.⁹E raka gunamu tauna bona Keriso ena hahediba lalonai se nohomu tauna na ienai Dirava na lasi. A hahediba lalonai e nohomu tauna, ia lalonai na Tamana bona Natuna raruosi e nohomu. ¹⁰Bema ta baine vasi dekemu ini hahediba herevadia basine vasilai, basio abiadae emu ruma ai bona basio hanamoa. ¹¹Badina be baine abiadae tauna danu ia ena dika lalonai e vareaimu.¹²Launa gau momo baina tore henimui na tomu, a asina lalomu dia pepa bona inka amo baina tore. Ede bamonai, lau na uramu baina vasi dekemui, bona baita hereva heheni, emui moale baine guguru. ¹³Tadimu, e abia hidi hahinena, natuna ese hahenamo e henimuimu.Quality Check completed on Friday (06/09/24), time: 12.24 pm.

3 John

¹ ¹Heitatao taugu egu lalokau tauna Gaius na tore heniamu, ia na momokani ai na lalokau heniamu. ²Egu lalokau tauna e, na gurigurimu gau iboudiai emu ai bae namo bona tauanimu baine namo, laumamu (daramu) e namomu hegeregere. ³Egu moale na bada-herea badina tadikaka haida ema bona eme haripiu oi na kara momokani taumu, momokani ai o rakamu hegeregere. ⁴Lau na asi egu moale badana ta ina moale hegeregere, name kamoni natugu na momokani ai e rakamu.⁵Egu lalikau taune e, oi dahaka o karamu na o karadia namonamomu tadikaka bona idau taudia ediai, ⁶idia ese emu lalokau eme haripiulai dubu vairanai. Oi na o kara namomu edia laolao ai o siaidia lasimu Dirava e uramu daladiai, ⁷badina be idia na ina lada dainai e laomu, gau haida se abikaumu murimuri taudia edia amo. ⁸Una dainai ita ese taunimanima ini bamodia na baita abidia dae, unu amo ita na idia gaukara hebou taudiai baita hereva momokani dainai.⁹Lau na gau ta vada na torea ekalesia taudia (dubu taudia) edia, a Diotrepfes, padadiai sibona e heimodaimu tauna, ese na se abimai dae. ¹⁰Dainai bema lau bainama, lau ese baina helalao-tao e karamu karadia daidiai, hereva dikadia e gwaurai henimaimu. A dia una mo, ia ese sibona tadikaka asine abimai dae, a ia ese tadikaka iabidaedia taudia danu e koudia bona dubu murimurinai vada eatoadia.¹¹Egu lalokau tauna e, dika na basio tohotohoa a kara namo hari. Kara namona e karaiaumu tauna be Dirava ena amo; kara dika e karaiaumu tauna ese Dirava se itaiamu. ¹²Demetrius na taunimanima iboudiai ese namona e gwauraimu bona hereva momokani sibona ese danu. A ita ese danu vada ta gwaurai bona dibamui eda gwau hedinarai na momokani.¹³Launa gau momo nama tore henimu, a asi nauramu baina toredia peni bona inka ai. ¹⁴A nauramu baine itamui haraga, bona raruosi tama hereva-hereva heheni. ¹⁵Maino emu ai baine mia. Turada edia hahenamo e henimu. Turada enesenai ai ta ta ladadiai ba hanamodia.3 Jn. (Chpt 1) General Checking yet to done.

Jude

1

¹Jude, Iesu Keriso ena hesiai tauna, bona James tadikakana, eabimui-hidi taumui, Dirava Tamada ena lalokau taumui, bona vada e gimamui Iesu Keriso dainai a tore henimuimu: ²Hebogahisi bona maino bona lalokau na emui ai bae bada. ³Egu lalokau taumui e, na ura bada baina tore henimui eda hahemaui herevadia daidiai lalonamo, lau na umui na tore henimuimu baina hagogadamui baina hededegwa korikori una helaga taudia e henidia waitani abidadamana dainai. ⁴Badina tatau haida vada hehuniai e vasi rau vareai padamui ai, idia na idau negai ini kara davadia vada e gwaurai henidia, Dirava se badinaiaua taudia, idia ese Dirava ena hariharibada na lebulebu gaunai vada e halaoa, bona ita Biaguda tamona bona Lohiabada Iesu Keriso na e goreamu. ⁵Harihari na uramu baina hahelalomui une - enabe nega ta ai vada o diba gauna - Iesu ese taunimanima (bese/uru) ta vada eha-mauridia Aikupito tanona amo, a una murinai ia ese seabidadamava taudia vada eha buadiatari. ⁶Aneru danu edia maoro dagidia se dogodia-tao, a edia noho korikori gabuna vada e rakatania - Dirava ese vada e atodia mia hanaihanai seinidiai e guidia, dibura mase-mase lalonai, ela bona dina badana ena hahemaoro negana. ⁷Ina na Sodom bona Gomorrah bona dekedea huanuadia hegeregereadia, heuda hanai bona kara bodagadia e karava idia hegeregereadia, bona e urava ini kara dikadia mo bae kara. Idia na haheitalai hegeregereadia, unu e kara toma taudia ahudia na mia hanaihanai lahina. ⁸Dounu hegeregereadia, ini nihi taudia danu tauanidia unu e hadika tomamu. A idia ese maoro taudia e dadaraidiamu bona hairai aneru dia e gonagona laidiamu. ⁹A Michael Aneru igunalaidia danu, ia diaboloidia e hepapa-ahuahua bona ia eheai heniaua Mose tauanina dinai, ia ese na se ere dika henia. A e hamaoroa eto. "Lohiabada ese baine gwau henimui." ¹⁰A ini taunimanima ese se lalopararalaimu gaudia na e gonagonalaimu bona dahaka e lalopararalaimu edia hemamiai na e karamu boroma asi lalodia na heto, ini gau ese eha dikadiamu. ¹¹Madi ihabaidia! badina idia na Kaino ena dalai vada e raka bona Balam ena kerere vada e moru henia, moni daidiai. idia na vada e mase Korah ena dagedage lalonai. ¹²Taudia be ini idia na miro toutoudia hehunidia emui anibou lalodiai, idia na umui ida o anibouva negadiai na se hemaraimu - heregu taudia sibodiamo e heubuva. Idia na ori asi medudia, lai ese e odadia evaevamu. idia na au asi huahuaadia - nega rua e masemu, mai ramudia ida e ragadiamu. ¹³Idia na davara hurehuredia dikadia, gwaragwaradia ese sibodia edia hemarai e hahedinaraimu. Idia na e morumu hisiudia, dibura mase mase gabuna na idia e nari laidiamu ela hanaihanai. ¹⁴Enoch danu, Adam ena amo uru ihahituna tauna, ese vada e peroveta laidia, etomu, "Aitaia! Lohiabada na e maimu mai ena helaga taudia daha daha ida." ¹⁵Ia na e maimu taunimanima iboudiai baine hahemaoro henidia. Ia na e maimu Dirava asie badinaiamu taudia iboudiai edia dika baineme hemaor henidia, badina Dirava seuramu karadia e karava bona Dirava ihadikana herevadia aukadia e gwaurai daidiai." ¹⁶Ini taunimanima na gonagona taudia, maumau taudia, edia hegahusi dikadia mo e karamu. Ududia na hegi herevadia mo e lasimu, idia na bae namo urana dainai haida e hanamodia koikoimu. ¹⁷A umui, egu lalokau taumui e, eda Lohiabada Iesu Keriso ena apostolo taudia ese guna e herevalai herevadia na ba lalodia tao. ¹⁸Idia ese e hamaoromuiva, "nega dokona ai, hekirikirilai taudia baema sibodia edia ura karadia bae kara." ¹⁹Ini idia ese heiriheiri be havaramu, idia na tauani mo e laloamu bona idia ese lauma na do se abia. ²⁰A umui, egu lalokau e, ba tubu daekau emui helaga bada abidadamanai, bona Lauma Helaga ai ba guriguri. ²¹Dirava ena lalokau lalonai ba noho, bona eda Lohiabada Iesu Keriso ena mauri hanaihanai e mailaiamu hebogahisina ba naria. ²²E daradaramu taudia ba bogadia-hisi. ²³A haida ba hamauridia lahi amo ba veridia-oho. Haida ba bogadahisi mai garimui ida. Tauani mirona dabuana danu ba inai henia. ²⁴Harihari be mai siahuna emui keto amo baine gimamui bona baine haginimui vairana hairaina asi bebegabegamui bona mai moalemui bada ida, ²⁵eda Hahemaui Dirava tamona eda Lohiabada Iesu Keriso bagunai: hairai, dagi, goada, bona siahu, na ia ena matamana neganai, ina harihari ela bona hanaihanai, Amen.

Revelation

1 ¹Iesu Keriso iha-hedinaraina herevana, Dirava ese e henia asi vanahana bae vara gaudia na ena hesiai taudia baine hamaorolaidia. Bena ena aneru e siaia ena hesiai tauna Ioane e haheitalaia. ²Ioane ese Dirava ena hereva bona Iesu Keriso ena hereva bona e ita gaudia iboudia ai e gwaurai hedinarai. ³Ini peroveta herevadia baine duahi tauna baine namo, bona bae kamoni taudia danu bae namo bona ina buka ai e tore herevadia bae badina taudia danu bae namo badina be ini gau iboudia ai be varamu negana vada eme kahikahi. ⁴Lau Ioane, ekalesia oreadia hituosi Asia ai: Harihari bada bona maino bavabi e nohomu, e nohova, bona baine noho, bona ena terona vairana ai e ginimu laumadia hahituosi edia amo, ⁵bona Iesu Keriso ena amo, ia na gwau maoro tauna namona, bona tore-isi lou roboana mase amo, bona tanobada pavapava dia biagudia. E ura henidamu eda karadika na rarana amo e huri oho tauna. ⁶Ia ese basileia ta e karaia ena hahelaga tauda ai e halaoda Dirava bona Tamada ena hairai bona siahu bae mia ela bona hanaihanai. Amen. ⁷A itaia, ia na ori amo be maimu, mata iboudiai ese bae itaia e gwadaia taudia danu bae itaia. Tanobada bese iboudiai ese ia dainai bae tai. Momokani, Amen. ⁸Lohiabada Dirava na e tomamu (e gwaumu) "Lau na Matamana bona Dokona," Ia na e nohomu, e nohova, bona do baine noho, siahu idoinai Diravana. ⁹Lau, Ioane umui tadikakamui hisi-ani ai bona basileia ai bona haheauka ai, Iesu bagunai, motumotu ta ladana Patimo ai na nohova, Dirava ena hereva bona Iesu ena hereva e gwaurai hedinarai daidiai. ¹⁰Bena Lohiabada ena dina ai Lauma ese e rohegu bona murigu ai gado badana ta, kibi regena na heto, na kamoni, ¹¹eto, ini ome ita gaudia na buka ai ba tore ekalesia oreadia hituosi dekedea basiai lao, ekalesia dia bini. Efeso, Semurana, Peregamo, Tuatira, Filadelfia, Laodikea. ¹²Bena na gini kerehai, e hereva henigu tauna baina itaia nato. Bena gold lamepadia hahitu na ita, ¹³lamepa bogaragidiai ta e gini, e kara taunimanima natuna na heto, ena dabua na lata, ela bona aena, kemena na gold torana e gegea. ¹⁴Kwarana bona huina na kuroka-kuroka, mamoe huina na heto, eiava snow na heto. Matana na lahi na heto. ¹⁵Aena na auri labora-labora e kimore-kimore na heto, lahi ai e

havevea gauna negana ai gadona na sinavai momo regedia na heto.¹⁶Imana idibana ai hisiu hitu e abi. Dare ta kahana-kahana mai ganodia gauna, uduna amo e lasi. Vairana na dina e tara na heto.¹⁷Ia na itaia, bena aena badinai na goru diho e kara na mase na heto. A ia ese imana idibana taugu ai e dau kau, eto,"Asio gari. Launa matamana bona dokona,¹⁸bona mauri tauna lau, na mase, to a itaia, na maurimu bona baina mauri hanaihanai! Mase key na bona mase taudia edia gabu key na na imagu ai.¹⁹Una dainai, ome ita gaudia ba tore, bona e maimu gaudia bona do bae vara gaudia bini. ²⁰Hisiu hitu imagu idibana ai o itamu, bona gold lamepadia: Hisiu hituosi na ekalesia hituosi edia aneru, bona lamepa hituosi na ekalesia oreadia hituosi.

2

¹Ekalesia oreana Epeso ai ena aneru ini ba tore henia toma: Hisiu hituosi imana idibana ai e dogo taomu bona gold lamepadia auhituosi, bogaradi ai e loa tauna ena hereva bini: ²"Mai dibagu emu gaukara bona emu hededegwa bona emu haheauka, bona karadika taudia o dadaraidiamu. ³Dibagu oi na o haheaukamu, o hisihisimu badina lau ladagu dainai bona so hesikumumu. ⁴To inana na lodulai henimumu emu lalokau gunana vada o rakatania. ⁵Ba laloa vada o morutania gabunai. Ba helalokerehai emu gaukara gunadia ma ba kara. Bema lasi, lau na baina vasi bona emu lamepa gabuna amo baina abia oho - bema oi basio helalokerehaimu neganai. ⁶A emu sina bina: Nikolaita taudia edia gaukara o inai henimu, lau ese danu na inai-amu. ⁷Mai taiana tauna ese Lauma ena hereva ekalesia oreana ediai baine kamoni. Kwalimu tauna lau ese maoro baine henia mauri auna amo huahua na baine ania, Dirava ena paradaiso lalonai. ⁸Ekalesia oreana Semurana ai ena aneru ini ba torea henia toma: Gini-gunana bona gini-gabena, e mase bona ma e mauri lou, tauna ena hereva bini: ⁹"Mai dibagu emu hisihisi bona emu ogogami (A oi na taga taumu), bona ere dika taudia sibodia Iuda taudiai e hahelaomu, to idia na lasi. A, idia na Satani ena dubu taudia. ¹⁰Bavabi hisidia na garidia basio gari. Aitaia! Diabolo na e hegaegaemu umui haida dibura rumanai baine kouwui bona baine dibaganimui, bona ba hisihisi dina gwauta. Ba heabadadama ela bona mase, bona mauri ena kwara-havava baina henimu. ¹¹Mai taiana tauna ese Lauma ena hereva ekalesia oreana ediai baine kamoni. Kwalimu tauna na mase iharuana ese basine hadikaia. ¹²Ekalesia oreana Peregamo ai ena aneru ini ba tore henia toma: Dare kahana kahana e abia tauna ena hereva bini: ¹³"Emu noho gabuna na dibagu, ena terona na eneseniai. Dounu oi ese lau ladagu ba hekamo tarika-tarika bona o abidadama henigumu, egu hereva e gwaurai hedinaraiwa mai momokanina tauna, Antipa bogaragimui ai, e alaia mase, Satani ena noho gabunai. ¹⁴A gau ta ta na lodulai henimumu: bogaragimui ai haida ese Balaam ena hahediba herevadia e badinamu, una tau ese Balak e hadibaia bona hekwakwanai gauna ta Isaraela taudia, edia dala ai etoa bona idia ese kaivakuku iboulaina vamudia e aniva bona e heuda hanaiva. ¹⁵Haida danu dekemui ai ese Nikolaita taudia edia hahediba herevadia eabi dae. ¹⁶A helalokerehai! bema lasi, baina vasi haraga dekemui, udugu darena amo baina tuari henidia. ¹⁷Mai taiana tauna ese Lauma ena hereva ekalesia oreana ediai baine kamoni. Kwalimu tauna na mana e hunia gauna, baina henia bona nadi kurokurona ta baina henia una nadi ai lada matamatana ta e hetore, ta asi dibana herevana a iabina tauna sibona mai dibana. ¹⁸Ekalesia oreana Tuatira ai ena aneru ini ba tore henia toma: Dirava Natuna, matana na lahi hururu-huruna na heto bona aena na auri labora-labora e kimore-kimoremu na heto, ena hereva bini: ¹⁹Mai dibagu emu gaukara, emu lalokau, emu abidadama, emu heduru bona emu haheauka. Emu kara gabe dia ese emu kara gunadia danu e hereamu. ²⁰To inana na lodulai henimumu: Asio gwaua tubumu hahinena Iesabel, sibona peroveta hahinena ai e hahelaomu. Egu hesiai taudia e hadibadia kereremu bona e hakaudia kereremu bona kaivakuku iboulaidia vamudia e animu bona e heuda hanaimu. ²¹Lau na ena nega vada na heni baine helalokerehai, a ena lebulebu karadia irakatanidia seuramu. ²²Aitaia! Lau ese gorere patana ta ai baina tahoa kau, bona ia idia e heuda hanaimu taudia basie helalokerehai negana ai idia danu baina hahisihisidia bada. ²³Lau ese natuna danu baina aladia mase, bona ekalesia oreadia iboudiai na bae diba lau na taunimanima edia lalohadai bona lalodia (kudoudia) na tahumu, bona umui danu ta ta davamui baine henimui ta ta ena kara, ena kara hegeregedia ai. ²⁴A umui hahidaosi Tuatira ai unu hahediba herevadia asio abidae, bona Satani ena dobu gabudia asi dibamui taumui - emu ai na tomu, 'Lau ese maduna idauna ta pagamui ai basina atoa kau.' ²⁵A vada oabia gauna ba kahua tao tarika-tarika ela bona lau baina vasi. ²⁶Kwalimu tauna egu kara baine badina ela bona dokona tauna na siahu baina henia. Ia ese tanobada besena baine lohiadia, ²⁷auri itotohina amo baine regudia. Uro e huari kohikohimu na heto ia ese baine huaridia. Lau danu siahu unuhetomana Tamagu ena amo vada na abia. ²⁸Bona hisiu bada danu baina henia. ²⁹Mai taiana tauna ese Lauma ena hereva ekalesia oreadia ediai baine kamonaia.

3

¹Ekalesia oreana Sadi ai ena aneru ini ba tore henia toma: Dirava ena lauma hituosi e abimu tauna ena hereva bini: Emu kara na dibagu. E herevalaimumu o maurimu e tomamu, to vada o mase. ²Ba noga bona mia gaudia bona be masemu gaudia, ba regu namonamo badina be emu kara maoro-maorona ta Dirava vairanai asina davaria. ³Ba laloa tao, dahaka oabi dae bona o kamoni. Ba badina, bona bahelalokerehai. A bema basio noga (gima), lau na bavasimu henao tauna na heto, bona egu vasi horana danu basio dibamu. ⁴A tata ese eneseni ai (Sadi ai) edia dabua asie hamiro taudia, na lau ida baia raka hebou, dabua kurokurona bae hahedokilai, badina idia na nanamo. ⁵Kwalimu tauna ese dabua kurokurona baine hahedokilaia, bona lau ese ladana basina rohoa Mauri Bukana amo, bona ia ladana baina gwauraia Tamagu vairanai, bona ena aneru vairadi ai. ⁶Mai taiana tauna ese Lauma ena hereva ekalesia oreana ediai baine kamonaia. ⁷Ekalesia oreana Filadelfia ai ena aneru ini ba tore henia toma: Helaga, hereva momokani tauna, Davida ena key e abimu tauna, e kehoamu bona ta ese basine kouamu tauna, bona baine koua bona ta ese basine kehoa, ena hereva bina: ⁸Mai

dibagu emu gaukara. Aitaia, iduara ta vada vairamu ai na kehoa tau ta ese basine koua diba. Badina emu goada na dia bada, to egu hereva vada o badina bona ladagu so gorea.⁹Aitaia! lau ese Diabolo ena dubu taudia sibodia Iuda taudia ai e hahelaomu to idia na lasi, idia na koikoi taudia - baina tuidia baema bona bae goru diho oi aemu badinai, bona bae diba lau ese na lalokau henimumu.¹⁰Egu haheauka herevana vada o badinaia dainai tanobada idoinai baina dibaia bona tanobada taudia baina dibadia negana ai na oi baina hamaurimu.¹¹Lau na bavasi haragamu. Vada oabia gauna ba dogoa tao tarika-tarika bena tau ta ese havava (crown) emu amo basine dadia.¹²Kwalimu tauna na egu Drava ena dubu duna ai baina halaoa. Unu amo ia na basine raka lasi lou, bona eguDirava ladana na ienai baina torea, egu Dirava ena hanua ladana danu (Ierusalemata matamatana guba amo, egu Dirava ena amo, e dihomu), bona ladagu matamatana.¹³Mai taiana tauna ese Lauma ena hereva ekalesia oreana ediai baine kamona.¹⁴Ekalesia oreana Laodikea ai ena aneru ini ba tore henia toma: Hereva momokani tauna, dibana tauna bona mai momokanina ida Dirava ese e kara gaudia roboana, ena hereva bini:¹⁵Mai dibagu emu gaukara, bona oi na dia keru eiava dia siahu! Na lalomu boma keru eiava boma siahu bema namo.¹⁶Una dainai, oi na maivalo (Lukewarm), dia siahu bona dia keru, lau na udugu amo oi baina lorimu lasi.¹⁷Badina be oi na o tomamu, lau na taga taugu, mai egu kohu momo, bona lau na gau ta ai asina dabumu.' A asi dibamai oi na dika rohoroho, ihareha, ogogoami, kepulu bona gagaemu mo.¹⁸Lau ese na haduamumu egu ai gold ba hoi lahi ese vada e hagoevaia gauna bena taga taumu ai baola, bona dabua kurokurona danu ba hoia bona ba hahedokilaia bena basio hemarai asi ramimu dainai, bona mata muramurana danu ba hoia, ba dahulai bena gau ba ita.¹⁹Lau na sisiba henidia bona na dadabadiamu taudia na ura heniadiamu. Una dainai lalomu ba siahua bona ha helalokerehai.²⁰A itaia, lau na iduara badinai na ginimu na pidipidimu. Eregu baine kamona bona iduara baine kehoa tauna enai baina raka vareai, ia ida baina aniani hebou.²¹Kwalimu tauna na baina abia dae, lau ida egu terona ai, baia helai hebou lau hegeregeregu na kwalimu bena Tamagu ida ena terona ai a helai hebou.²²Mai taiana tauna ese Lauma ena hereva ekalesia oreana ediai baine kamona.

4¹Ini gau muridiai na roha lao guba ai iduara ta e hekeho na itaia bona ere na kamona guna gauna, kibi regena na heto, ese e hereva henigu eto, A dae aoma gabe ai bae vara gaudia baina haheitalaimu.²Lauma ese e rohegu, bena guba ai terona ta na itaia bona ta latanai e helai kau.³E helai kau tauna ita-itana na iaspi bona sadio nadi dia na heheto bona kevau ese terona e gegea dae, ita-itana samarago nadina na heto.⁴Terona rau-hui hani ese terona badana e laia hegege bona heitatao taudia rua-hui hani unu terona latadia ai e helai kwaradia na mai havava gaudia gold gaudia.⁵Terona amo kevaru bona ere guba rahu-rahua e lasi bona terona vairana ai lamepa auhita e ara mai hururu-hururu dia, Dirava ena Lauma hahituosi gaudia bunu.⁶Bona terona vairanai danu davara hevarivari na heto e mia. Bona terona lalonai bona hegegenai mauri gaudia hani mimia, vairadia kahadia ai, bona muridia kahadia ai matadia na momo.⁷Mauri gauna gini-gunana na leona na heto, iha-ruana na boromakau natuna ta na heto, iha-toina vairana na ta taunimanima vairana na heto, iha-hanina na ugava e rohomu na heto.⁸Idia haniosi hanidia na tauratoi amo, murimuridia ai bona lalodia ai matadia na momo. Idia na dina hanuaboi lagadia asie animu, e herevamu e tomu, Helaga, Helaga, Helaga Lohiabada Siahu idoinai Diravana E nohova, e nohomu bona baine noho.⁹Bena hari mauri gaudia ese Mauri Hanaihanai Diravana terona ai e helaimu na e imodaiamu bona e heatolaiamu bona e hanamoamu negadia ai,¹⁰ heita tao taudia rua-hui haniosi ese terona ai e helaimu Diravana vairana ai e goru dihomu Mauri Hanaihanai Diravana e toma diho heniamu edia havava gaudia na terona vairanai e nege dobimu e tomu.¹¹Emai Lohiabada emai Dirava e namona binai. Hairai bona hemataurai bona siahu bavabi. Badina be oi ese gau iboudiai o havara. Emu ura dainai o kara dia bona e miamu.

5¹Bena na itaia terona ai e helai tauna imana idibana ai be buka ta lalonai bona murimuri kahana ai danu revareva e hetore bukana e hekou kunuka-kunuka ikouna toadia na hitu.²Bena aneru goadana ta na itaia e hereva badabada eto, Daika na hegeregere ina buka baine kehoa bona ikoudia toadia baina hamotu.³A guba ai bona tanobada ai bona tanobada henunai ta asi goadana buka baine kehoa bona lalona baine itaia.⁴Bena na tai dikadika badina be ta asi goadana buka baine kehoa bona lalona baine itaia.⁵Bena heitato tauna ta ese e hereva henigu eto, asio tai Iuda iduhuna ena Leona Davida ramuna vada e kwalimu ia ese buka baine kehoa bona ikouna toadia hituosi baine hamotu.⁶Bena terona bona mauri gaudia haniosi padadia ai heitatao taudia bogaragidiai Mamoe Natuna ginina ai na itaia e kara vada e alaia mase na heto. Doana na hitu matana danu hitu Dirava ena Lauma hituosi tanobada hegegemaia e saidia lao gaudia bunu.⁷Ia na ema terona ai e helai Tamana idibana amo buka eabia.⁸Buka eabia bena mauri gaudia haniosi bona heitatao taudia ruahui-haniosi na Mamoe Natuna vairanai e goru diho. Idia ta ta mai edia gitara bona mai edia gold urodia, unu uro be e gabumu bena bonadia e daemu muramuradia ai e honuhonu dae helaga taudia edia guriguri bunu.⁹Bena ane matamatana eabia eto:Oina hegeregere buka bavabiabona ikouna toadia ba hamotu.Badina be e alamu mase,bona raramu danu taunimanima o hoilaidia,Dirava ena iduhu iboudiai, gado iboudiai, hanua iboudiai, bese iboudiai amo;¹⁰Pavapava bona hahelaga taudia ai o halaodiaEda Dirava vairana aiBona tanobada ai bae lohia.¹¹Bena na roha lao bona aneru hutuma gadodia na kamona idia ese terona bona mauri gaudia haniosi bona heitatao taudia e ginidia hegege daha, daha, gerebu, gerebu.¹²Idia na e lolo badabada eto, "Mamoe Natuna e alaia mase ia hari namo siahu bona taga bona goada bona hemataurai bona hairai bona hahenamo baine abi.¹³Bena e kara gaudia iboudiai guba ai bona tanobada bona tanobada henunai bona davara ai bona lalodia gaudia iboudiai eredia na kamona eto, "Terona ai e helaimu Diravana bona Mamoe Natuna na hahenamo bona hemataurai bona hairai bona siahu bae abi hari ela bona hanaihanai.¹⁴Bena mauri gaudia haniosi eto, 'Amen' Bona heitatao taudia e goru diho e toma henia diho.

¹Bena aneru iha imana ena kobi vada e hiriria, bona lau ese hisiu ta na itaia guba amo vada e moru tanobada ai. Hisiu be dobu masemase gurina kina vada e henia. ²Ia ese dobu masemase gurina vada e kehoa, bona guri amo kwalahu e dae e karamu amu badadia kwalahudia na heto. Guri amo e lasiva kwalahuna ese dina bona guba vada e havaburadia. ³Bena kwalahu lalona amo kwadi vada e lasi tanobada latanai, bona siahua e henidia tanobada doadoadia e henidia siahudia na tanobada siahudia na heto. ⁴Idia vada e hamaorodia, tanobada avadia eiava tanobada ai e tubumu gaudia eiava audia na basie e hadika, a Dirava toana bagudiai lasi taudia toadia mo. ⁵Idia na se hamaorodia unu taunimanima bae aladia, a hua ima mo bae hahisihisidia. Edia hisihisi na doadoa ese taunimanima e koridiamu hisidia na heto. ⁶Unu dinadia ai taunimanima ese mase bae tahua, a basie davaria. Idia bae ura dikadika bae mase, a mase edia amo baine heau-oho. ⁷Kwadi oromadia be tuari hosidia na heheto. Kwaradai be e karamu golo korona dia na heheto, bona vairadia be taunimanima vairadia na heheto. ⁸Idia huidia be hahine huidia na heheto, bona isedia na leona isedia na heheto; ⁹idia kemedi be auri na heheto, bona hapedia regedia be kariota bona hosi momo tuari ai e heaumu regedia na heheto. ¹⁰Idia iudia be mai duridia, doadoa na heheto, bona iudia lalodia be taunimanima hua ima bae hahisihisidia siahudia eatodia. ¹¹Idia edia pavaapa be guri dobu masemasena aneruna. Ia ladana Heberu gadonai be Abaddon, bona Helena gadonai ia ladana be Apolio. ¹²Dika matamana vada e ore, Aitaia! Gabeamo dika rua na dounu be maimu. ¹³Bena aneru iha tauratoina ena kibi vada e hiriria. Bona gado ta na kamona Dirava vairanai e miamu golo patana doadia edia amo e maimu. ¹⁴Gado ese aneru iha tauratoina mai kibina ida, e hamaoroa eto, "Eufrate sinavaina badana ai e guidia anerudia haniosi ba ruhadia-nega." ¹⁵Bena aneru haniosi vada e hahegaegaedia una hora, una dina, una hua, una lagani, vada e ruhadia-nege badina taunimanima kahana toi do bae aladia. ¹⁶Tuari taudia hosi ai egui be gerebu sinahu-rua. Lau ese edia numera vada na kamonaia. ¹⁷Harihari be lau ese egu matahanai lalonai hosi bona latadai egui taudia ini na itadia toma, kemedi auridia be (lahi kakakakadia, vaiurivaiuri, sulfur laboralaboradia). Hosi kwaradia be leona kwaradia na heheto, bona ududia amo lahi, kwalahu bona sulfur e lasiva. ¹⁸Taunimanima kaha toiosi be ini hahedika toiosi: lahi, kwalahu bona sulfur idia ududia amo e lasi ese vada e aladia mase. ¹⁹Badina hosi edia siahua be ududiai bona iudiai - badina iudia na gaigai mai kwaradia na heheto bona unu amo idia ese taunimanima e haberodiava. ²⁰Taunimanima oredia iboudiai, ini hisihisi ese asie hamasedia, na do se helalokerehai edia ima-karakara gaudia amo, unu amo idia ese lauma dikadia bona kaivakuku itomadio henidia daladia amo, bona idia ese golo, siliva, bronze, nadi bona au - ini gau ese basie ita dibamu, basie kamonaimu dibamu, basie raka dibamu. ²¹Bona, idia na edia ala-ala amo, edia babalau amo, edia heudahanai amo, edia henaohenao karadia amo, do asie helalokerahai. Translation done by: Elder Peter English, on Monday (25/09/23), time: 8.09 am, ready for quality checking.

10 ¹Bena lau ese goadabada aneruna ta ma na itaia guba amo e diho e maiva. Ia be ori e hahedokilaia, kwarana daenai be kevaru ta. Ia vairana be dina na heto bona aena be lahi du-udia na heheto. ²Ia na buka maragina ta vada eabia, una be hekeho ia imanai. Ia aena idibana palapalana be davara latana ai eatoa bona aena laurina palapalana be tano latana ai eatoa. ³Bena ia vada gadona badana ai e lolo isi e karamu leona ta e gigiva na heto. Ia e lolo neganai ai, gubarahurahu hitu-osi sibodia gadodia amo e hereva lasi. ⁴Guba rahu-ruhu hitu-osi e hereva lasi neganai, lau nato baina toredia, a gado ta na kamonaia guba amo, e tomamu, "Guba rahu-ruhu hitu-osi edia hereva na ba hunidia. Basio torea diho." ⁵Bena lau ese na itaia ana aneruna davara ai bona tano ai e gini imana idibana vada eabia isi guba e dudui henia. ⁶Ia vada e gwauhamata noho-hanai Diravana, guba mai anina idoinai e karaia, tanobada mai anina idoinai, bona davara mai anina idoinai, e karadia ladanai, eto, "Nega halahena na lasi. ⁷A aneru ihahituna erena dinadai, ena kibi do baine hiriria neganai, Dirava ena hereva hehunina do bae momokani, ena hesiai peroveta taudia sivarai namo e hamorolaidia hegeregereha. ⁸Bena gado guba amo na kamonaia ese vada e hereva henigu bona e hamaorogu, eto, "Aola, davara ai bona tano ai e ginimu aneruna imana amo buka hekehona na bavabia." ⁹Bena aneru deken vada nala bona na hamaoroa buka maragina na baine henigu. Ia eto, "Avabia bona avania. Bogamu na be haiditaiamu, a udumu ai be bada-ranuna digarana na heto." ¹⁰Bena buka maragina aneru imana amo vada na abia bona na ania. Udugu ai digarana be bada-ranuna na heto. Vada na ania murina ai, lau bogagu vada e idita. ¹¹Bena taunimanima ta ese e hamaorogu, e tomava, "Oi na taunimanima momo, bese momo, gado momo, bona pavaapa momo daidai ba peroveta lou." Translation done by: Elder Peter English, on Monday (25/09/23), time: 8.09 am, ready for quality checking.

11 ¹Bena sirihio ta vada e henigu baina gaukaralaia hahetoe auna na heto. Vada e hamaorogu, eto, "Atore-isi bona Dirava ena dubu bona pata helagana, ba hahetoadia bona lalonai e tomadihomu taudia ba hahetoadia. ²A dubu murimurina na basio hahetoeaia, badina ina na Bese idaudia taudia vada e henidia. Idia ese hanua helagana na hua hariahui-rua do bae moimolaia. ³Bona lau ese egu hereva igwauraina taudia raruosi siahua baina henidia, bona idia edia puse dabuadia e hahedokilaidia amo dina daha-ta sinahu-rua tauratoi-ahui do bae peroveta." ⁴Ini na olive audia rua bona lamepa rua e atodia kaumu tanobada lohiana vairanai e ginimu. ⁵Bema ta ese ihadikadia urana baine ura, lahi ududia amo bae lasi bona e inai henidiamu taudia do bae hamasedia. Bena ta e uramu baine hadikadia, ia na ini do baine mase toma. ⁶Idia na mai edia maoro guba bae koua unu amo medu na basine diho idia edia peroveta dinadia ai. Idia na mai edia siahua ranu bae girodia rara ai baela bona tanobada ai dika gaudia idau bae havara edia ura negadai. ⁷Edia gwaurai lasi herevadia (haroro) vada bae guguru neganai, dagedage manuna guri dobu masemasena amo e daemu ese baine tuari henidia. Ia ese baine tuari henidia bona baine hadareredia bona baine aladia mase. ⁸Idia tauanidia badina na hanua

badana dalana ai bae mia (anina na Sodoma bona Aikupito toadia) unuseni ai danu edia Lohiabada vada e hasatauroa.⁹Badina dina toi mai dina kahana taunimanima haida taunimanima idauidau amo, iduhu idauidau amo, gado idauidau amo, bese idauidau amo ese tauanidia do bae itadia, bona gara ai iguridia do bae laodia-ahu.¹⁰Bona tanobada ai e nohomu taudia ese bae moale laidia bona bae hisidae. Idia ese harihari gaudia ta ta bae siai henidia badina be ini peroveta taudia raruosi ese tanobada ai e nohova e hahisihisidiava.¹¹A dina toi mai dina kahana ai Dirava ena mauri hodahodana ediai do baine vareai, bona idia na aedia ai do bae ginitore, bona bae itadia taudia na gari badaherea ese bae butudia tao.¹²Bena idia ese gado badana ta guba amo e kamoni e hamaorodia, eto, "Ini a dae mai!" bena idia na ori amo bae dae guba lalonai, inaidia taudia ese e itadiava lalonai.¹³Una hora lalonai tano-laga (heude-heude) badana ta baine vara, bona hanua badadia gwauta-osi amo kaha-ta na baine kohu. Taunimanima daha hitu tano laga (heude-heude) ese baine aladia, bona bae mauri taudia na do bae gari dikadika bona guba Diravana do bae heatolaia.¹⁴Dikadika iharuana vada eore. Aitaia! dikadika ihatoia na emai haragamu.¹⁵Bena aneru ihahituna ese ena kibi vada e hiriria, bona gado badadia guba amo e hereva, eto, "Tanobada basileiana na vada eda Lohiabada bona ena Keriso ena basileia ai vada eme lao bona ia na do baine lohia ela hanai hanai."¹⁶Bena taunimanima badadia ruahui-hani Dirava vairanai edia terona ai e helaimu taudia, vada e goru-diho bona Dirava e tomadiho henia.¹⁷Idia vada eto, "Emai tanikiu a henimumu, Lohiabada siahu bada Diravana, o nohomu, o nohova, badina be oi ese emu siahu bada hereana vada oabia bona vada o lohiamu."¹⁸Bese idau-idau taudia vada e badu, a oi emu badu na vada e kau, bona mase taudia ihahemaoro henidia negana, bona emu hesiai taudia, peroveta bona helaga taudia, davadia ihenidia, bona unu oi ladamu garina e garimu taudia, maragidia bona badadia, bona tanobada e hadikaiaumu taudia ba hadikadia negadia vada eme kau."¹⁹Bena Dirava ena Dubu Helagana gubai vada e kehoa bona Lohiabada ena taravatu mauana helagana Dubu Helagana lalonai vada e hedinarai. Kevaru diarina, rege bona guba rahu-rahu, tano lagana ta bona guba nadidia lagana ta vada e hekara.
Translation done by: Mr. Peter Vai English on Friday (06/10/23), time: 3.44 pm, ready for quality checking.

12 ¹Bena hoa gauna badana guba ai e hedinarai a hahine ta ena dabua na dina, bona hua na aena henudiai, bona hisiu gwauta rua ai e gegea. ²Ia na e rogorogo, bona ia na e hekamoni hisina dainai e tai lolo bona e hedegewa baine mara.³Bena toa ta ma e hedinarai guba lalonai, aitaia, huala badana kakakakana kwarana na hitu bona doana na gwauta, bona kwarana havava gaudia na hitu kwaradia.⁴Bena iuna ese guba hisiudia e daro dobi. Hari huala na baine mara hahinena vairanai e gini, una ia baine mara merona na ia ese baina ania eto.⁵Bena hahine na e mara mero eabia maruane, ia ese bese logora iboudiai auri itohona amo baine regudia. Natuna na e kitoa dae Dirava vairanai bona ena terona vairanai.⁶Bena hahine na tano gagaena e heau lao, Dirava ese e hahegaegae laia gabuna ai e noho unuseni ai ia ese dina daha ta sinahu rua tauratoi ahui bae ubua.⁷Hari guba ai tuari e vara, Mikael bona ena aneru ida ese huala e tuari henia, bona huala bona ena aneru ida e tuari lou, ⁸to ia na se goada e darere, bona edia gabu asie davaria lou guba ai.⁹Bena hari huala badana idau negai e tahoa dobi gaigaina, ma ladana ta Satani, tanobada idoinai e koiamu gauna na e doria lasi bona e tahoa dobi tanobada ai, bona ena aneru danu ia ida e tahodia dobi,¹⁰bena na kamoni gado badana ta guba ai e hereva eto, "Hari iseda Dirava ena hahemaori bona siahu bona ena basileia bona Keriso ena siahu vada eme ginidae badina be Dirava vairanai varavarada e hahebadelaidia boi e hahebadelaidia rani, tauna na vada e tahoa dobi,¹¹idia na mamoe natuna rarana dainai bona e gwaurai hedinarai herevadia daidiai, vada e hadarerea edia mauri asie lalokau henia ela bona mase.¹²Una dainai guba e, bona guba ai o nohomu taumui e! idia daidiai ba moale a tanobada bona davara madi ihabaimui, badina be diabololo vada e lasi! ia na badu ese e hahonuhonua dae badina be ia dibana ena nega eme kwadogi.¹³Hari haida ese e itaia, ia na tanobada ai vada e tahoa dobi, bona ia ese maro eabia hahinena e dagedage henia.¹⁴A hahine na Ugava hanina ruaosi e henia, bona ia ese huadia e rohotania tano gagaena e roho lao ena gabu korikori ela, lagani ta bona lagani rua bona lagani kahana-gaigai vairana amo baine daudau herea.¹⁵Bena gaigai na uduna amo ranu e loria lasi sinavai na heto hahine murina ai, abata ese ia baine arua isi eto.¹⁶A tanobada ese hahine e durua. Tanobada uduna eha hagaia bona huala ese e loria lasi sinavaina ma e hadonoa.¹⁷Bena huala ese hahine e badu henia bona ela hahine natuna oreadia eha tuari henidia, daidia Dirava ena hahegani bona Iesu ena hahedua herevadia e badinamu taudia bunu.¹⁸Bena ia na kone murinai e gini.RDK. LOHIA KOHU ESE E HAGUGURUA, THURSDAY (11/07/24), 6.00 PM.

13 ¹Bena dagedage gauna ta na itaia davara amo e lasi, doana na gwauta bona kwarana na hitu. Doana doridia ai be havava gaudia gwauta, bona kwarana ta ta ai hahedika ladana.²Hari dagedage gauna na itaia ita itana na taiga na heto, aena be bea na heto, bona uduna na leona na heto. Bena huala ese ena goada, bona ena terona, bona ena heregu siahuna badana na e henia.³Dagedage gauna kwarana ta e hedinarai e kara vada e haberoa dikadika, mase berona na heto, to berona vada e namo. Bena tanobada taudia na una dagedage gauna murinai e raka.⁴Idia danu una huala e toma henia diho, badina be ena siahu dagedage gauna vada e henia. Idia ese una dagedage gauna, danu e toma henia diho bona eto, "Daika be ina dagedage gauna heida-idana?" bona "Daika ese baine tuari henia?"⁵Udu ta danu unu dagedage gauna e henia hekokoroku bona Dirava hadikana, herevadia e gwaurai lalodika bona siahu danu e henia hua hari-ahui baine lohia.⁶Bena ta uduna e hagaia Dirava ere dika henia, Dirava ladana, ia e noho gabuna, bona guba ai e nohomu taudia na e hadikadia.⁷Dagedage gauna na maoro e henia helaga taudia baine tuari henidia bona baine hadareredia. Bona siahu danu e henia iduhu iboudiai, taunimanima iboudiai, gado iboudiai, bona bese iboudiai baine lohia.⁸Tanobada ai e nohomu taudia iboudiai ese bae tomadiho henia, ladadia asie tore taudia ibouboudiai, tanobada e karaia negana ai, ena Mauri Bukana lalonai, Mamoe Natuna ena, daika be e alaia mase.⁹Bema mai taiana tauna, ia na baine

kamonai. ¹⁰Bema ta baine abia mauri, ia na vada bainela. Bema ta dare matana, amo baine alaia mase, vada bae alaia mase. Ini na helaga taudia bae haheauka bona bae abidadama. ¹¹Bena dagedage gauna ta na itaia tano lalona amo e dae. Doana na rua mamoe na heto, bona erena na huala erena na heto. ¹²A ia ese dagedage gauna ginigunana ena siahu idoinai e gaukaralaia ia vairanai, bona tano mai inoholaina taudia iboudiai e haganidia dagedage gauna ginigunana hari ena mase berona e namo gauna bae toma diho henia. ¹³A hoa karadia badadia danu e kara, ta be lahi guba amo e hadihoia taunimanima vairadiai. ¹⁴A unu hoa karadia dagedage gauna vairanai, e kara siahuna amo ia ese tanobada taudia e koidia. Tanobada ai e noho taudia na e hamaorodia dagedage gauna mai dare, berona to e mauri gauna laulauna ba karaia eto. ¹⁵A ia na mai siahuna una dagedage gauna laulauna baine hamauria, unu amo una dagedage gauna laulauna na baine hereva. Bona mai siahuna danu una laulau basie toma diho henia taudia baine aladia mase. ¹⁶Bena taunimanima iboudiai, e hereva henidia auka herea. Kikina bona badana, taga taudia bona ogogami taudia, ura kwalimu taudia bona e guidia taudia, na toa ta e henidia imadia idibana ai eiava bagudia ai e kara. ¹⁷Una dainai, ta basine hoihoi diba hari toa-dagedage gauna ladana, eiava numerana eabi tauna mo sibona. ¹⁸Ini seniai aonegana bina: lalona e pararamu, tauna ese ina dagedage gauna numerana baine hagaua badina be ina tau ta numerana bona numerana na 666.RDK. LOHIA KOHU ESE E HAGUGURUA

14 ¹Mamoe natuna na itaia, Siona Ororonai e gini. Ia ida taunimanima domaga ta gerebu-dahahani, ia bona Tamana ladadia ai e tore taudia. ²Bona gado ta na kamoni guba amo ema sinavai regedia na heto bona guba e rahu dagumu na heto. Una gado danu gitara taudia edia girara e hatimu na heto. ³Idia na ane matamatadia e abiva terona bona mauri gaudia haniosi bona heitatao taudia vairadiai. Una ane na tau ta basine davarua diba hari taunimanima domaga ta gerehu hani daha hani, tanobada amo e hoidia taudia sibodia. ⁴Idia na hahine ida asie enobou taudia, vada helaga. Idia ese mamoe Natuna murinai e rakamu ena loa iboudiai. Taunimanima padadia amo e hoidia Dirava bona Mamoe natuna anina roboana ai baela taudia bunu. ⁵Koiko herevana ta idia ududia amo asie lasi, idia na asi bebeke-bebeke dia. ⁶Bena aneru ta na itaia guba padanai e roho, mia hanaihanai sivarina namona na tanobada ai e nohomu taudia ediai e laohai - bese, iduhu, gado bona tanobada iboudiai e harorolai henidia. ⁷E hereva badabada eto, Dirava garina ba gari, ia mo ba imodaia badina be ena hahemaoro negana vada be gini daemu. Guba, tanobada, davarua bona ranu e lohiloimu gabudia e kara Diravana ba toma henia diho. ⁸Aneru iharuana ia murina amo e roho, eto Babulonia badina hanuadia iboudiai na ena heuda hanai baduna vine-ranuna ehe-inulaidia hanuana, vada e kohu. ⁹Ma aneru ihatoia, idia muridia amo e roho, e lolo eto, ta ese dagedage gauna mai laulauna ida baine toma henia diho bona ia toana bagunai eiava imanai baine abi. ¹⁰Ia ese Dirava ena badu vine-ranuna ena kehere lalonai vada e seia, ranu kavakava ida asie buloa gauna. ¹¹E animu hisidia kwalahuna e dae hanaihanaimu, bona dina hanuaboi lagadia asie animu, dagedage gauna mai laulauna ida e toma henia dihomu bona lalona toana e abiamu taudia ahudia bunu. ¹²Helaga taudia, Dirava ena hahegani e badinamu bona Iesu e abidadama heniamu taudia, do bae haheauka. ¹³Bena gado ta na kamoni, guba amo ema, eto, Ini ba torea toma, Lohiabada enai e masemu taudia be nanamo. Ma lauma eto, oibe, edia gaukara amo bae laga-ani badina be edia kara ese e gwauraidiamu. ¹⁴Bena na roha lao, ori kurokuro ta na itaia, ori latanai ta helai, ita ita na taunimanima natuna na heto, kwarana ai na gold havava gauna, bona imana ai ilapa ta mai ganona. ¹⁵Bena aneru ta Dubu helaga amo e raka lasi, ori latanai e helai tauna e lolo henia, eto, emu ilapa aine gaukara, a lapalapa badina be uit iutuna negana vada eme kau, tanobada uitina vada e lo vaitani. ¹⁶Ori latanai e helai tauna ese ena ilapa e gaukaralaia, tanobada uitina e lapaia vaitani. ¹⁷Bena aneru ta ma guba dubuna amo e raka lasi, ia danu imana ai na ilapa ta mai ganona. ¹⁸Aneru ta pata helagana amo e raka lasi aneru na mai lahi siahuna ema. Bona ia ese aneru imana mai ilapana e lolo henia, eto, emu ilapa baine gaukara, ba utu oho moimoi gabuna tanobada ena vine takodia ba utu, badina be vine huahuadia vada e mage. ¹⁹Aneru ese ena ilapa e gaukaralaia tanobadai, tanobada ena vine huahuadia e utu oho bona moimoi gabuna badana, Dirava ena badu be una, lalonai e taho udamu. ²⁰Moimoi gauna na hanua murimurinai, be e moia. Rarana moimoi gabuna amo e lasi e aru ela bona kilomita sinahu toi, ena dobu danu tano ela bona hosi uduna hegeregere. Translation done by: Mrs Konio Kila on Sunday 17th November, 2023, time: 1.31pm, ready for quality checking.

15 ¹Bena hoa gauna guba ai na itaia, aneru hitu ese eha-hisi gaudia oredia hituosi e abi, Dirava ena badu ihaguguruna gaudia bunu. ²Bona davarua na itaia, hevarivarina heto, mai lahina, dagedage gauna bona laulauna mai ladana mai numerana ida vada e hadareredia taudia danu na itaia dia, idia na una davarua hevarvarina na heto isenai e gini, Dirava ena gitara imadia ai e abi. ³Bena Dirava ena hesiai tauna, Mose, ena ane eabia, Mamoe natuna ena ane danu, eto Lohiabada Dirava e, siahu idoinai Diravana emu gaukara dahaka bada, hoa karadia uru iboudiai edia Pavapava e, emu kara na maoromaoro bona momo-mokani. ⁴Lohiabada e, daika oi garimu basine gari? Daika oi ladamu basine imodaia? Badina be oimo sibomu helaga. Bese iboudiai baema, bae toma hemimu diho. Badina be emu hahemaoro karadia vada eme hedinarai. ⁵Vada na itaia, igwaurai hedinaraina kalagana helagana e kehoa guba ai. ⁶Bena aneru hituosi, haheisi gaudia hituosi e abi anerudia na kalaga helagana amo e raka lasi, dabua aukadia goevagoevadia bona kurokakuroka dia eha-hedokilai, kemedi na gold. ⁷Mauri gaudia haniosi amo ta ese aneru hituosi gold kibodia auhitu e henidia, unu kibo na noho hanaihanai Diravana ena badu amo e honuhonu dae. ⁸Bena Dirava hairaina bona siahuna kwalahudia ese una dubu e hahonua bona tau ta dubu lalonai basine raka vareai diba ela bona aneru hahituosi ese edia haheisi gaudia hituosi bae ore. Translation done by: Mrs Konio Kila on Sunday 17th November, 2023, time: 1.50 pm, ready for quality checking.

¹Bena ere badana ta dubu helaga lalona amo na kamoni, aneru hahituosi e hamaorodia, eto, Aola, Dirava ena badu ai e honumu kibodia auhitsuosi na tanobada ai ba bubu dobi. ²Aneru gini gunana ela, ena kibo tanobada e bubua. Bena dagedage gauna eabia bona laulauna e toma henia diho taudia ediai toto badadia mai hisidia eha dudu. ³Aneru iharuana ena kibo davarai e bubua, mase tauna rarana hegeregere ena ela, bena davara lalonai e noho gaudia iboudiai vada e mase. ⁴Aneru ihatioina ena kibo na sinavai ai bona ranu ihlohi gabudiai e bubua, bena rara ai ela. ⁵Bena ranu ilohidia aneruna erena na kamoni, eto, Helaga Diravana e, onohova, onohomu. Ini ohahemaoro henidia tomamu na mamaoro. ⁶Badina be helaga taudia bona peroveta taudia raradia e bubudia bena rara ohenidiamu, bae inu, edia kara hegeregere ena. ⁷Ere ta ma pata helagana amo na kamoni eto, Lohiabada Dirava e siahu idoinai Diravana momokani, emu hahemaoro na momokani bona maoromaoro. ⁸Aneru ihahanina ena kibo na dina latanai e bubua, bena e hasiahua taunimanima baine aradia, lahi na heto. ⁹Bena siahu badana ese taunimanima e aradia, idia ese haheisi e biagudia Dirava na ladana e uduguiria asie helalokerehai bona asie heatolaia. ¹⁰Aneru iha-imana ena kibo na dagadage gauna ena terona latanai e bubua, bena ena basileia e hadiburaia, taunimanima maladia e kori, hisihisi dainai. ¹¹Bena Guba Diravana na e uduguiria edia hisihisi bona edia toto daidiai asie helalokerehai bona edia kara dika asie rakatani. ¹²Aneru ihatauratoina ena kibo na sinavai badana, ladana Eufate lalonai e bubua, ranuna e kororo, mairiveina kahana hanuadia pavapavadia edia dala e lailaia. ¹³Vada na ita, lauma dikadia tatoti, paroparo na heto, huala bona dagedage gauna uduna amo bona peroveta koikoi tauna uduna amo e lasi. ¹⁴Idia na lauma dika hereadia, hoa karadia e karamu bona tanobada idoinai hanua pavpavadia e lao henidiamu, eha goadadiamu, siahu idoinai Diravana ena dina badana tuarina dainai. ¹⁵A itaia, henao tauna na heto be vasimu, Hegima tauna, ena dabua e abi hegaegaemu, asi ramina baine loa ena hemarai baine hedinarai na garina, ia hari namo. ¹⁶Bena lauma dikadia ese e gogodia gabu ta ai, ladana Heberu Gadodiai be Aramagedono. ¹⁷Aneru ihahituna ena kibo na guba padanai e bubua, bena guba dubana teronana amo ere badana ta e lasi, eto, vada e ore. ¹⁸Kevaru, ere bona guba rahu e vara. Tano e laga bada, taunimanima tanobada e noho matama ai ema bona harihari tano na unu se laga toma. ¹⁹Bena hanua badana e parara, karoa toi, bese idau-idau edia hanua logora e hegigi dobi, bona Dirava ese Babulonia badana e laloa ena badu garagarana keherena e henia, ena badu vine-ranua baine inua ore. ²⁰Motumotu iboudiai e heau boio ororo na lasihidia. ²¹Medu hetaridia badadia, edia metau na pound sinahu ta mai dikoana, na guba amo e moru taunimanima latadiai. Bena taunimanima ese Dirava e uduguiria, medu-hetari hetari dainai, badina be ena haheisi na bada herea. Translation done by: Mrs Konio Kila on Sunday 17th November, 2023, time: 2.35 pm, ready for quality checking.

17 ¹Kibo auhitsuosi e abi kau anerudia ta dekegu ema, e hereva henigu eto aoma, ariara hahinena badana, ranu momo latadiai e helaimu hahinena, ihahemaoro henina baina haheitalaimu. ²Hanua pavapavadia na ia ida vada e heuda hanai, bona tanobada ai e nohomu taudia ese ena heuda hanai vine ranua vada e inua kekero. ³Bena ia ese lauma ai e laohaigu, tano gagaena ala, unuseni ai hahine ta na itaia, mauri gauna kakakakana ta latanai e helai kau. Una mauri gauna na Dirava ihadikana herevadia amo honu, ia kwarana na hitu bona doana na gwauta. ⁴Hahine na dabua kakakakadia bona mia kakadia eha-dokilai, gola, nadi hururuhurudia bona ageva mai hairadia e heralai. Imana na gold keberena ta, gau dika rohoroho dia bona ena heuda hanai amo e honu. ⁵Ia baguna ai lada ta e torea, anina e hehuni gauna ini e torea toma, Babulonia badana, ariara hahinedia bona tanobada ena kara mirodia idoidiai sinadia. ⁶Hahine na itaia, helaga taudia bona Iesu dainai e aladia mase taudia raradia e iunu kekero, na itaia neganai na hoa dika dika. ⁷Bena aneru ese e hereva henigu eto, dahaka ohoamu? Ina hanina sivaraina hehunina, mauri gauna, latanai e helai kaumu gauna, kwarana hitu sivaraina hehunina, mauri gauna, latanai e helai kaumu gauna, kwarana hitu doana gwauta gauna sivaraina hehunina aina hamaorolaimu. ⁸Hari mauri gauna o itaia be e nohova, to harihari iana lasihia, asi vanahana ia na guri dohu-mase mase amo do baine dae, mase gabuna bainela. Bena tanobada ai e nohomu tanobada na matamatana ai ladadia na mauri bukana lalonai se tore taudia ese hari mauri gauna e nohova, ma lasihia ma bainema gauna, bae itaia bona bae hoa. ⁹Aonega tauna na lalona baine parara. Hari kwara hituosi na ororo hitu hahinena latadiai e helaimu. ¹⁰Idia na pavapava hahitu, laima vada e keto. Ta be e nohomu, a ta be do sema, bainema neganai taina baine noho. ¹¹A hari mauri gauna, e nohova na ihataura hanina, gau tamona hahituosi ia danu ta bona ia danu mase gabuna bainela. ¹²A doa gwauta oi ita gaudia na pavapava gwauta, to edia basileia do asie abia. A hari mauri gauna ida pavapava siahuna do bae abia, hora tamona. ¹³Iboudiai lalodia na tamona, edia goada bona siahu hari mauri gauna ba henia etomamu. ¹⁴Idia ese mamoe natuna bae tuari henia to mamoe natuna na do baine kwalimu, badina be ia na Lohia edia lohia, Pavapava edia Pavapava bona e bamoamu taudia na ia ese e boiridia bona eabidia hidi, idia ese ia e abidadama heniamu. ¹⁵Ma e hamaorogu eto, o ita ranudia ariara hahine ese e helai heni ranudia, na tano ore, bese bona gado idau. ¹⁶Mauri gauna doana gwauta osi o ita gaudia ese ariara hahinena bae inai henia, kopi kavakava bona hidiona bae abia, lahi ai bae golea oho. ¹⁷Bona Dirava ese eha-uradia, ena lalohadai bae haguguru, bona lalodia bae tamona, edia basileia na mauri gauna bae henia ela bona Dirava ena hereva baine guguru. ¹⁸Hari oi itaia hahinena na hanua badana bona hanua pavapavadia e lohidiu hanuana. Translation done by: Mrs Konio Kila on Sunday 17th November, 2023, time: 3.10 pm, ready for quality checking.

¹Ini gau iboudiai muridiai aneru ta ma na itaia. Mai siahuna ida bona tanobada danu ia hairaina ese eha diaria. ²Bena e lolo badabada, eto, "Babulonia badana vada e kohu! Ia na lauma dikana ena noho gabunai vada ela, lauma dika-hereadia edia kohu ai vada ela, bona manu dikadia bona dagedage manu dia edia ruma ai vada ela. ³Badina bese iboudiai ese ena heuda-hanai baduna vine-ranuna vada e inua. Hanua hanua pavapavadia na ia ida vada e heuda-hanai. Hoihoi taudia ese ena lebulebu tagadia amo edia taga vada e habada. ⁴Bena ere ta ma na kamoni guba amo eto, "A raka lasi iena amo, egu taunimanima, ia idia ba kara dika hebou na garina, bona ia ena hisihisi ta basio davarida. ⁵Badina be ena dika vada e senua ela bona guba ai, bona Dirava ese ena kara havara e lalo taomu. ⁶E henia hegeregere na ai ba henia, bona davadia ba henia harua, ena kara daidiai; ena kapusi e buloa hegeregere na ia ana ba buloa harua. ⁷Sibona e heimodaiva bona e lebulebuva hegeregere na hisihisi bona tai ba henia. Badina be lalona e hadaia, eto, 'Lau na pavapava hahinena na heto; lau na dia vabu, bona lau na basina tai! ⁸Una dainai dina tamona ai ena hisihisi idau-idau baine kau; mase, taitai, bona doe. Lahi ese baine araia vaitani, badina be Lohiabada Dirava na goada, bona iena hahemaoro tauna. ⁹Bona hanua hanua pavapavadia ia ida e heuda hanaiva bona e lebulebu hebouva taudia bae tai bona bae tai lolo ia idouna kwalahuna bae itaia negana ai. ¹⁰Idia na dauhai bae gini, badina be ena hisihisi garina dainai, baeto, "Madi o, madi o Babulonia, hanua bada hereana, goada hanuana! Badina hora tamona ai vada eme hahemaoro henimu. ¹¹Bena hoihoi taudia hanua hanua danu ia taina bae tai, bona bae tai dikadika badina be edia hoihoi kohudia tau ta ese basine hoi loumu - ¹²gold, silver, nadi hururu-hururudia, ageva mai hairaidia, dabua aukadia, dabua mia kakakakadia, silka dabuadia, dabua kakakakadia, boto audia bona au namodia idau-idau dia amo e kara gaudia, au namodia, auri lahora-labora amo e kara gaudia, auri bona nadi amo e kara gaudia, bronze, iron, marble, ¹³cinnamon, spice, incense, myrrh, frankincense, vine ranuna, dehoro, flaoa, uit, boromakau bona mamoe, hosi bona kariota, taunimanima tauanidia bona laumadia. ¹⁴Digara gaudia, laumamu ese e ura henimu gaudia, ese vada e rakatanimu. Taga bona diari gaudia iboudiai ese vada e heautanimumu, bona basio o davaridia loumu. ¹⁵Unu gau e hoiva edia taga e davariva taudia na dauhai bae gini badina ena hisihisi dainai bae gari, bae tai dikadika bae tai lolololo. ¹⁶Baeto, "Madi o, madi o hanua badana dabua aukadia, e hahedokilaiva, mia kakakakadia, bona kakakakadia, bona gold, nadi hururu-hururudia, bona ageva! ¹⁷Hora tamona ai emu taga vada eme ore vaitani." Kada iboudiai kapenadia, guikau taudia iboudiai, hiri taudia, bona davara gaukara dia amo e maurimu taudia, dauhai ai gigini. ¹⁸Bena idouna kwalahuna e itaia e tai lolo. Eto, "Edena be hanua badana idaina?" ¹⁹Bena tano gahuna na kwaradia ai e taho kau, bona e tai, e tai lolololo, eto, "Madi o, madi o hanua badana edena taga ese lagatoi e hatagadia. Badina hora tamoni vada eme ore vaitani." ²⁰Guba e, ena vahu ba moalelaia, bona helaga taumui, aposetolo taumui bona peroveta taumui, badina be umui daimui ai Dirava ese davana vada eme henia! ²¹Bena aneru goadana ta ese nadi-huro badana ta e abia isi davara ai e taho dobi, eto, "Babulonia, hanua badana, unu bae taho dobi toma, Bena basine hedinari lou. ²²Gitara e hataimu, ane e lada isimu taudia, ivilikou e hataimu, bona kibi e hiririmu taudia, Oi lalomu ai basie e kamoni dia lou. Gaukara namodia mai dibadia taudia, oi lalomu ai basie noho lou, Uit ibidina nadina regena na Oi lalomu ai basie kamoni lou. ²³Lamepa diarina na Oi lalomu ai basine hururu lou. Headava matamata tauna bona hahinena eredia oi lalomui ai Oi lalomu ai basie e kamoni lou, Badina be emu hoihoi taudia na tanobada lohiadia ai ela, Badina babalau kara dia ese bese iboudiai e koidia. ²⁴Peroveta taudia raradia, Bona Helaga taudia raradia, ia lalonai e davaridia, Bona tanobada ai e aladia mase taudia iboudia raradia ia lalonai e davari. Translation done by: Mr. Davai Heni Lohia on Monday (28/08/23), time 8.00am. Ready for quality checking.

19 ¹Unu gaudia muridia ai hutuma bada guba a eredia na kamoni gado badana ta na heto, eto, "Aleluia. hahemaori, hairai, bona siahuna na iseda Dirava enai mimia. ²Badina be ena hahemaoro na momo-mokakani bona mamaoro-mamaoro, badina be ia ese ariara hahinena badana vada e hahemaoro henia daika be ena heuda-hanai amo tanobada e hadikai hahinena bunai. Dirava ena hesiai taudia raradia davana eabi imana amo. ³Bena idia na ma nega iharuana e hereva eto: "Aleluia! Ena amo kwalahu e dae hanaihanaimu." ⁴Bena heitatao taudia ruahua-haniosi bona mauri gaudia haniosi e goru diho, eto, "Amen, Aleluia!" ⁵Bena terona amo gado ta e lasi eto, "Dirava ena hesiai taumui e, Kikina bona badana. ⁶Bena hutuma bada eredia na kamoni gado badana ta na heheto, bona sinavai momo ranudia regedia bona guba rahu regedia na heheto, eto, "Aleluia! Lohiabada eda Dirava siahuna idoinai Diravana ia Lohia. ⁷Aita moale bona aita hisi dae bona ia mo aita imodaia badina be Mamoe Natuna ena headava negana vada eme gini dae, bona adavana vada e hegaegae vaitani. ⁸Ena dabua aukadia vada e hadokilai goevagoeva bona kuroka-kurokadia" (badina be hari dabua aukadia na helaga taudia edia kara maoromaoro). ⁹Bena aneru ese e hamaorogu eto, "Ina atorea: Mamoe Natuna ena headava anibounai e vavedia taudia be nanamo." ma e hamaorogu eto, "Ini na Dirava ena hereva momokanidia." ¹⁰Bena aena badina ai na goru diho baina toma henia diho nato, a ia ese e gwaugu tao eto, "Ene asio kara toma! lau danu hesiai taugu oi bamomu bona varavaramu Iesu ena hereva e badinaiamu taudia bamodia danu. Dirava ba toma henia diho. ¹¹Bena guba na itaia e hekeho, bona hosi kuroka-kurokana ta e hedinari. Latanai e gui tauna ladana na Abidadama, bona momokani, bona ia na kara maoro-maoro ai e hahemaoromu bona e tuarimu. ¹²Ia matana na e kara lahi hururu-hururuna na heto, bona kwarana ai na havava gaudia momo. Ia enai lada ta e torea a e torea herevana ta asi dibana ia mo sibona. ¹³Ia na rara ai e urua diho dabuana e hahedokilaia, bona ladana e hatoa Dirava ena hereva. ¹⁴Guba ena tuari oreadia na ia murinai ela hosi kurokurodia ai e gini, daba aukadia goevagoevadia bona kuroka-kurokadia e hahedokilai. ¹⁵Uduna amo dare mai ganona e lasi, unu amo bese idau idau ibotalaidia, bona ia ese auri itotohina amo baine regudia. Siahuna idoinai Diravana ena badu garagara vinena gabuna ai baine moidia tao, ¹⁶Ena dabua ai bona mamuna ai lada ta e torea "Pavapava edia Pavapava bona Lohia edia Lohia." ¹⁷Bena aneru ta na itaia dina lalonai ai e gini guba padanai e

rohomu manudia iboudiai gadobada badana ai e lolo lasi henidia eto, "Aoma, Dirava ena anibou badana ai ame hegogo,¹⁸ unu amo Pavapava hidihodia, tuari baigudia hidihodia, goada taudia hidihodia, hosi hidihodia bona hosi ai e guimu taudia hidihodia, bona taunimanima iboudiai hidihodia, ura kwalimu taudia bona e guidia taudia, bona kikina badana hidihodia bavani."¹⁹Bena dagedage gauna, bona hanua pavapavadia mai edia tuari oreadia ida na itadia, e hegogo hari hosi ai e gui tauna bona ena ore aida bae tuari henidia.²⁰Bena dagedage gauna eabi mauri, bona peroveta koikoina hoa karadia dagedage gauna vairanai e kara dainai, dagedage gauna toana eabi bona laulauna e toma henia diho. Taudia e koidia danu e abia mauri idia raruosi na mauridia ai lahi gohuna teio e aramu gabuna lalonai e tahodia dobi.²¹A oreadia na hosi ai e gui tauna, uduna amo e lasi, darena ese e aladia mase, bona manu iboudiai ese hidihodia e ani bogadia e kunu.RDK. LOHIA KOHU ESE E HAGUGURUA. (21/07/24), 11.58 PM

20¹Bena aneru ta na itaia guba amo e diho. Guri dobu masemasena, Key na bona auri gadeana badana ta na ia imanai.²Ia ese huala, idau negai gaigaina, gauna diabololo, eiava satani, e dabaia tao bona e guia badina be lagani daha ta baine noho.³Bena ia ese guri dobu masemasena lalonai e tahoa dobi, bona e koua bona ikouna toana latanai e karaia hanai, una dainai ia ese bese idau dau basine koidia e lou ela bona lagani daha ta bae ore. Una murinai, ia na do ma ba ruhaia nega kwadogina mo.⁴Bena terona haida na itadia. Latadia ai e helai kau-taudia laumadia daidia be kwaradia e utu oho taudia badina be Iesu ena hereva bona Dirava ena hereva, e gwaurai hedinarai dainai, bona daidia be dagedage gauna eiava mai laulauna ida asie tomadiho henidia bona toana bagudia ai eiava imadia ai asie abi-bona hahemaoro na idia e henia. Idia na e mauri lou, bona Keriso ida eha lohia lagani daha ta.⁵(A mase taudia oredia asie mauri lou ela bona lagani daha ta e ore.)⁶Ina toreisi lou ginigunana lalonai ahuna eabiamu tauna na namo bona helaga! Ini gau e ore mase iharuana na asi siahuna, A Dirava ena hahelaga taudia bona Keriso, ena hahelaga taudia ai baela bona ia ida bae halohia ela bona lagani daha ta.⁷A unu lagani daha ta bae ore, Satana na ena igui amo bae ruhaia nege.⁸Ia na baine lasi tanobada daigunidia haniosi lalodia e nohomu besedia baine koidia - Gog bona Magog - baine gogodia tuari dainai. Ihagaudia na davara konena mirina na heto.⁹Idia na e dae ela tanobada lababana bona hahelaga taudia edia taruha bona e lalokau heniamu hanuana e daidia hegege. A lahi na guba amo e diho bona e habuadia tari.¹⁰Bena Diabololo, e koidia tauna, na lahi bona tei gohuna, lalonai e tahoa dobi unuseni ai dagedage gauna bona peroveta koikoina e tahodia dobi guna gabuna. Idia na bae hisihisi boi bona bae hisihisi rani ela bona hanaihanai.¹¹Bena terona kurokurona badana ta na itaia bona e helai kau Diravana danu, Tanobada bona guba na ia vairana amo e puki, to edia gabu ta asie davaria.¹²Bena mase taudia - Kikina bona badana - na itadia terona vairanai gigini, bona bukadia e kehodia. Bena buka ta ma e kehoa, edena be mauri bukana. Mase taudia na e hahemaoro henidia e kara gaudia bukadia ai e tore, edia kara hegeregeregia.¹³Bona davara ai e mase taudia na davara ese e henidia dae, bona idia danu edia kara hegeregeregia e hahemaoro henidia.¹⁴Bena mase bona mase gabuna lahi gohuna lalonai e tahodia dobi. Ina na mase iharuna - lahi gohuna.¹⁵Bema tau ta mauri bukana lalonai ladana se davaria sehetore ia na lahi gohuna lalonai bae tahoa dobi.RDK. LOHIA KOHU ESE E HAGUGURUA, HORANA: 3.08 AM, DINANA: FRIDAY (19/07/24)

21

¹Bena guba matamatana bona tanobada gunana na vada e puki oho, bona davara danu lasihia. ²Bona hanua helagana, Ieruselema matamatana, na itaia guba amo e diho Dirava ena amo, be headava ulatona na heto e haheia adavana ena.³Bena gado badana ta na kamoni terona amo ema eto, "Aitaia! Dirava ena noho gabuna na taunmanima dekedekediai, bona ia na bogaragidiai baine noho. Idia na iena bese ai baela, bona Dirava sibona na idia ida. ⁴Ia ese iruru-matadia iboudiai matadia amo baine dahu oho, bona mase bae ore, eiava daradoko, eiava taitai, eiava hisihisi. Idia na basine noho dau dau badina be gou gaudia vada e puki.⁵Bena terona ai e helaimu Diravana eto, "Aitaia! lau ese gau iboudiai baina hematamatadia." Ia ese ma e hamaorogu eto, "A torea diho badina be ini hereva na mamaoro-mamaoro bona momokani." ⁶Ia ese ma e hamaorogu eto, "Ini gau na vada e hekara! lau na Alefa bona Omega, matamana bona dokona. Ranu mase tauna na e lohiloheia daemu mauri ranuna baina henia asi davana.⁷A kwalimu tauna ahuna binai, bona lau na ena Dirava ai bainala bona ia na lau natugu ai bainela. ⁸A gari taudia, asie kamoni taudia, kara bodaga taudia, ala-ala taudia, babalau taudia, kaivakuku e toma henidia diho taudia bona koikoi taudia, iboudiai ahudia na lahi bona teio gohuna. Una na mase iharuana buna.⁹Bena aneru hituosi hari kibo hituosi lalodiai hahehisi gobedia hituosi eabi anerudia ta ema, bona e hereva henigu, eto, ini aoma headava matamatana hahinena, Mamoe Natuna adavana baina haheitalaimu." ¹⁰Bena lauma ai e laohaigu ororo badana ta bona dorina ai bona hanua helagana Ieruselema e haheitalaigu guba amo e diho Dirava ena amo.¹¹Ia hairaina na Dirava hairaina, bona diarina na nadi hururu-hururu davana bada gauna na heto - iaspi nadina na heto e negari-negari. ¹²Ia na bada, habana lababana na bada ikoukouna na gwauta rua, ikoukou badidiai na aneru gwauta-raru. Ikoukou daediai Isaraela iduhudia gwauta raruosi ladadia e tore. ¹³Laurabada kahana ai ikoukou toi, mirigini kahana ai toi, diho kahana ai toi, bona lahara kahana ai danu toi.¹⁴Bona habana badina nadidia na gwauta rua, bona latadia ai Mamoe Natuna ena aposetolo taudia gwauta raruosi ladadia e tore. ¹⁵Bena hari e hereva henigu aneru imana na hahetoho gauna ta gold amo e karaia gauna hanua e hahetohoa, ikoukoudia bona habana.¹⁶Hanua na e hadaia kaha haniosi hegeregere, roha-maorona bona lababana na hegeregere. Ia ese ena hahetoho gauna amo hanua e hahetohoa, maela daha gwauta rua roha-maorona (roha-maorona, lababana, bona harana-latana vada hegeregere.) ¹⁷Ia ese habana danu e hahetohoa, roha hari-ahui taurahani taunimanima hahetohona (aneru edia hahetoho amo).¹⁸Habana be iaspi nadina amo e larebaia bona hanua na gold hereadaena, to e negari-negari.

¹⁹Hanua habana badina nadidia na nadi hururu-hururudia e haheralaidia. Gini-gunana na iaspi nadina, iharuana na sapairo, ihatoina na kalakede, ihahanina na samarago, ²⁰ihaimana na sodonu, ihatauratoina na sedio, ihahituna na krusolito, ihataurahanina na berulio, ihataurahani-tana na tapasio, ihagwautana na krusoparaso, ihagwauta-tana na huakinto, ihagwauta ruana na ametuso. ²¹Bona ikoukoudia gwauta ruaosi na agevadia mai hairaidia ikoukoudia ta ageva mai hairaina ta. A hanua vairana ariarana na gold, negari-negari. ²²Hari hanua lalonai dubu ta asina itaia, badina be Lohiabada Siahu idoinai Diravana bona Mamoe Natuna na una hanua dubuna. ²³Dina bona hua danu lasi una hanua asie raraia badina be Dirava hairiana ese e hadiaria, bona ena lamepa na Mamoe Natuna. ²⁴Bese idauida na una hanua ena diari ai bae raka, bona tanobada pavapavadia ese hairiaidia bae rakalai vareai. ²⁵Dina ai ikoukoudia na basie kou, bona hanuaboi na lasi unuseni ai. ²⁶Bese idauida na una hanua ena hairiaidia bona hematauraidia bae rakalai vareai. ²⁷A hahedika gauna ta eiava lebulebu tauna eiava koikoi tauna unuseni ai basie raka vareai a Mamoe Natuna ena mauri bukana ai ladadia e tore taudia mo.RDK. LOHIA KOHU ESE E HAGUGURUA, HORANA: 2.08 AM, DINANA: FRIDAY (21/07/24)

22

¹Bena aneru ese mauri ranuna sinavaina negari-negarina e. Ia na Dirava bona Mamoe Natuna edia terona amo e lasi.

²Hanua bogaragina amo e arua parara. Sinavai kahana kahana mauri auna e gini, huahua na idau idau, bona hua ta ta ai mai huahua dia. Au rau na ese bese idau idau e hamauridiamu. ³Bona hahedika na basine vara lou. Dirava ena terona bona Mamoe Natuna edia terona na hanua lalonai, bona ena hesiai taudia danu bae toma henia diho. ⁴Idia ese ia vairana ba itaia, bona ladana na bagudia ai baine e hetore. ⁵Hanua na basine boi lou; idia na lamepa diarina basie abia eiava dina diarina badina be Lohiabada Dirava ese baine hadiaridia. Idia na bae lohia hanaihanai. ⁶Aneru ese e hereva henigu eto, "Ini hereva na mamaoro-mamoro bona momo-mokani. Lohiabada, peroveta taudia laumadia edia Dirava, ese ena aneru vada e siaia asi vanahana bae vara gaudia na ena hesiai taudia baine haheitalaidia." ⁷"Ba heita! Lau na bavasimu! Ina buka e gwaaurai gunamu herevadia e badinamu tauna na namo. ⁸Lau, Ioane, ini gau na kamoni bona na itadia. Na kamoni bona na itadia, na goru diho bena ini gau e haheitalaigu aneruna aena badinai baina toma henia diho nato. ⁹Bena e gwaugu tao eto, "Ene basio kara toma! Lau na hesiai taugu oi ida, bona tadikakamu peroveta taudia bamodia, bona ina buka herevadia e badinamu taudia bamodia. Dirava ba toma henia diho!" ¹⁰Ma e hamaorogu eto, "Ina buka ena peroveta herevadia basio kou ahu, badina negana vada eme kahikahi. ¹¹Kara dika tauna do baine kara dika, lebulebu tauna do baine lebulebu, kara maoromaoro tauna do baine maoromaoro. Helaga tauna do baine helaga. ¹²"Ba heita! lau na ba vasimu. Dava na imagu ai, taunimanima iboudiai edia kara heregeredia davadia baina henidia. ¹³Lau na Alefa bona Omega, gini-gunana bona gini-gabena, matamana bona dokona. ¹⁴Edia dabua e huri taudia be nanamo badina be idia ese mauri auna bae lao henia bona iduara amo hanua lalonai bae raka vareai diba. ¹⁵A murimuri ai be sisia bona babalau taudia, heuda-hanai taudia, ala-ala taudia, kaivakuku taudia, bona e toma henidia dihomu taudia, bona koikoi herevadia igwauraidia e moalelaimu taudia. ¹⁶Lau, Iesu, ese egu aneru vada na siaia vasi ekalesia oreadia herevadia vada e vasilai. Lau na Davida ramuna bona tuhutuhuna, daba hisiuna mai diarigu. ¹⁷Lauma bona headava matamata hahinena e tomamu, "Aoma!" E kamonaimu tauna danu baineto, "Aoma!" Ranu mase tauna, na bainema, bona ranu e uramu tauna, ese mauri ranuna baine inua asi davana. ¹⁸Ina buka ena peroveta herevadia e kamonaimu taudia iboudiai na sisiba henidiamu: Bema tau ta ese ini hereva latadi ai hereva ta baine atoa kau, Dirava ese ina buka lalonai e tore hisihisidia na ia latanai baine atoa kau. ¹⁹Bema ta ese hereva ta ina peroveta bukana amo baine abia oho, Dirava ese ia ahuna mauri auna enai bona hanua helagana lalonai ina buka ai haridia e tore ahudia na iena amo baine abi oho. ²⁰Bena aneru ese mauri ranuna sinavaina negari-negarina e. Ia na Dirava bona Mamoe Natuna edia terona amo e lasi. ²¹Hanua bogaragina amo e arua parara. Sinavai kahana kahana mauri auna e gini, huahua na idau idau, bona hua ta ta ai mai huahua dia. Au rau na ese bese idau idau e hamauridiamu.Rev. Eiwana Zacharias ese e hagugurua, dinana: 20/07/24, Time: 6.30 pm.